

瑜伽師地論科句披尋記卷第二十一

彌勒菩薩說

唐三藏沙門玄奘奉詔譯

韓清淨科記

本地分中聲聞地第十三初瑜伽處種性地品第一

丙十、聲聞地<sup>3</sup> 丁一、結前生後

如是已說修所成地。云何聲聞地？

丁二、正廣分別<sup>2</sup> 戊一、總標一切

一切聲聞地總嚕柁南曰：

若略說此地 性等數取趣 如應而安立 世間出世間

此地略有三 謂種性趣入 及出離想地 是說為聲聞

戊二、別辨一一<sup>3</sup> 己一、種性地<sup>3</sup> 庚一、徵

云何種性地？

庚二、標<sup>2</sup> 辛一、塢陀南

塢陀南曰：

若略說一切 種性地應知 謂自性安立 諸相數取趣

辛二、長行

謂若種性自性、若種性安立、若住種性者所有諸相、若住種性補特伽羅，如是一切總略為一，名種性地。

庚三、釋<sup>4</sup> 辛一、自性<sup>3</sup> 壬一、徵

云何種性？

壬二、釋<sup>2</sup> 癸一、辨相

謂住種性補特伽羅，有種子法。由現有故，安住種性補特伽羅，若遇勝緣，便有堪任、便有勢力，於其涅槃能得能證。

謂住種性補特伽羅有種子法者：意地中說：此一切種子識，若般涅槃法者，一切種子皆悉具足；不般涅槃法者，便闕三種菩提種子。（陵本二

卷一頁<sup>101</sup>）由此當知，此種子法，謂聲聞菩提種子；由附所依有此種子法故，名住聲聞種性補特伽羅。未遇生緣，安住自性無有變異，亦無失壞，故名為住。

癸二、問答<sup>2</sup> 子一、異名

問：此種性名有何差別？答：或名種子，或名為界，或名為性，是名差別。

子二、體性

問：今此種性以何為體？答：附在所依，有如是相，六處所攝。從無始世展轉傳來，法爾所得。於此立有差別之名，所謂種性、種子、界、性。

壬三、結

是名種性。

附在所依等者：此中所依，謂有識身。攝大乘論說：出世心從最清淨法界等流正聞熏習種子所生。此聞熏習，隨在一種所依轉處，寄在異熟識中，與彼和合俱轉，猶如水乳。（攝論一卷十四頁）如是應知，附所依義。又

如下說：住種性者所有諸相，謂與一切無涅槃法補特伽羅諸相相違，當知即名安住種性補特伽羅所有諸相。今指彼相違相，說有如是相言。又如下說：如是種子，非於六處有別異相，即於如是種類、分位、六處殊勝，是故此說六處所攝。又此種性，非無般涅槃法補特伽羅熏習可有。若許爾者，應不建立有無種性二種差別。然實不爾。即由是義，說住種性補特伽羅有種子性，從無始世展轉傳來，法爾所得。

辛二、安立<sup>2</sup> 壬一、釋<sup>2</sup> 癸一、正辨相<sup>2</sup> 子一、辨麤細<sup>2</sup> 丑一、問

云何種性安立？謂應問言：今此種性，為當言細？為當言麤？

丑二、答<sup>3</sup> 寅一、標

應答言：細。

寅二、徵

何以故？

寅三、釋

由此種子未能與果、未習成果，故名為細。若已與果、已習成果，爾時種性若種、若果，俱說名麤。

由此種子未能與果等者：菩薩地說：種性有二。一、本性住種性，二、習所成種性。今約最初，名未能與果；約彼第二，名未習成果。即於此位，由未有果，此種子相難可現見，故名為細。與此相違，由與果俱，是故種、果俱說名麤。

子二、辨一多<sup>2</sup> 丑一、問

問：如是種性，當言墮一相續？墮多相續？

墮一相續墮多相續者：相續有四。一、自身相續，二、他身相續，三、諸根相續，四、境界相續。如攝事分說。（陵本二百卷十五頁<sup>7510</sup>）今此義中，唯約諸根相續為論。由前已說六處所攝，故作是問：如是種性，墮一？墮多？

丑二、答<sup>3</sup> 寅一、標

答：當言墮一相續。

當言墮一相續者：此中義顯，唯墮意處，故言墮一相續。攝大乘說：寄在異熟識中。彼異熟識，意處攝故。

寅二、徵

所以者何？

寅三、釋<sup>2</sup>

卯一、反顯

若法異相，俱有而轉；見彼各別種種相續、種種流轉。

卯二、正成

如是種子，非於六處有別異相。

若法異相俱有而轉等者：如說：眼等六識是識自性差別；又說：眼等六觸、六受、六想、六思，是名觸、受、想、思自性差別。如是等類，雖依眼等六處而生，然非是一，名法異相。能依所依，同生住滅，是名俱有而轉。由是見彼六處，各別為依，及彼諸法差別生起，是名見彼各別種種相

續，種種流轉。若如是者，彼六處攝心心所法，應可說言墮多相續；種子不爾，非於六處有別異相，非彼六處俱有而轉，不見各別種種相續為依，及彼差別種種流轉，故不應言，墮多相續。

即於如是種類、分位、六處殊勝，從無始世展轉傳來，法爾所得，有如是想及以言說，謂為種性、種子、界、性，是故當言墮一相續。

即於如是種類分位六處殊勝等者：有涅槃法補特伽羅，是名種類。安住種性位中，是名分位。彼所有相，與一切無涅槃法補特伽羅諸相相違，是名六處殊勝。依如是義，假想安立諸差別名，謂為種性、種子、界、性。非析諸行別有實物名為種子，亦非餘處；然即諸行如是種性，如是等生，如是安布，名為種子。如決擇分說。（陵本五十二卷十五頁<sup>4198</sup>）由是當知，種子非於六處有別異相，是故當言墮一相續。

癸二、廣眾緣<sup>2</sup> 子一、違緣<sup>2</sup> 丑一、問

問：若住種性補特伽羅有涅槃法，此住種性有涅槃法補特伽羅，何因緣故有

涅槃法，而前際來長時流轉，不般涅槃？

丑二、答<sup>5</sup> 寅一、標

答：四因緣故，不般涅槃。

寅二、徵

何等為四？

寅三、列

一、生無暇故；二、放逸過故；三、邪解行故；四、有障過故。

寅四、釋<sup>4</sup> 卯一、生無暇<sup>3</sup> 辰一、徵

云何生無暇？

辰二、釋

謂如有一，生於邊國及以達須、蔑戾車中，四眾、賢良、正至、善士不往遊涉。

辰三、結



是名生無暇。

四眾賢良正至善士不往遊涉者：謂苾芻、苾芻尼、近事男、近事女，是名四眾。一切賢聖，是名賢良。已趣各別煩惱寂靜，是名正至。百行所攝，受諸律儀，是名善士。

卯二、放逸過<sup>3</sup> 辰一、徵

云何放逸過？

辰二、釋

謂如有一，雖生中國，又非達須、非蔑戾車，四眾、賢良、正至、善士皆往遊涉；而生貴家，財寶具足，於諸妙欲耽著受用，不見過患，不知出離。

辰三、結

是名放逸過。

卯三、邪解行<sup>3</sup> 辰一、徵

云何邪解行？

辰二、釋<sup>2</sup> 巳一、出惡見<sup>2</sup> 午一、標

謂如有一，雖生中國，乃至廣說；而有外道種種惡見。

午二、釋

謂起如是見，立如是論：無有施與，廣說乃至我自了知無諸後有。

無有施與等者：撥無施與、愛養、祠祀；撥無妙行、惡行，及彼二業果及異熟。如有尋有伺地說。（陵本八卷十四頁<sup>612</sup>）此中廣說乃至無諸後有，隨應當知。

巳二、明過患

復由如是外道見故，不值諸佛出現世間，無諸善友說正法者。

辰三、結

是名邪解行。

無諸善友說正法者者：具八因緣，名善友性。宣說初時所作無倒言論，及與超勝四種聖諦相應言論，是名善說正法。如下自說，別釋其相應知。

(陵本二十五卷一頁  
2069)

卯四、有障過<sup>3</sup> 辰一、徵

云何有障過？

辰二、釋<sup>3</sup> 巳一、異熟障

謂如有一，雖生中國，廣說如前，亦值諸佛出現於世，遇諸善友說正法者；而性愚鈍，頑駭無知，又復瘡痂，以手代言，無力能了善說、惡說所有法義。

巳二、業障

或復造作諸無間業。

巳三、煩惱障

或復長時起諸煩惱。

辰三、結

是名有障過。

云何有障過等者：此說重障，略有三種。謂異熟障、業障、煩惱障。異熟障者，謂若生處，聖道依彼不生不長，於是生處異熟果生；或有生處，聖道依彼雖得生長，而於其中異熟果生，聾駘愚鈍，盲瞽瘡痂，以手代言，無有力能解了善說、惡說法義；是名異熟障。言業障者，謂五無間業，及餘所有故思造業諸尤重業。彼異熟果若成熟時，能障正道，令不生起，是名業障。煩惱障者，謂猛利煩惱、長時煩惱。由此煩惱，於現法中，以其種種淨行所緣不能令淨，是名煩惱障。如下自說。（陵本二十九卷十五頁<sup>2453</sup>）此說有障，其義應知。

寅五、結<sup>2</sup> 卯一、正顯有種性<sup>2</sup> 辰一、不般涅槃

如是名為四種因緣。由此因緣故，雖有般涅槃法，而不般涅槃。

辰二、得般涅槃

彼若值遇諸佛出世，聽聞正法，獲得隨順教授教誡，無彼因緣，爾時方能善根成熟，漸次乃至得般涅槃。

卯二、兼明無種性

無涅槃法補特伽羅，住決定聚。彼若遇緣、若不遇緣，遍一切種，畢竟不能得般涅槃。

無涅槃法補特伽羅住決定聚等者：住無種性補特伽羅，乃至盡未來際，生死流轉無有止息，是名住決定聚。由此義故，彼若值遇諸佛出世，聽聞正法，獲得隨順教授教誡為增上緣；若不值遇；遍於一切界趣生中，彼彼有情畢竟不能得般涅槃。

子二、順緣<sup>2</sup> 丑一、問

問：何等名為涅槃法緣，而言闕故、無故、不會遇故，不般涅槃？

丑二、答<sup>4</sup> 寅一、標

答：有二種緣。

寅二、徵

何等為二？

寅三、列

一、勝，二、劣。

寅四、釋<sup>2</sup> 卯一、辨二相<sup>2</sup> 辰一、勝緣<sup>2</sup> 巳一、徵

云何勝緣？

巳二、列

謂正法增上他音，及內如理作意。

謂正法增上他音等者：聞他宣說超勝四聖諦法言音，是名正法增上他音。

由此為依，發生自內如理所引作意，名內如理作意。

辰二、劣緣<sup>4</sup> 巳一、徵

云何劣緣？

巳二、標

謂此劣緣乃有多種。

巳三、列

謂若自圓滿、若他圓滿、若善法欲、若正出家、若戒律儀、若根律儀、若於食知量、若初夜後夜常勤修習恬寤瑜伽、若正知而住、若樂遠離、若清淨諸蓋、若依三摩地。

巳四、釋<sup>12</sup> 午一、自圓滿<sup>4</sup> 未一、徵

云何自圓滿？

未二、列

謂善得人身，生於聖處，諸根無闕，勝處淨信，離諸業障。

未三、釋<sup>5</sup> 申一、善得人身<sup>3</sup> 酉一、徵

云何名為善得人身？

酉二、釋

謂如有一，生人同分，得丈夫身，男根成就，或得女身。

酉三、結

如是名為善得人身。

申二、生於聖處<sup>3</sup> 酉一、徵

云何名為生於聖處？

酉二、釋

謂如有一，生於中國，廣說如前，乃至善士皆往遊涉。

酉三、結

如是名為生於聖處。

申三、諸根無闕<sup>3</sup> 酉一、徵

云何名為諸根無闕？

酉二、釋

謂如有一，性不愚鈍，亦不頑駮，又不瘡瘡，乃至廣說支節無減。彼由如是支節無闕、耳無闕等，能於善品精勤修集。

酉三、結

如是名為諸根無闕。



性不愚鈍等者：由不愚鈍、頑駭、瘡癰，有力能了善說、惡說所有法義，此顯意根無闕。又不聾瞽，乃至支節無減，此顯耳等諸根無闕。由是能於正法受持讀誦；及於尊長修和敬業，參觀承事；乃至廣說於諸善品加行處所，皆能成就軌則。如下戒律儀說。（陵本二十二卷四頁<sup>1899</sup>）是名能於善品精勤修集。

申四、勝處淨信<sup>2</sup> 酉一、徵

云何名為勝處淨信？

酉二、釋<sup>2</sup> 戌一、標相

謂如有一，於諸如來正覺所說法毗奈耶，得淨信心，如是名為勝處淨信。

戌二、釋名<sup>2</sup> 亥一、勝處

言勝處者，謂諸如來正覺所說法毗奈耶，能生一切世出世間白淨法故。

亥二、淨信

此中所起前行增上諸清淨信，名勝處淨信，能除一切所有煩惱垢穢濁故。

此中所起前行增上諸清淨信等者：謂於三寶起清淨信，與世出世諸白淨法，為其先導，隨順證得，是名所起前行增上諸清淨信。由此能除一切所有煩惱。此中一切，謂於三寶處所。煩惱，謂即無明、見、疑。自性染汙，故名為垢；起邪決定，故名為穢；令不決定，故名為濁。

申五、離諸業障<sup>4</sup> 酉一、徵

云何名為離諸業障？

酉二、標

謂能遠離五無間業。

酉三、列

所謂於被害母、害父、害阿羅漢、破和合僧、於如來所惡心出血。

酉四、釋<sup>2</sup> 戌一、名離障

隨一所有無間業障，於現法中不作不行，如是名為離諸業障。

謂能遠離五無間業等者：此中且說五無間業已能遠離，名離業障；然復當

知，彼同分業亦非不離。有尋有伺地說：由彼事重，俱受現法果故。（陵本九卷二頁<sup>641</sup>）又下自說：五無間業，及餘所有故思造業諸尤重業。彼異熟果若成熟時，能障正道，令不生起，是名業障故。（陵本二十九卷十五頁<sup>2453</sup>）於現法中，彼無間業無身語意造作相轉，是名不作。不起身行、語行、意行，是名不行。

戊二、顯障義

若有於此五無間業造作增長，於現法中竟不能轉、得般涅槃、生起聖道。故約彼說離諸業障。

於現法中竟不能轉得般涅槃生起聖道者：由無間業，於現法中造作增長，即於現法當受其果，是故此說於現法中竟不能轉、得般涅槃、生起聖道。謂由聖道能般涅槃，是名得般涅槃、生起聖道。障不令生，名不能轉。

未四、結

唯由如是五種支分，自體圓滿，是故說此名自圓滿。

午二、他圓滿<sup>3</sup> 未一、徵

云何他圓滿？

未二、列

謂諸佛出世，說正法教，法教久住，法住隨轉，他所哀愍。

未三、釋<sup>5</sup> 申一、諸佛出世<sup>2</sup> 酉一、徵

云何名為諸佛出世？

酉二、釋<sup>2</sup> 戌一、明出世相

謂如有一，普於一切諸有情類，起善利益增上意樂，修習多千難行苦行，經三大劫阿僧企耶，積集廣大福德、智慧二種資糧，獲得最後上妙之身，安坐無上勝菩提座，斷除五蓋，於四念住善住其心，修三十七菩提分法，現證無上正等菩提。如是名為諸佛出世。

戌二、顯諸佛同

過去、未來、現在諸佛，皆由如是名為出世。

申二、說正法教<sup>2</sup> 酉一、徵

云何名為說正法教？

酉二、釋<sup>2</sup> 戌一、正辨相<sup>3</sup> 亥一、標

謂即如是諸佛世尊出現於世，哀愍一切諸聲聞故，依四聖諦，宣說真實苦集滅道無量法教。

亥二、列

所謂契經、應頌、記別、諷誦、自說、因緣、譬喻、本事、本生、方廣、希法、論議。

亥三、結

如是名為說正法教。

戌二、釋得名

諸佛世尊及聖弟子，一切正士皆乘此法而得出離，然後為他宣說稱讚，是故說此名為正法。宣說此故，名正法教。

申三、法教久住<sup>2</sup> 酉一、徵

云何名為法教久住？

酉二、釋<sup>2</sup> 戌一、正辨相

謂說正法已，轉法輪已，

轉法輪已者：攝事分說：世尊轉所解法，置於阿若憍陳身中，此復隨轉置餘身中，彼復隨轉置餘身中。以是展轉隨轉義故，說名為輪。正見等法所成性故，說名法輪。（陵本九十五卷十二頁<sup>7155</sup>）此轉法輪，如義應知。

乃至世尊壽量久住，及涅槃後。經爾所時，正行未滅、正法未隱，如是名為正法久住。

正行未滅正法未隱者：此中正行，謂即行法；正法，謂即教法。攝事分說：略有二種像似正法。一、似教正法，二、似行正法。（陵本九十九卷十五頁<sup>7444</sup>）若於爾時，無彼二種像似正法顯現，是名正行未滅、正法未隱。

戌二、明說意

如是久住，當知說彼勝義正法作證道理。

當知說彼勝義正法作證道理者：決擇分說：諸佛聖教若欲略釋，由六種理門應隨決了。一、真義理門，二、證得理門，三、教導理門，四、遠離二邊理門，五、不可思議理門，六、意趣理門。（陵本六十四卷四頁<sup>5085</sup>）彼說證得理門，即此作證道理。於證得中復有四種。一、諸有情業果證得，二、聲聞乘證得，三、獨覺乘證得，四、大乘證得。當知最初唯是世間，為簡彼故，唯取後三，是故說言勝義正法作證道理。言道理者，謂如實性、離顛倒性。若此勝義正法作證道理未滅、未隱，即此正法名為久住。

申四、法住隨轉<sup>3</sup> 酉一、徵

云何名為法住隨轉？

酉二、釋

謂即如是證正法者，了知有力能證如是正法眾生，即如所證，隨轉隨順教授

教誡。

酉三、結

如是名為法住隨轉。

申五、他所哀愍<sup>3</sup> 酉一、徵

云何名為他所哀愍？

酉二、釋

他謂施主。彼於行者起哀愍心，惠施隨順淨命資具，所謂如法衣服、飲食、諸坐臥具、病緣醫藥。

酉三、結

如是名為他所哀愍。

午三、善法欲<sup>3</sup> 未一、徵

云何善法欲？

未二、釋<sup>2</sup> 申一、出因緣



謂如有一，或從佛所、或弟子所，聞正法已，獲得淨信。

申二、正辨相

得淨信已，應如是學：在家煩擾，若居塵宇，出家閑曠，猶處虛空，是故我今應捨一切妻子眷屬、財穀珍寶，於善說法毗奈耶中，正捨家法，趣於非家。

正捨家法趣於非家者：在家位中，於諸妻室有婬欲相應貪，於餘親屬及諸財寶有受用相應愛，正捨此故，是名正捨家法。趣求出離一切惡不善法，是名趣於非家。

既出家已，勤修正行，令得圓滿。

未三、結

於善法中生如是欲，名善法欲。

既出家已勤修正行令得圓滿等者：調伏自心所有煩惱，名修正行。證得真實圓滿解脫，名得圓滿。於如是事信解愛樂，名善法欲。

午四、正出家<sup>3</sup> 未一、徵

云何正出家？

未二、釋

謂即由此勝善法欲增上力故，白四羯磨，受具足戒；或受勞策所學尸羅。

未三、結

是名正出家。

午五、戒律儀<sup>3</sup> 未一、徵

云何戒律儀？

未二、釋

謂彼如是正出家已，安住具戒，堅牢防護別解律儀，軌則、所行皆得圓滿，於微小罪見大怖畏，受學一切所有學處。

未三、結

是名戒律儀。

安住具戒等者：如下廣釋應知。（陵本二十二卷二頁1893）

午六、根律儀<sup>3</sup> 未一、徵

云何根律儀？

未二、釋<sup>2</sup> 申一、眼根

謂即依此尸羅律儀，守護正念，修常委念，以念防心，行平等位。眼見色已，而不取相，不取隨好。恐依是處，由不修習眼根律儀防護而住，其心漏泄所有貪憂惡不善法。故即於彼修律儀行，防護眼根，依於眼根修律儀行。

申二、餘根

如是行者，耳聞聲已、鼻嗅香已、舌嘗味已、身覺觸已、意了法已，而不取相，不取隨好。恐依是處，由不修習意根律儀防護而住，其心漏泄所有貪憂惡不善法。故即於彼修律儀行，防護意根，依於意根修律儀行。

未三、結

是名根律儀。

守護正念等者：下說防守正念，常委正念，念防護意，行平等位，乃至廣說。如彼廣釋應知。（陵本二十三卷一頁<sup>1943</sup>）

午七、於食知量<sup>3</sup> 未一、徵

云何於食知量？

未二、釋<sup>2</sup> 申一、離欲樂邊

謂彼如是守諸根已，以正思擇食於所食。不為倡蕩、不為憍逸、不為飾好、不為端嚴食於所食。

申二、離自苦邊

然食所食，為身安住、為暫支持、為除饑渴、為攝梵行、為斷故受、為令新受當不更生、為當存養力樂無罪安隱而住。

未三、結

如是名為於食知量。

以正思擇食於所食等者：如下廣釋應知。（陵本二十三卷七頁<sup>1963</sup>）

午八、惛寤瑜伽<sup>3</sup> 未一、徵

云何初夜後夜常勤修習惛寤瑜伽？

未二、釋

謂彼如是食知量已，於晝日分，經行、宴坐二種威儀，從順障法淨修其心；於初夜分，經行、宴坐二種威儀，從順障法淨修其心。過此分已，出住處外，洗濯其足，右脅而臥，重累其足，住光明想、正念、正知、思惟起想。於夜後分，速疾惛寤，經行、宴坐二種威儀，從順障法淨修其心。

未三、結

如是名為初夜後夜常勤修習惛寤瑜伽。

初夜後夜常勤修習惛寤瑜伽等者：謂佛弟子聽聞惛寤瑜伽法已，欲樂修學，便依如是惛寤瑜伽，作如是念：我當成辦佛所聽許惛寤瑜伽。發生樂欲，精進勤劬，超越勇猛勢力發起、勇悍、剛決、不可制伏、策勵其心無間相續。如下自說。（陵本二十四卷一頁<sup>2005</sup>）是名常勤修習惛寤瑜伽。又

彼諸相，下自廣釋應知。

午九、正知而住<sup>3</sup> 未一、徵

云何正知而住？

未二、釋

謂彼如是常勤修習恬寤瑜伽已，若往、若來正知而住，若覩、若瞻正知而住，若屈、若伸正知而住，持僧伽胝及以衣鉢正知而住，若食、若飲、若噉、若嘗正知而住，若行、若住、若坐、若臥正知而住，於恬寤時正知而住，若語、若默正知而住，於解勞睡時正知而住。

未三、結

如是名為正知而住。

若往若來正知而住等者：如下廣釋應知。（陵本二十四卷九頁<sup>2031</sup>）

午十、樂遠離<sup>3</sup> 未一、徵

云何樂遠離？

未二、釋

謂由如是所修善法，無倒修治初業地已，遠離一切臥具貪著，住阿練若、樹下、空室、山谷、峰穴、草積、迴露、塚間、林藪、虛曠平野、邊際臥具。

未三、結

是名樂遠離。

午十一、清淨諸蓋<sup>3</sup> 未一、徵

云何清淨諸蓋？

未二、釋

謂彼如是住阿練若，或復樹下，或空室等，於五種蓋淨修其心。所謂貪欲、瞋恚、昏沈睡眠、掉舉惡作，及以疑蓋。從彼諸蓋淨修心已，心離諸蓋，安住賢善勝三摩地。

未三、結

如是名為清淨諸蓋。

安住賢善勝三摩地者：為欲對治欲貪等故，住三摩地，思惟青瘀等相，是名安住賢善勝三摩地。三摩呬多地說：何故此相說名賢善？諸煩惱中貪最為勝，於諸貪中欲貪為勝，生諸苦故。此相是彼對治所緣，故名賢善。

（陵本十一卷二十二頁<sup>954</sup>）

午十二、依三摩地<sup>3</sup> 未一、徵

云何依三摩地？

未二、釋<sup>4</sup> 申一、住初靜慮

謂彼如是斷五蓋已，便能遠離心隨煩惱。

便能遠離心隨煩惱者：謂即貪欲蓋等。令心擾動，是名心隨煩惱。斷不現行，心得清淨，名遠離彼。

遠離諸欲惡不善法，有尋有伺，離生喜樂；入初靜慮具足安住。

申二、第二靜慮

尋伺寂靜，於內等淨，心一趣性，無尋無伺，定生喜樂；第二靜慮具足安住。



申三、第三靜慮

遠離喜貪，安住捨、念及以正知，身領受樂；聖所宣說，捨、念具足安樂而住；第三靜慮具足安住。

申四、第四靜慮

究竟斷樂，先斷於苦，喜憂俱沒，不苦不樂，捨念清淨；第四靜慮具足安住。

未三、結

如是名為依三摩地。

遠離諸欲惡不善法等者：此四靜慮諸差別相，如下廣釋應知。（陵本三十

三卷九頁<sup>2699</sup>）

卯二、明漸次<sup>2</sup> 辰一、舉諸緣

彼由如是漸次修行，後後轉勝、轉增、轉上，修集諸緣，初自圓滿，依三摩地以為最後。得如是心清淨鮮白，無諸瑕穢，離隨煩惱，質直堪能，安住無動。

得如是心清淨鮮白等者：第四靜慮，捨念清淨，超諸災患，名心清淨鮮白。不為三摩地生愛味、慢、見、疑、無明等諸隨煩惱之所染汙，是名無諸瑕穢，離隨煩惱。遠離誑諂，堪任加行，是名質直堪能。一切動亂皆悉遠離，是名安住無動。

若復獲得依四聖諦，為令遍知、永斷、作證、修習他音教授教誡，為令遍知永斷作證等者：此中遍知，謂於苦諦。永斷，謂於集諦。作證，謂於滅諦。修習，謂於道諦。應知。

便有如是堪能勢力，發生如理所引作意，及彼為先所有正見。

發生如理所引作意等者：謂不增益非真實有，亦不損減諸真實有，是名如理所引作意。如意地說應知。（陵本一卷十一頁<sup>50</sup>）由是能生世間正見。如是正見，加行位起，非無分別，故是世間。

由此便能於四聖諦入真現觀，圓滿解脫，於無餘依般涅槃界而般涅槃。

於四聖諦入真現觀等者：謂能知智與所知境，和合無乖，現前觀察，名真

現觀；此即見道有學解脫。於上修道由數習故，更復證得無學解脫，是名圓滿解脫；此即有餘依涅槃界。從是以後，身任運滅，住無餘依，是名於無餘依般涅槃界而般涅槃。

辰二、顯差別<sup>3</sup> 巳一、真實修集

當知此中始從正見，圓滿解脫，於無餘依般涅槃界而般涅槃，是名種性真實修集。

是名種性真實修集者：修集無漏智慧資糧，是名種性真實修集。無漏慧有三種，謂加行無漏慧、根本無漏慧、後得無漏慧。加行無漏，即世正見。由是此說始從正見，亦名種性真實修集。

巳二、修集劣緣

從自圓滿，乃至最後依三摩地，當知是名修集劣緣。

巳三、修集勝緣

若依四諦法教增上所有教授教誡他音，若如正理所引作意，當知是名修集勝

緣。

壬二、結

如是名為種性安立。

辛三、諸相<sup>3</sup> 壬一、徵

云何住種性者所有諸相？

壬二、釋<sup>2</sup> 癸一、總標相違

謂與一切無涅槃法補特伽羅諸相相違，當知即名安住種性補特伽羅所有諸相。

癸二、別釋諸相<sup>2</sup> 子一、問

問：何等名為無涅槃法補特伽羅所有諸相，成就彼故，應知說名無涅槃法補特伽羅？

子二、答<sup>2</sup> 丑一、標說

答：無涅槃法補特伽羅有眾多相，我今當說彼相少分。

丑二、釋相<sup>6</sup> 寅一、第一無種性相<sup>2</sup> 卯一、釋

謂彼最初不住種性無涅槃法補特伽羅，阿賴耶愛，遍一切種皆悉隨縛，附屬所依，成無量法不可傾拔，久遠隨逐，畢竟堅固，依附相續，一切諸佛所不能救。

阿賴耶愛等者：執阿賴耶為自內我，是名阿賴耶愛。於五取蘊，或執為我，或執我所，是名遍一切種皆悉隨縛。此為根本，附屬所依。一切有生雜染品法，於中攝藏，不得對治，是名成無量法不可傾拔。無始時來數習阿賴耶愛，積集成種，是名久遠隨逐。乃至盡未來際，難可破壞，障得解脫，是名畢竟堅固。由是故說一切諸佛所不能救。

卯二、結

是名第一不住種性補特伽羅無種性相。

寅二、第二無種性相<sup>3</sup> 卯一、標

復有所餘不住種性補特伽羅無種性相。

卯二、釋<sup>2</sup> 辰一、不厭生死

謂彼聽聞以無量門呵毀生死眾多過失，又復聽聞以無量門稱讚涅槃眾多功德，而於生死不見少分戲論過失，不見少分所有過患，亦復不能少分厭離。如是見厭，於過去世不能已生，於未來世不能當生，於現在世不能正生。

辰二、不欣涅槃

又於愛盡寂滅涅槃，不見少分下劣功德，不見少分所有勝利，亦復不能少分欣樂。如是見樂，於過去世不能已生，於未來世不能當生，於現在世不能正生。

不見少分戲論過失者：意地中說：一切種子識，於生自體雖有淨不淨業因，然唯樂著戲論為最勝因。（陵本二卷一頁<sup>104</sup>）此中戲論，謂即能引一切虛妄分別無義言論。樂著此故，故有生死，是名戲論過失。

卯三、結

是名第二不住種性補特伽羅無種性相。

寅三、第三無種性相<sup>3</sup> 卯一、標

復有所餘不住種性補特伽羅無種性相。

卯二、釋<sup>3</sup> 辰一、由無慚愧

謂彼本性成就上品無慚無愧。由是因緣，無有厭惡，心無怯畏。

無有厭惡心無怯畏者：此以無慚無愧為其因緣。由無慚故，無有厭惡；由無愧故，心無怯畏。

辰二、由樂行惡

以歡喜心現行眾惡。由是因緣，未嘗追悔。

未嘗追悔者：此以歡喜行惡為其因緣。由心歡喜，故不追悔。

辰三、由觀現法

唯觀現法。由是因緣，自身財寶衰退過患。

自身財寶衰退過患者：此以唯觀現法為其因緣。唯觀現法諸興盛事，住諸安樂，不重當來行施作福、受齋持戒，由是說有自身財寶衰退過患。

卯三、結

是名第三不住種性補特伽羅無種性相。

寅四、第四無種性相<sup>3</sup> 卯一、標

復有所餘不住種性補特伽羅無種性相。

卯二、釋

謂一切種圓滿分明稱當道理，美妙、殊勝、易可解了。

謂一切種圓滿等者：三藏十二分教，名一切種。趣涅槃宮為先首故，是名圓滿。善釋文句，故名分明。四種道理相應，是名稱當道理。文句可味，故名美妙。無所依止，故名殊勝。顯然有趣，是名易可解了。

或依苦諦、或依集諦、或依滅諦、或依道諦宣說開示正法教時，不能獲得微小發心、微小信解，況能獲得身毛為豎、悲泣墮淚？

身毛為豎悲泣墮淚者：異門分說：如是等事是淨信相。謂由隨順理門所生淨信增上力故。（陵本八十三卷二頁<sup>6279</sup>）

如是亦依過去、未來、現在世別。



如是亦依過去未來現在世別者：謂彼微小發心、微小信解，由過去世不能已生，由未來世不能當生，由現在世不能正生，例指如前，故作是說。

卯三、結

是名第四不住種性補特伽羅無種性相。

寅五、第五無種性相<sup>3</sup> 卯一、標

復有所餘不住種性補特伽羅無種性相。

卯二、釋<sup>2</sup> 辰一、辨彼相<sup>2</sup> 巳一、假相出家

謂彼或時於善說法毗奈耶中暫得出家，或為國王所逼迫故，或為狂賊所逼迫故，或為債主所逼迫故，或為怖畏所逼迫故，或不活畏所逼迫故。非為自調伏、非為自寂靜、非為自涅槃、非為沙門性、非為婆羅門性而求出家。

非為自調伏等者：此中調伏，謂調善死。寂靜，謂苦邊際。涅槃，謂勝義樂。於善說法毗奈耶中，八支聖道安立可得；成就此故，畢竟不壞，名沙門性。若所作事決定究竟，已能驅擯惡不善法，是名婆羅門性。如說：當

知婆羅門，更無有所作；所作事已辦，是謂婆羅門。

已二、不樂正學

既出家已，樂與在家及出家眾共誼雜住。或發邪願修諸梵行，謂求生天，或餘天處。

或發邪願修諸梵行等者：謂發邪願，求生欲天、或色界天，名求生天；為受用欲及喜樂故。或修梵行，為求不動空無邊處、識無邊處、無所有處、非想非非想處，名餘天處；起邪分別，謂解脫故。

或樂退捨所學禁戒，或犯尸羅，內懷朽敗，外現真實；如水所生雜穢蝸牛，螺音狗行。實非沙門，自稱沙門；非行梵行，自稱梵行。

或樂退捨所學禁戒等者：謂受戒已，後復決定發起不同分心；或於有所識別大丈夫前，故意發起棄捨語言；是名退捨所學禁戒。內無沙門法故，外持沙門相故，是名內懷朽敗，外現真實；猶如大木，外皮堅妙，內被蟲食，虛無有實。諸苾芻犯禁戒等，如彼蝸螺穢濁淨水，是名如水所生雜穢

蝸牛。習行惡行，於受利養臥具等時，自稱年臘最為第一，是名螺音狗行。已失苾芻分，稱有苾芻分，是名實非沙門，自稱沙門；實懷惡欲，而自稱言我是第一真沙門故。實非遠離姪欲穢法，而自稱言我已遠離，是名非行梵行，自稱梵行。如是諸義，如攝異門分說應知。（陵本八十四卷十五頁<sup>6397</sup>）復有差別，茲不具述。

如是亦依過去、未來、現在世別。

辰二、顯略義

當知如是不住種性補特伽羅，假相出家；非不樂學補特伽羅，名真出家，受具足戒，成苾芻性。由此異門，由此意趣，義顯於彼本非出家，唯有任持出家相狀，墮出家數。

卯三、結

是名第五不住種性補特伽羅無種性相。

寅六、第六無種性相<sup>3</sup> 卯一、標

復有所餘不住種性補特伽羅無種性相。

卯二、釋

謂彼少有所作善業，或由於身，或語、或意，一切皆為希求諸有。或求當來殊勝後有，或求財寶，或求殊勝所有財寶。

卯三、結

是名第六不住種性補特伽羅無種性相。

壬三、結

如是等類，有眾多相。成就彼故，墮在不般涅槃法數。

辛四、數取趣<sup>4</sup> 壬一、徵

云何安住種性補特伽羅？

壬二、列

謂住種性補特伽羅，或有唯住種性，而未趣入，亦未出離。或有安住種性，亦已趣入，而未出離。或有安住種性，亦已趣入，及已出離。或有軟根，

或有中根，或有利根。或有貪行，或有瞋行，或有癡行。或生無暇，或生有暇。或有縱逸，或無縱逸。或有邪行，或無邪行。或有障礙，或無障礙。或遠，或近。或未成熟，或已成熟。或未清淨，或已清淨。

壬三、釋<sup>16</sup>

癸一、未趣入未出離<sup>3</sup> 子一、徵

云何名為安住種性補特伽羅，唯住種性，而未趣入，亦未出離？

子二、釋

謂如有一補特伽羅，成就出世聖法種子，而未獲得親近善士、聽聞正法，未於如來正覺正說法毗奈耶獲得正信，未受持淨戒，未攝受多聞，未增長惠捨，未調柔諸見。

子三、結

如是名為唯住種性，而未趣入，亦未出離補特伽羅。

癸二、已趣入未出離<sup>2</sup> 子一、徵

云何名為安住種性，亦已趣入，而未出離補特伽羅？

子二、釋<sup>2</sup> 丑一、翻例前

謂前所說所有黑品相違白品，當知即名安住種性，亦已趣入補特伽羅。

謂前所說所有黑品相違白品等者：前說未獲正信，乃至未調柔諸見，是名黑品；由不信等，乃至惡慧未被對治故。今已趣入得初正信，乃至調柔諸見，是名相違白品。此趣入相，如下自釋應知。

丑二、明差別

而差別者，謂猶未得所有聖道及聖道果煩惱離繫。

而差別者等者：望已出離，說差別故。

癸三、已趣入已出離<sup>2</sup> 子一、徵

云何名為安住種性，亦已趣入，及已出離補特伽羅？

子二、釋<sup>2</sup> 丑一、指前說

謂如前說。

丑二、明差別

而差別者，已得聖道及聖道果煩惱離繫。

癸四、軟根<sup>3</sup> 子一、徵

云何軟根補特伽羅？

子二、釋<sup>2</sup> 丑一、標相

謂有如是補特伽羅，於所知事、所緣境界，所有諸根極遲運轉、微劣運轉。

於所知事所緣境界者：謂或不淨，或慈愍，或緣性緣起，或界差別，或阿那波那念，或蘊善巧，或界善巧，或處善巧，或緣起善巧，或處非處善巧，或下地麤性上地靜性，或苦諦、集諦、滅諦、道諦，是名所知事。如下自說。（陵本二十六卷十四頁<sup>2210</sup>）

或聞所成、或思所成、或修所成作意相應。

或聞所成等者：解深密經作如是說：聞所成慧依止於文，但如其說，未善意趣，未現在前，隨順解脫，未能領受成解脫義。思所成慧亦依於文，不惟如說，能善意趣，未現在前，轉順解脫，未能領受成解脫義。修所成

慧，亦依於文，亦不依文，亦如其說，亦不如說，能善意趣，所知事同分三摩地所行影像現前，極順解脫，已能領受成解脫義。（解深密經三卷十一頁）由是當知聞思修三作意差別。

丑二、列釋

謂或信根，或精進根，或復念根，或復定根，或復慧根，無有堪能、無有勢力通達法義，速證真實。

子三、結

是名軟根補特伽羅。

癸五、中根<sup>3</sup> 子一、徵

云何中根補特伽羅？

子二、釋

謂有如是補特伽羅，於所知事、所緣境界，所有諸根少遲運轉。一切如前，應當廣說。



子三、結

是名中根補特伽羅。

癸六、利根<sup>3</sup> 子一、徵

云何利根補特伽羅？

子二、釋<sup>2</sup> 丑一、標相

謂有如是補特伽羅，於所知事、所緣境界，所有諸根不遲運轉、不劣運轉。或聞所成、或思所成、或修所成作意相應。

丑二、列釋

謂或信根，或精進根，或復念根，或復定根，或復慧根，有所堪能、有大勢力通達法義，速證真實。

子三、結

是名利根補特伽羅。

癸七、貪行<sup>3</sup> 子一、徵

云何貪行補特伽羅？

子二、釋

謂有如是補特伽羅，於可愛事、可染著事所緣境界，有猛利貪、有長時貪。

子三、結

是名貪行補特伽羅。

癸八、瞋行<sup>3</sup> 子一、徵

云何瞋行補特伽羅？

子二、釋

謂有如是補特伽羅，於可憎事、可瞋恚事所緣境界，有猛利瞋、有長時瞋。

子三、結

是名瞋行補特伽羅。

癸九、癡行<sup>3</sup> 子一、徵

云何癡行補特伽羅？

子二、釋

謂有如是補特伽羅，於所知事、所緣境界，有猛利癡、有長時癡。

子三、結

是名癡行補特伽羅。

癸十、生無暇生有暇等<sup>2</sup> 子一、生無暇等

若生無暇、若有縱逸、若有邪行、若有障礙補特伽羅，如是一切如前應知。

子二、生有暇等

與此相違，應知即是生於有暇、無有縱逸、無有邪行、無有障礙補特伽羅。

如是一切如前應知者：指如前說四種不般涅槃因緣應知。

癸十一、遠<sup>4</sup> 子一、徵

云何名遠補特伽羅？

子二、標

謂有如是補特伽羅，由時遠故，去涅槃遠；或有復由加行遠故，說名為遠。

子三、釋<sup>2</sup> 丑一、時遠<sup>2</sup> 寅一、徵

云何名為由時遠故，去涅槃遠？

寅二、釋

謂有如是補特伽羅，經多百生，或多千生、多百千生，然後方能值遇勝緣，得般涅槃。

丑二、加行遠<sup>2</sup> 寅一、徵

云何名為加行遠故，說名為遠？

寅二、釋<sup>2</sup> 卯一、正顯

謂有如是補特伽羅，唯住種性，而未趣入，不能速疾值遇勝緣、得般涅槃，彼於涅槃未能發起勝加行故。

卯二、簡非

由加行遠說名為遠，不由時遠。

子四、結

如是二種總略為一，說名為遠補特伽羅。

癸十二、近<sup>4</sup> 子一、徵

云何名近補特伽羅？

子二、標

謂有如是補特伽羅，由時近故，去涅槃近；或有復由加行近故，說名為近。

子三、釋<sup>2</sup> 丑一、時近<sup>3</sup> 寅一、徵

云何名為由時近故，去涅槃近？

寅二、釋<sup>2</sup> 卯一、當得涅槃

謂有如是補特伽羅，住最後生、住最後有、住最後身，即由此身當得涅槃。

卯二、當得正斷

或即由此剎那無間，於煩惱斷當得作證。

寅三、結

如是名為由時近故，去涅槃近。

丑二、加行近<sup>2</sup> 寅一、徵

云何名為由加行近說名為近？

寅二、釋

謂有如是補特伽羅，安住種性，亦已趣入。

子四、結

如是二種總略為一，說名為近補特伽羅。

癸十三、未成熟<sup>4</sup> 子一、徵

云何未成熟補特伽羅？

子二、標

謂有如是補特伽羅，未能獲得最後有身。

子三、釋

謂住於此能般涅槃，或能趣入正性離生。

子四、結

是名未成熟補特伽羅。

或能趣入正性離生者：謂入見道，證諦現觀，名入正性離生。以墮正性聚定，遠離惡趣生故。

癸十四、已成熟<sup>4</sup> 子一、徵

云何已成熟補特伽羅？

子二、標

謂有如是補特伽羅，已能獲得最後有身。

子三、釋

謂住於此能般涅槃，或能趣入正性離生。

子四、結

是名已成熟補特伽羅。

癸十五、未清淨<sup>3</sup> 子一、徵

云何未清淨補特伽羅？

子二、釋

謂有如是補特伽羅，未生聖道，於聖道果煩惱離繫未能作證。

子三、結

是名未清淨補特伽羅。

癸十六、已清淨<sup>2</sup> 子一、徵

云何已清淨補特伽羅？

子二、指

謂與上相違，應知其相。

壬四、結<sup>2</sup> 癸一、標

如是名為安住種性補特伽羅所有差別。為度彼故，諸佛世尊出現於世。

癸二、釋

謂若未趣入，令其趣入；若未成熟，令其成熟；若未清淨，令其清淨；轉正法輪，制立學處。



本地分中聲聞地初瑜伽處趣入地品第二

己二、趣入地<sup>2</sup> 庚一、結前生後

如是已說種性地。云何趣入地？

庚二、標釋差別<sup>3</sup> 辛一、總標<sup>2</sup> 壬一、喩柁南

喩柁南曰：

若略說一切 趣入地應知 謂自性安立 諸相數取趣

壬二、長行

謂若趣入自性、若趣入安立、若趣入者所有諸相、若已趣入補特伽羅，如是  
一切總略為一，名趣入地。

辛二、別釋<sup>4</sup> 壬一、自性<sup>3</sup> 癸一、徵

云何趣入自性？

癸二、釋<sup>2</sup> 子一、辨相<sup>2</sup> 丑一、辨<sup>3</sup> 寅一、唯趣入

謂安住種性補特伽羅，本性成就涅槃種子。若於爾時有佛出世，生於中國，

不生達須、蔑戾車中，乃至廣說初得見佛及佛弟子，往詣承事，從彼聞法得初正信、受持淨戒、攝受多聞、增長惠捨、調柔諸見。

寅二、將成熟

從是已後，由此法受、由此因緣，身滅壞已、度此生已，獲得六處異熟所攝殊勝諸根，能作長時轉勝正信生起依止；亦能與彼受持淨戒、攝受多聞、增長惠捨、調柔諸見，轉上、轉勝、轉復微妙為所依止。復由如是轉上、轉勝、轉復微妙信等諸法，更得其餘殊勝異熟；由此異熟，復得其餘隨順出世轉勝善法。

寅三、已成熟

如是展轉互為依因，互與勢力，於後後生轉轉勝進，乃至獲得最後有身。謂住於此得般涅槃，或能趣入正性離生。

丑二、結

是名趣入。

子二、釋名<sup>3</sup> 丑一、徵

何以故？

丑二、釋

若道、若路、若正行跡，能得涅槃、能趣涅槃；彼於爾時，能昇、能入、能正行履，漸次趣向，至極究竟。

丑三、結

是故說此名已趣入。

癸三、結

如是名為趣入自性。

由此法受由此因緣等者：此中法受，謂得正信乃至調柔諸見。於現法中見彼功德，心正執受安置成立，故名法受，是即最初趣入。此復能感後世殊勝異熟，故名因緣。言殊勝異熟者，謂即六處異熟所攝殊勝諸根。此與信等諸法展轉為依，後後勝進，乃至獲得最後有身，是即趣入究竟。如文易

知。

壬二、安立<sup>3</sup> 癸一、徵

云何建立趣入？

癸二、釋<sup>2</sup> 子一、別辨相<sup>2</sup> 丑一、種類<sup>2</sup> 寅一、列釋<sup>2</sup> 卯一、列

謂或有種性，或有趣入，或有將成熟，或有已成熟。或有唯趣入，非將成熟，非已成熟；或有亦趣入，亦將成熟，非已成熟；或有亦趣入，亦已成熟，非將成熟；或有非趣入，非將成熟，非已成熟。

卯二、釋<sup>2</sup> 辰一、約法相辨<sup>4</sup> 巳一、有種性

云何有種性？謂如前說。

云何有種性謂如前說者：此如前說唯住種性，而未趣入，亦未出離補特伽羅應知。唯有趣入堪能性故，名有種性。

巳二、有趣入<sup>3</sup> 午一、徵

云何有趣入？

午二、釋

謂住種性補特伽羅，最初獲得昔所未得，於諸如來正覺正說法毗奈耶，所有正信、受持淨戒、攝受多聞、增長惠捨、調柔諸見。

午三、結

是名趣入。

云何有趣入等者：信等諸法，名為趣入。自性成就此故，名有趣入。

巳三、將成熟<sup>3</sup> 午一、徵

云何將成熟？

午二、釋

謂即如是已得趣入補特伽羅，除所獲得最後有身。謂住於此得般涅槃，或能趣入正性離生。從趣入後，於後後生修集諸根，轉上、轉勝、轉復微妙。

午三、結

是名將成熟。

於後後生修集諸根等者：此中諸根，謂信等法，如下說有上中下品三善根故。從趣入後，或經一生，或二、或多，展轉勝進，是名轉上、轉勝；若已獲得最後有身，是名轉復微妙。

巳四、已成熟<sup>3</sup> 午一、徵

云何已成熟？

午二、釋

謂所獲得最後有身。若住於此得般涅槃，或能趣入正性離生。

午三、結

是名已成熟。

辰二、約補特伽羅相辨<sup>4</sup> 巳一、唯趣入非將成熟非已成熟<sup>3</sup> 午一、徵

云何唯趣入，非將成熟，非已成熟？

午二、釋

謂初獲得於諸如來正覺正說法毗奈耶所有正信，廣說乃至調柔諸見；未從此

後復經一生。

午三、結

是名唯趣入，非將成熟，非已成熟。

已二、亦趣入亦將成熟非已成熟<sup>3</sup> 午一、徵

云何亦趣入，亦將成熟，非已成熟？

午二、釋

謂初獲得於諸如來正覺正說法毗奈耶所有正信，廣說乃至調柔諸見；從此已後，復經一生，或二、或多，而未獲得最後有身。謂住於此得般涅槃，餘如前說。

午三、結

是名亦趣入，亦將成熟，非已成熟。

已三、亦趣入亦已成熟非將成熟<sup>3</sup> 午一、徵

云何亦趣入，亦已成熟，非將成熟？

午二、釋

謂即如是已得趣入補特伽羅，復已獲得最後有身。若住於此得般涅槃，餘如前說。

午三、結

是名亦已趣入，亦已成熟，非將成熟。

已四、非已趣入非將成熟非已成熟<sup>3</sup> 午一、徵

云何非已趣入，非將成熟，非已成熟？

午二、釋

謂即如有涅槃法補特伽羅，唯住種性，而未趣入。

午三、結

是名非已趣入，非將成熟，非已成熟補特伽羅。然有堪能，定當趣入、當得成熟。

寅二、別簡<sup>2</sup>

卯一、標



復有一類補特伽羅，定無堪能當得趣入、當得成熟。謂離種性無涅槃法補特伽羅。

卯二、釋

當知如是補特伽羅無種性故，定無堪能當得趣入及當成熟，何況當能得般涅槃。

丑二、位攝<sup>2</sup> 寅一、辨差別<sup>4</sup> 卯一、標

當知此中，如是一切補特伽羅，六位所攝。

卯二、徵

何等為六？

卯三、列

一、有堪能補特伽羅，二、成就下品善根補特伽羅，三、成就中品善根補特伽羅，四、成就上品善根補特伽羅，五、究竟方便補特伽羅，六、已到究竟補特伽羅。

卯四、釋<sup>6</sup> 辰一、有堪能<sup>3</sup> 巳一、徵

云何堪能補特伽羅？

巳二、釋

謂安住種性補特伽羅，而未獲得最初於佛正覺正說法毗奈耶所有正信，廣說乃至調柔諸見。

巳三、結

是名堪能補特伽羅。

辰二、成就下品善根<sup>3</sup> 巳一、徵

云何成就下品善根補特伽羅？

巳二、釋

謂安住種性補特伽羅，已能獲得最初於佛正覺正說法毗奈耶所有正信，廣說乃至調柔諸見。

巳三、結

是名成就下品善根補特伽羅。

辰三、成就中品善根<sup>3</sup> 巳一、徵

云何成就中品善根補特伽羅。

巳二、釋

謂安住種性補特伽羅，已能獲得最初於佛正覺正說法毗奈耶所有正信，廣說乃至調柔諸見；從是已後，或經一生，或二、或多，展轉勝進，而未獲得最後有身。謂住於此能般涅槃，或能趣入正性離生。

巳三、結

是名成就中品善根補特伽羅。

辰四、成就上品善根<sup>3</sup> 巳一、徵

云何成就上品善根補特伽羅？

巳二、釋

謂即如是展轉勝進補特伽羅，已能獲得最後有身。若住於此能般涅槃，或能

趣入正性離生。

巳三、結

是名成就上品善根補特伽羅。

辰五、究竟方便<sup>3</sup> 巳一、徵

云何名為究竟方便補特伽羅？

巳二、釋

謂已獲得最後有身補特伽羅，為盡諸漏聽聞正法，或得無倒教授教誡，正修加行，而未能得遍一切種諸漏永盡，未到究竟。

巳三、結

如是名為究竟方便補特伽羅。

辰六、已到究竟<sup>3</sup> 巳一、徵

云何名為已到究竟補特伽羅？

巳二、釋

謂即如是補特伽羅，為盡諸漏聽聞正法，獲得無倒教授教誡，如是如是正修加行，已能獲得遍一切種諸漏永盡，所作已辦，究竟獲得第一清涼。

已三、結

如是名為已到究竟補特伽羅。

寅二、明漸次<sup>2</sup> 卯一、別辨相<sup>5</sup> 辰一、能獲下品善根

當知此中，堪能種類補特伽羅，即以種性為依為住，便能獲得下品善根，及能趣入。

辰二、能獲中品善根

既趣入已，下品善根為依為住，復能獲得中品善根，以此善根而自成熟。

以此善根而自成熟者：此中成熟，謂將成熟，非已成熟。如前已說應知。

辰三、能獲上品善根

彼於如是自成熟時，中品善根為依為住，復能獲得上品善根，已得成熟。

辰四、究竟方便

彼由如是上品善根修集為因所得自體，復能修集轉勝資糧。由是觸證心一境性，復能趣入正性離生，證預流果、或一來果、或不還果，而未能證最勝第一阿羅漢果。如是名為究竟方便補特伽羅。

辰五、已到究竟

若已證得一切煩惱皆悉永斷阿羅漢果，爾時名為已到究竟補特伽羅。

彼由如是上品善根修集為因所得自體等者：此中所得自體，謂即獲得最後有身。言轉勝資糧者，謂即無漏加行慧。言觸證心一境性者，謂證諦現觀時，所緣能緣平等平等無分別智正通達故。

卯二、結略義<sup>2</sup> 辰一、標

此則顯示由初中後一切聲聞所修正行，所立六種補特伽羅。

辰二、釋

由有種性聲聞正行，顯示最初補特伽羅；由到究竟聲聞正行，顯示最後補特伽羅；由餘聲聞所修正行，顯示中間補特伽羅。

子二、總料簡<sup>2</sup> 丑一、問

問：已得趣入補特伽羅，為有定量，一切時等得般涅槃？為無定量，一切時分而不齊等得般涅槃？

丑二、答<sup>2</sup> 寅一、標有差別

答：無有定量，亦非一切時分齊等得般涅槃。然隨所應，如所遇緣有差別故，而般涅槃。

寅二、列釋種類<sup>2</sup> 卯一、列三種

當知此中，或有一類極經久遠，或有一類非極久遠，或有一類最極速疾得般涅槃。

卯二、隨難釋

謂住種性補特伽羅，最極速疾般涅槃者，要經三生。第一生中，最初趣入；第二生中，修令成熟；第三生中，修成熟已，或即此身得般涅槃，或若不得般涅槃者，必入學位，方可天沒，極經七有得般涅槃。

癸三、結

如是名為趣入安立。

壬三、諸相<sup>2</sup> 癸一、徵

云何名為已趣入者所有諸相？

癸二、釋<sup>2</sup> 子一、種類差別<sup>8</sup> 丑一、第一相<sup>2</sup> 寅一、釋<sup>2</sup> 卯一、不樂惡說<sup>3</sup> 辰

一、辨相

謂安住種性補特伽羅纔已趣入，設轉餘生，於自大師及善說法毗奈耶中，雖復忘念。若遇世間現有惡說法毗奈耶，及有善說法毗奈耶，雖久聽聞以無量門讚美惡說法毗奈耶有勝功德，而不信解愛樂修行，亦不於彼而求出家。設暫出家，纔得趣入，尋復速疾棄捨退還。

辰二、引喻

為性於彼不樂安住。如蜜生蟲置之醎酢；或如愛樂受妙欲者，置淤泥中。

辰三、釋因



彼由宿世妙善因力所任持故。

卯二、愛樂善說<sup>3</sup> 辰一、辨相

若暫聽聞讚美善說法毗奈耶少分功德，或全未聞。雖暫少聞，或全未聞，而能速疾信解趣入，愛樂修行，或求出家。既出家已，畢竟趣入，終無退轉。

辰二、引喻

為性於此愛樂安住。如蜜生蟲置之上蜜；或如愛樂受妙欲者，置勝欲中。

辰三、釋因

彼由宿世妙善因力所任持故。

寅二、結

是名第一已得趣入補特伽羅已趣入相。

纔已趣入設轉餘生者：得初正信乃至調柔諸見，是名纔已趣入。度此生已，得餘異熟，名轉餘生。

丑二、第二相<sup>3</sup> 寅一、標

復有所餘已得趣入補特伽羅已趣入相。

寅二、釋<sup>3</sup> 卯一、辨相

謂雖未得能往一切惡趣、無暇煩惱離繫，而能不生惡趣、無暇。

卯二、引教

世尊依此已得趣入補特伽羅，密意說言：若有世間上品正見，雖歷千生不墮惡趣。

能往一切惡趣無暇煩惱離繫者：若已證入正性離生，爾時便能永斷邪見，及往一切惡趣業等，是名能往一切惡趣、無暇煩惱離繫。

卯三、證成

彼若已入上品善根，漸向成熟，爾時便能不生無暇及餘惡趣。

寅三、結

是名第二已得趣入補特伽羅已趣入相。

彼若已入上品善根等者：此釋經說世間正見不墮惡趣所有密意。謂若世間

信等諸根轉復微妙，乃至獲得最後有身，是名已入上品善根。隨順能生無漏正見，是名漸向成熟。彼於爾時，定能趣入正性離生，是故說彼不生無暇及餘惡趣。是即經說所有密意。

丑三、第三相<sup>3</sup> 寅一、標

復有所餘已得趣入補特伽羅已趣入相。

寅二、釋

謂暫聞佛或法或僧勝功德已，便得隨念清淨信心，引發廣大出離善法。數數緣念，融練淨心，身遂毛豎、悲泣雨淚。

寅三、結

是名第三已得趣入補特伽羅已趣入相。

丑四、第四相<sup>3</sup> 寅一、標

復有所餘已得趣入補特伽羅已趣入相。

寅二、釋

謂性成就猛利慚愧，於所現行諸有罪處，深生羞恥。

寅三、結

是名第四已得趣入補特伽羅已趣入相。

丑五、第五相<sup>3</sup> 寅一、標

復有所餘已得趣入補特伽羅已趣入相。

寅二、釋

謂於受持、讀誦、請問、思惟、觀行、求善法中，有深欲樂、猛利欲樂。

寅三、結

是名第五已得趣入補特伽羅已趣入相。

丑六、第六相<sup>3</sup> 寅一、標

復有所餘已得趣入補特伽羅已趣入相。

寅二、釋

謂於一切無罪事業，修集一切善品加行正方便中，能善修集，堅固發起、長

時發起、決定發起。

寅三、結

是名第六已得趣入補特伽羅已趣入相。

丑七、第七相<sup>3</sup> 寅一、標

復有所餘已得趣入補特伽羅已趣入相。

寅二、釋

謂彼為性塵垢微薄，煩惱羸劣。雖起諸纏，而不長時相續久住。無諂無誑，能制憍慢我我所執。好取功德，憎背過失。

寅三、結

是名第七已得趣入補特伽羅已趣入相。

無諂無誑者：謂性質直，是質直類，如其聖教而正修行，如其真實而自顯發，是名無諂無誑。

丑八、第八相<sup>3</sup> 寅一、標

復有所餘已得趣入補特伽羅已趣入相。

寅二、釋

謂能善巧藏護其心，於諸廣大所應證處不自輕憊，不自安處無力能中，其所信解增多猛盛。

寅三、結

是名第八已得趣入補特伽羅已趣入相。

謂能善巧藏護其心者：謂能了知自心雜染過患，於時時間，由聞思修方便善巧，善能防護，令不趣入故。

子二、善根差別<sup>3</sup> 丑一、標已說

如是等類已得趣入補特伽羅已趣入相，當知無量，我於是中已說少分。

丑二、總料簡<sup>3</sup> 寅一、下品

如是諸相，若有安住下品善根而趣入者，當知下品，名有間隙，未能無間，未善清淨。

寅二、中品

若有安住中品善根而趣入者，當知中品。

寅三、上品

若有安住上品善根而趣入者，當知上品，無有間隙，已能無間，已善清淨。

丑三、結趣入<sup>2</sup> 寅一、墮趣入數

如是名為已得趣入補特伽羅已趣入相。成就如是趣入相者，當知墮在已趣入數。

寅二、為他現證

應知如是安住種性、已得趣入補特伽羅所有眾多吉祥士相，唯佛世尊及到第一究竟弟子，以善清淨勝妙智見，現見現證。隨其種性，隨所趣入，如應救濟。

壬四、數取趣<sup>2</sup> 癸一、徵

云何名為已得趣入補特伽羅？

癸二、釋<sup>2</sup> 子一、列差別<sup>2</sup> 丑一、列

謂或有已得趣入補特伽羅，唯已趣入，未將成熟，未已成熟，未得出離。或有亦已趣入，亦將成熟，未已成熟，未得出離。或有亦已趣入，亦已成熟，未得出離、隨欲而行。

丑二、指

如是差別，應知如前已辯其相。

子二、指隨應

復有所餘，如種性地說軟根等補特伽羅所有差別，今於此中，如其所應，亦當了知所有差別。

辛三、總結

如是所說若趣入自性、若趣入安立、若已趣入者所有諸相、若已趣入補特伽羅，一切總說名趣入地。

瑜伽師地論科句披尋記卷第二十一



瑜伽師地論科句披尋記卷第二十二

彌勒菩薩說

唐三藏沙門玄奘奉詔譯

韓清淨科記

本地分中聲聞地初瑜伽處出離地品第三之一

己三、出離地<sup>2</sup> 庚一、結前生後

如是已說趣入地。云何出離地？

庚二、略廣宣說<sup>4</sup> 辛一、離欲資糧<sup>2</sup> 壬一、總標<sup>2</sup> 癸一、喩柁南

喩柁南曰：

若世間離欲 如是出世間 及此二資糧 是名出離地

癸二、長行

謂若由世間道而趣離欲，若由出世道而趣離欲，若此二道所有資糧，總略為一，名出離地。

壬二、別釋<sup>3</sup> 癸一、世間離欲<sup>3</sup> 子一、徵

云何名為由世間道而趣離欲？

子二、釋<sup>2</sup> 丑一、舉離欲界

謂如有一，於下欲界觀為麤相，於初靜慮離生喜樂若定、若生觀為靜相。

於下欲界觀為麤相等者：此中麤相、靜相差別，以要言之，有過患義是麤性義。若彼彼地中過患增多，即由如是過患增多性故，名為麤性；若彼彼地中過患減少，即由如是過患減少性故，名為靜性。如下自說應知。（陵

本二十七卷十八頁<sup>2304</sup>）

彼由多住如是觀時，便於欲界而得離欲，亦能證入最初靜慮。

丑二、例餘一切

如是復於初靜慮上，漸次如應，一切下地觀為麤相，一切上地觀為靜相。彼由多住如是觀時，便於乃至無所有處而得離欲，亦能證入乃至非想非非想處。

子三、結

如是名為由世間道而趣離欲。除此更無若過若增。

癸二、出世離欲<sup>3</sup> 子一、徵

云何名為由出世道而趣離欲？

子二、釋<sup>2</sup> 丑一、成就有學智見

謂如有一，親近善士，於聖法中已成聰慧，於聖法中已得調順。於苦聖諦如實知苦，於集聖諦如實知集，於滅聖諦如實知滅，於道聖諦如實知道。

於聖法中已成聰慧等者：此中聖法，謂出世道，由性無漏，故得聖名。即於是中善思所思，善說所說，善作所作，是名已成聰慧。又於色等十相取過患想，心不流散，是名已得調順。

丑二、證得無學解脫

既得成就有學智見，從此已後漸修聖道，遍於三界見修所斷一切法中，自能離繫、自得解脫。如是便能超過三界。

子三、結

如是名為由出世道而趣離欲。

如是便能超過三界者：為顯出世離欲超一切處，究竟解脫；及簡世間不越有頂，暫得離欲，後更相續；故作是說。

癸三、二道資糧<sup>3</sup> 子一、徵

云何名為二道資糧？

子二、標<sup>2</sup> 丑一、喩柁南

喩柁南曰：

自他圓滿善法欲 戒根律儀食知量

恬寤正知住善友 聞思無障捨莊嚴

丑二、長行

謂若自圓滿、若他圓滿、若善法欲、若戒律儀、若根律儀、若於食知量、若初夜後夜常勤修習恬寤瑜伽、若正知而住、若善友性、若聞正法、若思正

法、若無障礙、若修惠捨、若沙門莊嚴。如是等法，是名世間及出世間諸離欲道趣向資糧。

子三、釋<sup>2</sup> 丑一、略指前三

當知此中，若自圓滿、若他圓滿、若善法欲，此三如前修集種子諸劣緣中，已辯其相。

丑二、廣辨十一<sup>10</sup> 寅一、戒律儀<sup>3</sup> 卯一、徵

云何戒律儀？

卯二、喞柁南標

喞柁南曰：

戒律儀當知 辯三虧滿十 六異門三淨 勝功德十種

卯三、長行釋<sup>2</sup> 辰一、釋一切種<sup>5</sup> 巳一、辨<sup>2</sup> 午一、廣辨六種<sup>2</sup> 未一、總標

戒律儀者，謂如有一，安住具戒，廣說乃至受學學處。

未二、別釋<sup>6</sup> 申一、安住具戒<sup>3</sup> 酉一、徵

云何名為安住具戒？

酉二、釋

謂於所受學所有學處，不虧身業，不虧語業，無闕，無穿。

酉三、結

如是名為安住具戒。

不虧身業等者：具離殺生、不與取、欲邪行三不善業，是名不虧身業。具離虛妄語、離間語、麤惡語、綺語四不善業，是名不虧語業。此釋具戒應知。由十因緣尸羅圓滿，是名無闕。十因緣者，如下自釋。不數毀犯，犯已還淨，是名無穿。此釋安住應知。

申二、善能守護別解律儀<sup>3</sup> 酉一、徵

云何名為善能守護別解律儀？

酉二、釋

謂能守護七眾所受別解律儀。即此律儀，眾差別故，成多律儀。

酉三、簡

今此義中，唯依苾芻律儀處說善能守護別解律儀。

謂能守護七眾所受別解律儀等者：謂苾芻、苾芻尼、正學、勤策男、勤策女、近事男、近事女，是名七眾。依此制立三種律儀，謂苾芻律儀、苾芻尼律儀、近事律儀，名多律儀。今此義中舉其最勝，是故唯依苾芻律儀處說善能守護別解律儀。又苾芻尼、正學、勤策女三種律儀，皆墮出家品故，當知攝屬苾芻律儀，是故作如是說。

申三、軌則圓滿<sup>4</sup> 酉一、徵

云何名為軌則圓滿？

酉二、標

謂如有一，或於威儀路，或於所作事，或於善品加行處所，成就軌則。隨順世間，不越世間；隨順毗奈耶，不越毗奈耶。

隨順世間等者：決擇分說：若於彼彼異方、異域、國城、村邏、王都、王

宮，若執理家、商賈、邑義諸大眾中，古昔軌範建立隨轉，如是名為立軌範住。（陵本五十二卷八頁<sup>4168</sup>）此說隨順世間，不越世間，如義應知。梵毗奈耶，此云調伏。攝事分說：略有五法攝毗奈耶。一者、性罪，二者、遮罪，三者、制，四者、開，五者、行。（陵本九十九卷五頁<sup>7416</sup>）於此制立隨順隨轉，無有違越，是名隨順毗奈耶，不越毗奈耶。

酉三、釋<sup>3</sup>

戌一、於威儀路<sup>3</sup>

亥一、徵

云何名為於威儀路成就軌則，隨順世間，不越世間；隨順毗奈耶，不越毗奈耶？

亥二、釋<sup>2</sup>

天一、舉於所行

謂如有一，於所應行、於如所行，即於此中如是而行。由是行故，不為世間之所譏毀，不為賢良、正至、善士、諸同法者、諸持律者、諸學律者之所呵責。

於所應行於如所行等者：此釋於行威儀。謂於是事、是處、是時，如量、



如理、如其品類所應行者，即於此事、此處、此時，如量、如理、如其品類正知而行，是名於行威儀成就軌則。此中是事、是處、是時應行，名所應行；如量、如理、如其品類而行，名如所行。

天二、例所住等

如於所行，於其所住、所坐、所臥，當知亦爾。

亥三、結

如是名為於威儀路成就軌則，隨順世間，不越世間；隨順毗奈耶，不越毗奈耶。

戌二、於所作事<sup>3</sup> 亥一、徵

云何名為於所作事成就軌則，隨順世間，不越世間；隨順毗奈耶，不越毗奈耶？

亥二、釋<sup>2</sup> 天一、列所作事

謂如有一，於其所作，若衣服事、若便利事、若用水事、若楊枝事、若入聚

落行乞食事、若受用事、

若受用事者：攝事分中說：有五種不淨受用，及有五種清淨受用。如彼別釋應知。（陵本九十九卷一十二頁<sup>7436</sup>）

若盥鉢事、若安置事、

若安置事者：如說不應置鉢在雜穢處、若坑澗處、若崖岸處應知。（陵本二十四卷十七頁<sup>2055</sup>）

若洗足事、若為敷設臥具等事。即此略說衣事、鉢事，復有所餘如是等類諸所應作，名所作事。

天二、明應作等

如其所應，於所應作、於如所作，即於此中如是而作。由是作故，不為世間之所譏毀，不為賢良、正至、善士、諸同法者、諸持律者、諸學律者之所呵責。

亥三、結

如是名為於所作事成就軌則，隨順世間，不越世間；隨順毗奈耶，不越毗奈耶。

戌三、於諸善品加行處所<sup>3</sup> 亥一、徵

云何名為於諸善品加行處所成就軌則，隨順世間，不越世間；隨順毗奈耶，不越毗奈耶？

亥二、釋<sup>2</sup> 天一、列善加行

謂於種種善品加行，若於正法受持讀誦；若於尊長修和敬業，參觀承事；若於病者起慈悲心，殷重供侍；若於如法宣白加行，住慈悲心，展轉與欲；若於正法請問聽受，翹勤無惰；於諸有智同梵行者，盡其身力而修敬事；於他善品常勤讚勵；常樂為他宣說正法；入於靜室，結加趺坐，繫念思惟。

若於如法宣白加行等者：若舉羯磨，若擯羯磨，是名如法宣白加行。於爾所時，以饒益心，不以衰損；以柔軟語，不以麤獷；以善友意，不以憎恚；是名住慈悲心，展轉與欲。

如是等類，諸餘無量所修善法，皆說名為善品加行。

天二、明應作等

彼於如是隨所宣說善品加行，如其所應，於所應作、於如所作，即於此中如是而作。由是作故，不為世間之所譏毀，不為賢良、正至、善士、諸同法者、諸持律者、諸學律者之所呵責。

亥三、結

如是名為於諸善品加行處所成就軌則，隨順世間，不越世間；隨順毗奈耶，不越毗奈耶。

酉四、結

若於如是所說行相軌則差別悉皆具足，應知說名軌則圓滿。

申四、所行圓滿<sup>2</sup> 酉一、徵

云何名為所行圓滿？

酉二、釋<sup>2</sup> 戌一、舉非處<sup>3</sup> 亥一、標

謂諸苾芻，略有五種非所行處。

亥二、徵

何等為五？

亥三、列

一、唱令家，二、婬女家，三、酤酒家，四、國王家，五、旃荼羅、羯恥那家。

戌二、簡所行

若於如是如來所制非所行處，能善遠離；於餘無罪所有行處，知時而行。如是名為所行圓滿。

唱令家者：思所成地說：唱令家者，謂屠羊等。由遍宣告此屠羊等，成極重罪，多造惡業，殺害羊等故。（陵本十六卷二十三頁<sup>1446</sup>）此屠羊等，由遍宣告，名唱令家，其義應知。

申五、於微小罪見大怖畏<sup>3</sup> 酉一、徵

云何名為於微小罪見大怖畏？

酉二、釋<sup>2</sup> 戌一、別辨相<sup>2</sup> 亥一、釋微小罪<sup>2</sup> 天一、出體

謂於諸小、隨小學處，若有所犯，可令還淨，名微小罪。

天二、釋名

於諸學處現行毀犯，說名為罪；既毀犯已，少用功力而得還淨，說名微小。由是因緣，名微小罪。

謂於諸小隨小學處等者：於罪聚中，制立所犯，有下中上三品差別。若犯下品，少用功力而得還淨，謂對於一補特伽羅即可發露除滅，如是所犯，名微小罪。為令此微小罪堪能無犯，更復制立隨護學處，是名諸小、隨小學處。

亥二、釋大怖畏<sup>2</sup> 天一、徵

云何於中見大怖畏？

天二、釋<sup>3</sup> 地一、怖無堪能

謂作是觀：勿我由此毀犯因緣，無復堪能得所未得、觸所未觸、證所未證。無復堪能得所未得等者：攝事分中，說勝進想略有三種。一、未得為得，二、未會為會，三、未證為證。最初能得先所未得預流果故，當知是名未得為得。即此為依，復能契會上學果故，當知是名未會為會。即此為依，復能證得阿羅漢果，於諸惑斷能作證故，當知是名未證為證。（陵本八十六卷四頁<sup>6496</sup>）此說得所未得、觸所未觸、證所未證，三種差別準義應知。彼說契會，此名為觸，名別義同。

地二、怖有惡行

勿我由此近諸惡趣，往諸惡趣。或當自責，或為大師、諸天、有智同梵行者以法呵責。

地三、怖大惡聲

勿我由此遍諸方維惡名、惡稱、惡聲、惡頌遐邇流布。

地二、顯勝利

彼於如是現法、當來毀犯因生諸非愛果，見大怖畏。由是因緣，於小、隨小所有學處，命難因緣亦不故犯。或時、或處失念而犯，尋便速疾如法發露，令得還淨。

酉三、結

如是名為於微小罪見大怖畏。

申六、受學學處<sup>3</sup> 酉一、徵

云何名為受學學處？

酉二、釋<sup>3</sup> 戌一、明從受<sup>2</sup> 亥一、聞所學處<sup>2</sup> 天一、從師所聞

謂於先受別解脫戒，白四羯磨受具戒時，從戒師所，得聞少分學處體性；復從親教、軌範師處，得聞所餘別解脫經；總略宣說過於二百五十學處，皆自誓言：一切當學。

天二、從餘所聞

復從所餘恆言議者、同言議者、常交往者、有親愛者聞所學處，復於半月常



所宣說別解脫經聞所學處，一切自誓：皆當修學。

亥二、名獲律儀

以於一切所應學處皆受學故，說名獲得別解律儀。

戌二、辨善巧<sup>2</sup> 亥一、已善巧

從此以後，於諸學處，若已善巧，便能無犯。設有所犯，尋如法悔。

於諸學處若已善巧者：聞思所成作意相應，名已善巧。於諸學處能曉悟故。

亥二、未善巧

若諸學處未得善巧、未能曉悟，由先自誓願受持故，得於今時求受善巧，欲求曉悟。於如前說諸所學處，從親教師或軌範師，如先請問。

戌三、明無倒<sup>2</sup> 亥一、正受教誨

既得善巧及曉悟已，隨所教誨無增無減，復能受學。

亥二、正受文義

又於尊重及等尊重所說學處，若文、若義能無倒受。

酉三、結

如是名為受學學處。

午二、略攝三種<sup>3</sup> 未一、結前生後

如是廣辯戒律儀已。云何應知此中略義？

未二、顯二三種<sup>2</sup> 申一、三種戒相<sup>4</sup> 酉一、標

謂於是中，世尊顯示戒蘊略義，有三種相。

酉二、列

一者、無失壞相，二者、自性相，三者、自性功德相。

酉三、徵

此復云何？

酉四、釋<sup>3</sup> 戌一、無失壞相

謂若說言：安住具戒。由此顯示尸羅律儀無失壞相。

戌二、自性相

若復說言：能善守護別解律儀。由此顯示尸羅律儀自性相。

戌三、自性功德相<sup>2</sup> 亥一、觀他增上<sup>3</sup> 天一、標

若復說言：軌則、所行皆悉圓滿。由此顯示別解律儀，如其所受，觀他增上自性功德相。

觀他增上自性功德相者：為顧他故，令他增上，未信者信，信者增長。要由軌則、所行皆悉圓滿方可成辦，是名觀他增上功德。為顯此相，故別建立，如下自釋可知。

天二、徵

所以者何？

天三、釋<sup>2</sup> 地一、正顯

由他觀見如是軌則、所行圓滿，未信者信，信者增長。由是發生清淨信處，心無厭惡，言不譏毀。

地二、反成

若異於此具足尸羅軌則、所行皆圓滿者，觀他增上所有功德勝利，應無。與此相違過失，應有。

亥二、觀自增上<sup>3</sup> 天一、標

若復說言：於微小罪見大怖畏、受學學處。由此顯示別解律儀，如其所受，觀自增上自性功德相。

觀自增上自性功德相者：謂由於微小罪見大怖畏，故有堪能得所未得、觸所未觸、證所未證；及由受學學處，身壞已後當生善趣；名自增上。為顧自故，令自增上，是名觀自增上自性功德相。

天二、徵

所以者何？

天三、釋<sup>2</sup> 地一、反顯

雖由如是軌則、所行皆悉圓滿，獲得如前觀他增上功德勝利。然由毀犯淨戒

因緣，當生惡趣；或無堪能得所未得，如前廣說。

地二、正成

若能於彼微小罪中見大怖畏，於先所受上品學處能正修學。由是因緣，身壞已後當生善趣；亦有堪能得所未得，如前廣說。

於先所受上品學處能正修學者：於罪聚中他勝罪聚，是上品罪。此即受具戒時，從戒師所聽聞少分學處體性，是故說此名先所受。

由是因緣，說此名為別解律儀，如其所受，觀自增上功德勝利。

申二、三種戒性<sup>3</sup> 酉一、標

復有異門。謂佛世尊此中略顯三種戒性。

酉二、列

一、受持戒性，二、出離戒性，三、修習戒性。

酉三、釋<sup>3</sup> 戌一、受持戒性

謂若說言：安住具戒。由此顯示受持戒性。

戌二、出離戒性<sup>4</sup> 亥一、標

若復說言：能善守護別解律儀。由此顯示出離戒性。

亥二、徵

所以者何？

亥三、釋

別解律儀所攝淨戒，當知說名增上戒學。即依如是增上戒學，修增上心、增上慧學；由此能得一切苦盡，究竟出離。

亥四、結

如是出離，用增上戒以為前行所依止處，是故說此別解律儀名出離戒性。

戌三、修習戒性<sup>3</sup> 亥一、標

若復說言：軌則、所行皆悉圓滿，於微小罪見大怖畏，受學學處。由此顯示修習戒性。

亥二、徵

所以者何？

亥三、釋

若由如是所說諸相別解律儀，修習淨戒，名善修習、極善修習。

若由如是所說諸相別解律儀者：此中諸相，謂即軌則、所行皆悉圓滿，於微小罪見大怖畏，受學學處應知。

未三、結歸六種

如是一種尸羅律儀現前宣說，當知六種。

如是一種尸羅律儀等者：謂如前說安住具戒、善能守護別解律儀、軌則圓滿、所行圓滿、於微小罪見大怖畏、受學學處，是名六種應知。如是一切，皆戒律儀之所攝故，名為一種尸羅律儀。

巳二、虧滿十<sup>2</sup> 午一、總標

又即如是尸羅律儀，由十因緣，當知虧損；即此相違十因緣故，當知圓滿。

午二、別釋<sup>2</sup> 未一、廣辨虧損<sup>2</sup> 申一、出十因緣<sup>3</sup> 酉一、徵

云何十種虧損因緣？

酉二、列

一者、最初惡受尸羅律儀，二者、太極沈下，三者、太極浮散，四者、放逸懈怠所攝，五者、發起邪願，六者、軌則虧損所攝，七者、淨命虧損所攝，八者、墮在二邊，九者、不能出離，十者、所受失壞。

酉三、釋<sup>10</sup>

戌一、惡受尸羅<sup>3</sup>

亥一、徵

云何名為最初惡受尸羅律儀？

亥二、釋

謂如有一，王所逼迫而求出家，或為狂賊之所逼迫、或為債主之所逼迫、或為怖畏之所逼迫、或不活畏之所逼迫而求出家。不為沙門性、不為婆羅門性、不為自調伏、不為自寂靜、不為自涅槃而求出家。

亥三、結

如是名為最初惡受尸羅律儀。



戌二、太極沈下<sup>3</sup> 亥一、徵

云何名為太極沈下？

亥二、釋

謂如有一，性無羞恥，惡作羸劣，為性慢緩，於諸學處所作慢緩。

亥三、結

如是名為太極沈下。

性無羞恥等者：性無慚愧，名無羞恥。由是因緣，若有所犯，不顧自他而生憂悔，是名惡作羸劣。性不翹勤，是名慢緩。由是因緣，若有所犯，不能如法速疾悔除，是名於諸學處所作慢緩。

戌三、太極浮散<sup>3</sup> 亥一、徵

云何名為太極浮散？

亥二、釋

謂如有一，堅執惡取，非處惡作，於不應作諸惡作中浪作惡作；非處於他起

輕懺心、或惱害心，於其非處彊生曉悟。

亥三、結

如是名為太極浮散。

堅執惡取等者：謂若見取、若戒禁取，是名惡取。即於彼取執為最勝，能得清淨，是名堅執惡取。於非所犯妄執為犯，不如正理而生憂悔，是名非處惡作。由是因緣，悔不應悔，是名於不應作諸惡作中浪作惡作。又或於他起輕懺心、或惱害心，理有相違，故名非處。於不成犯謂彼成犯，是名於其非處彊生曉悟。

戌四、放逸懈怠所攝<sup>3</sup> 亥一、徵

云何放逸懈怠所攝？

亥二、釋<sup>2</sup> 天一、放逸攝<sup>2</sup> 地一、別辨相<sup>2</sup> 玄一、三際俱行<sup>2</sup> 黃一、過去世

謂如有一，由過去世毀犯所犯；於此毀犯，由失念故，一類不能如法還淨。

黃二、餘二世<sup>2</sup> 宇一、例

如由過去，由未來世、由現在世當知亦爾。

字二、釋

謂毀犯所犯；於此毀犯，由失念故，一類不能如法還淨。

由過去世毀犯所犯等者：於五罪聚隨有所犯，是名毀犯所犯。菩薩地說：一切違犯，當知皆是惡作所攝，應向有力於語表義能覺能受小乘、大乘補特伽羅，發露悔滅。又說：應如發露除惡作法，先當稱述所犯事名，應作是說：長老專志！或言：大德！我如是名，違越菩薩毗奈耶法，如所稱事犯惡作罪。（陵本四十一卷十九頁<sup>3401</sup>）此中如法還淨，應如是知。

玄二、先時所作及俱隨行<sup>2</sup> 黃一、先時所作

又非先時，於所毀犯發起猛利無犯樂欲。謂我定當如所行、如所住，如是如是行於所行、如是如是住於所住，於所毀犯終不毀犯。

黃二、俱時隨行

由是因緣，隨所行住，如是如是毀犯所犯。

謂我定當如如所行等者：如下自說：若往、若還、若覩、若瞻、若屈、若伸、持僧伽胝及以衣鉢、若食、若飲、若噉、若嘗正知而住，由是名為於村邑等如法行時正知而住。若行、若住、若坐、若臥、若習惛寤、若語、若默、若解勞睡正知而住，由是名為於其住處如法住時正知而住。又說：若於是事、是處、是時，如量、如理、如其品類所應作者，即於此事、此處、此時，如量、如理、如其品類正知而作。（陵本二十四卷十九頁<sup>2061</sup>）此說如如所行，乃至如是如是住於所住，準彼應知。由於行住有其如量、如理、如其品類種種差別，是故作如是說。

地二、出略義

由此成就前際俱行、後際俱行、中際俱行、先時所作及俱隨行所有放逸。

天二、懈怠攝

又自執取睡眠為樂、偃臥為樂、脅臥為樂；性不翹勤；為性懶惰；不具起發；於諸有智同梵行者，不能時時觀問供事。

不具起發者：謂於一切善品加行，由無猛利樂欲，不能圓滿起發故。

亥三、結

是名放逸懈怠所攝。

戌五、發起邪願<sup>3</sup> 亥一、徵

云何名為發起邪願？

亥二、釋<sup>2</sup> 天一、求生天等

謂如有一，依止邪願修行梵行。言我所有若戒、若禁，若常精勤、若修梵行，當得生天，或餘天處。

天二、愛樂利敬

或復愛樂利養恭敬，而修梵行。謂因此故，從他希求利養恭敬；即於如是利養恭敬，深生染著。

亥三、結

如是名為發起邪願。

戌六、軌則虧損所攝<sup>3</sup> 亥一、徵

云何軌則虧損所攝？

亥二、釋

謂如有一，於威儀路、或所作事、或諸善品加行處所所有軌則，不順世間，違越世間；不順毗奈耶，違越毗奈耶。準前廣說。

亥三、結

是名軌則虧損所攝。

戌七、淨命虧損所攝<sup>3</sup> 亥一、徵

云何淨命虧損所攝？

亥二、釋<sup>2</sup> 天一、別辨相<sup>2</sup> 地一、非法追求

謂如有一，為性大欲，不知喜足，難養難滿。

為性大欲等者：謂欲令他知已有德，當有所施、當有所作，是名為性大欲。不於隨一衣服、飲食、臥具等事便生歡喜，不生知足，是名不知喜

足。不能獨一自得怡養，又復追求餘長財寶，是名難養。若得微少，或得麤敝，難自支持，是名難滿。

常以非法追求衣服、飲食、臥具、病緣醫藥及諸資具，不以正法。

常以非法追求衣服等者：此中非法，如下列釋。或依矯詐、或邪妄語、或假現相、或苦研逼、或利求利種種狀相應知。

地二、貪求方便<sup>5</sup> 玄一、依詐威儀

又為貪求種種衣服、飲食、臥具、病緣醫藥資具因緣，方便顯己有勝功德，矯詐構集非常威儀。

矯詐構集非常威儀者：此中顯示，依矯詐相而有追求，方便示現離欲者相。謂於一時身業安住，威儀進止無有躁擾，於一威儀能經時久，不多驚懼，終不數數易脫威儀，是名矯詐構集非常威儀。

為誑他故，恆常詐現諸根無掉、諸根無動、諸根寂靜，由是令他謂其有德，當有所施、當有所作。所謂承事，供給衣服、飲食、臥具、病緣醫藥及諸資

具。

恆常詐現諸根無掉等者：謂如前說，威儀進止無有躁擾，是名諸根無掉。身業安住，是名諸根無動。於一威儀能經時久，不多驚懼，終不數數易脫威儀，是名諸根寂靜。

玄二、依邪妄語

又多凶悖、彊口、矯傲、修飾其名、執恃種姓。

修飾其名執恃種姓者：不觀待義，安立假名，謂是阿羅漢等，是謂修飾其名。謂生婆羅門家是最勝種類，所餘刹帝利等是下劣種類，是名執恃種姓。此中顯示邪妄語相應知。

或求多聞，或任持法，為利養故，亦復為他宣說正法。或佛所說，或弟子說，或自宣說己實有德，或少增益。

玄三、依假現相<sup>2</sup> 黃一、舉求衣服

或於他前方便現相，為求衣服，或求隨一沙門資具。或為求多，或求精妙，



雖無匱乏，而現被服故弊衣裳，為令淨信長者、居士、婆羅門等知其衣服有所匱乏，殷重承事，給施眾多上妙衣服。

黃二、例餘資具

如為衣服，為餘隨一沙門資生眾具亦爾。

玄四、依苦研逼

或於淨信長者、居士、婆羅門所，如其所欲不得稱遂，或彼財物有所闕乏，求不得時，即便彊逼、研磨麤語，而苦求索。

玄五、依利求利

或彼財物無所闕乏，得下劣時，便對施主現前毀棄所得財物，如是告言：咄哉男子！某善男子、某善女人，方汝族姓及以財寶，極為下劣，又極貧匱，而能惠施如是如是多妙悅意資產眾具；汝望於彼，族姓尊貴，財寶豐饒，何為但施如是少劣非悅意物？

天二、出略義

彼由如是或依矯詐、或邪妄語、或假現相、或苦研逼、或利求利種種狀相，而從他所非法希求所有衣服、飲食、臥具、病緣醫藥諸資生具，非以正法而有所求。由非法故，說名邪命。

亥三、結

如是名為尸羅淨命虧損所攝。

戌八、墮在二邊<sup>3</sup> 亥一、徵

云何名為墮在二邊？

亥二、釋<sup>2</sup> 天一、極樂行邊

謂如有一，耽著受用極樂行邊，從他所得或法非法所有衣服、飲食、臥具、病緣醫藥及諸資具，愛玩受用，不觀過患、不知出離。是名一邊。

天二、自苦行邊

復有一類，好求受用自苦行邊，以無量門而自煎迫，受極苦楚。謂依棘刺、或依灰塗、或依木杵、或依木板、或狐蹲住、或狐蹲坐修斷瑜伽。或復事

火，謂乃至三承事於火。或復升水，謂乃至三升上其水。或一足住，隨日而轉。或復所餘。如是等類修自苦行，是第二邊。

亥三、結

如是名為墮在二邊。

戌九、不能出離<sup>3</sup> 亥一、徵

云何名為不能出離？

亥二、釋

謂如有一，或戒或禁由見執取。謂我因此若戒若禁，當得清淨、解脫、出離。

當得清淨解脫出離者：謂執戒禁無間方便以為清淨，名得清淨。或執以此解脫煩惱，名得解脫。或執以此出離生死，名得出離。

一切外道所有禁戒，雖善防護、雖善清淨，如其清淨，不名出離。

亥三、結

如是名為不能出離。

戌十、所受失壞<sup>3</sup> 亥一、徵

云何名為所受失壞？

亥二、釋

謂如有一，都無羞恥，不顧沙門，毀犯淨戒，習諸惡法。

習諸惡法者：此中惡法，謂極猛利無慚無愧，不信佛等，毀謗賢聖，邪見相應故；或復種種惡法現行故。如攝異門分說。（陵本八十四卷十五

頁  
6396）

內懷腐敗，外現貞實，猶如淨水所生蝸牛、螺音狗行。實非沙門，自稱沙門；實非梵行，自稱梵行。

亥三、結

如是名為所受失壞。

申二、結說異名

略由如是十種因緣，名戒虧損。世尊或說尸羅虧損，或時復說尸羅艱難。當

知於彼諸因緣中，由二因緣，謂不能出離，及所受失壞。由餘因緣，當知唯說尸羅虧損。

由二因緣等者：謂二因緣，通說尸羅虧損及與艱難。所餘因緣，唯說尸羅虧損應知。

未二、翻例相違

與此安立黑品因緣相違白品所有因緣，當知說名尸羅圓滿、尸羅清淨。

已三、六異門<sup>2</sup> 午一、引教<sup>6</sup> 未一、根本<sup>2</sup> 申一、標

有處世尊宣說尸羅名為根本。

申二、證

如伽他說：

若善住根本 其心便寂靜 因聖見惡見 相應不相應

因聖見惡見相應不相應者：謂因聖見相應，惡見不相應故，後證無作究竟涅槃，名心寂靜應知。

未二、莊嚴具<sup>2</sup> 申一、標

有處世尊宣說尸羅名莊嚴具。

申二、證

如伽他說：

苾芻苾芻尼 戒莊嚴圓滿 於不善能捨 於善能修習

未三、塗香<sup>2</sup> 申一、標

有處世尊宣說尸羅名為塗香。

申二、證

如伽他說：

苾芻苾芻尼 戒塗香圓滿 於不善能捨 於善能修習

未四、熏香<sup>2</sup> 申一、標

有處世尊宣說尸羅名為熏香。

申二、證

如伽他說：

阿難有香類 順風善能熏 逆風亦能熏 順逆熏亦爾

未五、妙行<sup>2</sup> 申一、標

有處世尊宣說尸羅名為妙行。

申二、證

如伽他說：

身妙行能感 可愛諸異熟 於現法當來 語妙行亦爾

身妙行能感可愛諸異熟於現法當來者：謂身妙行，能感可愛異熟。若順現受，名於現法；順生受等，名於當來。有尋有伺地說：諸善業亦由事重受現法果故。（陵本九卷三頁<sup>642</sup>）

未六、律儀<sup>2</sup> 申一、標

有處世尊宣說尸羅名為律儀。

申二、證<sup>2</sup> 酉一、伽他

如伽他說：

諸有惠施主 具戒住律儀 有阿笈摩見 及有果正見

有阿笈摩見及有果正見者：此中阿笈摩見，謂法住智；及果正見，謂真實智應知。法住智者，謂如佛施設開示，無倒而知。真實智者，謂如學見跡，觀甚深義。如有尋有伺地說。（陵本十卷十七頁<sup>816</sup>）

酉二、長行

復有說言：安住具戒，善能守護別解律儀，乃至廣說。

午二、釋名<sup>6</sup> 未一、根本<sup>2</sup> 申一、問

問：何緣世尊宣說尸羅名為根本？

申二、答<sup>4</sup> 酉一、標義

答：能建立義、能任持義，是根本義。

酉二、釋因

由此尸羅建立、任持一切世間及出世間，能引無罪最勝第一快樂功德，令生



令證，是故尸羅說名根本。

酉三、喻成

譬如大地，建立、任持一切藥草、卉木、叢林，令生令長。

酉四、指前

如是尸羅如前廣說。

未二、莊嚴具<sup>2</sup> 申一、問

問：何緣世尊宣說尸羅名莊嚴具？

申二、答<sup>2</sup> 酉一、釋<sup>2</sup> 戌一、舉餘世間

答：諸餘世間耳環、指環、腕釧、臂釧及以寶印、金銀、鬘等妙莊嚴具。若有成就幼稚、黑髮、少年、盛壯、姝妙形色而服飾之，少增妙好。非有成就朽老、衰邁、齒落、髮白、年逾八十或九十者而服飾之，當有妙好。唯除俳優令眾歡笑。若遭病苦、財貨匱乏、親戚喪亡，當爾服之，亦無妙好。

戌二、顯戒殊勝

戒莊嚴具，於一切類、於一切時，若有服者皆為妙好。

酉二、結

是故尸羅名莊嚴具。

未三、塗香<sup>2</sup> 申一、問

問：何緣世尊宣說尸羅名為塗香？

申二、答<sup>2</sup> 酉一、釋<sup>2</sup> 戌一、顯因

答：由此所受清淨無罪妙善尸羅，能正除遣一切所受惡戒為因身心熱惱。

戌二、舉喻

譬如最極炎熾熱時，塗以栴檀龍腦香等，一切鬱蒸皆得除滅。

酉二、結

是故尸羅說名塗香。

未四、熏香<sup>2</sup> 申一、問

問：何緣世尊宣說尸羅名為熏香？

申二、答<sup>2</sup> 酉一、釋<sup>2</sup> 戌一、顯因

答：具戒士夫補特伽羅，遍諸方域，妙善稱譽聲頌普聞。

戌二、舉喻

譬如種種根莖香等，隨風飄颺遍諸方所，悅意芬馥，周流彌遠。

酉二、結

是故尸羅名為熏香。

遍諸方域妙善稱譽聲頌普聞者：為顯前頌名順能熏、逆能熏，及順逆熏，故此釋言遍諸方域，非餘香類有此能故。

未五、妙行<sup>2</sup> 申一、問

問：何緣世尊宣說尸羅名為妙行？

申二、答

答：由此尸羅清淨善行，能趣妙樂，往妙天趣，向妙安隱，故名妙行。

未六、律儀<sup>2</sup> 申一、問

問：何緣世尊宣說尸羅名為律儀？

申二、答

答：由此尸羅清淨善法，是防護性，是息除相，是遠離體，故名律儀。

是防護性等者：性能防護惡不善法，名防護性。止息不善業道所生諸不善業，名息除相。棄捨不律儀思，與信等五善根俱行，名遠離體。

巳四、三淨<sup>4</sup> 午一、標

又戒律儀有三種觀清淨因相。

午二、徵

何等為三？

午三、列

一、觀身業，二、觀語業，三、觀意業。

午四、釋<sup>2</sup> 未一、辨相<sup>3</sup> 申一、徵

云何觀察如是諸業，令戒律儀皆得清淨？

申二、辨<sup>2</sup>

酉一、觀身語業<sup>2</sup>

戌一、舉身業<sup>2</sup>

亥一、辨<sup>2</sup>

天一、於現末世<sup>2</sup>

地

### 一、觀察

謂希當造及欲正造身作業時，如是觀察：我此身業為能自損，及以損他，是不善性，能生眾苦，招苦異熟？為不自損，亦不損他，是其善性，能生諸樂，招樂異熟？

地二、清淨

如是觀已。若自了知我此身業，自損損他，是不善性，能生眾苦，招苦異熟；即於此業攝斂不作，亦不與便。若自了知我此身業，不損自他，是其善性，餘如前說；即於此業而不攝斂、造作、與便。

天二、於過去世<sup>2</sup>

地一、觀察

復於過去已造身業亦數觀察：我此身業為能自損，餘如前說。

地二、清淨

如是觀已。若自了知我此身業，自損損他，餘如前說；便於有智同梵行所，

如實發露，如法悔除。若自了知我此身業，不損自他，餘如前說；便生歡喜，晝夜安住，多隨修學。

亥二、結

如是彼於去來今世所造身業，能善觀察、能善清淨。

戌二、例語業

如於身業，於其語業，當知亦爾。

酉二、觀意業<sup>2</sup>

戌一、辨<sup>2</sup>

亥一、觀察

由過去行為緣生意，由未來行為緣生意，由現在行為緣生意，即於此意數數觀察：我此意業為能自損，餘如前說。

亥二、清淨

如是觀已。若自了知我此意業是其黑品，即於此業攝斂不起，不與其便。若自了知我此意業是其白品，即於此業而不斂攝、發起、與便。

戌二、結

如是於彼去來今世所起意業，能善觀察、能善清淨。

申三、證<sup>2</sup> 酉一、舉賢聖

所以者何？去來今世所有沙門、若婆羅門，於身語意三種業中，或已觀察、或當觀察、或正觀察，或已清淨、或當清淨、或正清淨，或已多住、或當多住、或正多住，一切皆由如是觀察、如是清淨。

酉二、引聖教

如佛世尊曾為長老囉怛羅說：

汝今囉怛羅 於身語意業 應數正觀察 念諸佛聖教

囉怛羅汝應 學是沙門業 若能於此學 唯勝善無惡

未二、略義<sup>2</sup> 申一、觀察

若於如是身語意業審正思擇，我此諸業為能自損，廣說如前，是名觀察。

申二、清淨

若於一分攝斂不作，亦不與便，廣說乃至發露悔除。復於一分而不斂攝，造

作與便，廣說乃至便生歡喜，晝夜安住，多隨修學。是名清淨。

已五、十勝功德<sup>3</sup> 午一、標

如是清淨尸羅律儀，應知有十功德勝利。

午二、徵

何等為十？

午三、釋<sup>10</sup> 未一、第一勝利<sup>2</sup> 申一、辨

謂諸所有具戒士夫補特伽羅，自觀戒淨，便得無悔；無悔故歡；歡故生喜；由心喜故，身得輕安；身輕安故，便受勝樂；樂故心定；心得定故，能如實知、能如實見；實知見故，便能起厭；能起厭故，便得離染；由離染故，證得解脫；得解脫故，便自知見我已解脫，乃至我能於無餘依般涅槃界當般涅槃。

申二、結

如是所有具戒士夫補特伽羅，尸羅清淨增上力故，獲得無悔，漸次乃至能到



涅槃。是名第一尸羅律儀功德勝利。

未二、第二勝利<sup>2</sup> 申一、辨

復有所餘具戒士夫補特伽羅，於臨終時起如是念：我已善作身語意行，非我惡作身語意行，乃至廣說。若有其趣，作福業者、作善業者、作能救濟諸怖畏者之所應往，我於斯趣必定當往。

申二、結

如是獲得能往善趣第二無悔。由無悔恨所有士夫補特伽羅，名賢善死、賢善天逝、賢善過往。是名第二尸羅律儀功德勝利。

未三、第三勝利

復有所餘具戒士夫補特伽羅，遍諸方域，妙善稱譽聲頌普聞。是名第三尸羅律儀功德勝利。

未四、第四勝利

復有所餘具戒士夫補特伽羅，寢安、恬安，遠離一切身心熱惱。是名第四尸

羅律儀功德勝利。

未五、第五勝利

復有所餘具戒士夫補特伽羅，若寢、若怙，諸天保護。是名第五尸羅律儀功德勝利。

未六、第六勝利

復有所餘具戒士夫補特伽羅，於他凶暴不慮其惡，無諸怖畏，心離驚恐。是名第六尸羅律儀功德勝利。

未七、第七勝利

復有所餘具戒士夫補特伽羅，諸喜殺者、怨讎惡友，雖得其隙，亦常保護，了知此是具戒士夫補特伽羅，或為善友，或住中平。是名第七尸羅律儀功德勝利。

未八、第八勝利

復有所餘具戒士夫補特伽羅，一切魍魎、藥叉、宅神、非人之類，雖得其

便、雖得其隙，而常保護。謂具尸羅增上力故。是名第八尸羅律儀功德勝利。

未九、第九勝利<sup>3</sup> 申一、標

復有所餘具戒士夫補特伽羅，法無艱難，從他獲得種種利養。

申二、釋

所謂衣服、飲食、臥具、病緣醫藥及諸資具。由依尸羅增上因力，國王、大臣，及諸黎庶、饒財長者，及商主等恭敬尊重。

申三、結

是名第九尸羅律儀功德勝利。

未十、第十勝利<sup>3</sup> 申一、標

復有所餘具戒士夫補特伽羅，一切所願皆得稱遂。

申二、釋<sup>4</sup> 酉一、生欲人天

若於欲界，願樂當生或剎帝利大族姓家、或婆羅門大族姓家、或諸居士大族

姓家、或諸長者大族姓家、或四大王眾天、或三十三天、或夜摩天、或覩史多天、或樂化天、或他化自在天眾同分中，由戒淨故，即隨所願當得往生。

酉二、往生有色

若復願樂入諸靜慮現法樂住，或有色天眾同分中若住、若生，由戒淨故，便得離欲，所願皆遂。

酉三、往生無色

若復願樂寂靜勝解，超過色定，入無色定具足安住，或無色天眾同分中當得往生，餘如前說。

酉四、證極涅槃

若復願樂當證最極究竟涅槃，由戒淨故，便證一切究竟離欲。

申三、結

是名第十尸羅律儀功德勝利。

辰二、結勸修學<sup>2</sup> 巳一、牒略義

如是已說戒蘊廣辯、戒蘊虧損、戒蘊圓滿、戒蘊異門、戒蘊觀察及以清淨、戒蘊所有功德勝利。

已二、勸修學

於此宣說明了開示一切種相，最極圓滿資糧所攝尸羅律儀。若有自愛樂沙門性、婆羅門性諸善男子，應勤修學。

於此宣說明了開示一切種相等者：如前已說戒蘊廣辯乃至功德勝利，是名一切種相。又由戒淨能趣無作究竟涅槃，是名最極圓滿資糧所攝。

瑜伽師地論科句披尋記卷第二十二



## 瑜伽師地論科句披尋記卷第二十三

彌勒菩薩說

唐三藏沙門玄奘奉詔譯

韓清淨科記

本地分中聲聞地初瑜伽處出離地品第三之二

寅二、根律儀<sup>3</sup> 卯一、廣分別相<sup>3</sup> 辰一、徵

云何根律儀？

辰二、標

謂如有一，能善安住密護根門，防守正念，常委正念，乃至廣說。

辰三、釋<sup>2</sup> 巳一、依標別顯<sup>5</sup> 午一、密護根門<sup>3</sup> 未一、徵

云何名為密護根門？

未二、釋

謂防守正念，常委正念，廣說乃至防護意根，及正修行意根律儀。

未三、結

如是名為密護根門。

午二、防守正念<sup>3</sup> 未一、徵

云何名為防守正念？

未二、釋<sup>2</sup> 申一、獲正念

謂如有一，密護根門增上力故，攝受多聞、思惟、修習。由聞思修增上力故，獲得正念。

密護根門增上力故等者：此顯根為依處，與聞思修為攝受因。密護根故，聞思修慧依之得生，是名攝受多聞、思惟、修習。

申二、能防守

為欲令此所得正念無忘失故，能趣證故，不失壞故。於時時中，即於多聞、若思、若修，正作瑜伽，正勤修習，不息加行、不離加行。

未三、結



如是由此多聞思修所集成念，於時時中，善能防守正聞思修瑜伽作用。如是名為防守正念。

正作瑜伽等者：如下自說瑜伽有四。一、信，二、欲，三、精進，四、方便。（陵本二十八卷九頁<sup>2354</sup>）當知此中，初由信故，於應得義深生信解，信應得已，於諸善法生起樂欲，是名正作瑜伽。由樂欲故，晝夜策勵，安住精勤堅固勇猛，是名正勤修習。發精進已，攝受方便，是名不息加行、不離加行。

午三、常委正念<sup>2</sup> 未一、徵

云何名為常委正念？

未二、釋<sup>2</sup> 申一、別辨相<sup>3</sup> 酉一、標

謂於此念恆常所作、委細所作。

酉二、辨

當知此中，恆常所作，名無間作；委細所作，名殷重作。

酉三、結

即於如是無間所作、殷重所作，總說名為常委正念。

申二、顯功能

如其所有防守正念，如是於念能不忘失；如其所有常委正念，如是即於無忘失念得任持力。即由如是功能勢力，制伏色聲香味觸法。

午四、念防護意<sup>3</sup> 未一、徵

云何名為念防護意？

未二、釋<sup>2</sup> 申一、五無間意<sup>2</sup> 酉一、舉眼識

謂眼色為緣生眼識，眼識無間生分別意識；由此分別意識，於可愛色色將生染著，於不可愛色色將生憎恚。即由如是念增上力，能防護此非理分別起煩惱意，令其不生所有煩惱。

酉二、例餘識

如是耳鼻舌身廣說，當知亦爾。

由此分別意識等者：如五識身相應地說：由眼識生，三心可得。如其次第，謂率爾心、尋求心、決定心。初是眼識，二在意識。決定心後方有染淨。此後乃有等流眼識善不善轉。（陵本一卷九頁<sup>31</sup>）此說分別意識，當知即是尋求、決定二心，與眼識俱，分別眼所識色，執取相好，由是或能起貪，或能起瞋，是即染淨心中一分染心。由此眼識無間俱生分別意識，於眼所識色能起貪故，名於可愛色將生染著。能起瞋故，名於不可愛色將生瞋恚。為簡意識唯自所緣可愛、不可愛色法，是故此說可愛、不可愛色。

申二、自染汙意

意法為緣生意識，即此意識有與非理分別俱行，能起煩惱；由此意識，於可愛色法將生染著，於不可愛色法將生憎恚。亦由如是念增上力，能防護此非理分別起煩惱意，令其不生所有煩惱。

未三、結

如是名為念防護意。

由此意識於可愛色法等者：此中意識不與眼識俱生，唯緣過去、未來可愛色事，不緣現在，是故此說可愛、不可愛色法。餘如前釋。

午五、行平等位<sup>3</sup> 未一、徵

云何名為行平等位？

未二、釋

平等位者，謂或善捨、或無記捨。由彼於此非理分別起煩惱意善防護已，正行善捨、無記捨中，由是說名行平等位。

未三、結

如是名為行平等位。

謂或善捨或無記捨者：此中善捨，善法所攝。決擇分說：捨是無貪、無瞋、無癡、精進分故，即如是法離雜染義，建立為捨。（陵本五十五卷五頁<sup>4407</sup>）無記捨者，謂不苦不樂受應知。

巳二、廣辨二相<sup>3</sup> 午一、總舉<sup>2</sup> 未一、能善防護<sup>3</sup> 申一、徵

云何於此非理分別起煩惱意能善防護？

申二、釋<sup>2</sup> 酉一、防護諸根

謂於色聲香味觸法，不取其相，不取隨好，終不依彼發生諸惡不善尋思，令心流漏。

酉二、修根律儀

若彼有時忘失念故，或由煩惱極熾盛故，雖離取相及取隨好，而復發生惡不善法，令心流漏，便修律儀。

申三、結

由是二相，故能於此非理分別起煩惱意能善防護。

未二、正行平等<sup>3</sup> 申一、徵

云何此意由是二相善防護已，正行善捨或無記捨？

申二、釋<sup>3</sup> 酉一、標

謂即由是二種相故。

酉二、徵

云何二相？

酉三、釋<sup>2</sup> 戌一、舉眼

謂如所說防護眼根，及正修行眼根律儀。

戌二、例餘

如說眼根防護律儀，防護耳鼻舌身意根，及正修行意根律儀，當知亦爾。

申三、結

由是二相，於其善捨、無記捨中，令意正行。

午二、隨釋<sup>3</sup> 未一、不取相及隨好<sup>2</sup> 申一、別辨相<sup>2</sup> 酉一、第一類<sup>2</sup> 戌一、不取

其相<sup>2</sup> 亥一、舉眼所識色<sup>2</sup> 天一、徵

云何於眼所識色中不取其相？

天二、釋<sup>2</sup> 地一、反顯

言取相者，謂於眼識所行色中，由眼識故取所行相，是名於眼所識色中執取其相。

地二、正成

若能遠離如是眼識所行境相，是名於眼所識色中不取其相。

亥二、例耳所識等

如於其眼所識色中，如是於耳鼻舌身意所識法中，當知亦爾。

云何於眼所識色中不取其相等者：此顯意識不取眼識所行境相，名不取相。當知此中，言取相者，謂即意識與眼識俱，執取前說可愛、或不可愛色色，是故說言由眼識故取所行相。眼識無間意識生故。如五識身相應地說：顯色、形色、表色，是眼識所行、眼識境界、眼識所緣，亦是意識所行、境界、所緣。（陵本一卷六頁<sup>15</sup>）境相差別，如是應知。

戌二、不取隨好<sup>2</sup> 亥一、舉眼所識色<sup>2</sup> 天一、徵

云何於眼所識色中不取隨好？

天二、釋<sup>2</sup> 地一、反顯

取隨好者，謂即於眼所識色中，眼識無間俱生分別意識，執取所行境相，或能起貪、或能起瞋、或能起癡，是名於眼所識色中執取隨好。

地二、正成

若能遠離此所行相，於此所緣不生意識，是名於眼所識色中不取隨好。

亥二、例耳所識等

如於其眼所識色中，如是於耳鼻舌身意所識法中，當知亦爾。

云何於眼所識色中不取隨好等者：此顯意識不取色相所有隨好。當知此中，言隨好者，謂由分別意識，於彼色相種種分別之所引發，唯是意識所行、意識境界、意識所緣。

酉二、第二類<sup>2</sup> 戌一、總標

復有餘類執取其相、執取隨好。

戌二、別辨<sup>2</sup> 亥一、舉眼所識色<sup>2</sup> 天一、取相<sup>2</sup> 地一、釋



言取相者，謂色境界在可見處，能生作意正現在前，眼見眾色。

地二、結

如是名為執取其相。

天二、取隨好<sup>2</sup> 地一、釋

取隨好者，謂即色境在可見處，能生作意正現在前，眼見色已；然彼先時從他聞有如是如是眼所識色，即隨所聞名句文身，為其增上為依為住，如是士夫補特伽羅，隨其所聞，種種分別眼所識色。

地二、結

如是名為執取隨好。

亥二、例耳所識等

如於其眼所識色中，如是於耳鼻舌身意所識法中，當知亦爾。

申二、應思擇<sup>2</sup> 酉一、辨種類

又此取相及取隨好，或有由此因緣、由此依處、由此增上，發生種種惡不善

法，令心流漏；或有由此因緣、由此依處、由此增上，不生種種惡不善法，令心流漏。

酉二、明遠離

若於此中執取其相，執取隨好，不如正理，由此因緣、由此依處、由此增上，發生種種惡不善法，令心流漏。彼於如是色類境界，遠離取相及取隨好。

未二、惡不善法<sup>3</sup> 申一、徵

云何名為惡不善法？

申二、釋

謂諸貪欲，及貪所起諸身惡行、諸語惡行、諸意惡行；若諸瞋恚、若諸愚癡，及二所起諸身惡行、諸語惡行、諸意惡行。

申三、結

是名種種惡不善法。

未三、令心流漏<sup>3</sup> 申一、徵

云何由彼令心流漏？

申二、釋

謂若於彼彼所緣境界，心、意、識生，遊行流散；即於彼彼所緣境界，與心、意、識種種相應，能起所有身語惡行貪瞋癡生，遊行流散。

申三、結

是名由彼令心流漏。

云何由彼令心流漏等者：謂於彼彼所緣境界生貪瞋癡，遊行流散，由是能令彼相應心亦於所緣遊行流散，是故說言令心流漏。為顯非心、意、識自性雜染能生過失，故作是說。

午三、結義<sup>2</sup> 未一、辨差別<sup>2</sup> 申一、防護諸根

如是於眼所識色中，乃至於意所識法中，執取其相及取隨好，由是發生種種雜染；彼於取相及取隨好能遠離故，便不發生種種雜染。

申二、修行律儀

若由忘念，或由煩惱極熾盛故，雖獨閑居，由先所見眼所識色增上力故，或先所受耳鼻舌身意所識法增上力故，發生種種惡不善法，隨所發生而不執著，尋便斷滅、除棄、變吐，是名於彼修行律儀。

尋便斷滅除棄變吐者：令彼現行不相續故，是名斷滅。令彼諸纏不現行故，是名除棄。令彼種子不隨逐故，是名變吐。

未二、辨隨應<sup>2</sup>

申一、應策發<sup>2</sup>

酉一、作意策發

若於其眼所識色中，應策眼根；及於其耳鼻舌身意所識法中，應策意根；即便於彼作意策發。如是策發，令不雜染。

酉二、結名防護

由是因緣，於此雜染防護眼根，廣說乃至防護意根；如是名為防護眼根，廣說乃至防護意根。

申二、不應策發<sup>2</sup>

酉一、遍不策發

若於其眼所識色中，不應策發所有眼根，及於其耳鼻舌身意所識法中，不應策發所有意根；即便於彼遍一切種而不策發。不策發故，令不雜染。

## 酉二、結修律儀

由是因緣，於此雜染修根律儀。如是名為能正修行眼根律儀，廣說乃至能正修行意根律儀。

若於其眼所識色中應策眼根等者：如下自說：復於已往或正往時，觀見眾色，於此眾色一分應觀，或有一分所不應觀。於不應觀所有眾色，當攝其眼，善護諸根；於所應觀所有眾色，應善住念而正觀察。（陵本二十四卷十六頁<sup>2052</sup>）此中於所識色應策眼根者，謂於一類所應觀色，如諸所有衰老朽邁上氣者身、傴僂憑杖戰掉者身、或諸疾苦重病者身，乃至廣說。又於所識色不應策發眼根者，謂於一類不應觀色，如諸妓樂戲笑歡娛，或餘遊戲所作歌舞音樂等事，乃至廣說。由應觀色，令不雜染，是故應策眼根。不應觀色，能令雜染，是故不應策發眼根。由是道理，所餘諸根，於所行

境，或應策發、或不應策，當知亦爾。

卯二、出二略義<sup>2</sup> 辰一、結前生後

如是應知己廣分別根律儀相。云何當知此中略義？

辰二、略辨二種<sup>2</sup> 巳一、第一略義<sup>2</sup> 午一、總標

此略義者，謂若能防護、若所防護、若從防護、若如防護、若正防護。如是  
一切，總略為一，名根律儀。

午二、別釋<sup>5</sup> 未一、能防護<sup>2</sup> 申一、徵

今於此中誰能防護？

申二、釋

謂防守正念，及所修習常委正念，是能防護。

未二、所防護<sup>2</sup> 申一、徵

何所防護？

申二、釋

謂防護眼根，防護耳鼻舌身意根，是所防護。

未三、從防護<sup>2</sup> 申一、徵

從何防護？

申二、釋

謂從可愛、不可愛色，廣說乃至從其可愛、不可愛法而正防護。

未四、如防護<sup>2</sup> 申一、徵

如何防護？

申二、釋

謂不取相、不取隨好。若依是處發生種種惡不善法，令心流漏，即於此處修行律儀。防守根故，名修律儀。如是防護。

未五、正防護<sup>2</sup> 申一、徵

何者正防護？

申二、釋

謂由正念，防護於意，行平等位，是名正防護。

巳二、第二略義<sup>2</sup> 午一、總標

又略義者，謂若防護方便、若所防護事、若正防護。如是一切總略為一，名根律儀。

午二、別釋<sup>3</sup> 未一、防護方便<sup>3</sup> 申一、徵

此中云何防護方便？

申二、釋

謂防守正念，常委正念。眼見色已，不取其相，不取隨好；廣說乃至意知法已，不取其相，不取隨好。若依是處發生種種惡不善法，令心流漏，即於是處修行律儀。防守根故，名修律儀。

申三、結

如是名為防護方便。

未二、所防護事<sup>3</sup> 申一、徵



云何名為所防護事？

申二、釋

所謂眼色，乃至意法。

申三、結

如是名為所防護事。

未三、正防護<sup>3</sup> 申一、徵

此中云何名正防護？

申二、釋

謂如說言：由其正念，防護於意，行平等位。

申三、結

名正防護。

卯三、辨二所攝<sup>5</sup> 辰一、標

又根律儀略有二種。

辰二、列

一者、思擇力所攝，二者、修習力所攝。

辰三、釋<sup>2</sup> 巳一、第一義<sup>2</sup> 午一、思擇力所攝

思擇力所攝根律儀者，謂於境界深見過患，不能於此所有過患除遣斷滅。

午二、修習力所攝

修習力所攝根律儀者，謂於境界深見過患，亦能於此所有過患除遣斷滅。

巳二、第二義<sup>2</sup> 午一、思擇力所攝

又由思擇力所攝根律儀故，於所緣境，令煩惱纏不復生起、不復現前；而於依附所依隨眠，不能斷除、不能永拔。

午二、修習力所攝

由修習力所攝根律儀故，於所緣境，煩惱隨眠不復生起、不復現前；一切時分，依附所依所有隨眠，亦能斷除、亦能永拔。

辰四、結

如是思擇力所攝根律儀、修習力所攝根律儀，有此差別，有此意趣，有此殊異。

辰五、簡

當知此中，思擇力所攝根律儀，是資糧道所攝；修習力所攝根律儀，當知墮在離欲地攝。

有此差別等者：前說初義、後義二門差別，名此差別。為欲除遣、斷滅、變吐，而修律儀，名此意趣。即彼二力所攝無能、有能，名此殊異。

寅三、於食知量<sup>4</sup> 卯一、徵

云何名為於食知量？

卯二、標

謂如有一，由正思擇食於所食，不為倡蕩、不為憍逸、不為飾好、不為端嚴，乃至廣說。

乃至廣說者：如前已說然食所食，為身安住、為暫支持、為除饑渴、為攝

梵行、為斷故受、為令新受當不更生、為當存養力樂無罪安隱而住，即此廣說應知。

卯三、釋<sup>2</sup> 辰一、廣辨<sup>2</sup> 巳一、辨<sup>6</sup> 午一、由正思擇食於所食<sup>2</sup> 未一、徵

云何名為由正思擇食於所食？

未二、釋<sup>2</sup> 申一、思擇<sup>3</sup> 酉一、觀諸過患<sup>5</sup> 戌一、標

正思擇者，如以妙慧等隨觀察段食過患。

如以妙慧等隨觀察段食過患者：如下說有三種過患，謂受用種類過患、變異種類過患、追求種類過患。觀此一切，或觀隨一，是名等隨觀察段食過患。

見過患已，深生厭惡，然後吞咽。

戌二、徵

云何名為觀見過患？

戌三、列

謂即於此所食段食，或觀受用種類過患、或觀變異種類過患、或觀追求種類過患。

戌四、釋<sup>3</sup> 亥一、受用種類過患<sup>3</sup> 天一、徵

云何受用種類過患？

云何受用種類過患者：吞咽段物，是名受用。於爾所時，有其非一可惡穢相，是名受用種類過患。

天二、釋<sup>2</sup> 地一、明種類

謂如有一，將欲食時，所受段食色香味觸皆悉圓滿，甚為精妙。從此無間進至口中，牙齒咀嚼，津唾浸爛，涎液纏裹，轉入咽喉。爾時此食先曾所有悅意妙相一切皆捨，次後轉成可惡穢相，當轉異時，狀如變吐。

地二、觀過患

能食士夫補特伽羅，若正思念此位穢相，於餘未變一切精妙所受飲食，初尚不能住食欣樂，況於此位。由如是等非一相貌漸次受用增上力故，令其飲食

淨妙相沒，過患相生，不淨所攝。

天三、結

是名於食受用種類所有過患。

亥二、轉變種類過患<sup>3</sup> 天一、徵

云何轉變種類過患？

云何轉變種類過患者：謂食所食，或變不淨，或生疾病，或不銷住，是名轉變種類過患。

天二、釋<sup>2</sup> 地一、明種類

謂此飲食既噉食已，一分銷變，至中夜分或後夜分，於其身中，便能生起養育增長血肉筋脈骨髓皮等非一眾多種種品類諸不淨物。次後一分變成便穢，變已趣下展轉流出。

地二、觀過患<sup>3</sup> 玄一、不淨可厭

由是日日數應洗淨。或手、或足、或餘支節誤觸著時，若自若他皆生厭惡。

玄二、多疾病生<sup>3</sup> 黃一、標

又由此緣，發生身中多種疾病。

黃二、釋

所謂癰瘰、乾癬、濕癬、疥癩、疽疔、上氣、疥嗽、皰漿、噦噎、乾銷、癰、寒熱、黃病、熱血、陰瘧。

黃三、結

如是等類無量疾病，由飲食故，身中生起。

玄三、不銷而住

或由所食不平和故，於其身中不銷而住。

天三、結

是名飲食變異種類所有過患。

亥三、追求種類過患<sup>4</sup> 天一、徵

云何追求種類過患？

天二、標

謂於飲食追求種類有多過患。

天三、列

或有積集所作過患，或有防護所作過患，或壞親愛所作過患，或無厭足所作過患，或不自在所作過患，或有惡行所作過患。

天四、釋<sup>6</sup> 地一、積集過患<sup>3</sup> 玄一、徵

云何名為於食積集所作過患？

玄二、釋<sup>2</sup> 黃一、寒熱逼惱<sup>2</sup> 宇一、舉為飲食

謂如有一，為食因緣，寒時為寒之所逼惱，熱時為熱之所逼惱，種種策勵劬勞勤苦。營農、牧牛、商賈、計算、書數、雕印，及餘種種工巧業處，為得未得所有飲食，或為積聚。

宇二、例飲食緣

如為飲食，為飲食緣，當知亦爾。



為飲食緣者：如有頌言：田事與金銀，牛馬珠環釧，女僕增諸欲，是人所耽樂。（陵本十九卷二十一頁<sup>1686</sup>）如是一切，名飲食緣應知。

黃二、不遂愁憂

如是策勵劬勞勤苦，方求之時，所作事業若不諧遂；由是因緣，愁憂焦惱、拊胸傷歎、悲泣迷悶，何乃我功唐捐無果？

玄三、結

如是名為於食積集所作過患。

地二、防護過患<sup>3</sup> 玄一、徵

云何名為於食防護所作過患？

玄二、釋

謂所作業若得諧遂，為護因緣起大憂慮：勿我財寶當為王賊之所侵奪，或火焚燒，或水漂蕩，或宿惡作當令滅壞，或現非理作業方便當令散失，

或宿惡作等者：宿不善業為因，名宿惡作。現邪方便為緣，名現非理作業

方便。

或諸非愛、或宿共財當所理奪，

或諸非愛等者：怨讎惡友，名諸非愛。若諸財物從本以來與他共有，名宿共財。由是為因，慮為他奪，是名當所理奪。

或即家中當生家火，由是當令財寶虧損。

玄三、結

如是名為於食防護所作過患。

地三、能壞親愛過患<sup>4</sup> 玄一、徵

云何於食能壞親愛所作過患？

玄二、標

謂諸世間，為食因緣多起鬥諍。父子、母女、兄弟、朋友尚為飲食互相非毀，況非親里為食因緣而不展轉更相鬥訟。

玄三、釋

所謂大族諸婆羅門、刹帝利種、長者、居士，為食因緣迭興違諍，以其手足塊刀杖等互相加害。

玄四、結

是名於食能壞親愛所作過患。

地四、無有厭足過患<sup>3</sup> 玄一、徵

云何於食無有厭足所作過患？

玄二、釋

謂諸國王刹帝利種，位登灌頂，亦於自國王都聚落不住喜足，俱帥兵戈，互相征討。吹以貝角，扣擊鐘鼓，揮刀、槃稍、放箭、攢矛，車馬象步交橫馳亂；種種戈仗傷害其身，或便致死，或等死苦。復有所餘如是等類。

玄三、結

是名於食無有厭足所作過患。

地五、不得自在過患<sup>3</sup> 玄一、徵

云何因食不得自在所作過患？

玄二、釋

謂如一類，為王所使，討固牢城，因遭種種極熱脂油、熱牛糞汁及鎔銅鐵而相注灑，或被戈仗傷害其身，或便致死，或等死苦。復有所餘如是等類。

玄三、結

是名因食不得自在所作過患。

地六、起諸惡行過患<sup>3</sup> 玄一、徵

云何因食起諸惡行所作過患？

玄二、釋<sup>2</sup> 黃一、明惡行<sup>2</sup> 宇一、舉身

謂如有一，為食因緣，造作積集身諸惡行。

宇二、例餘

如身惡行，語、意亦爾。

黃二、顯過患<sup>2</sup> 宇一、命終憂悔

臨命終時，為諸重病苦所逼切。由先所作諸身語意種種惡行增上力故，於日後分，見有諸山、或諸山峰垂影懸覆、近覆、極覆。

於日後分見有諸山等者：意地中說：若有先作惡不善業及增長已，彼於爾時，如日後分，或山山峰影等懸覆、遍覆、極覆。當知如是補特伽羅從明趣闇。（陵本一卷十五頁<sup>74</sup>）義應準知。謂日後分，彼日光明為山山峰影所障覆，如如漸次，有初中後障覆之相。若於初位，日未遍覆，但為山峰覆其少分，是名懸覆。於此位中，闇相輕微。次於中位，日已為山之所近覆，闇相轉重。乃至後位，闇相極重，故名極覆。如是從明趣闇，漸次位別，道理亦爾。

便作是念：我自昔來依身語意所造諸業，唯罪非福。若有其趣，諸造惡者當生其中，我今定往。如是悔已，尋即捨命。

字二、墮諸惡趣

既捨命已，隨業差別生諸惡趣。謂那落迦、傍生、餓鬼。

玄三、結

如是名為因食惡行所作過患。

戌五、結

如是段食，於追求時有諸過患，於受用時有諸過患，於轉變時有諸過患。

酉二、觀少勝利<sup>4</sup> 戌一、標

又此段食有少勝利。

戌二、徵

此復云何？

戌三、釋

謂即此身由食而住，依食而立，非無有食。

謂即此身由食而住者：謂食與身能為任持，是名由食而住。食所建立，是名依食而立。

戌四、廣<sup>2</sup> 亥一、徵

云何名為有少勝利？

亥二、釋<sup>2</sup> 天一、總標身住

謂即如是依食住身，最極久住或經百年。若正將養，或過少分，或有未滿而便夭沒。

天二、略簡差別<sup>2</sup> 地一、修暫住行

若唯修此身暫住行，非為妙行；若於如是身暫時住而生喜足，非妙喜足，亦非領受飲食所作圓滿無罪功德勝利。

若唯修此身暫住行者：聞所成地說：一切有情住有三種。謂日別住、盡壽住、善法可愛生展轉住。（陵本十三卷二十二頁<sup>1160</sup>）當知此中，言暫住者，即日別住，謂由段食增上力故。

地二、修集梵行

若不唯修身暫住行，亦不唯於身暫時住而生喜足，而即依此暫時住身，修集梵行令得圓滿，乃為妙行，亦妙喜足。

若不唯修身暫住行等者：此中義顯應修善法可愛生展轉住，故說不唯修暫住行，及於暫住而生喜足。由是善法為因緣故，於現法中乃至能般涅槃，於後法中能往善趣，多有所作；是故此說修集梵行令得圓滿，乃為妙行，亦妙喜足。

又能領受飲食所作圓滿無罪功德勝利。

西三、思擇諸相<sup>2</sup> 戌一、辨<sup>2</sup> 亥一、遮非所宜

應自思惟：我若與彼愚夫同分，修諸愚夫同分之行，非我所宜；我若於此下劣段食少分勝利安住喜足，亦非我宜。

又能領受飲食所作圓滿無罪功德勝利者：謂如下說，為當存養力樂無罪安隱而住食於所食應知。

亥二、顯正所宜<sup>5</sup> 天一、應求出離

若於如是遍一切種段食過患圓滿知己，以正思擇，深見過患，而求出離。

天二、應念報恩



為求如是食出離故，如子肉想，食於段食。應作是念：彼諸施主，甚大艱難積集財寶，具受廣大追求所作種種過患。由悲愍故，求勝果故，如割皮肉及以刺血，而相惠施。

由悲愍故者：謂彼施主於行者所起哀愍心故。如前已說他所哀愍應知。我得此食，宜應如是方便受用。謂應如法而自安處，無倒受用，報施主恩，令獲最勝大果、大利、大榮、大盛。

謂應如法而自安處等者：謂若精勤修習如理作意，住沙門性、住出家性，是名如法而自安處。不染、不住、不耽、不縛、不悶、不著，亦不堅執，深見過患，了知出離，而受用之，是名無倒受用。修習如是正法行時，即是法爾報施主恩，由不虛受信施，令他生最勝福故。又由能作有情義利利益安樂，是名令他獲大果、大利、大榮、大盛。

天三、應離染汙

當隨月喻往施主家，盪滌身心，安住慚愧，遠離憍傲，

當隨月喻往施主家等者：謂往施主家時，成就威儀，軌則圓滿，不求利養，不希恭敬，是名盪滌身心。其性澄清，遠離熱惱，故喻如月。

不自高舉，不輕懷他。如自獲得所有利養，心生喜悅，如是於他所得利養，心亦喜悅。

不自高舉不輕懷他等者：由不自恃及不懷他，是故於他所得利養，如自獲得，心生喜悅。

天四、應離嫌恨<sup>2</sup> 地一、遮非

又應如是自持其心往施主家。豈有出家往詣他所，要望他施非不惠施，要望他敬非不恭敬，要多非少，要妙非麤，要當速疾而非遲緩。

地二、顯正

應作是心，往施主家：設不惠施，終不於彼起怨害心及瞋恚心而相嫌恨。勿我由此起怨害心及瞋恚心增上緣力，身壞已後生諸惡趣，多受困厄。設不恭敬而非恭敬，設少非多，設麤非妙，設復遲緩而非速疾，亦不於彼起怨害心

及瞋恚心而相嫌恨。如前廣說。

天五、應知其量<sup>3</sup> 地一、標

又我應依所食段食，發起如是如是正行，及於其量如實了達。

地二、釋

謂我命根由此不滅，又於此食不苦耽著，纔能隨順攝受梵行。

發起如是如是正行等者：謂如前說，以正思擇，深見過患，而求出離，乃至廣說。是名發起如是如是正行。又如下說，為身安住、為暫支持、為除饑渴、為攝梵行食於所食，乃至廣說。名於其量如實了達。謂我命根由此不滅者，此顯為身安住食於所食。又於此食不苦耽著者，此顯為暫支持食於所食。由於此中遠離自苦行邊，及與欲樂行邊，是故說言不苦耽著。纔能隨順攝受梵行者，此顯為除饑渴、為攝梵行食於所食。

地三、結

如是我今住沙門性、住出家性，受用飲食，如法清淨，遠離眾罪。

戌二、結

由是諸相，以正思擇食於所食。

如是我今住沙門性等者：謂於是處八支聖道安立可得，名沙門性。自能出離身中所有的一切惡不善法，名出家性。

申二、所食<sup>5</sup> 酉一、徵

云何所食？

酉二、標

謂四種食。

酉三、列

一者、段食，二者、觸食，三者、意等思食，四者、識食。

酉四、簡

今此義中意說段食。

酉五、廣<sup>2</sup> 戌一、名段食

此復云何？謂餅、麪、飯、羹、臠、糜、粥、酥油、糖、蜜、魚、肉、菹、鮓、乳、酪、生酥、薑、鹽、酢等種種品類，和雜為搏，段段吞食；故名段食。

戌二、食異名

所言食者，所謂餐、噉、咀嚼、吞咽、嘗、啜、飲等名之差別。

午二、不為倡蕩<sup>2</sup> 未一、徵

云何名為不為倡蕩？

未二、釋<sup>2</sup> 申一、舉為倡蕩<sup>2</sup> 酉一、辨相

謂如有一樂受欲者，為受諸欲食於所食。彼作是思：我食所食，令身飽滿、令身充悅。過日晩時至於夜分，當與姝妙嚴飾女人共為嬉戲，歡娛受樂，倡掉縱逸。

酉二、釋名

言倡蕩者，於此聖法毗奈耶中，說受欲者欲貪所引、婬逸所引所有諸惡不善

尋思。由此食噉所食噉時，令其諸根皆悉掉舉，令意躁擾、令意不安、令意不靜。若為此事食所食者，名為倡蕩食於所食。

令意躁擾等者：欲等尋思擾亂其心，是名令意躁擾。非理分別，不住於捨，是名令意不安。煩惱猛盛，令心流漏，是名令意不靜。

申二、例名不為

諸有多聞聖弟子眾，以思擇力，深見過患，善知出離，而食所食；非如前說諸受欲者食於所食；是故名為不為倡蕩。

午三、不為憍逸等<sup>2</sup> 未一、徵

云何名為不為憍逸、不為飾好、不為端嚴？

未二、釋<sup>2</sup> 申一、舉為憍逸等<sup>3</sup> 酉一、總標

謂如有一樂受欲者，為受諸欲食於所食。

酉二、別辨<sup>2</sup> 戌一、憍逸<sup>2</sup> 亥一、辨相

彼作是思：我今宜應多食所食、飽食所食，隨力隨能食噉肥膩，增房補益，

色香味具精妙飲食。過今夜分至於明日，於角武事當有力能。所謂按摩、拍毬、托石、跳躑、蹴踢、攘臂、扼腕、揮戈、擊劍、伏弩、控絃、投輪、擲索，依如是等諸角武事，當得勇健，膚體充實，長夜無病，久時少壯，不速衰老，壽命長遠，能多噉食，數數食已能正銷化，除諸疾患。

亥二、結義

如是為於無病憍逸、少壯憍逸、長壽憍逸而食所食。

戌二、飾好端嚴<sup>2</sup> 亥一、釋<sup>2</sup> 天一、辨相

既角武已，復作是思：我應沐浴。便以種種清淨香水沐浴其身；沐浴身已，梳理其髮；梳理髮已，種種妙香用塗其身；既塗身已，復以種種上妙衣服、種種華鬘、種種嚴具莊飾其身。

天二、釋名

此中沐浴、理髮、塗香，名為飾好；既飾好已，復以種種上妙衣服、華鬘、嚴具莊飾其身，名為端嚴。

亥二、結

如是總名為飾好故、為端嚴故食於所食。

酉三、結顯

彼既如是憍逸、飾好、身端嚴已，於日中分或日後分，臨欲食時，饑渴并至。於諸飲食極生希欲、極欣、極樂，不見過患，不知出離，隨得隨食。復為數數倡蕩、憍逸、飾好、端嚴，多食多飲，令身充悅。

於諸飲食極生希欲等者：此中極生希欲，謂於未得諸飲食時。極欣，謂於已得未受用時。極樂，謂於已得正受用時。

申二、翻例不為<sup>2</sup> 酉一、例非

諸有多聞聖弟子眾，以思擇力，深見過患，善知出離，而食所食；非如前說諸受欲者食於所食。

酉二、顯正

唯作是念：我今習近所不應習、所應斷食，為欲永斷如是食故。



唯作是念等者：謂如前說，為憍逸故、為飾好故、為端嚴故食於所食，是名所不應習、所應斷食。諸有多聞聖弟子眾，為欲永斷如是所食，是故厭離、惡賤、驚恐，而作是念。

午四、為身安住<sup>2</sup> 未一、徵

云何名為為身安住食於所食？

未二、釋<sup>2</sup> 申一、名安住

謂飲食已壽命得存，非不飲食壽命存故，名身安住。

申二、顯所為

我今受此所有飲食，壽命得存，當不夭沒；由是因緣，身得安住，能修正行，永斷諸食。

永斷諸食者：前說諸受欲者食於所食，或為倡蕩、或為憍逸、或為飾好、或為端嚴，如是皆墮欲樂行邊，能壞梵行、能障梵行、能令種種諸惡不善尋思現行，永斷如是食故，是名永斷諸食。

午五、為暫支持<sup>2</sup> 未一、徵

云何名為為暫支持食於所食？

未二、釋<sup>2</sup> 申一、舉二存養<sup>3</sup> 酉一、標列

謂略說有二種存養。一、有艱難存養，二、無艱難存養。

酉二、辨相<sup>2</sup> 戌一、有艱難存養<sup>3</sup> 亥一、徵

云何名為有艱難存養？

亥二、釋<sup>3</sup> 天一、有苦

謂受如是所有飲食，數增饑羸，困苦重病。

天二、有染

或以非法追求飲食，非以正法。

或以非法追求飲食等者：此中非法，謂如前說，或依矯詐、或邪妄語、或假現相、或苦研逼、或利求利種種狀相應知。（陵本二十二卷十頁<sup>1919</sup>）

得已，染愛、耽嗜、饕餮、迷悶、堅執、涵著受用。

天三、有障

或有食已，令身沈重，無所堪能，不任修斷；或有食已，令心遲鈍，不速得定；或有食已，令入出息來往艱難；或有食已，令心數為昏沈睡眠之所纏擾。

亥三、結

如是名為有艱難存養。

得已染愛等者：樂著受用，是名染愛。喜樂堅著，是名耽嗜。希求更得，是名饕餮。不觀得失，是名迷悶。攝為己有，不能捨離，是名堅執。耽樂受用，無所顧惜，是名涵著。

戌二、無艱難存養<sup>3</sup> 亥一、徵

云何名為無艱難存養？

亥二、釋<sup>3</sup> 天一、無苦

謂受如是所有飲食，令無饑羸，無有困苦及以重病。

天二、無染

或以正法追求飲食，不以非法。既獲得已，不染、不愛，亦不耽嗜、饕餮、迷悶、堅執、涵著而受用之。

天三、無障

如是受用，身無沈重，有所堪能，堪任修斷；令心速疾得三摩地；令入出息無有艱難；令心不為惛沈睡眠之所纏擾。

亥三、結

如是名為無艱難存養。

酉三、料簡

若由有艱難存養，壽命得存，身得安住，此名有罪，亦有染汙。若由無艱難存養，壽命得存，身得安住，此名無罪，亦無染汙。

申二、名暫支持

諸有多聞聖弟子眾，遠離有罪有染存養，習近無罪無染存養，由是故說為暫

支持。

午六、為除饑渴等<sup>2</sup>

未一、牒前總標<sup>2</sup>

申一、問

問：云何習近如前所說無罪無染所有存養，以自存活？

申二、答

答：若受飲食，為除饑渴、為攝梵行、為斷故受、為令新受當不更生、為當存養力樂無罪安隱而住，如是習近無罪無染所有存養，而自存活。

未二、隨標別釋<sup>5</sup>

申一、為除饑渴<sup>3</sup>

酉一、徵

云何名為為除饑渴受諸飲食？

酉二、釋

謂至食時，多生饑渴，氣力虛羸，希望飲食。為欲息此饑渴纏逼、氣力虛羸，知量而食。如是食已，令於非時不為饑羸之所纏逼，謂於日晚或於夜分，乃至明日未至食時。

酉三、結

如是名為為除饑渴受諸飲食。

申二、為攝梵行<sup>3</sup> 酉一、徵

云何名為為攝梵行受諸飲食？

酉二、釋

謂如其量受諸飲食，由是因緣，修善品者，或於現法、或於此日，飲食已後，身無沈重，有所堪能，堪任修斷；令心速疾得三摩地；令入出息無有艱難；令心不為惛沈睡眠之所纏擾。由是速疾有力有能得所未得、觸所未觸、證所未證。

酉三、結

如是名為為攝梵行受諸飲食。

申三、為斷故受<sup>3</sup> 酉一、徵

云何名為為斷故受受諸飲食？

酉二、釋<sup>2</sup> 戌一、出故受

謂如有一，由過去世食不知量、食所匪宜、不銷而食；由是因緣，於其身中  
生起種種身諸疾病，所謂疥癩、皰漿、嗽等，如前廣說。

所謂疥癩皰漿嗽等如前廣說者：如前轉變種類過患中，說有多種疾病應  
知。（陵本二十三卷八頁<sup>1967</sup>）

由此種種疾病因緣，發生身中極重、猛利、熾然苦惱不可意受。

戊二、明為斷

為欲息除如是疾病，及為息除從此因緣所生苦受，習近種種良醫所說饒益所  
宜隨順醫藥，及受種種悅意飲食。由此能斷已生疾病，及彼因緣所生苦受。

酉三、結

如是名為為斷故受受諸飲食。

申四、為令新受當不更生<sup>3</sup> 酉一、徵

云何名為為令新受當不更生受諸飲食？

酉二、釋

謂如有一，由現在世安樂無病、氣力具足，不非量食、不食匪宜、亦非不銷而更重食，令於未來食住身中成不銷病，或於身中當生隨一身諸疾病，所謂疥癩、皰漿、嗽等，如前廣說。由是因緣，當生身中如前所說種種苦受，餘如前說。

酉三、結

如是名為為令新受當不更生受諸飲食。

申五、為當存養力樂無罪安隱而住<sup>2</sup> 酉一、徵

云何名為為當存養力樂無罪安隱而住受諸飲食？

酉二、釋<sup>5</sup> 戌一、存養

謂飲食已，壽命得存，是名存養。

戌二、力

若除饑羸，是名為力。

戌三、樂



若斷故受，新受不生，是名為樂。

戌四、無罪

若以正法追求飲食，不染、不愛，乃至廣說而受用之，是名無罪。

戌五、安隱而住

若受食已，身無沈重，有所堪能，堪任修斷，如前廣說，如是名為安隱而住。

堪任修斷如前廣說者：謂如前說，令心速疾得三摩地，令入出息無有艱難，令心不為惛沈睡眠之所纏擾應知。

巳二、結

是故說言：由正思擇食於所食，不為倡蕩、不為憍逸、不為飾好、不為端嚴，乃至廣說，是名廣辯於食知量。

辰二、略義<sup>2</sup> 巳一、徵

云何應知此中略義？

巳二、釋<sup>3</sup> 午一、第一略義<sup>2</sup> 未一、標

謂若所受食，若如是食，當知總名此中略義。

未二、釋<sup>2</sup> 申一、所受食<sup>2</sup> 酉一、徵

何者所食？

酉二、配

謂諸段食。即餅、麪、飯、羹、臠、糜、粥，如前廣說。

申二、如是食<sup>2</sup> 酉一、徵

云何而食？

酉二、配

謂正思擇食於所食，不為倡蕩、不為憍逸、不為飾好、不為端嚴，乃至廣說。

午二、第二略義<sup>2</sup> 未一、標

復次，應知此中略義，謂為攝受對治，為遠離欲樂行邊，為遠離自苦行邊，為攝受梵行，受諸飲食。

未二、釋<sup>4</sup> 申一、為攝受對治<sup>2</sup> 酉一、徵

云何為攝受對治受諸飲食？

酉二、配

謂如說言：由正思擇食於所食。

申二、為遠離欲樂行邊<sup>2</sup> 酉一、徵

云何為遠離欲樂行邊受諸飲食？

酉二、配

謂如說言：不為倡蕩、不為憍逸、不為飾好、不為端嚴食於所食。

申三、為遠離自苦行邊<sup>2</sup> 酉一、徵

云何為遠離自苦行邊受諸飲食？

酉二、配

謂如說言：為除饑渴、為斷故受、為令新受當不更生、為當存養若力若樂食於所食。

申四、為攝受梵行<sup>2</sup> 酉一、徵

云何為攝受梵行受諸飲食？

酉二、配

謂如說言：為攝梵行、為得無罪安隱而住食於所食。

午三、第三略義<sup>3</sup> 未一、標

復次，應知此中略義，謂有二種。

未二、列

一、無所食，二、有所食。

未三、釋<sup>2</sup> 申一、別辨相<sup>2</sup> 酉一、無所食

無所食者，謂一切種都無所食；無所食故，即便天沒。

酉二、有所食<sup>3</sup> 戌一、標列

有所食者，有其二種。一、平等食，二、不平等食。

戌二、別辨<sup>2</sup> 亥一、平等食

平等食者，謂非極少食、非極多食、非不宜食、非不消食、非染汙食。

亥二、不平等食

不平等食者，謂或極少食、或極多食、或不宜食、或不消食、或染汙食。

戌三、料簡<sup>2</sup>

亥一、辨<sup>2</sup>

天一、受用平等所食<sup>4</sup>

地一、非極少食

當知此中，由平等食非極少食，令身饑羸未生不生，已生斷滅。

地二、非極多食

由平等食非極多食，身無沈重，有所堪能，堪任修斷，如前廣說。

地三、非不宜食及不消食

由平等食非不宜食、非不消食，能斷故受，不生新受；由是因緣，當得存養若力若樂。

地四、非染汙食

由平等食非染汙食，當得無罪安隱而住。

天二、遠離不平等食<sup>4</sup>

地一、極少食

由極少食，雖存壽命，而有饑羸，亦少存活。

地二、極多食

由極多食，如極重擔鎮壓其身，不能以時所食消變。

地三、不消食及不宜食<sup>2</sup> 玄一、不消食

由不消食，或住身中成不消病，或生隨一身諸病苦。

玄二、不宜食<sup>2</sup> 黃一、例

如不消食，由不宜食，當知亦爾。

黃二、簡

此不宜食有差別者，謂於身中集諸過患，由此復觸極重病苦。

地四、染汙食

由染汙食，非法追求諸飲食已，有染有愛、耽嗜、饕餮，如前廣說而受用之。

亥二、結

由此受用平等所食，及以遠離不平等食，故說於食平等所作。

申二、顯諸句<sup>3</sup> 酉一、總標

即此於食平等所作，廣以諸句宣示開顯，所謂說言：由正思擇食於所食，不為倡蕩、不為憍逸、不為飾好、不為端嚴，如前廣說。

酉二、別配<sup>2</sup> 戌一、遮都無所食

此中說言：由正思擇食於所食，不為倡蕩、不為憍逸、不為飾好、不為端嚴，為身安住、為暫支持。由此遮止都無所食。

戌二、遮不平等食<sup>3</sup> 亥一、標

若復說言：為除饑渴、為攝梵行，廣說乃至安隱而住。由此遮止不平等食。

亥二、徵

云何遮止不平等食？

亥三、釋<sup>2</sup> 天一、遮<sup>3</sup> 地一、所食極少

謂若說言：為除饑渴。由此遮止所食極少。

地二、所食極多

若復說言：為攝梵行。由此遮止所食極多。

地三、不消而食食所匪宜

若復說言：為斷故受、為令新受當不更生。由此遮止不消而食、食所匪宜。

天二、顯<sup>3</sup> 地一、不極少食不極多食

若復說言：為當存養、為當得力。由此顯示不極少食、不極多食。

地二、消已而食及食所宜

若復說言：為當得樂。由此顯示消已而食，及食所宜。

地三、無染汙食<sup>3</sup> 玄一、標

若復說言：為當無罪安隱而住。由此顯示無染汙食。

玄二、徵

所以者何？

玄三、釋<sup>2</sup> 黃一、反顯<sup>2</sup> 宇一、染汙有罪

若以非法追求飲食，得已染愛，如前廣說而受用之，名染汙食，亦名有罪。

宇二、不安隱住



若於善品勤修習者，於住空閑瑜伽作意、受持、讀誦、思惟義中，由彼諸惡不善尋思，令心流漏、令心相續，隨順、趣向、臨入而轉，由是因緣，不安隱住。

黃二、別廣<sup>2</sup> 宇一、總標

此安隱住復有二種。

宇二、列釋

一者、遠離所食極多，由是因緣，身無沈重，有所堪能，堪任修斷，如前廣說。二者、於食不生味著，由是因緣，遠離諸惡尋思擾動不安隱住。

酉三、總結

是故如此一切諸句，皆為宣示開顯於食平等所作。

卯四、結

如是名為廣略宣說於食知量。

瑜伽師地論科句披尋記卷第二十三

110011

瑜伽師地論科句披尋記卷第二十四

彌勒菩薩說

唐三藏沙門玄奘奉詔譯

韓清淨科記

本地分中聲聞地初瑜伽處出離地品第三之三

寅四、初夜後夜修習惛寤瑜伽<sup>3</sup> 卯一、徵

復次，初夜後夜常勤修習惛寤瑜伽者，云何初夜？云何後夜？云何惛寤瑜伽？云何常勤修習惛寤瑜伽？

卯二、釋<sup>3</sup> 辰一、略標<sup>4</sup> 巳一、初夜

言初夜者，謂夜四分中，過初一分，是夜初分。

巳二、後夜

言後夜者，謂夜四分中，過後一分，是夜後分。

謂夜四分中過初一分等者：夜有三時，略分為四，名夜四分。於中最初一

分名夜初分，中間二分名夜中分，最後一分名夜後分。此中義顯從初向後齊至中間，故名過初一分。從後向初齊至中間，故名過後一分。

已三、惛寤瑜伽<sup>4</sup> 午一、晝日分

惛寤瑜伽者，謂如說言：於晝日分經行、宴坐，從順障法淨修其心。

午二、初夜分

於初夜分經行、宴坐，從順障法淨修其心。

午三、中夜分

淨修心已，出住處外洗濯其足，還入住處，右脅而臥，重累其足，住光明想、正念、正知、思惟起想巧便而臥。

午四、夜後分

至夜後分，速疾惛寤，經行、宴坐，從順障法淨修其心。

惛寤瑜伽等者：此中經言，如下自釋應知。

已四、常勤修習惛寤瑜伽

常勤修習恬寤瑜伽者，謂如有一世尊弟子，聽聞恬寤瑜伽法已，欲樂修學，便依如是恬寤瑜伽，作如是念：我當成辦佛所聽許恬寤瑜伽。發生樂欲，精進勤劬，超越勇猛勢力發起、勇悍、剛決、不可制伏、策勵其心無間相續。發生樂欲等者：謂於隨順瑜伽修習道中發生希慕、發生欣樂，欲有所作，是名發生樂欲。為淨障故，發勤精進，是名精進勤劬。精進有五。一、被甲精進，二、加行精進，三、不下精進，四、無動精進，五、無喜足精進。如攝事分說。（陵本八十九卷四頁<sup>6731</sup>）此中超越勇猛勢力發起，即彼被甲精進，謂由猛利樂欲所發起故。此中勇悍，即彼加行精進，謂隨所欲發起堅固勇悍方便故。此中剛決，即彼不下精進，謂為證得所受諸法，不自輕憊，亦無怯懼故。此中不可制伏，即彼無動精進，謂能堪忍寒熱等苦故。此中策勵其心無間相續，即彼無喜足精進，謂於後後轉勝、轉妙諸功德性欣求證得故。

辰二、廣辯<sup>3</sup> 巳一、於晝日分經行宴坐從順障法淨修其心<sup>2</sup> 午一、徵

此中云何於晝日分經行、宴坐，從順障法淨修其心？

午二、釋<sup>5</sup> 未一、晝日

言晝日者，謂從日出時至日沒時。

未二、經行

言經行者，謂於廣長稱其度量一地方所，若往、若來相應身業。

未三、宴坐

言宴坐者，謂如有一，或於大床、或小繩床、或草葉座，結加趺坐，端身正願，安住背念。

結加趺坐等者：結加趺坐有五因緣，如下自釋。（陵本三十卷七頁<sup>2504</sup>）若

策舉身令其端直，是名端身，由是其心不為昏沈睡眠之所纏擾。若令其心離諂離詐，調柔正直，是名正願，由是其心不為外境散動之所纏擾。如理作意相應之念，名為背念，棄背違逆一切黑品故。此中諸義，亦如下說。

未四、障及順障法<sup>2</sup> 申一、略標

所言障者，謂五種蓋。順障法者，謂能引蓋、隨順蓋法。

申二、隨釋<sup>2</sup> 酉一、五蓋<sup>2</sup> 戌一、徵

云何五蓋？

戌二、釋

謂貪欲蓋、瞋恚蓋、昏沈睡眠蓋、掉舉惡作蓋，及以疑蓋。

酉二、順障法<sup>2</sup> 戌一、徵

云何順障法？

戌二、釋

謂淨妙相，瞋恚相，黑闇相，親屬、國土、不死尋思，追憶昔時笑戲喜樂承事隨念，及以三世或於三世非理法思。

云何五蓋等及云何順障法等者：此中貪欲蓋等及淨妙相等，皆如三摩呬多地說應知。（陵本十一卷三頁<sup>845</sup>）

未五、淨修其心<sup>2</sup> 申一、由法增上<sup>2</sup> 酉一、釋<sup>2</sup> 戌一、別顯<sup>2</sup> 亥一、於經行時<sup>2</sup>

天一、問

問：於經行時，從幾障法淨修其心？云何從彼淨修其心？

天二、答<sup>3</sup> 地一、總標所從

答：從愒沈睡眠蓋，及能引愒沈睡眠障法，淨修其心。

地二、別修方便<sup>3</sup> 玄一、取光明相

為除彼故，於光明相善巧精懇，善取善思、善了善達。

於光明相善巧精懇等者：三摩呬多地說：光明有三種。一、治闇光明，二、法光明，三、依身光明。（陵本十一卷六頁<sup>859</sup>）此應準知。如理作意相應，是名善巧。無倒無間殷重加行，是名精懇。取多光明為所緣境，及於彼相如理思惟，是名善取善思。依法光明了達諸法，是名善了善達。

以有明俱心，及有光俱心。

以有明俱心等者：法光明想，是名有明俱心。治闇光明、依身光明彼相應想，是名有光俱心。



或於屏處、或於露處往返經行。

或於屏處或於露處往返經行者：此經行時以有光俱心應知。

於經行時，隨緣一種淨妙境界，極善示現，勸導、讚勵、慶慰其心。謂或念佛、或法、或僧、或戒、或捨、或復念天。

於經行時隨緣一種淨妙境界等者：此以有明俱心應知。謂或念佛乃至念天，是名隨緣一種淨妙境界。令心憶念彼諸功德，是名極善示現。安置學處，令正受行，是名勸導；令心無退，是名讚勵；令心歡喜，是名慶慰。

玄二、聞思正法<sup>2</sup> 黃一、舉正法

或於宣說惛沈睡眠過患相應所有正法，於此法中，為除彼故，以無量門訶責毀訾惛沈睡眠所有過失，以無量門稱揚讚歎惛沈睡眠永斷功德。所謂契經、應頌、記別、諷頌、自說、因緣、譬喻、本事、本生、方廣、希法，及以論議。

黃二、習聞思

為除彼故，於此正法聽聞受持，以大音聲若讀、若誦，為他開示，思惟其義，稱量觀察。

玄三、觀方隅等

或觀方隅，或瞻星月諸宿道度，或以冷水洗灑面目。

地三、結明對治

由是惛沈睡眠纏蓋未生不生，已生除遣。如是方便，從順障法淨修其心。

亥二、於宴坐時<sup>2</sup> 天一、問

問：於宴坐時，從幾障法淨修其心？云何從彼淨修其心？

天二、答<sup>2</sup> 地一、總標所從

答：從四障法淨修其心。謂貪欲、瞋恚、掉舉惡作、疑蓋，及能引彼法，淨修其心。

地二、別修方便<sup>2</sup> 玄一、於貪欲蓋<sup>2</sup> 黃一、釋<sup>2</sup> 宇一、舉方便<sup>2</sup> 宙一、觀不淨相

為令已生貪欲纏蓋速除遣故，為令未生極遠離故，結加趺坐，端身正願，安

住背念；或觀青瘀、或觀膿爛、或觀變壞、或觀膨脹、或觀食噉、或觀血塗、或觀其骨、或觀其鎖、或觀骨鎖，

或觀青瘀等者：如是一切，令於四種姪相應貪心得清淨，如下自說應知。

（陵本二十六卷二十一頁<sup>2235</sup>）

或於隨一賢善定相作意思惟。

或於隨一賢善定相作意思惟者：此中賢善定相，如三摩呬多地釋應知。

（陵本十一卷二十二頁<sup>954</sup>）前說不定地，此說定地，故二差別。

宙二、聞思正法<sup>2</sup> 洪一、舉正法

或於宣說貪欲過患相應正法，於此法中，為斷貪欲，以無量門訶責毀訾欲貪、欲愛、欲藏、欲護、欲著過失，

以無量門訶責毀訾欲貪等者：此中欲貪、欲愛、欲藏、欲護、欲著，皆貪異名。攝異門分說：貪者，謂於受用喜樂堅著故。藏者，謂於內所攝自體中愛故。護者，謂於他相續中愛故。著者，謂著受用，無所顧惜故。（陵

本八十四卷十六頁<sup>6400</sup>）愛有多種，若過去、若未來、若現在、若境界、若領受，遍行一切應知。

以無量門稱揚讚歎一切貪欲永斷功德。所謂契經、應頌、記別，乃至廣說。

洪二、習聞思

為斷貪欲，於此正法聽聞受持，言善通利、意善尋思、見善通達，即於此法，如是宴坐，如理思惟。

宇二、明對治

由是因緣，貪欲纏蓋未生不生，已生除遣。

黃二、結

如是方便，從順障法淨修其心。

言善通利等者：謂大音聲若讀、若誦，是名言善通利。如所聞法思惟其義，是名意善尋思。於諸法相如實覺了，是名見善通達。

玄二、於瞋蓋等<sup>2</sup>

黃一、顯差別<sup>3</sup>

宇一、於瞋恚蓋<sup>2</sup>

宙一、修四無量<sup>2</sup>

洪一、舉慈

於瞋恚蓋法有差別者，謂如是宴坐，以慈俱心，無怨無敵、無損無惱，廣大無量，極善修習；普於一方發起勝解，具足安住。

以慈俱心等者：三摩呬多地說：現前饒益，故名慈俱。無怨者，離惡意樂故。無敵者，離現乖諍故。無惱害者，離不饒益事故。廣者，所緣廣大故。大者，利益安樂思惟最勝故。無量者，果無量故。如四大河，眾流雜處。善修習者，極純熟故。乃至廣說勝解遍滿者，是增上意樂勝解周普義。具足者，圓滿清白故。住者，所修觀行日夜專注，時專注故。（陵本十二卷十二頁<sup>1014</sup>）此應準知。

洪二、例餘

如是第二、如是第三、如是第四，上下傍布，普遍一切無邊世界發起勝解，具足安住。

如是第二等者：此中義顯普於十方發起勝解，具足安住。初說一方，此說第二、第三、第四，是謂四方。言上下者，謂上下方。言傍布者，謂彼四

維。如是安立十方差別應知。

宙二、例說對治

餘如前說。

餘如前說者：前貪欲蓋作如是說：由是因緣，未生不生，已生除遣。如是方便，從順障法淨修其心。此瞋恚蓋理亦應說，故指如前，下皆準知。

宇二、於掉舉惡作蓋<sup>2</sup> 宙一、修九心住

於掉舉惡作蓋法有差別者，謂如是宴坐，令心內住，成辦一趣，得三摩地。

宙二、例說對治

餘如前說。

令心內住等者：如下說有九種心住，內住為初，乃至等持為後。（陵本三十卷九頁<sup>2511</sup>）此說令心內住，即其初相；成辦一趣，得三摩地，即後二相應知。

宇三、於疑蓋<sup>2</sup>

宙一、別辨依處<sup>2</sup>

洪一、依三世辨<sup>2</sup>

荒一、遮非理思

於疑蓋法有差別者，謂如是宴坐，於過去世，非不如理作意思惟；於未來世、於現在世，非不如理作意思惟。我於過去為曾有耶？為曾無耶？我於過去為曾何有？云何曾有？我於未來為當何有？云何當有？我於現在為何所有？云何而有？今此有情從何而來？於此殞沒當往何所？於如是等不如正理作意思惟，應正遠離。

荒二、舉如理思

如理思惟去來今世，唯見有法，唯見有事；知有為有，知無為無；唯觀有因，唯觀有果；於實無事不增不益，於實有事不毀不謗。

洪二、依最勝辨<sup>2</sup> 荒一、舉實知

於其實有，了知實有。謂於無常、苦、空、無我一切法中，了知無常、苦、空、無我。

荒二、明勝利

以能如是如理思惟，便於佛所無惑無疑。餘如前說。

便於佛所無惑無疑等者：攝異門分說：於佛無智者，謂不了知如來法身及諸行相。於法無智者，謂不了知善說等相。於僧無智者，謂不了知正行等相。於苦等無智者，謂如諸經所分別相，及十六行中不了知故。於因無智者，謂於無明等諸有支中，能為行等所有因性不了知故。於因所生無智者，謂於行等諸有支中，從無明等因所生性不了知故。（陵本八十四卷十九頁<sup>6411</sup>）此說無惑無疑，翻彼應釋。又於佛所無惑無疑下言，餘如前說，疑是衍文。

於法、於僧、於苦、於集、於滅、於道、於因，及因所生諸法無惑無疑。

宙二、例說對治

餘如前說。

黃二、辨聞思<sup>3</sup> 宇一、於瞋恚蓋

又於瞋恚蓋應作是說：為斷瞋恚及瞋恚相，於此正法聽聞受持，乃至廣說。

宇二、於掉舉惡作蓋



於掉舉惡作蓋應作是說：為斷掉舉惡作及順彼法，於此正法聽聞受持，乃至廣說。

字三、於疑蓋

於其疑蓋應作是說：為斷疑蓋及順彼法，於此正法聽聞受持，乃至廣說。

戌二、總結

如是方便，從貪欲、瞋恚、昏沈睡眠、掉舉惡作、疑蓋，及順彼法，淨修其心。是故說言：經行、宴坐，從順障法淨修其心。

酉二、結

如是已說由法增上，從順障法淨修其心。

申二、由自增上及世增上<sup>2</sup> 酉一、總標

復有由自增上及世增上，從順障法淨修其心。

復有由自增上及世增上者：如次義顯慚愧應知。慚所慚故，是名由自增上。愧所愧故，是名由世增上。

酉二、別顯<sup>2</sup> 戌一、由自增上<sup>3</sup> 亥一、徵

云何名為由自增上？

亥二、釋<sup>2</sup> 天一、生不執著

謂如有一，於諸蓋中隨起一種，便自了知此非善法，於所生蓋不堅執著，速疾棄捨、擯遣、變吐。

天二、自起慚羞

又能自觀此所生蓋，甚可羞恥，令心染惱，令慧羸劣，是損害品。

亥三、結

如是名為由自增上，從順障法淨修其心。

戌二、由世增上<sup>3</sup> 亥一、徵

云何名為由世增上，從順障法淨修其心？

亥二、釋<sup>2</sup> 天一、由訶毀

謂如有一，於諸蓋中隨一已生，或將生時，便作是念：我若生起所未生蓋，

當為大師之所訶責，亦為諸天及諸有智同梵行者以法輕毀。

天二、明對治

彼由如是世增上故，未生諸蓋能令不生，已生諸蓋能速棄捨。

亥三、結

如是名為由世增上，從順障法淨修其心。

巳二、於夜中分如法寢臥<sup>2</sup> 午一、略舉<sup>2</sup> 未一、濯足

又為護持諸臥具故，順世儀故。

又為護持諸臥具故者：謂於臥具現充受用，由洗濯足能正將護，是名護持。以時濯足，隨順世間、不越世間所有軌則，名順世儀。

盡夜初分經行、宴坐，從順障法淨修其心。從順障法淨修心已，出住處外洗濯其足。

從順障法淨修其心者：此句疑衍。

未二、寢臥

洗濯足已，還入住處，如法寢臥，為令寢臥長養大種。得增長已，長益其身，轉有勢力，轉能隨順無間常委善品加行。

如法寢臥者：謂如下說右脅而臥，重累其足應知。

午二、別顯<sup>5</sup> 未一、右脅而臥<sup>3</sup> 申一、標<sup>2</sup> 酉一、問

問：以何因緣右脅而臥？

酉二、答

答：與師子王法相似故。

申二、釋<sup>2</sup> 酉一、問

問：何法相似？

酉二、答<sup>2</sup> 戌一、能發精進<sup>3</sup> 亥一、舉喻

答：如師子王，一切獸中，勇悍堅猛，最為第一。

亥二、合結

苾芻亦爾，於常修習恬寤瑜伽，發勤精進，勇悍堅猛，最為第一。由是因

緣，與師子王臥法相似。

亥三、簡非

非如其餘鬼臥、天臥、受欲者臥。由彼一切懶惰懈怠，下劣精進，勢力薄弱。

非如其餘鬼臥天臥等者：如彼一切或覆面臥、或仰面臥、或左脅臥，故說名餘。受用婬欲，名受欲者。

戌二、離諸過失<sup>2</sup> 亥一、顯勝利

又法應爾，如師子王右脅臥者，如是臥時，身無掉亂，念無忘失，睡不極重，不見惡夢。

亥二、例相違

異此臥者，與是相違，當知具有一切過失。

申三、結

是故說言：右脅而臥，重累其足。

未二、住光明想巧便而臥<sup>3</sup> 申一、徵

云何名為住光明想巧便而臥？

申二、釋

謂於光明相善巧精懇，善取善思、善了善達，思惟諸天光明俱心，巧便而臥。由是因緣，雖復寢臥，心不惛闇。

申三、結

如是名為住光明想巧便而臥。

思惟諸天光明俱心者：此中光明，唯取依身光明。思惟彼故，與彼俱行相應想生，是名思惟諸天光明俱心。

未三、正念巧便而臥<sup>3</sup> 申一、徵

云何正念巧便而臥？

申二、釋

謂若諸法，已聞、已思、已熟修習，體性是善，能引義利。由正念故，乃至睡夢亦常隨轉；由正念故，於睡夢中亦常記憶，令彼法相分明現前，即於彼

法心多隨觀；由正念故，隨其所念，或善心眠、或無記心眠。

申三、結

是名正念巧便而臥。

謂若諸法已聞已思等者：此說正聞思修瑜伽作用。由此增上力故，獲得正念。此能對治不善，名體性是善。隨順正行，名能引義利。

未四、正知巧便而臥<sup>3</sup> 申一、徵

云何正知巧便而臥？

申二、釋

謂由正念而寢臥時，若有隨一煩惱現前，染惱其心。於此煩惱現生起時，能正覺了，令不堅著，速疾棄捨，既通達已，令心轉還。

申三、結

是名正知巧便而臥。

未五、思惟起想巧便而臥<sup>3</sup> 申一、徵

云何名為思惟起想巧便而臥？

申二、釋<sup>2</sup> 酉一、辨相<sup>3</sup> 戌一、不住放逸

謂以精進策勵其心，然後寢臥。於寢臥時，時時覺寤，如林野鹿，不應一切縱放其心，隨順、趣向、臨入睡眠。

戌二、樂住加行

復作是念：我今應於諸佛所許恬寤瑜伽，一切皆當具足成辦。為成辦故，應住精勤最極濃厚加行欲樂。

戌三、起發具足

復作是念：我今為修恬寤瑜伽，應正發起勤精進住。為欲修習諸善法故，應正翹勤，離諸懶惰，起發具足。過今夜分至明清旦，倍增發起勤精進住，起發具足。

酉二、略義<sup>3</sup> 戌一、第一起想

當知此中，由第一思惟起想，無重睡眠，於應起時速疾能起，終不過時方乃



惛寤。

戌二、第二起想

由第二思惟起想，能於諸佛共所聽許師子王臥如法而臥，無增無減。

戌三、第三起想

由第三思惟起想，令善欲樂常無懈廢。雖有失念，而能後後展轉受學，令無斷絕。

申三、結

如是名為思惟起想巧便而臥。

隨順趣向臨入睡眠者：此中睡眠，謂重睡眠，由此令心闇鈍、薄弱、懶惰、懈怠，無有堪能應時而起，是故不應縱放其心，隨順、趣向、臨入。言隨順者，謂於初位。言趣向者，謂於中位。言臨入者，謂於後位。如是差別應知。

巳三、至夜後分速惛寤等<sup>3</sup> 午一、徵

云何至夜後分速疾惛寤，經行、宴坐，從順障法淨修其心？

午二、釋<sup>2</sup> 未一、夜後分

夜後分者，謂夜四分中，過後一分，名夜後分。

未二、速惛寤<sup>2</sup> 申一、明方便

彼由如是住光明想、正念、正知、思惟起想巧便而臥，於夜中分，夜四分中，過於一分，正習睡眠。令於起時，身有堪能應時而起，非為上品惛沈睡眠纏所制伏，令將起時闇鈍、薄弱、懶惰、懈怠。

申二、顯堪能

由無如是闇鈍、薄弱、懶惰、懈怠，暫作意時，無有艱難，速疾能起。

闇鈍薄弱懶惰懈怠者：心不明利，是名闇鈍。心不堅猛，是名薄弱。執取睡眠為樂、偃臥為樂、脅臥為樂，是名懶惰。性不翹勤，不具起發，是名懈怠。

午三、例

從諸障法淨修心者，如前應知。

從諸障法淨修心者如前應知者：謂如前說，於經行時，從惛沈睡眠蓋，及能引惛沈睡眠障法，淨修其心；於宴坐時，從貪欲、瞋恚、掉舉惡作、疑蓋，及能引彼法，淨修其心。其相應知。

辰三、略義<sup>2</sup> 已一、結前生後

如是廣辯初夜後夜常勤修習惛寤瑜伽已，復云何知此中略義？

已二、正顯略義<sup>3</sup> 午一、明所作事<sup>4</sup> 未一、標

謂常勤修習惛寤瑜伽所有士夫補特伽羅，略有四種正所作事。

未二、徵

何等為四？

未三、列

一者、乃至惛寤，常不捨離所修善品，無間常委修善法中，勇猛精進。二者、以時而臥，不以非時。三者、無染汙心而習睡眠，非染汙心。四者、以

時恬寤，起不過時。

未四、結

是名四種常勤修習恬寤瑜伽所有士夫補特伽羅正所作事。

午二、配所宣說<sup>3</sup> 未一、標

依此四種正所作事，諸佛世尊為聲聞眾宣說修習恬寤瑜伽。

未二、徵

云何宣說？

未三、配<sup>4</sup> 申一、第一正所作事<sup>2</sup> 酉一、舉說

謂若說言：於晝日分經行、宴坐，從順障法淨修其心；於初夜分經行、宴坐，從順障法淨修其心。由此言故，宣說第一正所作事。

酉二、釋義

謂乃至恬寤，常不捨離所修善品，無間常委修善法中，勇猛精進。

申二、第二正所作事<sup>2</sup> 酉一、舉說

若復說言：出住處外洗濯其足，還入住處，右脅而臥，重累其足。由此言故，宣說第二正所作事。

酉二、釋義

謂以時而臥，不以非時。

申三、第三正所作事<sup>2</sup> 酉一、舉說

若復說言：住光明想、正念、正知、思惟起想巧便而臥。由此言故，宣說第三正所作事。

酉二、釋義

謂無染汙心而習睡眠，非染汙心。

申四、第四正所作事<sup>2</sup> 酉一、舉說

若復說言：於夜後分速疾恬寤，經行、宴坐，從順障法淨修其心。由此言故，宣說第四正所作事。

酉二、釋義

謂以時恬寤；起不過時。

午三、隨難別釋<sup>2</sup> 未一、標二種緣<sup>2</sup> 申一、無染心眠

此中所說住光明想、正念、正知、思惟起想巧便臥者，顯由二緣，無染汙心而習睡眠，非染汙心。謂由正念，及由正知。

申二、以時恬寤

復由二緣以時恬寤，起不過時。謂由住光明想，及由思惟起想。

未二、釋其所以<sup>2</sup> 申一、無染心眠

此復云何？由正念故，於善所緣攝斂而臥；由正知故，於善所緣若心退失，起諸煩惱，即便速疾能正了知。如是名為由二緣故，無染汙心而習睡眠，非染汙心。

申二、以時恬寤

由住光明想，及思惟起想，無重睡眠，非睡眠纏能遠隨逐。如是名為由二緣故，以時恬寤，起不過時。

卯三、結

如是宣說常勤修習惛寤瑜伽所有略義，及前所說廣辯釋義，總說名為初夜後夜常勤修習惛寤瑜伽。

寅五、正知而住<sup>4</sup> 卯一、徵

云何名為正知而住？

卯二、列

謂如有一，若往、若還正知而住，若覩、若瞻正知而住，若屈、若伸正知而住，持僧伽胝及以衣鉢正知而住，若食、若飲、若噉、若嘗正知而住，若行、若住、若坐、若臥正知而住，於惛寤時正知而住，若語、若默正知而住，解勞睡時正知而住。

卯三、釋<sup>2</sup> 辰一、廣分別<sup>2</sup> 巳一、別辨其相<sup>6</sup> 午一、若往若還正知而住<sup>3</sup> 未一、徵

若往、若還正知住者，云何為往？云何為還？云何往還正知而住？

未二、釋<sup>3</sup> 申一、往

所言往者，謂如有一，往詣聚落，往聚落間；往詣家屬，往家屬間；往詣道場，往道場間。

申二、還

所言還者，謂如有一，從聚落還，聚落間還；從家屬還，家屬間還；從道場還，道場間還。

申三、正知住<sup>2</sup> 酉一、明正知<sup>2</sup> 戌一、釋<sup>4</sup> 亥一、於自往還

所言往還正知住者，謂於自往，正知我往；及於自還，正知我還。

謂於自往正知我往等者：謂於自身若往、若還，由正知力，不隨雜染心轉，必令自心隨我勢力自在而轉，是名正知我往、我還。

亥二、於應往還

於所應往及非所往，能正了知；於所應還及非所還，能正了知。

於所應往及非所往等者：如下說言：或有居家我所應往，謂剎帝利大族姓家、或婆羅門大族姓家、或諸居士大族姓家、或僚佐家、或饒財家、或長



者家、或商主家。又如說言：或有居家我不應往，何等居家？謂唱令家，或酤酒家，或姪女家，或國王家，或旃荼羅、羯恥那家；或復有家一向誹謗，不可迴轉。此說於所應往及非所往，準彼應釋。還至本處，名所應還，與此相違，名非所還。

亥三、於往還時

於應往時及非往時，能正了知；於應還時及非還時，能正了知。

於應往時及非往時者：如下說言：又有居家我雖應往，不應太早太晚而往。若施主家有遽務時，亦不應往；若戲樂時、若有營構嚴飾事時、若為世間弊穢法時、若忿競時，亦不應往。如是一切，名非往時，與此相違，名應往時。

亥四、於如往還

於其如是如是應往及不應往，能正了知；於其如是如是應還及不應還，能正了知。

戌二、結

是名正知。

於其如是如是應往及不應往者：如下說言：又如所往，如是應往，乃至廣說所受施物應知其量，是名如是如是應往。與此相違，名不應往。

酉二、顯住相

彼由成就此正知故，自知而往，自知而還；往所應往，非非所往，還所應還，非非所還；以時往還，不以非時；如其色類動止軌則、禮式、威儀，應往應還，如是而往，如是而還。

未三、結

如是名為若往、若還正知而住。

彼由成就此正知故等者：此中略顯前所說義。言自知而往，自知而還者，此顯於往還事。言往所應往至非非所還者，此顯於往還處。言以時往還，不以非時者，此顯於往還時。言如其色類至如是而還者，此顯如量、如

理、如其品類而有往還。如是所顯略義差別，餘皆準知。此中色類，謂出家補特伽羅剃除鬚髮、捨俗形好、著壞色衣應知。修所成地說：於下劣形相應善觀察，能生精勤如理作意，乃得名為出家之想及沙門想故。

午二、若觀若瞻正知而住<sup>3</sup> 未一、徵

若觀、若瞻正知住者，云何為觀？云何為瞻？云何觀瞻正知而住？

未二、釋<sup>3</sup> 申一、觀

所言觀者，謂於如前所列諸事，若往、若還，先無覺慧、先無功用、先無欲樂，於其中間眼見眾色，是名為觀。

謂於如前所列諸事等者：前說聚落、家屬、道場，是名所列諸事。眼見眾色，不由覺慧、功用、欲樂之所發起，是名先無覺慧、先無功用、先無欲樂。

申二、瞻

所言瞻者，謂於如前所列諸事，若往、若還，覺慧為先、功用為先、欲樂為

先，眼見眾色。謂或諸王，或諸王等，或諸僚佐，或諸黎庶，或婆羅門，或諸居士，或饒財寶長者商主，或餘外物、房舍、屋宇、殿堂、廊廟，或餘世間眾雜妙事，觀見此等，是名為瞻。

申三、正知住<sup>2</sup> 酉一、明正知

若復於此觀瞻自相，能正了知；

若復於此觀瞻自相者：前說眾色，當知唯是假相有法。依顯形色而假立故，彼顯形色是其自相。

於所應觀，於所應瞻，能正了知；

於所應觀於所應瞻者：如下說有一分應觀、一分不應觀色應知。

於應觀時，於應瞻時，能正了知；如所應觀，如所應瞻，能正了知；是名正知。

酉二、顯住相

彼由成就此正知故，自知而觀，自知而瞻；觀所應觀，瞻所應瞻；於應觀

時，於應瞻時，而正瞻覩；如所應覩，如所應瞻，如是而覩，如是而瞻。

未三、結

如是名為若覩、若瞻正知而住。

午三、若屈若伸正知而住<sup>3</sup> 未一、徵

若屈、若伸正知住者，云何為屈？云何為伸？云何名為若屈、若伸正知而住？

未二、釋<sup>2</sup> 申一、屈伸

謂彼如是覩時、瞻時，若往為先、若還為先，或屈伸足、或屈伸臂、或屈伸手、或復屈伸隨一支節，是名屈伸。

申二、正知住<sup>2</sup> 酉一、明正知

若於屈伸所有自相，能正了知；若所屈伸，能正了知；若屈伸時，能正了知；若如是屈及如是伸，能正了知；是名正知。

若於屈伸所有自相等者：此中自相，謂即表色。如意地說應知。（陵本一卷六頁<sup>12</sup>）若手、若足、若臂、若復隨一支節，名所屈伸。如下說言：不

應搖身、搖臂、搖頭，乃至不應放縱一切身分應知。

酉二、顯住相

彼由成就此正知故，於屈於伸，自知而屈，自知而伸；於所應屈，於所應伸，而屈而伸；於應屈時，於應伸時，而屈而伸；如所應屈，如所應伸，如是而屈，如是而伸。

未三、結

如是名為若屈、若伸正知而住。

午四、持僧伽胝及以衣鉢正知而住<sup>3</sup> 未一、徵

持僧伽胝及以衣鉢正知住者，云何持僧伽胝？云何持衣？云何持鉢？云何持僧伽胝及以衣鉢正知而住？

未二、釋<sup>2</sup> 申一、持僧伽胝及以衣鉢<sup>3</sup> 酉一、持僧伽胝<sup>2</sup> 戌一、僧伽胝

謂有大衣，或六十條、或九條等、或兩重刺，名僧伽胝。

戌二、持

被服受用，能正將護，說名為持。

酉二、持衣<sup>2</sup> 戌一、衣

若有中衣，若有下衣，

若有中衣若有下衣者：如下說言，但持三衣。一、僧伽胝，二、嗢怛羅僧伽，三、安怛婆參。（陵本二十五卷二十頁<sup>2148</sup>）此說大衣、中衣、下衣，如次即彼三衣應知。

或持為衣，或有長衣，或應作淨，或已作淨，如是一切說名為衣。

戌二、持

被服受用，能正將護，說名為持。

或持為衣等者：前說三衣，名持為衣。貯蓄餘衣，是名長衣。如是一切總名為衣。於如是衣佛所開許，應白羯磨，或復已白，名應作淨，或已作淨。

酉三、持鉢<sup>2</sup> 戌一、鉢

若堪受持或鐵、或瓦乞食應器，說名為鉢。

戌二、持

現充受用，能正將護，說名為持。

申二、正知住<sup>2</sup> 酉一、明正知

若於如是或僧伽氍、或衣、或鉢所有自相，能正了知；於所應持或僧伽氍、或衣、或鉢或淨不淨，能正了知；若於此時或僧伽氍、或衣、或鉢已持應持，能正了知；若於如是或僧伽氍、或衣、或鉢應如是持，能正了知；是名正知。

或淨不淨能正了知者：謂若習近增諸善法，減不善法，是名為淨；與此相違，當知不淨。如下說言，不應開紐、不軒、不礫，亦不褻張而被法服，乃至廣說不應置鉢在雜穢處、若坑澗處、若崖岸處。其義應知。

酉二、顯住相

彼由成就此正知故，於所應持或僧伽氍、或衣、或鉢，自知而持；於所應



持，於應持時，而能正持；如所應持，如是而持。

未三、結

如是名為持僧伽胝及以衣鉢正知而住。

午五、若食若飲若噉若嘗正知而住<sup>3</sup> 未一、徵

若食、若飲、若噉、若嘗正知住者，云何為食？云何為飲？云何為噉？云何為嘗？云何若食、若飲、若噉、若嘗正知而住？

未二、釋<sup>3</sup> 申一、食<sup>2</sup> 酉一、標列

謂諸所有受用飲食，總名為食。此復二種，一、噉，二、嘗。

酉二、別辨<sup>2</sup> 戌一、噉<sup>3</sup> 亥一、徵

云何為噉？

亥二、列

謂噉餅麩、或飯、或糜、或羹、或臠，或有所餘造作轉變可噉可食，能持生命。

亥三、結

如是等類皆名為噉，亦名為食。

或有所餘造作轉變等者：謂若餅麩、或飯、或糜、或羹、或臠，及餘可噉可食一切品類，當知唯是假相有法，非常言論所攝，謂由加行故及轉變故。如思所成地說。（陵本十六卷四頁<sup>1377</sup>）此說造作轉變，準彼應釋。

戌二、嘗<sup>3</sup> 亥一、徵

云何為嘗？

亥二、列

謂嘗乳、酪、生酥、熟酥、油、蜜、沙糖、魚、肉、醯、鮓，或新果實，或有種種咀嚼品類。

亥三、結

如是一切總名為嘗，亦名為食。

申二、飲<sup>2</sup> 酉一、徵

云何為飲？

酉二、列

謂沙糖汁、或石蜜汁、或飯漿飲、或鑽酪飲、或酢為飲、或桴酪飲，乃至於水，總名為飲。

申三、正知住<sup>2</sup> 酉一、明正知

若於如是若食、若飲、若噉、若嘗所有自相，能正了知；若於一切所食、所飲、所噉、所嘗，能正了知；若於爾時應食、應飲、應噉、應嘗，能正了知；若於如是應食、應飲、應噉、應嘗，能正了知；是名正知。

酉二、顯住相

彼由成就此正知故，於自所有若食、若飲、若噉、若嘗，自知而食，自知而飲，自知而噉，自知而嘗；於所應食，於所應飲，於所應噉，於所應嘗，正食、正飲、正噉、正嘗；應時而食，應時而飲，應時而噉，應時而嘗；如所應食乃至如所應嘗，如是而食乃至如是而嘗。

未三、結

如是名為若食、若飲、若噉、若嘗正知而住。

午六、若行若住廣說乃至若解勞睡正知而住<sup>3</sup> 未一、徵

若行、若住，廣說乃至若解勞睡正知住者，云何為行？云何為住？云何為坐？云何為臥？云何恬寤？云何為語？云何為默？云何名為解於勞睡？云何於行，廣說乃至於解勞睡正知而住？

未二、釋<sup>9</sup> 申一、行

謂如有一，於經行處來往經行，或復往詣同法者所，或涉道路。如是等類，說名為行。

申二、住

復如有一，住經行處，住諸同法阿遮利耶、鄔波陀耶，及諸尊長、等尊長前。如是等類，說名為住。

申三、坐

復如有一，或於大床、或小繩床、或草葉座、或諸敷具、或尼師壇，結加趺坐，端身正願，安住背念。如是等類，說名為坐。

申四、臥

復如有一，出住處外洗濯其足，還入住處，或於大床、或小繩床、或草葉座、或阿練若、或在樹下、或空閑室，右脅而臥，重疊其足。如是等類，說名為臥。

申五、惛寤

復如有一，於晝日分經行、宴坐，從順障法淨修其心；於初夜分、於後夜分經行、宴坐，從順障法淨修其心；說名惛寤。

申六、語<sup>2</sup>

酉一、列<sup>3</sup>

戌一、讀誦法教

復如有一，常勤修習如是惛寤，於未受法正受正習，令得究竟。所謂契經、應頌、記別，廣說如前。即於如是已所受法，言善通利，謂大音聲若讀、若誦。

戌二、為他開示

或復為他廣說開示。

戌三、慶慰勸勵

於時時間，與諸有智同梵行者，或餘在家諸賢善者，語言談論，共相慶慰，為欲勸勵及求資具。

酉二、結

如是等類，說名為語。

於時時間至及求資具者：此中共相慶慰，謂於有智同梵行者。為欲勸勵及求資具，謂於在家諸賢善者。如是差別應知。

申七、默<sup>2</sup> 酉一、列<sup>2</sup> 戌一、思惟

復如有一，隨先所聞、隨先所習言善通利究竟諸法，獨處空閑，思惟其義，籌量觀察。

戌二、修習<sup>2</sup> 亥一、止

或處靜室，令心內住、等住、安住，及與近住、調伏、寂靜、最極寂靜、一趣、等持。

亥二、觀

或復於彼毗鉢舍那修瑜伽行。

酉二、結

如是等類，說名為默。

或處靜室至修瑜伽行者：此中止觀，名瑜伽行。令心內住乃至等持，是名止行，此即九種心住。四種毗鉢舍那，是名觀行。如下自釋應知。

申八、勞睡

復如有一，於其熱分極炎暑時，或為熱逼、或為劬勞，便生疲倦，非時惛寐，樂著睡眠，是名勞睡。

申九、正知住<sup>2</sup> 酉一、明正知<sup>2</sup> 戌一、釋<sup>4</sup> 亥一、於行等相

若復於行，廣說乃至於解勞睡所有自相，能正了知。

亥二、於應行等

於所應行，乃至於所應解勞睡，能正了知。

亥三、於行等時

於應行時，乃至於應解勞睡時，能正了知。

亥四、於如行等

如所應行，乃至如所應解勞睡，能正了知。

戌二、結

是名正知。

酉二、顯住相

彼由成就此正知故，於其自行乃至於其自解勞睡，正知而行乃至正知而解勞睡；若所應行乃至若所應解勞睡，即於彼行乃至於彼解於勞睡；若時應行乃至若時應解勞睡，即此時行乃至此時解於勞睡；如所應行乃至如所應解勞睡，如是而行乃至如是而解勞睡。



未三、結

如是名為於行、於住、於坐、於臥、於其恬寤、於語、於默、於解勞睡正知而住。

已二、總顯次第及所為事<sup>2</sup> 午一、徵

復次，如是正知而住，云何次第？為顯何事？

午二、釋<sup>2</sup> 未一、辨次第<sup>2</sup> 申一、釋<sup>6</sup> 酉一、往還<sup>3</sup> 戌一、於所應往及非所往<sup>2</sup>

亥一、於村邑等

謂如有一，依止如是村邑、聚落、亭邏而住，作是思惟：我今應往如是村邑、聚落、亭邏巡行乞食。如是乞已，出還本處。

亥二、於諸居家<sup>2</sup> 天一、不應往<sup>3</sup> 地一、標

又於如是村邑等中，或有居家我不應往。

地二、徵

何等居家？

地三、列

謂唱令家，或酤酒家，或姪女家，或國王家，或旃荼羅、羯恥那家；或復有家一向誹謗，不可迴轉。

謂唱令家等者：此顯五種非所行處。如前戒律儀中已說應知。（陵本二十卷四頁<sup>1901</sup>）

天二、應往<sup>2</sup> 地一、標

或有居家我所應往。

地二、列

謂刹帝利大族姓家、或婆羅門大族姓家、或諸居士大族姓家、或僚佐家、或饒財家、或長者家、或商主家。

戌二、於應往時及不應往

又有居家我雖應往，不應太早太晚而往。若施主家有遽務時，亦不應往；若戲樂時、若有營構嚴飾事時、若為世間弊穢法時、若忿競時，亦不應往。

若為世間弊穢法時者：謂欲邪行名弊穢法應知。

戌三、於如所往及非所應<sup>2</sup> 亥一、往村邑等

又如所往，如是應往。不與暴亂惡象俱行，不與暴亂眾車、惡馬、惡牛、惡狗而共同行，不入鬧叢，不蹈棘刺，不踰垣牆，不越坑塹，不墮山崖，不溺深水，不履糞穢。

亥二、往施主家<sup>2</sup> 天一、應隨月喻

應隨月喻往施主家，具足慚愧，遠離憍傲，盪滌身心，不求利養，不希恭敬。如自獲得所有利養，心生喜悅，如是於他所得利養，心亦喜悅。不自高舉，不輕憊他，心懷哀愍。

不自高舉不輕憊他心懷哀愍者：此顯喜悅他得利養由三因緣應知。

天二、應自持心<sup>4</sup> 地一、於非所宜

又應如是自持其心，往施主家。豈有出家往詣他所，要望他施非不惠施，廣說乃至要當速疾而非遲緩。

廣說乃至要當速疾等者：此中廣說，謂要望他敬非不恭敬，要多非少，要妙非麤。如前於食知量中已說應知。

地二、於應知量

又作是心：我於今假往施主家，所受施物應知其量。

地三、於邪追求

又我不應利養因緣，矯詐虛誑、現惑亂相、以利求利。

矯詐虛誑等者：謂依矯詐、或邪妄語、或假現相、或苦研逼、或利求利種種狀相，而從他所非法希求所有衣服、飲食、臥具、病緣醫藥諸資生具。如前戒律儀中釋相應知。

地四、於染受用

得利養已，無染、無愛，亦不耽嗜、饕餮、迷悶、堅執、涵著而受用之。

西二、觀瞻<sup>2</sup> 戌一、標

復於已往或正往時，觀見眾色，於此眾色一分應觀，或有一分所不應觀。於

不應觀所有眾色，當攝其眼，善護諸根；於所應觀所有眾色，應善住念而正觀察。

於不應觀所有眾色等者：謂所觀色若令發生種種雜染，此不應觀。於如是色，不應策發所有眼根，是名當攝其眼。不取其相及與隨好，防守正念，修根律儀，是名善護諸根。若所觀色令不雜染，此所應觀。於如是色，應策眼根，安住正念，審諦觀察，為令於色離喜貪故。

戌二、釋<sup>2</sup> 亥一、不應觀色<sup>3</sup> 天一、徵

何色類色所不應觀？

天二、釋

謂諸妓樂戲笑歡娛，或餘遊戲所作歌舞音樂等事；如是復有母邑殊勝，幼少盛年，美妙形色；或復有餘所見眾色，能壞梵行、能障梵行、能令種種諸惡不善尋思現行。

天三、結

如是色類所有眾色，不應觀視。

亥二、所應觀色<sup>3</sup> 天一、徵

何色類色是所應觀？

天二、釋<sup>3</sup> 地一、老相

謂諸所有衰老朽邁上氣者身、傴僂憑杖戰掉者身。

地二、病相

或諸疾苦重病者身，腳腫、手腫、腹腫、面腫、膚色萎黃、瘡癬、疥癩、眾苦逼迫、身形委頓、身形洪爛、諸根闇鈍。

地三、死相<sup>2</sup> 玄一、朽穢不淨

或有天喪，死經一日、或經二日、或經七日，被諸烏鵲、餓狗、鴟鷂、狐狼、野干種種暴惡傍生禽獸之所食噉。

玄二、他生愁等

或命終已，出置高床，上施幃帳，前後大眾或哀或哭，以其灰土塵塗全身髮，

生愁、生苦、生悲、生怨、生憂、生惱。

天三、結

如是等類所有眾色，我應觀察。觀是眾色，能順梵行、能攝梵行、能令諸善尋思現行。

酉三、屈伸

不應搖身、搖臂、搖頭、跳躑、攜手、叉腰、竦肩入施主家，不應輒坐所不許座，不應不審觀座而坐，不應放縱一切身分，不應翹足、不應交足、不太狹足、不太廣足，端嚴而坐。

酉四、衣鉢<sup>2</sup> 戌一、持衣

不應開紐、不軒、不磔，亦不褻張而被法服；所服法衣并皆齊整，不高、不下、不如象鼻；非如多羅樹間房穗、非如龍首、非如豆搏而被法服。

戌二、持鉢

不應持鉢預就其食，不應持鉢在飲食上，不應置鉢在雜穢處、若坑澗處、若

崖岸處。

酉五、飲食

又應次第受用飲食。不應以飯覆羹臠上，不以羹臠覆其飯上，不應饕餮受諸飲食，不應嫌恨受諸飲食，不太麤食、不太細食，不應圓搏食，不應舐手、不應舐鉢，不振手食、不振足食，不應齧斷而食其食。

不應嫌恨受諸飲食者：謂如前說，往施主家，設不惠施，終不於彼起怨害心及瞋恚心而相嫌恨。乃至廣說。（陵本二十三卷十一頁<sup>1978</sup>）義應準知。

酉六、行等<sup>5</sup>

戌一、經行<sup>3</sup>

亥一、標處所

從施主家還歸住處，於晝夜分，在自別人所經行處往反經行；非於他處、非不委處、非不恣處、非不與處而輒經行。

亥二、遮時位

非身劬勞、非身疲倦、非心掉舉所制伏時而習經行。

亥三、顯習相



為修善品、為善思惟，內攝諸根、心不外亂而習經行，不太馳速、不太躁動，亦非一向專事往來而習經行，時時進步、時時停住而習經行。

在自別人所經行處等者：於自所居住處，自院、自房，稱其廣長度量一方所而習經行，不共於他，名自別人所經行處。如是經行，非於他所住處，是名非於他處。非地方所不稱度量，是名非不委處。若往、若來非不恣意，是名非不恣處。非為僧分所不許與，是名非不與處。

#### 戌二、宴坐

如是於自所居住處、自院自房自別人處、僧分與處、非於他處、非不委處、非不恣處習經行已。復於大床，或小繩床，或草葉座，或尼師壇，或阿練若、樹下、冢間，或空閑室，結加趺坐，端身正願，安住背念，而習宴坐。

#### 戌三、寢寤

於夜中分如法寢息，於晝日分及夜初分，修諸善品不應太急。如是寢時，應如前說，住光明想、正念、正知、思惟起想。於夜後分速疾恬寤。

戌四、語默<sup>2</sup> 亥一、第一義<sup>2</sup> 天一、語

或於語論、或於讀誦，勤修加行。

天二、默<sup>2</sup> 地一、遠離無義

或為修斷，閑居宴默思惟法時，應當遠離順世典籍，綺字、綺句、綺飾文詞，能引無義，不能令證神通等覺、究竟涅槃。

不能令證神通等覺者：此中神通，意說漏盡智通。覺，即智差別名。等言，等取所餘諸聖功德應知。

地二、法隨法行

復於如來所說正法，最極甚深、相似甚深空性相應，隨順緣性及諸緣起，殷重無間善攝善受，令堅、令住、令無失壞，為成正行，不為利養恭敬稱譽。

復於如來所說正法等者：如下說言，緣性緣起所緣，唯有諸法能引諸法，無有作者及以受者，是名空性相應。依此義說最極甚深。又緣起支，雖實無常、苦、空、無我，而有彼相相似顯現，如有尋有伺地釋。（陵本十卷

十六頁<sup>812</sup>）依此義說相似甚深。

又於是法言善通利、慧善觀察，於誼雜眾不樂習近、不樂多業、不樂多言，於時時間安住正念。

亥二、第二義<sup>2</sup> 天一、語<sup>2</sup> 地一、談論慶慰

與諸有智同梵行者，語言談論，共相慶慰，樂興請問，樂求諸善，無違諍心。  
地二、為他說法

言詞稱量、言詞合理、言詞正直、言詞寂靜，樂勤為他宣說正法。

言詞稱量等者：義無違逆，是名稱量。譬喻相應，是名合理。言無雜亂，是名正直。言不勝聽，是名寂靜。

天二、默<sup>2</sup> 地一、思惟

又應宴默，於惡不善所有尋思不樂尋思，又於非理所有諸法不樂思惟。

地二、修習

於自所證，離增上慢；於少下劣差別證中，不生喜足；於上所證中無退屈；

善能遠離不應思處，時時修習止觀瑜伽，樂斷樂修，無間修習、殷重修習。善能遠離不應思處等者：不應思處，略有九種。一、我，二、有情，三、世界，四、業報，五、靜慮者境界，六、諸佛境界，七、十四不可記事，八、非正法，九、一切煩惱之所引攝。如顯揚說。（顯揚論十七卷七頁）若有思議如是等事，當能引三種過失。一、起心亂過失，二、生非福過失，三、不得善過失。由是說言不應思處。言止觀瑜伽者，四瑜伽中方便所攝應知。

戌五、解勞睡<sup>3</sup> 亥一、出因緣

又於熱分極炎暑時，勇猛策勵，發勤精進，隨作一種所應作事，勞倦因緣，遂於非時發起惛睡。

亥二、明所為

為此義故，暫應寢息，欲令惛睡疾除遣，勿經久時，損減善品、障礙善品。

亥三、舉方便

於寢息時，或關閉門，或令苾芻在傍看守，或毗奈耶隱密軌則，以衣蔽身，在深隱處須臾寢息，令諸勞睡皆悉除遣。

申二、結

如是名為正知而住先後次第。謂依行時及依住時。

未二、辨知住<sup>2</sup> 申一、辨<sup>2</sup> 酉一、正知

又於善品先未趣入，心興加行如理作意俱行妙慧，說名正知。

酉二、住

即此正知，行時、住時，一切成辦無所減少，如是名為正知而住。

申二、配<sup>2</sup> 酉一、行時

當知此中，若往、若還、若覩、若瞻、若屈、若伸、持僧伽胝及以衣鉢、若食、若飲、若噉、若嘗正知而住，由是名為於村邑等如法行時正知而住。

酉二、住時

若行、若住、若坐、若臥、若習恬寤、若語、若默、若解勞睡正知而住，由

是名為於其住處如法住時正知而住。

辰二、顯略義<sup>3</sup> 巳一、結前生後

如是應知己廣分別正知而住。復云何知此中略義？

巳二、總標別釋<sup>2</sup> 午一、標

謂於行時有五種業，於其住時有五種業，行時、住時正知而住有四種業，如是名為正知而住所有略義。

午二、釋<sup>3</sup> 未一、行時五業<sup>4</sup> 申一、徵

云何行時有五種業？

申二、列

一者、身業，二者、眼業，三者、一切支節業，四者、衣鉢業，五者、飲食業。

申三、結

如是名為行時五業。

申四、配<sup>5</sup> 酉一、身業

謂若說言：若往、若還。此言顯示行時身業。

酉二、眼業

若復說言：若覩、若瞻。此言顯示行時眼業。

酉三、一切支節業

若復說言：若屈、若伸。此言顯示行時一切支節業。

酉四、衣鉢業

若復說言：持僧伽氍及以衣鉢。此言顯示行時衣鉢業。

酉五、飲食業

若復說言：若食、若飲、若噉、若嘗。此言顯示行時飲食業。

未二、住時五業<sup>4</sup> 申一、徵

云何名為住時五業？

申二、列

一者、身業，二者、語業，三者、意業，四者、晝業，五者、夜業。

申三、配<sup>5</sup> 酉一、身業

謂若說言：若行、若住、若坐。此言顯示住時身業。

酉二、語業

若復說言：若語。此言顯示住時語業。

酉三、意業

若復說言：若臥、若默、若解勞睡。此言顯示住時意業。

若臥若默等者：前說：住光明想、正念、正知、思惟起想。是臥所攝。又說：於惡不善所有尋思不樂尋思，乃至樂斷樂修，無間修習、殷重修習。是默所攝。又意地說：眠夢是彼意識勝所作業；依此義說，顯示住時意業。

酉四、晝等業

若復說言：若習恬寤。此言顯示住時晝業、夜業、身業、語業。



酉五、夜業

又若臥者，此言顯示住時夜業。

申四、結

當知是名住時五業。

若復說言若習惛寤等者：習惛寤中說：於晝日分及於初後夜分經行、宴坐，從順障法淨修其心。此即顯示住時晝業、夜業。即彼經行，顯示身業。又說：於經行時，以大音聲若讀、若誦所聽聞法。是即顯示住時語業。

未三、正知四業<sup>2</sup> 申一、徵

云何名為行時、住時正知而住所有四業？

申二、釋<sup>3</sup> 酉一、舉四業

謂初依彼行業、住業起如是業，即於彼業安守正念，不放逸住。當知此業，正念所攝、不放逸攝。

行時住時正知而住所有四業等者：前說行時有五種業，即依彼業安住正念，不放逸住，是名行時正知而住所有二業。如是住時正知而住二業亦爾。由是總說行時、住時正知而住有四種業。

酉二、明正知

若於是事、是處、是時，如量、如理、如其品類所應作者，即於此事、此處、此時，如量、如理、如其品類正知而作。

若於是事是處是時等者：前說若往、若還，乃至若解勞睡，是名為事。即於是事能順梵行、能攝梵行、能令諸善尋思現行，是名為處。以時往還，乃至廣說若解勞睡，是名為時。無有增減，是名為量。與義相應，是名為理。諸相差別，是名品類。依廣分別，隨應可知。

酉三、顯勝利

彼由如是正知作故，於現法中無罪無犯，無有惡作，無變無悔；於當來世亦無有罪，身壞死後不墮惡趣，不生一切那落迦中。

無變無悔者：不為受等變壞其心，是名無變。臨命終時不生憂悔，是名無悔。

已三、總結略義

為得未得，積習資糧。如是名為正知而住所有略義。

卯四、結

前廣分別，今此略義，一切總名正知而住。

瑜伽師地論科句披尋記卷第二十四



瑜伽師地論科句披尋記卷第二十五

彌勒菩薩說

唐三藏沙門玄奘奉詔譯

韓清淨科記

本地分中聲聞地初瑜伽處出離地品第三之四

寅六、善友性<sup>3</sup> 卯一、徵

云何名善友性？

卯二、釋<sup>2</sup> 辰一、廣分別<sup>2</sup> 巳一、釋<sup>2</sup> 午一、由八因緣<sup>4</sup> 未一、標

謂八因緣故，應知一切種圓滿善友性。

未二、徵

何等為八？

未三、列

謂如有一，安住禁戒、具足多聞、能有所證、性多哀愍、心無厭倦、善能堪

忍、無有怖畏、語具圓滿。

未四、釋<sup>8</sup> 申一、安住禁戒<sup>3</sup> 酉一、徵

云何名為安住禁戒？

酉二、釋

謂安住具戒，善能守護別解律儀，如前廣說樂沙門性、樂婆羅門性，為自調伏、為自寂靜、為自涅槃，修行正行。

酉三、結

如是名為安住禁戒。

申二、具足多聞<sup>3</sup> 酉一、徵

云何名為具足多聞？

酉二、釋

謂若有法宣說開示，初中後善，文義巧妙，獨一、圓滿、清白、梵行。於如是類眾多妙法，能善受持，言善通利、意善尋思、見善通達。

酉三、結

如是名為具足多聞。

謂若有法宣說開示等者：攝異門分說：宣說者，謂因他請問而為記別。開示者，謂他展轉所生疑惑皆能除遣。初善者，謂聽聞時生歡喜故。中善者，謂修行時無有艱苦，遠離二邊，依中道行故。後善者，謂極究竟離諸垢故，及一切究竟離欲為後邊故。義妙者，謂能引發利益安樂故。文巧者，謂善緝綴名身等故，及語具圓滿故。純一者，謂不與一切外道共故。圓滿者，謂無限量故，最尊勝故。清淨者，謂自性解脫故。鮮白者，謂相續解脫故。梵行者，謂八聖支道。（陵本八十三卷十二頁<sup>6311</sup>）此應準釋。申三、能有所證<sup>3</sup> 酉一、徵

云何名為能有所證？

酉二、釋<sup>2</sup> 戌一、舉所證<sup>3</sup> 亥一、二十種想

謂能證得勝無常想、無常苦想、苦無我想、厭逆食想、一切世間不可樂想、

有過患想、斷想、離想、滅想、死想、不淨想、青瘀想、膿爛想、破壞想、膨脹想、噉食想、血塗想、離散想、骨鎖想、觀察空想。

謂能證得勝無常想等者：謂於諸行取無常相，亦取苦相，於諸法中取無我相，此能對治三種顛倒，謂於無常計常顛倒，於苦計樂顛倒，及於無我計我顛倒，是名勝無常想、無常苦想、苦無我想。於飲食中取惡逆相，是名厭逆食想。及隨順苦受諸行及苦受中取苦諦相，是名一切世間不可樂想。若修世間道時，於諸下地取過患相，是名有過患想。若修涅槃道時，於斷界、離欲界、滅界，觀見最勝寂靜功德，如其次第修習彼想，是名斷想、離想、滅想。於其命根取中天相，是名死想。依內依外取朽穢相，名不淨想。於外不淨為治欲貪，觀青瘀等乃至骨鎖，名青瘀想乃至名骨鎖想。觀諸蘊中，無有常恆、堅住、主宰，或說為我，或說有情，或復於此說為生者、老者、病者及以死者，或復說彼能造諸業、能受種種果及異熟，由是諸行皆悉是空，無有我故，如是觀察空無所得，是名觀察空想。



亥二、八種等至

復能證得最初靜慮、第二靜慮、第三靜慮、第四靜慮、空無邊處、識無邊處、無所有處、最後非想非非想處。

亥三、四無量等

又能證得慈悲喜捨，或預流果、或一來果、或不還果、或神境通、或宿住通、或天耳通、或死生通、或心差別通、或阿羅漢。

戌二、顯勝能<sup>2</sup> 亥一、標

具八解脫靜慮等定，有大堪能，具大勢力，能善為他現三神變教授教誡。

亥二、釋

三神變者，一、神力神變，二、記說神變，三、教導神變。

酉三、結

如是名為能有所證。

能善為他現三神變教授教誡等者：如下說言，由神境神變，能現種種神通

境界，令他於已生極尊重；由彼於已生尊重故，於屬耳聽瑜伽作意，極生恭敬。由記說神變，能尋求他心行差別。由教誡神變，如根、如行、如所悟入為說正法，於所修行能正教誡。故三神變能攝諸相圓滿教授。（陵本二十七卷二十二頁<sup>2321</sup>）此應準釋。

申四、為性哀愍<sup>3</sup> 酉一、徵

云何名為為性哀愍？

酉二、釋

謂於他所常起悲憐，樂與其義、樂與其利、樂與其樂、樂與猗觸、樂與安隱。

酉三、結

如是名為為性哀愍。

樂與其義等者：令離諸苦，是名樂與其義；令修善行，是名樂與其利；當知此由以悲俱心。無損惱行，是名樂與其樂，當知此由以慈俱心。令生歡喜，是名樂與猗觸，當知此由以喜俱心。令離貪恚，是名樂與安隱，當知

此由以捨俱心。菩薩地說：一切無量，名為哀愍，成就此故，名哀愍者。

（陵本四十四卷十頁<sup>3575</sup>）故作是釋。

申五、心無厭倦<sup>3</sup> 酉一、徵

云何名為心無厭倦？

酉二、釋

謂善能示現、善能教導、善能讚勵、善能慶慰，處於四眾宣說正法，不辭勞倦，翹勤無惰，起發圓滿，為性好樂，發勤精進。

酉三、結

如是名為心無厭倦。

謂善能示現等者：攝釋分說：示現者，謂為令受學白品行故，示現四種真實道理。教導者，謂示現已，得信解者，安置學處，令正受行。讚勵者，謂彼有情若於所知、所行、所得中，心生退屈，爾時稱讚策勵其心，令於彼事堪有勢力。慶喜者，謂彼有情於法隨法勇猛正行，即應如實讚悅，令

其歡喜。（陵本八十一卷八頁<sup>6192</sup>）此應準知。

申六、善能堪忍<sup>3</sup> 酉一、徵

云何名為善能堪忍？

酉二、釋<sup>2</sup> 戌一、耐他怨害

謂罵不報罵、瞋不報瞋、打不報打、弄不報弄，堪耐椎杵。於諸逼迫、縛錄、禁閉、捶打、毀辱、迫脅、斫截眾苦事中，自推己過，以業異熟為所依趣，終不於他發生憤恚，亦不懷恨隨眠不捨。如是雖遭輕陵毀辱，而其本性都無變改，唯常於彼思為義利。

自推己過以業異熟為所依趣者：菩薩地說：菩薩從他怨害所生眾苦現在前時，應如是學：如此是我自業過耳，由我先世自造種種不淨業故，今受如是種種苦果。（陵本四十二卷六頁<sup>3431</sup>）此應準釋。

戌二、安受眾苦

又能堪忍寒熱、饑渴、蚊蟲、風日、蛇蝎惡觸，他所干犯、殍毒語言，身內

所生猛利、堅勁、辛楚、切心、奪命苦受，為性堪忍，能有容納。

酉三、結

如是名為善能堪忍。

申七、無有怖畏<sup>3</sup> 酉一、徵

云何名為無有怖畏？

酉二、釋

謂處大眾說正法時，心無怯劣、聲無戰掉、辯無誤失，終不由彼怯懼因緣，為諸怖畏之所逼切，腋不流汗、身毛不豎。

酉三、結

如是名為無有怖畏。

申八、語具圓滿<sup>3</sup> 酉一、徵

云何名為語具圓滿？

酉二、釋

謂彼成就最上首語、極美妙語、甚顯了語、易悟解語、樂欲聞語、無違逆語、無所依語、無邊際語。

謂彼成就最上首語等者：攝釋分說：先首語者，趣涅槃宮為先首故。美妙語者，其聲清美，如羯羅頻迦音故。顯了語者，謂詞句文皆善巧故。易解語者，巧辯說故。樂聞語者，引法義故。無依語者，不依希望他信已故。不違逆語者，知量說故。無邊語者，廣大善巧故。（陵本八十一卷三頁<sup>6172</sup>）此中次第少分有別，隨文可知，然義無異，應依彼釋。

西三、結

如是名為語具圓滿，言詞巧妙。

言詞巧妙者：此如下說，宣說相應、助伴、隨順、清亮、有用、相稱、應順名句文身所有言論應知。

午二、能作五事<sup>2</sup> 未一、標

成就如是八種因緣，善能諫舉、善作憶念、善能教授、善能教誡、善說正法。

未二、釋<sup>5</sup> 申一、善能諫舉<sup>3</sup> 酉一、徵

云何名為善能諫舉？

酉二、釋

謂若有餘，於增上戒毀犯尸羅，於增上軌毀犯軌則，由見聞疑能正諫舉，真實不以虛妄，應時不以非時，饒益不以衰損，柔軟不以麤獷，善友不以憎嫉。

酉三、結

如是名為善能諫舉。

真實不以虛妄等者：有尋有伺地說：於邪舉罪時，有五種邪舉罪者。言不應時故，名非時語者。言不實故，名非實語者。言引無義故，名非義語者。言麤獷故，名非法語者。言挾瞋恚故，名非靜語者。（陵本八卷十三頁<sup>606</sup>）與彼相違，是故名為善能諫舉。彼引無義，即此衰損。餘如文知。

申二、善作憶念<sup>2</sup> 酉一、徵

云何名為善作憶念？

酉二、釋<sup>2</sup> 戌一、標

謂令憶念先所犯罪，或法、或義。

戌二、辨<sup>3</sup> 亥一、令憶所犯<sup>3</sup> 天一、徵

云何名為令其憶念先所犯罪？

天二、釋

謂若有餘，先起毀犯而不能憶，善作方便，令彼憶念。告言：長老！曾於某處、某事、某時，毀犯如是如是色類。

天三、結

如是名為令其憶念先所犯罪。

毀犯如是如是色類者：犯自所受下劣形相、威儀、眾具，是名毀犯如是如是色類。下劣形相、威儀、眾具者，修所成地已釋其相。（陵本二十卷十



亥二、令憶念法<sup>3</sup> 天一、徵

云何名為令憶念法？

天二、釋

謂若有餘，於先所聞、所受正法，獨處思念。所謂契經、應頌、記別，廣說如前。彼若不憶，令其憶念，或復稱述、授與令憶，或興請問、詰難令憶。

天三、結

如是名為令憶念法。

亥三、令憶念義<sup>3</sup> 天一、徵

云何名為令憶念義？

天二、釋<sup>2</sup> 地一、於所聞受

謂若有餘，於先所聞、所受正義，有所忘失，為作憶念，宣說開示，令新令顯。

地二、於所作說

又若有善能引義利、能引梵行，久時所作、久時所說，彼若忘失，亦令憶念。

天三、結

如是名為善作憶念。

申三、善能教授<sup>3</sup> 酉一、徵

云何名為善能教授？

酉二、釋<sup>2</sup> 戌一、標

謂於遠離、寂靜瑜伽作意止觀，時時隨順教授而轉，時時宣說與彼相應無倒言論。

戌二、列

所謂能趣心離障蓋甚可愛樂尸羅言論、等持言論、聖慧言論、解脫言論、解脫智見言論、少欲言論、喜足言論、永斷言論、離欲言論、寂滅言論、損減言論、無雜言論、隨順緣性緣起言論。

酉三、結

如是名為善能教授。

所謂能趣心離障蓋甚可愛樂尸羅言論等者：此中略說三種言教。一、聖正言教，二、厭離言教，三、令心離蓋趣愛言教。謂尸羅言論，乃至解脫智見言論，是即聖正言教。謂於是中，宣說諸聖成就如是戒、如是定、如是慧、如是解脫、如是解脫知見故。少欲言論、喜足言論，是即厭離言教。謂於是中，宣說少欲喜足故。永斷言論，乃至隨順緣性緣起言論，是即令心離蓋趣愛言教。當知此教復有三門。一者、一切煩惱蓋離蓋趣愛言教，即此所說永斷言論、離欲言論、寂滅言論，依為證得斷、離、滅界而宣說故。二者，五蓋離蓋趣愛言教，是即損減言論、無雜言論。三者、無明蓋離蓋趣愛言教，是即隨順緣性緣起言論。如是諸義，依攝事分釋應知。

（陵本八十九卷四頁<sup>6728</sup>）

申四、善能教誡<sup>3</sup> 酉一、徵

云何名為善能教誡？

酉二、釋<sup>2</sup> 戌一、標

謂於大師所說聖教，能以正法、以毗奈耶平等教誨。

戌二、辨<sup>3</sup> 亥一、調伏

或軌範師，或親教師，或同法者，或餘尊重、等尊重者，如實知彼隨於一處違越毀犯，便於時時如法訶責、治罰、驅擯，令其調伏。

亥二、攝受

既調伏已，如法平等受諸利養，和同、曉悟、收斂、攝受。

亥三、教誨

於所應作及不應作，為令現行不現行故。

如法平等受諸利養等者：於已以法所獲如法衣服、飲食、諸坐臥具、病緣醫藥資身什物，與眾同用，自無隱費，是名如法平等受諸利養。和合方便，共為一事，是名和同。於諸學處已得善巧，有犯無犯能正覺了，是名曉悟。能正觀察身語意業，若損自他，即於此業攝斂不作，亦不與便，是

名收斂。如法御眾，方便饒益，是名攝受。

於其積習及不積習，教導教誨。

酉三、結

如是名為善能教誡。

於其積習及不積習教導教誨者：習所成性，是名積習。未習成性，名不積習。當知此中，意取不善及與善法，如次名為積習及不積習。於其積習，是不應作，令不現行；於不積習，是所應作，應令現行。為此義故，安置學處，令受正行，名教導教誨。

申五、善說正法<sup>3</sup> 酉一、徵

云何名為善說正法？

酉二、釋<sup>2</sup> 戌一、正法<sup>2</sup> 亥一、世間<sup>2</sup> 天一、標

謂於時時能善宣說初時所作無倒言論。

天二、釋

所謂施論、戒論、生天之論。於諸欲中，能廣開示過患出離清淨品法。

於諸欲中能廣開示過患出離清淨品法者：於諸行中，諸欲無常虛偽不實，敗壞之法，猶如幻事誑惑愚夫，是名過患。於諸行中，欲貪滅、欲貪斷、欲貪出，是名出離。當知出離是清淨自性，開示過患是清淨因緣，是故總名清淨品法。

亥二、出世間

又於時時宣說超勝四種聖諦相應言論。所謂苦論、集論、滅論、道論。

戌二、善說<sup>2</sup> 亥一、語具圓滿

為諸有情得成熟故，為諸有情得清淨故，為令正法得久住故，宣說相應、助伴、隨順、清亮、有用、相稱、應順名句文身所有言論。

宣說相應助伴等者：攝釋分說：相應者，謂名句文身次第善安立故，又依四種道理相應故。助伴者，能成次第故。隨順者，謂解釋次第故。清徹者，文句顯了故。清淨資助者，善入眾心故。相稱者，如眾會故。應順

者，應供故、稱法故、引義故、順時故。（陵本八十一卷三頁<sup>6174</sup>）當知此說清亮，即彼清徹。有用，即彼清淨資助。善入眾心，令得清淨，名有用故。

亥二、隨順清淨<sup>2</sup> 天一、隨順

又此言論應時而發、殷重、漸次、相續、俱有、令其欣慶、令其愛樂、令其歡喜、令其勇悍、無所訶擯、相應、助伴、無亂、如法、稱順眾會。

又此言論應時而發等者：菩薩地說：菩薩為他說正法時，依隨順說應為他說。有十五相。一者、以時，二者、重法，三者、次第，四者、相續，五者、隨順，六者、歡喜，七者、愛樂，八者、悅豫，九者、欣勇，十者、不擯，十一者、應理，十二者、稱順，十三者、無亂，十四者、如法，十五者、順眾。（陵本三十八卷十六頁<sup>3150</sup>）當知此中，應時而發乃至稱順眾會，如次配彼十五種相。譯文有異，然義無別，如彼應釋。

天二、清淨

有慈憐心，有利益心，有哀愍心，不依利養恭敬讚頌，不自高舉、不陵懾他。

酉三、結

如是名為善說正法。

有慈憐心等者：此顯依清淨說應為他說有五相別。言有慈憐心者，謂於有怨有情。言有利益心者，謂於惡行有情。言有哀愍心者，謂於有樂有苦、放逸下劣有情。言不依利養恭敬讚頌者，謂無染心。言不自高舉、不陵懾他者，謂無嫉纏。如是諸義，亦如菩薩地釋。（陵本三十八卷十七頁<sup>3156</sup>）

巳二、結

由彼成就如是八支，於時時間善能諫舉、善作憶念、善能教授、善能教誡、善說正法，是故說彼名為善友。

由彼成就如是八支者：此中八支，謂即前說八種語具圓滿應知。

辰二、顯略義<sup>3</sup> 巳一、結前生後

如是廣辯善友性已。復云何知此中略義？



巳二、略辨四緣<sup>4</sup> 午一、第一因緣

謂若善友心善稠密，為性哀愍，最初於彼樂為利益、樂為安樂。

午二、第二因緣

又即於此利益安樂，如實了知，無有顛倒，離顛倒見。

午三、第三因緣

又即於此利益安樂，有大勢力、方便善巧，能令積集、能令引發。

午四、第四因緣

又即於此利益安樂，翹勤無惰，起發圓滿，為性好樂，發動精進。

巳三、結攝一切

當知由此四因緣故，攝一切種總、略圓滿善知識性。如是名為此善友性所有略義。

卯三、結

若前所說廣分別義，若此所說所有略義，一切總說為善友性。

謂若善友心善稠密等者：此中略義，謂由四種因緣，即菩薩地五種善友相中初四種相。一者、於他先欲求作利益安樂；二者、於彼利益安樂如實了知，無顛倒覺；三者、於彼善權方便順儀說法，隨眾堪受調伏事中，有能力；四者、饒益心無厭倦。（陵本四十四卷七頁<sup>3564</sup>）是名菩薩善友初四種相。今此義同。

寅七、聞思正法<sup>3</sup> 卯一、徵

云何名為聞思正法？

卯二、釋<sup>2</sup> 辰一、正法<sup>2</sup> 巳一、略說<sup>4</sup> 午一、標

謂正法者，若佛世尊、若佛弟子、正士、正至、正善丈夫，宣說開顯分別照了。

午二、徵

此復云何？

午三、釋

所謂契經、應頌、記別，廣說如前十二分教。

午四、結

是名正法。

正士正至正善丈夫等者：於諸有情遠離邪行、行無倒行，是名正士。已趣各別煩惱寂靜，是名正至。具善友相，眾德相應，是名正善丈夫。因他請問而為記別，是名宣說。除遣他疑，顯發甚深義句，是名開顯。既略說已，分別開示，解其義趣，是名分別。於作證法，廣為他說宣揚開示，是名照了。

巳二、廣辨<sup>2</sup>

午一、釋<sup>2</sup>

未一、十二分教<sup>12</sup>

申一、契經<sup>3</sup>

酉一、徵

云何契經？

酉二、釋<sup>2</sup>

戌一、契義

謂薄伽梵，於彼彼方所，為彼彼所化有情，依彼彼所化諸行差別，宣說無量蘊相應語、處相應語、緣起相應語、食相應語、諦相應語、界相應語、聲聞

乘相應語、獨覺乘相應語、如來乘相應語、念住正斷神足根力覺支道支等相應語、不淨息念諸學證淨等相應語。

戌二、經義

結集如來正法藏者，攝聚如是種種聖語，為令聖教久住世故，以諸美妙名句文身，如其所應次第安布、次第結集。謂能貫穿縫綴種種能引義利、能引梵行真善妙義。

酉三、結

是名契經。

不淨息念諸學證淨等相應語者：不淨，謂不淨所緣。息念，謂阿那波那念所緣。如下自釋應知。諸學，謂戒、定，及慧三無漏學。證淨，謂佛、法、僧、戒四種證淨。

申二、應頌<sup>3</sup> 酉一、徵

云何應頌？

酉二、釋

謂於中間、或於最後宣說伽陀，或復宣說未了義經。

酉三、結

是名應頌。

或復宣說未了義經等者：謂若是經唯略標義，未廣分別，是名宣說未了義經。於如是經亦名應頌。

申三、記別<sup>3</sup> 酉一、徵

云何記別？

酉二、釋

謂於是中，記別弟子命過已後當生等事，或復宣說已了義經。

酉三、結

是名記別。

或復宣說已了義經等者：謂若是經已廣分別略所標義，是名宣說已了義

經。於如是經亦名記別。

申四、諷頌<sup>3</sup> 酉一、徵

云何諷頌？

酉二、釋

謂非直說，是結句說。或作二句、或作三句、或作四句、或作五句、或作六句等。

酉三、結

是名諷頌。

謂非直說是結句說者：非長行說，名非直說。以句宣說，名結句說。

申五、自說<sup>3</sup> 酉一、徵

云何自說？

酉二、釋

謂於是中，不顯能請補特伽羅名字、種性，為令當來正法久住、聖教久住，

不請而說。

西三、結

是名自說。

申六、因緣<sup>3</sup> 西一、徵

云何因緣？

西二、釋

謂於是中，顯示能請補特伽羅名字、種性，因請而說；及諸所有毗奈耶相應，有因有緣別解脫經。

西三、結

是名因緣。

有因有緣別解脫經者：謂有緣起制立一切所學處故。

申七、譬喻<sup>3</sup> 西一、徵

云何譬喻？

酉二、釋

謂於是中，有譬喻說。由譬喻故，本義明淨。

酉三、結

是名譬喻。

申八、本事<sup>3</sup> 酉一、徵

云何本事？

酉二、釋

謂諸所有宿世相應事義言教。

酉三、結

是名本事。

謂諸所有宿世相應事義言教者：謂除本生，宣說前際諸所有事故。

申九、本生<sup>3</sup> 酉一、徵

云何本生？



酉二、釋

謂於是中，宣說世尊在過去世彼彼方分，若死、若生，行菩薩行、行難行行。

酉三、結

是名本生。

申十、方廣<sup>3</sup> 酉一、徵

云何方廣？

酉二、釋

謂於是中，宣說一切諸菩薩道，為令修證阿耨多羅三藐三菩提、十力、無畏、無障智等一切功德。

酉三、結

是名方廣。

是名方廣者：此所說法廣故、多故、極高大故、時長遠故，謂極勇猛，經三大劫阿僧企耶方得成滿，故名方廣。如攝釋分說。（陵本八十一卷十二

頁  
6202)

申十一、希法<sup>3</sup> 酉一、徵

云何希法？

酉二、釋

謂於是中，宣說諸佛、諸佛弟子、苾芻、苾芻尼、式叉摩那、勞策男、勞策女、近事男、近事女等，若共不共，勝於其餘、勝諸世間，同意所許，甚奇希有最勝功德。

酉三、結

是名希法。

申十二、論議<sup>3</sup> 酉一、徵

云何論議？

酉二、釋

所謂一切摩怛理迦、阿毗達磨，研究甚深素怛纘義，宣暢一切契經宗要。

酉三、結

是名論議。

一切摩怛理迦等者：攝釋分說：且如一切了義經，皆名摩怛理迦。謂於是處，世尊自廣分別諸法體相。又於是處，諸聖弟子已見諦跡，依自所證，無倒分別諸法體相，此亦名為摩怛理迦。即此摩怛理迦，亦名阿毗達磨，乃至廣說。（陵本八十一卷十二頁<sup>6203</sup>）此說一切摩怛理迦、阿毗達磨，如義應知。

未二、三藏所攝<sup>4</sup> 申一、標

如是所說十二分教，三藏所攝。

申二、列

謂或有素怛纁藏攝，或有毗奈耶藏攝，或有阿毗達磨藏攝。

申三、配<sup>3</sup> 酉一、素怛纁藏

當知此中，若說契經、應頌、記別、諷頌、自說、譬喻、本事、本生、方

廣、希法，是名素怛纁藏。

酉二、毗奈耶藏

若說因緣，是名毗奈耶藏。

酉三、阿毗達磨藏

若說論議，是名阿毗達磨藏。

申四、結

是故如是十二分教，三藏所攝。

午二、結

如是一切，正士、正至、正善丈夫共所宣說，故名正法。

辰二、聞思<sup>2</sup> 巳一、聞正法<sup>3</sup> 午一、標

聽聞此故，名聞正法。

午二、徵

此復云何？

午三、釋<sup>2</sup> 未一、約三藏辨<sup>2</sup> 申一、列

謂如有一，或受持素怛纁，或受持毗奈耶，或受持阿毗達磨，或受持素怛纁及毗奈耶，或受持素怛纁及阿毗達磨，或受持毗奈耶及阿毗達磨，或具受持素怛纁、毗奈耶、阿毗達磨。

申二、結

如是一切，名聞正法。

未二、約文義辨

此聞正法復有二種。一、聞其文，二、聞其義。

巳二、思正法<sup>2</sup> 午一、徵

云何思正法？

午二、釋<sup>2</sup> 未一、略標

謂如有一，即如所聞、所信正法，獨處空閑，遠離六種不應思處。謂思議我、思議有情、思議世間、思議有情業、思議果異熟、思議靜慮者靜慮境

界、思議諸佛諸佛境界。

遠離六種不應思處等者：顯揚論說有九種事不可思議，此說六種不應思處，即彼前六種。云何名為不應思處？由思議我若有、若無，成二過失故。由思議有情、思議世間，三過所隨故。由有情業、處、事等難思故。由果異熟二作者非定故。由靜慮者及諸佛境界無譬、自在故。如顯揚論釋應知。（顯揚論十七卷八頁）

但正思惟所有諸法自相、共相。

但正思惟所有諸法自相共相者：如下說有五種善巧。謂蘊善巧、界善巧、處善巧、緣起善巧、處非處善巧。此五善巧略則為二。一、自相善巧，二、共相善巧。由蘊善巧顯自相善巧，由餘善巧顯共相善巧。（陵本二十七卷十七頁<sup>2302</sup>）由是當知，若正思惟蘊所攝法，是名思惟諸法自相；若復思惟餘所攝法，是名思惟諸法共相。

如是思惟，復有二種。

申二、列

一者、以算數行相，善巧方便算計諸法；二者、以稱量行相，依正道理觀察諸法功德過失。

申三、釋

謂若思惟諸蘊相應所有言教，若復思惟如前所說所餘隨一所有言教，皆由如是二種行相方便思惟。

若復思惟如前所說所餘隨一所有言教者：謂如前說處相應語，乃至不淨息念諸學證淨等相應語，名蘊所餘隨一所有言教。

申四、廣<sup>2</sup> 酉一、徵

此復云何？

酉二、釋<sup>2</sup>

戌一、舉諸蘊<sup>2</sup>

亥一、算數行相<sup>2</sup>

天一、思惟蘊數<sup>2</sup>

地一、釋<sup>5</sup>

玄

一、色蘊

謂言色者，即十色處，及墮法處所攝眾色，是名色蘊。

玄二、受蘊

所言受者，即三種受，是名受蘊。

玄三、想蘊

所言想者，即六想身，是名想蘊。

即六想身者：謂眼觸所生想，耳、鼻、舌、身、意觸所生想，名六想身。

玄四、行蘊

所言行者，即六思身等，是名行蘊。

即六思身等者：謂眼觸所生思，耳、鼻、舌、身、意觸所生思，名六思身。等言，等取所餘除受及想諸心法等。如是一切總名行蘊。

玄五、識蘊

所言識者，即六識身等，是名識蘊。

即六識身等者：眼識乃至意識，名六識身。等言，等取心、意、識差別應



知。

地二、結

如是名為以算數行相，思惟諸蘊相應言教。

天二、思惟無量

或復由此算數行相，別別思惟展轉差別，當知即有無量差別。

亥二、稱量行相<sup>3</sup> 天一、徵

云何以稱量行相，依正道理思惟諸蘊相應言教？

天二、釋<sup>4</sup> 地一、標

謂依四道理無倒觀察。

地二、徵

何等為四？

地三、列

一、觀待道理，二、作用道理，三、證成道理，四、法爾道理。

地四、釋<sup>4</sup> 玄一、觀待道理<sup>5</sup> 黃一、徵

云何名為觀待道理？

黃二、標

謂略說有二種觀待。

黃三、列

一、生起觀待，二、施設觀待。

黃四、釋<sup>2</sup> 字一、別辨<sup>2</sup> 宙一、生起觀待

生起觀待者，謂由諸因、諸緣勢力生起諸蘊，此蘊生起要當觀待諸因、諸緣。

謂由諸因諸緣勢力生起諸蘊等者：有尋有伺地中說：有十因、四緣，生起諸蘊及蘊觀待，隨其所應差別應知。

宙二、施設觀待

施設觀待者，謂由名身、句身、文身施設諸蘊，此蘊施設要當觀待名句文身。

字二、總結

是名於蘊生起觀待、施設觀待。

黃五、結

即此生起觀待、施設觀待，生起諸蘊、施設諸蘊，說名道理瑜伽方便，是故說為觀待道理。

玄二、作用道理<sup>4</sup> 黃一、徵

云何名為作用道理？

黃二、標

謂諸蘊生已，由自緣故，有自作用，各各差別。

黃三、釋<sup>2</sup> 宇一、舉十二處

謂眼能見色，耳能聞聲，鼻能嗅香，舌能嘗味，身能覺觸，意能了法。色為眼境，為眼所行；乃至法為意境，為意所行。

宇二、例所餘法

或復所餘如是等類，於彼彼法別別作用，當知亦爾。

由自緣故有自作用等者：謂彼諸蘊從自種子及自緣生，即生剎那，名有作用。如是作用不共餘法，是名各各差別。如下舉事易可了知。

黃四、結

即此諸法各別作用所有道理瑜伽方便，皆說名為作用道理。

玄三、證成道理<sup>5</sup> 黃一、徵

云何名為證成道理？

黃二、標

謂一切蘊皆是無常，眾緣所生，苦、空、無我。由三量故，如實觀察。

黃三、列

謂由至教量故，由現量故，由比量故。

黃四、釋

由此三量證驗道理。

謂由至教量故等者：此中三量，如聞所成地廣釋應知。（陵本十五卷八

諸有智者，心正執受、安置、成立。謂一切蘊皆無常性、眾緣生性、苦性、空性，及無我性。

心正執受安置成立者：於至教量生淨信解，是名執受。於現量中能生正見，種諸善根，是名安置。於比量中令義決了，是名成立。

黃五、結

如是等名證成道理。

玄四、法爾道理<sup>3</sup> 黃一、徵

云何名為法爾道理？

黃二、釋<sup>2</sup> 字一、徵道理<sup>4</sup> 宙一、於器世間

謂何因緣故，即彼諸蘊如是種類，諸器世間如是安布？

諸器世間如是安布者：此如意地中說世間成相廣釋應知。（陵本二卷九

宙二、於四大種

何因緣故，地堅為相、水濕為相、火煖為相、風用輕動以為其相？

宙三、於三法中

何因緣故，諸蘊無常、諸法無我、涅槃寂靜？

宙四、於五蘊相

何因緣故，色變壞相、受領納相、想等了相、行造作相、識了別相？

宇二、顯法爾

由彼諸法本性應爾、自性應爾、法性應爾，即此法爾，說名道理瑜伽方便。

由彼諸法本性應爾等者：有尋有伺地說：諸緣起法，若佛出世，若不出世，安住法性、法住、法界。<sup>817</sup>（陵本十卷十七頁）此說本性即彼法性，無始時來理成就故。此說自性即彼法住，無倒文句假立自性故。此說法性即彼法界，法性為因故。

或即如是、或異如是、或非如是，一切皆以法爾為依，一切皆歸法爾道理，

令心安住、令心曉了。

或即如是等者：謂諸法生有此三別，世共了知，唯現成相，不應思議，若妄思議，三過所隨，或謂即如是、或謂異如是、或謂無如是。是故此說一切皆以法爾為依，一切皆歸法爾道理。

黃三、結

如是名為法爾道理。

天三、結

如是名為依四道理，觀察諸蘊相應言教。

戌二、例所餘

如由算數行相及稱量行相，觀察諸蘊相應言教，如是即由二種行相，觀察其餘所有言教。

申五、結

如是總名審正觀察思惟一切所說正法。

卯三、結

如是名為聞思正法。

寅八、無障<sup>4</sup> 卯一、徵

云何無障？

卯二、標

謂此無障略有二種。

卯三、列

一者、依內，二者、依外。

卯四、釋<sup>2</sup> 辰一、標說

我當先說依內外障，與彼相違，當知即是二種無障。

辰二、別辨<sup>2</sup> 巳一、有障<sup>3</sup> 午一、廣辨<sup>2</sup> 未一、依內障<sup>3</sup> 申一、徵

云何名依內障？

申二、釋<sup>3</sup> 酉一、加行障攝<sup>5</sup> 戌一、資具闕乏



謂如有一，於其先世不曾修福；不修福故，不能時時獲得隨順資生眾具，所謂衣、食、諸坐臥具、病緣醫藥及餘什具。

戌二、煩惱猛盛

有猛利貪及長時貪，有猛利瞋及長時瞋，有猛利癡及長時癡。

戌三、多諸疾病

或於先世積集造作多疾病業。由彼為因，多諸疾病。

或於先世積集造作多疾病業等者：菩薩地說：菩薩異熟，大力具足。謂性少疾，或全無病，有大堪能。又說：於諸眾生以身供事，乃至廣說用能增長身心勢力餅飯糜等種種飲食施諸眾生，是名菩薩大力具足因。（陵本三十六卷二頁<sup>2904</sup>）此說先世多疾病業為因，翻彼應知。

戌四、風熱痰癰數數發動

或由現在行不平等。由是因緣，風熱痰癰數數發動。

戌五、宿食住身

或有宿食住在身中。

酉二、遠離障攝

或食麤重，多事、多業、多有所作、多與眾會。

或食麤重等者：如是一切能障遠離，下自當釋。

樂著事業、樂著語言、樂著睡眠、樂著誼眾、樂相雜住、樂著戲論。

酉三、寂靜障攝

樂自恃舉、掉亂、放逸、居止非處。

樂自恃舉等者：此顯能障寂靜。樂自恃舉及與掉亂，能障毗鉢舍那。放逸及與居止非處，能障奢摩他。下自當釋。

申三、結

如是等類，應知一切名依內障。

未二、依外障<sup>3</sup> 申一、徵

云何名依外障？

申二、釋<sup>2</sup> 酉一、依不善士

謂如有一，依不善士；由彼因緣，不能時時獲得隨順教授教誡。

酉二、依非處所

或居惡處。於此住處，若晝日分，多有種種誼雜、眾集、諸變異事；若於夜分，多有種種高聲、大聲、大眾誼雜；復有種種猛利辛楚風日惡觸；或有種種人及非人怖畏驚恐。

申三、結

如是等類，應知一切名依外障。

午二、略義<sup>2</sup> 未一、結前生後

如是廣辯內外障已。復云何知此中略義？

未二、標列隨釋<sup>4</sup> 申一、標

謂於此中略有三障。

申二、列

一、加行障，二、遠離障，三、寂靜障。

申三、釋<sup>3</sup> 酉一、加行障<sup>3</sup> 戌一、徵

云何加行障？

戌二、釋<sup>3</sup> 亥一、標舉

謂若此障會遇現前，於諸善品所有加行皆無堪能，亦無勢力。

亥二、徵因

此復云何？

亥三、列事

謂常疹疾、困苦、重病，風熱痰癰數數發動，或有宿食住在身中，或被蛇蝎、百足、蚰蜒之所蜇螫，或人非人之所逼惱，又不能得衣、食、臥具、病緣醫藥及餘什具。

戌三、結

如是等類，應知一切名加行障。

酉二、遠離障<sup>2</sup> 戌一、徵

云何遠離障？

戌二、釋<sup>2</sup> 亥一、舉事<sup>2</sup> 天一、列<sup>8</sup> 地一、食麤重等

謂食麤重，多事、多業、多有所作。

謂食麤重等者：謂或食已，令身沈重，無所堪能，不任修斷；或有食已，令心遲鈍，不速得定；或有食已，令入出息來往艱難；或有食已，令心數為昏沈睡眠之所纏擾；如是一切，名食麤重。買賣營為、種蒔林木、畜僑賒耶妙臥具等，如是一切名多事業。即於彼彼事業，或欲思量、或起功用，是名多有所作。

地二、樂著事業

或樂事業。由此因緣，愛樂種種所作事業，彼彼事中其心流散。

地三、樂著語言

或樂語言。由此因緣，雖於遠離斷寂靜修，有所堪能、有大勢力，然唯讀誦

便生喜足。

雖於遠離斷寂靜修等者：謂遠離中，修習除斷惡不善法，是名斷修。修習奢摩他、毗鉢舍那，名寂靜修。此顯雖無食羶重等種種過失，堪任修斷及修寂靜，然樂語言，能障遠離。以於已聞、已所受法，唯大音聲若讀、若誦便生喜足故。

地四、樂著睡眠

或樂睡眠。由此因緣，惛沈睡眠常所纏繞，為性懈怠，執睡為樂、執倚為樂、執臥為樂。

地五、樂著誼眾

或樂誼眾。由此因緣，樂與在家及出家眾談說種種王論、賊論、食論、飲論、妙衣服論、姪女巷論、諸國土論、大人傳論、世間傳論、大海傳論。如是等類能引無義虛綺論中，樂共談說，枉度時日。

地六、多與眾會

又多愛樂數與眾會。彼彼事中令心散動、令心擾亂。

地七、樂相雜住

或樂雜住。由此因緣，諸在家眾及出家眾，若未會遇，思慕欲見；若已會遇，不欲別離。

地八、樂著戲論

或樂戲論。由此因緣，樂著世間種種戲論，於應趣向好樂前行，於遠離中喜捨善軛。

於應趣向好樂前行等者：決擇分說：云何趣向前行？謂受僧祇、或復別人諸衣服等所有利養，或請僧祇及與別人，皆名趣向。若諸苾芻，於如是事最初前行，故名趣向前行。云何捨遠離軛？謂於遠離邊際臥具、遠離眾惡人所習近似寂靜室，遠棄捨之，不生欲樂。（陵本六十二卷二頁<sup>4970</sup>）此中二義，準彼應知。

天二、結

如是等類眾多障法，應知一切名遠離障。

亥二、顯障

若有此障會遇現前，難可捨離阿練若處、山林、曠野、邊際臥具所有貪著，亦不能居阿練若處、塚間、樹下、空閑靜室。

難可捨離阿練若處等者：謂由最初於遠離處不樂往趣，名難捨離。於彼貪著縱能往趣，於彼後時亦不安住，名不能居阿練若等。此中山谷、巖穴、稻稈積等，名空閑室。大樹林中，名林樹下。空迴、塚間、邊際臥坐，名阿練若。如下自釋。（陵本三十卷六頁<sup>2501</sup>）

酉三、寂靜障<sup>4</sup> 戌一、徵

云何寂靜障？

戌二、標

謂寂靜者，即奢摩他、毗鉢舍那。有奢摩他障、有毗鉢舍那障。

戌三、釋<sup>2</sup>

亥一、別顯<sup>2</sup>

天一、奢摩他障<sup>4</sup>

地一、徵



云何奢摩他障？

地二、標

謂諸放逸及住非處。

地三、釋<sup>2</sup> 玄一、由諸放逸

由放逸故，或惛沈睡眠纏繞其心，或唯得奢摩他便生愛味，或於下劣性心樂趣入，或於闇昧性其心樂著。

或於下劣性心樂趣入等者：此說諸欲，名下劣性。惛睡，名闇昧性應知。

玄二、由住非處

由住如是非處所故，人或非人誼雜擾亂，他所逼惱，心外馳散。

地四、結

如是名為奢摩他障。當知此障能障寂靜。

天二、毗鉢舍那障<sup>3</sup> 地一、徵

云何毗鉢舍那障？

地二、標

謂樂自恃舉及以掉亂。

地三、釋<sup>2</sup>

玄一、樂自恃舉<sup>2</sup>

黃一、由族姓等<sup>2</sup>

宇一、辨<sup>2</sup>

宙一、舉因<sup>2</sup>

洪

一、生高族姓

樂自恃舉者，謂如有一，作是思惟：我生高族，淨信出家，非為下劣，諸餘苾芻則不如是。由此因緣，自高自舉，陵懣於他。

洪二、生富族等

如是我生富族，淨信出家，非為貧匱，我具妙色，喜見端嚴，多聞、聞持、其聞積集，善巧言詞，語具圓滿，諸餘苾芻則不如是。由此因緣，自高自舉，陵懣於他。

多聞聞持等者：無量經典初中後分皆能聽受，故名多聞。隨所聞義皆能憶持，令不忘失，故名聞持。數習文義，令其堅住，是故說名其聞積集。此如佛地經論釋。

宙二、顯障

彼由如是自高舉故，諸有苾芻耆年多智、積修梵行，不能時時恭敬請問。彼諸苾芻亦不時時為其開發未開發處，為其顯了未顯了處，亦不為其殷到精懇、以慧通達甚深句義方便開示，乃至令其智見清淨。

字二、結

如是名為樂自恃舉毗鉢舍那障。

為其開發未開發處等者：深隱要義，是名未開發處。密意義趣，是名未顯了處。無漏智見，由離障染得清淨名。

黃二、由少證得<sup>2</sup> 字一、辨

又如有一，唯得少分下劣智見安隱而住。彼由如是少分下劣智見安住，便自高舉；自高舉故，便生喜足，更不上求。

字二、結

是名樂自恃舉所作毗鉢舍那障。

唯得少分下劣智見安隱而住者：此中少分下劣，謂彼若智、若見、若安隱住三種應知。

玄二、掉亂<sup>2</sup> 黃一、釋<sup>2</sup> 字一、辨相

言掉亂者，謂如有一，根不寂靜，諸根掉亂、諸根囂舉。

謂如有一根不寂靜等者：如尋思行補特伽羅，諸根不住，名不寂靜。諸根掉動，諸根散亂，是名掉亂。諸根飄舉，是名囂舉。

於一切時，惡思所思、惡說所說、惡作所作。

於一切時惡思所思等者：此如癡行補特伽羅有如是相，如次配釋意業、語業、身業應知。

不能安住思惟諸法，不能堅固思惟諸法。

字二、顯障

由此因緣，毗鉢舍那不能圓滿、不得清淨。

黃二、結

是名掉亂毗鉢舍那障。

不能安住思惟諸法等者：此中二種思惟，當知說名自性清淨。如思所成地說。（陵本十六卷一頁<sup>1363</sup>）言安住思惟者，謂此思惟，先未知義得正了知、得正決了故。言堅固思惟者，謂此思惟，數數作意，能於其修隨順趣入故。於此二種思惟無有堪能，是故毗鉢舍那不得清淨。

亥二、總結

如是二法障奢摩他，謂多放逸及住非處；二法能障毗鉢舍那，謂樂自恃舉及以掉亂。

戌四、結

如是若奢摩他障、若毗鉢舍那障，總名寂靜障。

申四、結

如是名為障之略義。

午三、總結

即此略義及前廣辯，總略為一，說名為障。

巳二、無障<sup>2</sup> 午一、翻有障

此障相違，當知無障。

午二、顯無障

謂即此障無性、遠離、不合、不會，說名無障。

謂即此障無性遠離等者：謂若此障非先世有，是名無性。不現在前，是名遠離。不順生緣，是名不合、不會。

寅九、惠捨<sup>2</sup> 卯一、徵

云何惠捨？

卯二、釋<sup>2</sup> 辰一、略標

謂若布施，其性無罪，為莊嚴心、為伴助心、為資瑜伽、為得上義而修布施，是名惠捨。

謂若布施其性無罪等者：正行施時身語意業，名施自性。離諸過失，是名

無罪。數數惠施，制伏慳垢，名莊嚴心。善思俱行增長廣大，名伴助心。能為定地資糧，名資瑜伽。能證上妙可愛樂事，名得上義。如是種種為所願樂，而修布施，故名惠捨。

辰二、廣辨<sup>3</sup> 巳一、問

問：誰能施？誰所施？用何施？何相施？云何施？何故施？由此因緣，施性無罪。

巳二、答<sup>6</sup> 午一、誰能施<sup>2</sup> 未一、標

答：誰能施者，謂施者、施主，是名能施。

未二、辨<sup>2</sup> 申一、總徵

云何施者？云何施主？

申二、別答<sup>2</sup> 酉一、施者

謂若自手施，名為施者。

酉二、施主

若自物施、若欲樂施、非不樂施，名為施主。

午二、誰所施<sup>3</sup> 未一、標

誰所施者，謂四種所施。

未二、列

一、有苦者，二、有恩者，三、親愛者，四、尊勝者。

未三、釋<sup>4</sup> 申一、有苦者<sup>3</sup> 酉一、徵

云何有苦者？

酉二、列

謂貧窮者、或乞丐者、或行路者、或希求者、或盲瞽者、或聾駭者、或無依者、或無趣者、匱乏種種資生具者。

酉三、結

復有所餘如是等類，名有苦者。

申二、有恩者<sup>3</sup> 酉一、徵



云何有恩者？

酉二、列

謂或父母、或乳飲者、或養育者、或成長者、或於曠野沙磧等中能濟度者、或饑饉時能賑恤者、或怖怨敵而救援者、或被執縛而能解者、或遭疾病而治療者、教利益者、教安樂者、引利益者、引安樂者、隨所生起諸事務中為助伴者、同歡喜者、同憂愁者、遭厄難時不相棄者。

酉三、結

復有所餘如是等類，名有恩者。

申三、親愛者<sup>3</sup> 酉一、徵

云何親愛者？

酉二、列

謂諸親友，或於其處有愛有敬、或信順語、或數語言談論交往、或有親昵。

酉三、結

復有所餘如是等類，說名親愛。

申四、尊勝者<sup>3</sup> 酉一、徵

云何尊勝？

酉二、列

謂若沙門、若婆羅門，世間同許為賢善者、

世間同許為賢善者者：謂如下說，成就賢善士法，名賢善者應知。

離損害者、極離害者、

離損害者等者：離斷彼命，名離損害。離解支節，名極離害。有尋有伺地

中殺生業道作是分別。害極害執者，謂斷彼命故，解支節故，計活命故。

（陵本八卷八頁<sup>581</sup>）今準彼釋。

離貪欲者、為調伏貪而修行者、離瞋恚者、為調伏瞋而修行者、離愚癡者、為調伏癡而修行者。

酉三、結

復有所餘如是等類，名尊勝者。

午三、用何施<sup>3</sup> 未一、標

用何施者，謂若略說，或用有情數物而行惠施，或用無情數物而行惠施。

未二、釋<sup>2</sup> 申一、有情數物<sup>2</sup> 酉一、徵

云何有情數物持用惠施？

酉二、釋<sup>2</sup> 戌一、列有情數<sup>2</sup> 亥一、正明聲聞

謂或妻子、奴婢、作使，或象、馬、豬、牛、羊、雞、鴨、駝、騾等類，或有諸餘大男、大女、小男、小女，或復所餘如是等類所用施物。

亥二、兼顯菩薩<sup>2</sup> 天一、標

或復內身頭、目、手、足、血、肉、骨、髓隨願施與，此亦名為有情數物持用布施。

天二、簡

是諸菩薩所現行事，非此義中意所許施。

或復內身頭目手足等者：菩薩地說：又諸菩薩略由二相，以自內身施來求者。一、總求身者，以身施彼，隨所欲為，繫屬於彼、隨順於彼。二、別求手、足、頭、目、支節、血、肉、筋、骨乃至髓者，隨其所欲，一切施與。（陵本三十九卷二頁<sup>3183</sup>）此唯菩薩所現行事，不共聲聞，是故宣說非此義中意所許施。

戌二、名無罪施

若有於彼諸有情類，或得自在，或有勢力，或能制伏。

若有於彼諸有情類或得自在等者：謂於自所攝受妻子、奴婢、作使說得自在，於餘大男、大女、小男、小女說有勢力，或能制伏。

若應持彼惠施於他；若惠施時自無有罪；若不由彼惠施因緣，他心嫌恨；若施於他，知彼有情不為損惱；是名無罪有情數物持用惠施。

申二、無情數物<sup>5</sup> 酉一、徵

云何無情數物持用惠施？

酉二、標

謂若略說有三種物。

酉三、列

一者、財物，二者、穀物，三者、處物。

酉四、釋<sup>3</sup> 戌一、財物<sup>2</sup> 亥一、釋

言財物者，謂末尼、真珠、琉璃、螺貝、璧玉、珊瑚、瑪瑙、彩石、生色可染、赤珠、右旋。復有所餘如是等類，或諸珍寶、或金、或銀、或諸衣服、或諸什物、或香、或鬘。

亥二、結

是名財物。

生色可染者：謂彼末尼、真珠、琉璃等寶，成就妙色，清淨光瑩，可令愛染，是名生色可染。

戌二、穀物<sup>2</sup> 亥一、釋

云何穀物？謂諸所有可食可飲，大麥、小麥、稻穀、粟穀、糜黍、胡麻、大小豆等，甘蔗、蒲萄、乳酪、果汁種種漿飲。

亥二、結

復有所餘如是等類，是名穀物。

戌三、處物<sup>2</sup> 亥一、釋

云何處物？謂諸田宅、邸店、廛肆，建立福舍及寺館等。

亥二、結

復有所餘如是等類，是名處物。

酉五、結

是名無罪無情數物持用惠施。

未三、結

當知此中，有情數物、無情數物，一切總說名所用施。

午四、何相施<sup>2</sup> 未一、釋

何相續者，謂無貪俱行思造作心意業，及此所起身業、語業，捨所施物。或自相續，或他相續。

未二、結

是名施相。

或自相續或他相續者：如前說有施者、施主，今此說名自他相續，如次應知。

午五、云何施<sup>2</sup> 未一、釋<sup>3</sup> 申一、辨施相

云何施者，謂由淨信而行惠施；由正教見而行惠施；

由正教見而行惠施者：菩薩地說：不由惡見妄有執取而行惠施，謂如廣大暴惡祠祀。不計殺生布施為法，亦不妄取吉祥瑞應相應相狀而行布施。又諸菩薩，終不妄計唯一一切種極善清淨而行惠施，即是世間及出世間離欲清淨。唯審了知所行布施，但是離欲清淨資糧。（陵本三十九卷七頁<sup>3198</sup>）此應準知。

由有果見而行惠施；

由有果見而行惠施者：謂施飲食能感大力，施諸衣服能感妙色，施諸車乘能感快樂，施諸燈明能感淨眼，於如是等深生信解，不由他緣、非他所引而行布施，是名由有果見而行惠施。

由極殷重而行惠施；由恭敬心自手行施，而不輕慢；應時而施，濟他要用；不損惱他而行惠施。

申二、顯施物

如法平等，不以凶暴積集財物而行惠施，以鮮潔物而行惠施，以精妙物而行惠施，以清淨物而行惠施。

以清淨物而行惠施者：謂若施物如法所引，非誑詐得、非侵他得，當知是則名清淨物。

申三、明棄捨

由此自他俱無有罪，數數惠施制伏慳垢，積集勢力而行惠施。先心歡喜而行



惠施，於正施時其心清淨，施已無悔。

未二、結

如是而施。

數數惠施制伏慳垢等者：謂有種種可施財物，雖見求者正現在前，而於惠施心不趣入，是名慳垢。當知此由先未串習所作過失。對治此故，力勵思擇而行惠施，能不隨逐先未串習所作過失自在而行，是名制伏慳垢。如是數數思擇為先串習施已，於行惠施心樂趣入，是名積集勢力而行惠施。

午六、何故施<sup>2</sup> 未一、釋

何故施者，或慈悲故而行惠施，謂於有苦。或知恩故而行惠施，謂於有恩。或愛、或敬、或信順故而行惠施，謂於親愛。或為希求世出世間殊勝功德而行惠施，謂於尊勝。

未二、結

由是因緣，故修惠施。

已三、結

由是行相，或在家者、或出家者修行布施，為莊嚴心、為伴助心、為資瑜伽、為得上義而行布施。由此因緣，施性無罪，是名惠捨。

寅十、沙門莊嚴<sup>3</sup> 卯一、徵

云何名為沙門莊嚴？

卯二、標<sup>2</sup> 辰一、喩陀南

喩陀南曰：

正信而無諂	少病精進慧	具少欲喜足	易養及易滿
杜多德端嚴	知量善士法	具聰慧者相	忍柔和賢善

辰二、長行

謂如有一，具足正信、無有諂曲、少諸疾病、性勤精進、成就妙慧、少欲、喜足、易養、易滿、具足成就杜多功德、端嚴、知量、具足成就賢善士法、具足成就聰慧者相、堪忍、柔和、為性賢善。

卯三、釋<sup>2</sup> 辰一、別辨其相<sup>2</sup> 巳一、辨成就<sup>17</sup> 午一、具足正信<sup>4</sup> 未一、徵

云何名為具足正信？

未二、標

謂多淨信、多正敬順、多生勝解、多善欲樂。

未三、釋<sup>2</sup> 申一、舉於大師

於諸善法及大師所深生淨信，無惑無疑；於大師所恭敬尊重承奉供養；既修如是恭敬尊重承奉供養，專心親附，依止而住。

申二、例於法等

如於大師，如是於法同梵行者、於諸所學教授教誡、於修供養、於無放逸、於三摩地，當知亦爾。

未四、結

如是名為具足正信。

謂多淨信等者：謂於三寶生清淨信，不可引奪，名多淨信。及於三寶恭敬

尊重承奉供養，是名多正敬順。於如來等不可思議威德神力及甚深法，唯生信解，無驚無恐，無有怖畏，是名多生勝解。於諸善法樂作樂得，是名多善欲樂。

午二、無有諂曲<sup>3</sup> 未一、徵

云何名為無有諂曲？

未二、釋

謂有純質，為性正直，於其大師及諸有智同梵行所，如實自顯。

未三、結

如是名為無有諂曲。

午三、少諸疾病<sup>3</sup> 未一、徵

云何名為少諸疾病？

未二、釋

謂性無病，順時變熟，平等執受，不極溫熱、不極寒冷，無所損害，隨時安

樂。由是因緣，所食、所飲、所噉、所嘗，易正變熟。

未三、結

如是名為少諸疾病。

謂性無病等者：若於先世積集造作多疾病業，由彼為因，多諸疾病。今此不爾，名性無病。不非量食、不食匪宜，亦非不消而更重食，由是所食以時消變，是名順時變熟。貪瞋癡纏不多現行，及四大種無有偏增，由是有執受色無有變異，是名平等執受。

午四、性勤精進<sup>3</sup> 未一、徵

云何名為性勤精進？

未二、釋

謂能安住有勢、有勤、有勇、堅猛，於善法中能不捨輒，翹勤無惰，起發圓滿，能有所作，於諸有智同梵行者躬自承奉。

未三、結

如是名為性勤精進。

謂能安住有勢有勤等者：攝事分說：有勢力者，由被甲精進故。有精進者，由加行精進故。有勇悍者，由於廣大法中無怯劣精進故。有堅猛者，由寒熱、蚊蟲等所不能動精進故。有不捨善軛者，由於下劣無喜足精進故。（陵本八十五卷二十一頁<sup>6481</sup>）是名精進五相，此應準知。

午五、成就妙慧<sup>3</sup> 未一、徵

云何名為成就妙慧？

未二、釋

謂聰、念、覺皆悉圓滿。根不闇鈍、根不頑愚，亦不瘡癰，非手代言，有力能了善說、惡說所有法義，具足成就俱生覺慧，具足成就加行覺慧。

未三、結

如是名為成就妙慧。

謂聰念覺皆悉圓滿者：謂與俱生、加行二慧相應，是名為聰。於所聞義能

無忘失，是名為念。於實有義能正了知，是名為覺。

午六、少欲<sup>3</sup> 未一、徵

云何少欲？

未二、釋

謂雖成就善少欲等所有功德，而不於此欲求他知。謂他知我具足少欲，成就功德。

未三、結

是名少欲。

午七、喜足<sup>4</sup> 未一、徵

云何喜足？

未二、標

謂於隨一衣服、飲食、臥具等事，便生歡喜，生正知足。

未三、釋<sup>2</sup> 申一、舉於衣服

於所未得所有衣服，或麤或妙，更無希望、更無思慮；於所已得不染不愛，如前廣說而受用之。

申二、例飲食等

如於衣服，於其飲食、臥具等事，當知亦爾。

未四、結

是名喜足。

午八、易養<sup>3</sup> 未一、徵

云何易養？

未二、釋<sup>2</sup> 申一、自得怡養

謂能獨一自得怡養，不待於他，或諸僮僕、或餘人眾。

申二、不求長物

又不追求餘長財寶，令他施者、施主等類謂為難養。

未三、結



是名易養。

午九、易滿<sup>3</sup> 未一、徵

云何易滿？

未二、釋

謂得微少，便自支持；若得麤弊，亦自支持。

未三、結

是名易滿。

午十、具杜多德<sup>3</sup> 未一、徵

云何成就杜多功德？

未二、釋<sup>2</sup> 申一、舉種類<sup>4</sup> 酉一、列事

謂常期乞食、次第乞食、但一座食、先止後食、但持三衣、但持毳衣、持糞掃衣、住阿練若、常居樹下、常居迴露、常住塚間、常期端坐、處如常座。

酉二、標數

如是依止若食、若衣、若諸敷具杜多功德，或十二種，或十三種。

或十二種或十三種者：謂如前說，常期乞食、次第乞食，若總為一，不更分別，則為十二；若復分別，則為十三。由是因緣，故差別說。

西三、辨相<sup>12</sup> 戌一、乞食<sup>3</sup> 亥一、標列

於乞食中分為二種。一者、隨得乞食，二者、次第乞食。

隨得乞食等者：此即前說常期乞食，隨往還家，常期乞食故。

亥二、隨釋<sup>2</sup> 天一、隨得乞食

隨得乞食者，謂隨往還家，隨獲隨得而便受食。

天二、次第乞食

次第乞食者，謂入里巷，巡家而乞，隨得隨現而便受食。不高舉手越趣餘家，願我當獲精妙飲食，乃至期願多有所得。

亥三、料簡

當知此中，若依乞食無差別性，唯有十二；若依乞食有差別性，便有十三。

戌二、但一座食<sup>3</sup> 亥一、徵

云何名為但一座食？

亥二、釋

謂坐一座，乃至應食悉皆受食，從此座起必不重食。

亥三、結

如是名為但一座食。

戌三、先止後食<sup>3</sup> 亥一、徵

云何名為先止後食？

亥二、釋

謂為食故，坐如應坐，乃至未食先應具受諸所應食。應正了知：我今唯受爾所飲食，當自支持。又正了知：我過於此，定不當食。如是受已，然後方食。

亥三、結

如是名為先止後食。

戌四、但持三衣<sup>3</sup> 亥一、徵

云何名為但持三衣？

亥二、釋<sup>4</sup> 天一、標

謂但三衣而自支持。

天二、徵

何者三衣？

天三、列

一、僧伽胝，二、嗢怛羅僧伽，三、安怛婆參。

天四、釋

除此三衣，終不貯畜過此長衣。

亥三、結

如是名為但持三衣。

戌五、但持毳衣<sup>3</sup> 亥一、徵

云何名為但持毳衣？

亥二、釋

謂所持衣或三衣數、或是長衣，一切皆用毛毳而作，終不貯蓄餘所作衣。

亥三、結

如是名為但持毳衣。

戌六、持糞掃衣<sup>3</sup> 亥一、徵

云何名為持糞掃衣？

亥二、釋

謂所有衣，他捨棄擲或街、或巷、或市、或廛、或道非道，或雜便穢，或為便穢、膿血、洩唾之所塗染。取如是等不淨衣物，除去麤穢，堅執洗浣，縫染受持。

亥三、結

如是名為持糞掃衣。

戌七、住阿練若<sup>3</sup> 亥一、徵

云何名為住阿練若？

亥二、釋

謂住空閑山林垌野，受用邊際所有臥具，遠離一切村邑聚落。

亥三、結

如是名為住阿練若。

戌八、常居樹下<sup>3</sup> 亥一、徵

云何名為常居樹下？

亥二、釋

謂常期願住於樹下，依止樹根。

亥三、結

如是名為常居樹下。

戌九、常居迴露<sup>3</sup> 亥一、徵

云何名為常居迴露？

亥二、釋

謂常期願住於迴露，無覆障處。

亥三、結

如是名為常居迴露。

戌十、常住塚間<sup>3</sup> 亥一、徵

云何名為常住塚間？

亥二、釋

謂常期願住塚墓間，諸有命過送尸骸處。

亥三、結

如是名為常住塚間。

諸有命過送尸骸處等者：謂諸有情既命終已，送彼尸骸往至其處，即彼處

所名為塚間。

戌十一、常期端坐<sup>3</sup> 亥一、徵

云何名為常期端坐？

亥二、釋

謂於大床、或小繩床、或草葉座端身而坐，推度時日，終不以背或以其脅，依倚大床、或小繩床、或壁、或樹、草葉座等。

亥三、結

如是名為常期端坐。

戌十二、處如常座<sup>3</sup> 亥一、徵

云何名為處如常座？

亥二、釋

謂所坐臥或諸草座、或諸葉座，如舊敷設草座、葉座而常坐臥，一敷設後，終不數數翻舉修理。



亥三、結

如是名為處如常座。

酉四、釋名<sup>3</sup> 戌一、問

問：何故名為杜多功德？

戌二、答<sup>2</sup> 亥一、舉喻

答：譬如世間或毛或氎，未鞭、未彈、未紛、未擘，爾時相著，不軟不輕，不任造作縷線氎蓐。若鞭、若彈、若紛、若擘，爾時分散，柔軟輕妙，堪任造作縷線氎蓐。

亥二、合法

如是行者，由飲食貪，於諸飲食令心染著；由衣服貪，於諸衣服令心染著；由敷具貪，於諸敷具令心染著。彼由如是杜多功德，能淨修治，令其純直，柔軟輕妙，有所堪任，隨順依止，能修梵行。

戌三、結

是故名為杜多功德。

隨順依止能修梵行者：隨順壽命得存所依止身，能令得所未得、觸所未觸、證所未證故。

申二、明所為<sup>3</sup> 酉一、於飲食貪<sup>2</sup> 戌一、總顯能障

於飲食中，有美食貪及多食貪，能障修善。

戌二、別明斷除<sup>2</sup> 亥一、美食貪

為欲斷除美食貪故，常期乞食、次第乞食。

亥二、多食貪

為欲斷除多食貪故，但一座食、先止後食。

酉二、於衣服貪<sup>2</sup> 戌一、總顯能障<sup>2</sup> 亥一、標

於衣服中，有三種貪，能障修善。

亥二、列

一、多衣貪，二、軟觸貪，三、上妙貪。

戌二、別名斷除<sup>3</sup> 亥一、多衣貪

為欲斷除多衣貪故，但持三衣。

亥二、軟觸貪

為欲斷除於諸衣服軟觸貪故，但持毳衣。

亥三、上妙貪

為欲斷除於諸衣服上妙貪故，持糞掃衣。

酉三、於數具貪<sup>2</sup> 戌一、總顯能障<sup>2</sup> 亥一、標

於諸數具有四種貪，能障修善。

亥二、列

一、誼雜貪，二、屋宇貪，三、倚樂臥樂貪，四、數具貪。

戌二、別明斷除<sup>4</sup> 亥一、誼雜貪

為欲斷除誼雜貪故，住阿練若。

亥二、屋宇貪

為欲斷除屋宇貪故，常居樹下、迴露、塚間。又為斷除姪洿貪故，常住塚間。

亥三、倚樂臥樂貪

為欲斷除倚樂臥樂貪故，常期端坐。

亥四、敷具貪

為欲斷除敷具貪故，處如常座。

未三、結

是名成就杜多功德。

午十一、端嚴<sup>3</sup> 未一、徵

云何端嚴？

未二、釋

謂能成就若往、若還、若覩、若瞻、若屈、若伸、持僧伽胝持衣持鉢，端嚴形相。

未三、結

是名端嚴。

午十二、知量<sup>3</sup> 未一、徵

云何知量？

未二、釋

謂於淨信諸婆羅門、長者、居士，極恣衣服、飲食、敷具、病緣醫藥諸什物中，知量而取。

未三、結

是名知量。

午十三、成就賢善士法<sup>3</sup> 未一、徵

云何成就賢善士法？

未二、釋

謂生高族淨信出家，或生富族淨信出家，顏容姝妙，喜見端嚴，具足多聞，

語具圓滿，或隨獲得少智、少見、少安樂住。由是因緣，不自高舉，不陵懣他；能知唯有法隨法行，是其諦實。既了知己，精進修行法隨法行。

未三、結

是名成就賢善士法。

午十四、成就聰慧者相<sup>3</sup> 未一、徵

云何成就聰慧者相？

未二、釋<sup>3</sup> 申一、標

謂由作業相表知愚夫，由作業相表知聰慧。

申二、徵

其事云何？

申三、釋

謂諸愚夫，惡思所思、惡說所說、惡作所作；諸聰慧者，善思所思、善說所說、善作所作。

未三、結

是名成就聰慧者相。

午十五、堪忍<sup>3</sup> 未一、徵

云何堪忍？

未二、釋<sup>2</sup> 申一、舉事<sup>2</sup> 酉一、不反報他

謂如有一，罵不報罵、瞋不報瞋、打不報打、弄不報弄。

酉二、能自忍受

又彼尊者，堪能忍受寒熱、饑渴、蚊蟲、風日、蛇蝎毒觸，又能忍受他所干犯、麤惡語言，又能忍受身中所有猛利、堅勁、辛楚、切心、奪命苦受。

申二、釋義

為性堪忍，有所容受。

未三、結

是名堪忍。

午十六、柔和<sup>3</sup> 未一、徵

云何柔和？

未二、釋<sup>2</sup> 申一、舉成就法

謂如有一，於大師等具足成就慈愍身業，具足成就慈愍語業，具足成就慈愍意業。與諸有智同梵行者和同受用應所受用；凡所飲食無有私密；如法所獲、如法所得，墮在鉢中，為鉢所攝而為受用。

如法所獲如法所得等者：攝事分說：若物不依邪命非法方便獲得，此物名為如法所得。若物已置在於鉢內，當知此物名墮鉢中。若物雖未置於鉢中，而將欲置，當知此物名鉢所攝。（陵本九十九卷二十頁<sup>7458</sup>）此應準知。

同戒、同見。

申二、釋柔和義

成就如是六種可樂、可愛、可重、無違諍法，易可共住，性不惱他。與諸有



智同梵行者共住一處，常令歡喜。

未三、結

是名柔和。

成就如是六種可愛可樂可重無違諍法者：慈愍三業，是謂前三。同受財物，是為第四。同戒、同見，是為第五、第六。言可樂者，即是可愛、可重總名。攝事分說：由二種相成可樂性。一、體彼有德而尊重故；二、荷彼有恩而慰意故。（陵本九十九卷二十頁<sup>7459</sup>）此中可愛，即彼慰意增上；可重，即彼尊重增上。言無違者，謂離貪等所有擾惱故。言無諍者，和合方便共為一事故。

午十七、賢善<sup>3</sup> 未一、徵

云何賢善？

未二、釋

謂如有一，遠離鬻蹙，舒顏平視，含笑先言，常為愛語，性多攝受善法朋

侶，身心澄淨。

未三、結

是名賢善。

身心澄淨者：謂由修習勝奢摩他、毗鉢舍那，遠離身心麤重，獲得身心輕安，由是調伏一切世間貪憂，是名身心澄淨。

已二、辨住學<sup>16</sup> 午一、不樂利敬

若有成就如是諸法，愛樂正法、愛樂功德；

若有成就如是諸法等者：自下別顯增上戒學清淨殊勝及與清淨因緣，應依思所成地配釋其相。（陵本十七卷一頁<sup>1455</sup>）至下當述。由是此說正法及與功德唯說於戒應知。

不樂利養恭敬稱譽。

午二、不執邪見

亦不成就增益、損減二種邪見。於非有法未嘗增益，於實有法未嘗損減。

不樂利養恭敬稱譽等者：思所成地引釋頌言：不耽著利養，及所有恭敬，亦不執諸見，增益與損減者：此頌顯示不耽著利養恭敬故，不執著五種惡見故，令所修學清淨殊勝。與此義同。

午三、不著世論

於諸世間事文綺者，所造順世種種字相綺飾文句相應詩論，能正了知無義無利，遠避、棄捨、不習、不愛，亦不流傳。

午四、不畜長物

不樂貯畜餘長衣鉢。

於諸世間至餘長衣鉢者：思所成地引釋頌言：不著順世間，無義文呪術，亦不樂畜積，無義長衣鉢者：此頌顯示不執著諸惡見因，外道邪論，以能障礙取蘊解脫。彼所制造，名順世間。及遠離耽著利養恭敬因，長衣鉢等。因清淨故，學得清淨。與此義同。

午五、不習居家

遠離在家共誼雜住，增煩惱故。

午六、樂近賢聖

樂與聖眾和合居止，淨修智故。

遠離在家至淨修智故者：思所成地引釋頌言：恐增諸煩惱，不染習居家，為淨修智慧，當親近賢聖者：此頌顯示遠離所治因，親近能治因故，學得清淨。與此義同。

午七、不樂攝受

不樂攝受親里朋友。勿我由此親友因緣，當招無量擾亂事務；彼或變壞，當生種種愁感、傷歎、悲苦、憂惱。

午八、不著煩惱

隨所生起本隨二惑，不堅執著，尋即棄捨、除遣、變吐。勿我由此二惑因緣，當生現法後法眾苦。

不樂攝受至後法眾苦者：思所成地引釋頌言：不畜朋友家，恐發憂悲亂，

能生苦煩惱，纔起尋遠離者：此頌顯示若親近居家，生憂悲散亂，增長諸煩惱，能為眾苦因。由親近彼能生眾苦，煩惱纔生尋即除遣，如是顯示對治之因。與此義同。

午九、不壞信施

**終不虛損所有信施，終不毀犯清淨禁戒受用信施，終不毀謗他人信施。**

午十、不捨學處

**終不棄捨所受學處。**

終不虛損至所受學處者：思所成地引釋頌言：不受於信施，恐加害瘡炮，於如來正法，嘗無有棄捨者：此頌顯示不貪著利養恭敬，不堅執諸惡邪見，不虛受用信施，不毀謗正法，亦能遠離貪著後世諸欲及能生起諸惡見因，如是所學清淨殊勝。與此義同。

午十一、不伺他犯

**常樂省察己之過失，不喜伺求他所愆犯。**

午十二、發露已惡

**隱覆自善，發露已惡。**

常樂省察至發露已惡者：思所成地引釋頌言：於他愆犯中，無功用安樂，常省自過失，知已速發露者：此頌顯示遠離作意求覓他人所有過失；於自善品無有散亂常生歡喜；於自過失如實了知，發露悔除，離增上慢；由此因緣學得清淨。與此義同。

午十三、出離所犯

**命難因緣，亦不故思毀犯眾罪；設由忘念，少有所犯，即便速疾如法悔除。**

午十四、自作應作

**於應作事翹勤無惰，凡百所為自能成辦，終不求他為己給使。**

命難因緣至為己給使者：思所成地引釋頌言：若犯於所犯，當如法出離，所應營事中，能勇勵自作作者：此頌顯示出離所犯，及能遠離貪受他人恭奉侍衛，由此因緣學得清淨。與此義同。

午十五、不謗甚深

於佛世尊及佛弟子不可思議威德神力、甚深法教深生信解，終不毀謗；能正了知唯是如來所知所見，非我境界。

於佛世尊至非我境界者：思所成地引釋頌言：於佛及弟子，威德與言教，一切皆信受，觀大罪不謗者：此頌顯示信圓滿故，於能誹謗見大罪故，學得清淨。與此義同。

午十六、不著見取

終不樂住自妄見取、非理僻執、惡見所生言論呪術。

終不樂住至言論呪術者：思所成地引釋頌言：於極甚深法，不可思度處，能捨舊師宗，不堅執自見。此頌顯示遠離安住自見取故，清淨殊勝。與此義同。

辰二、釋莊嚴義<sup>3</sup> 巳一、標相

若與如是功德相應，如是安住、如是修學，以正沙門諸莊嚴具而自莊嚴，甚

為微妙。

已二、舉喻

譬如有人，盛壯端正，好自莊嚴，樂受諸欲，沐浴身首，塗以妙香，服鮮白衣，飾以種種妙莊嚴具。所謂瓔珞、耳環、指環、腕釧、臂釧、諸妙寶印，并金銀等種種華鬘。如是莊嚴極為奇妙。

已三、合法

如是行者，以正沙門種種功德妙莊嚴具而自莊嚴，其德熾然，威光遍照，是故說為沙門莊嚴，是名沙門莊嚴具義。

瑜伽師地論科句披尋記卷第二十五



瑜伽師地論科句披尋記卷第二十六

彌勒菩薩說

唐三藏沙門玄奘奉詔譯

韓清淨科記

本地分中聲聞地第二瑜伽處之一

辛二、品類建立<sup>2</sup> 壬一、廣徵

問：於如前所舉、所開示出離地中，有幾品類補特伽羅能證出離？云何建立補特伽羅？云何所緣？云何教授？云何學？云何隨順學法？云何瑜伽壞？云何瑜伽？云何作意？云何瑜伽師所作？幾種瑜伽師？云何瑜伽修？云何修果？幾種補特伽羅異門？幾種補特伽羅？幾種建立補特伽羅因緣？有幾種魔？幾種魔事？云何發趣空無有果？

如前所舉所開示者：前說世間及出世間二離欲道，是名所舉。彼二資糧，名所開示。

壬二、別答<sup>2</sup> 癸一、喩柁南標

喩柁南曰：

諸補特伽羅 建立所緣教 學隨順學法 壞瑜伽作意

瑜伽師作修 果門數取趣 因魔事無果 是皆當廣說

癸二、長行釋<sup>17</sup> 子一、補特伽羅品類差別<sup>4</sup> 丑一、標

補特伽羅品類差別有二十八種。

丑二、徵

云何二十八？

丑三、列

謂鈍根者、利根者、貪增上者、瞋增上者、癡增上者、慢增上者、尋思增上者、得平等者、薄塵性者、行向者、住果者、隨信行者、隨法行者、信勝解者、見至者、身證者、極七返有者、家家者、一間者、中般涅槃者、生般涅槃者、無行般涅槃者、有行般涅槃者、上流者、時解脫者、不動法者、慧解

脫者、俱分解脫者。

丑四、釋<sup>28</sup> 寅一、鈍根<sup>3</sup> 卯一、徵

云何鈍根補特伽羅？

卯二、釋

謂有補特伽羅，成就鈍根，於所知事遲鈍運轉、微劣運轉，如前已說。

卯三、廣

此復二種，應知其相。一者、本來鈍根種性，二者、未善修習諸根。

成就鈍根等者：謂或信根，或精進根，或復念根，或復定根，或復慧根，是名為根。如前安住種性中已說。（陵本二十一卷十三頁<sup>1856</sup>）

寅二、利根<sup>3</sup> 卯一、徵

云何利根補特伽羅？

卯二、釋

謂有補特伽羅，成就利根，於所知事不遲鈍運轉、不微劣運轉，如前已說。

卯三、廣

此亦二種，應知其相。一者、本來利根種性，二者、已善修習諸根。

寅三、貪增上<sup>3</sup> 卯一、徵

云何貪增上補特伽羅？

卯二、釋

謂有補特伽羅，先餘生中，於貪煩惱已修、已習、已多修習；

已修已習已多修習者：現行成就，是名已修。數數現行，是名已習。長時積集，名多修習。

由是因緣，今此生中，於所愛事，有猛利貪、有長時貪。

卯三、結

是名貪增上補特伽羅。

有猛利貪有長時貪者：謂於微劣所愛事中，尚能生起最極、後後、上品貪纏，何況中品、上品境界。如是說名有猛利貪。又此貪纏住在身中，經久

相續，長時隨縛，如是說名有長時貪。如貪增上，如是下說瞋、癡及慢增上，說此二別，隨應亦爾。

寅四、瞋增上<sup>3</sup> 卯一、徵

云何瞋增上補特伽羅？

卯二、釋

謂有補特伽羅，先餘生中，於瞋煩惱已修、已習、已多修習；由是因緣，今此生中，於所憎事，有猛利瞋、有長時瞋。

卯三、結

是名瞋增上補特伽羅。

寅五、癡增上<sup>3</sup> 卯一、徵

云何癡增上補特伽羅？

卯二、釋

謂有補特伽羅，先餘生中，於癡煩惱已修、已習、已多修習；由是因緣，今

此生中，於所愚事，有猛利癡、有長時癡。

卯三、結

是名癡增上補特伽羅。

寅六、慢增上<sup>3</sup> 卯一、徵

云何慢增上補特伽羅？

卯二、釋

謂有補特伽羅，先餘生中，於慢煩惱已修、已習、已多修習；由是因緣，今此生中，於所慢事，有猛利慢、有長時慢。

卯三、結

是名慢增上補特伽羅。

寅七、尋思增上<sup>3</sup> 卯一、徵

云何尋思增上補特伽羅？

卯二、釋

謂有補特伽羅，先餘生中，於其尋思已修、已習、已多修習；由是因緣，今此生中，於所尋思事，有猛利尋思、有長時尋思。

卯三、結

是名尋思增上補特伽羅。

寅八、得平等<sup>3</sup> 卯一、徵

云何得平等補特伽羅？

卯二、釋<sup>2</sup> 辰一、舉先因緣

謂有補特伽羅，先餘生中，雖於貪、瞋、癡、慢、尋思，不修、不習、不多修習，而於彼法未見過患、未能厭壞、未善推求。

辰二、釋得平等

由是因緣，於所愛、所憎、所愚、所慢、所尋思事，無猛利貪、無長時貪，然如彼事，貪得現行。如貪，瞋、癡、慢、尋思亦爾。

卯三、結

是名得平等補特伽羅。

未能厭壞未善推求者：未能修習淨行所緣，是名未能厭壞。於彼所緣未能尋思六事差別，是名未善推求。淨行所緣及六事差別，如下自說當知。

寅九、薄塵性<sup>3</sup> 卯一、徵

云何薄塵性補特伽羅？

卯二、釋<sup>2</sup> 辰一、舉於貪<sup>2</sup> 巳一、舉先因緣

謂有補特伽羅，先餘生中，於貪煩惱不修、不習、不多修習，已能於彼多見過患，已能厭壞、已善推求。

巳二、釋薄塵性

由是因緣，今此生中，於所愛事會遇現前，眾多美妙上品境中，起微劣貪；於其中品、下品境中，貪全不起。

辰二、例瞋等

如貪，瞋、癡、慢、尋思應知亦爾。



卯三、結

是名薄塵性補特伽羅。

寅十、行向<sup>3</sup> 卯一、徵

云何行向補特伽羅？

卯二、釋<sup>3</sup> 辰一、標

謂行四向補特伽羅。

辰二、徵

何等為四？

辰三、列

一、預流果向，二、一來果向，三、不還果向，四、阿羅漢果向。

卯三、結

是名行向補特伽羅。

謂行四向補特伽羅等者：謂如有一，純熟相續，超過一切外異生地，入正

性離生，若未證得初預流果，終無中夭，是名預流果向。又如有一，或世間道，倍離欲界貪已，趣入正性離生；或預流果，為斷欲界上中品惑，修對治行；是名一來果向。又如有一，或世間道，先離欲界貪已，趣入正性離生；或一來果，進斷欲界餘煩惱故，修對治行；是名不還果向。又如有一，學已見跡，為斷非想非非想地煩惱故，修對治行，是名阿羅漢果向。

義如顯揚論說。（顯揚論三卷十頁）

寅十一、住果<sup>3</sup> 卯一、徵

云何住果補特伽羅？

卯二、釋<sup>3</sup> 辰一、標

謂住四果補特伽羅。

辰二、徵

何等為四？

辰三、列

一、預流果，二、一來果，三、不還果，四、阿羅漢果。

卯三、結

是名住果補特伽羅。

謂住四果補特伽羅等者：永斷一切見所斷惑，最初證得逆流行果，名預流果。進斷欲界上中品惑，極唯更受天有一生、人有一生，名一來果。盡斷欲界一切煩惱，永不還來欲界受生，名不還果。永斷三界見修所斷一切煩惱，盡苦邊際，不受後有，是名阿羅漢果。

寅十二、隨信行<sup>3</sup> 卯一、徵

云何隨信行補特伽羅？

卯二、釋<sup>2</sup> 辰一、標相

謂有補特伽羅，從他求請教授教誡，由此力故，修證果行。

辰二、遮簡

非如所聞、所受、所究竟、所思、所量、所觀察法，自有功能、自有勢力隨

法修行；唯由隨他補特伽羅，信而修行。

卯三、結

是名隨信行補特伽羅。

非如所聞所受等者：如所施設、開示，領解文句差別，是名所聞。忍可其義，是名所受。無倒解了，名所究竟。若於彼法暫爾思惟，是名所思。若復於彼思量推察，是名所量。既推察已，如所安立復審觀察，名所觀察。彼隨信行補特伽羅，於如是事自無力能，是故此中作如是說。

寅十三、隨法行<sup>3</sup> 卯一、徵

云何隨法行補特伽羅？

卯二、釋

謂有補特伽羅，如其所聞、所受、所究竟、所思、所量、所觀察法，自有功能、自有勢力隨法修行；不從他求教授教誡，修證果行。

卯三、結

是名隨法行補特伽羅。

寅十四、信勝解<sup>2</sup> 卯一、徵

云何信勝解補特伽羅？

卯二、釋

謂即隨信行補特伽羅，因他教授教誡，於沙門果得觸證時，名信勝解補特伽羅。

於沙門果得觸證時者：證諦現觀，名得觸證。齊爾所時，安立信勝解名。

寅十五、見至<sup>2</sup> 卯一、徵

云何見至補特伽羅？

卯二、釋

謂即隨法行補特伽羅，於沙門果得觸證時，說名見至補特伽羅。

寅十六、身證<sup>3</sup> 卯一、徵

云何身證補特伽羅？

卯二、釋

謂有補特伽羅，於八解脫順逆入出身作證，多安住，而未能得諸漏永盡。

卯三、結

是名身證補特伽羅。

於八解脫順逆入出等者：三摩呬多地說：有八解脫，謂有色觀諸色解脫等。又說：無間入諸等至，謂先順次入乃至有頂，後逆次入至初靜慮，由是當知順逆及入出相。身者，意身故。作證者，由智斷得作證故。如顯揚論說。（顯揚論四卷三頁）多安住者，謂於彼定，其心晝夜能正隨順、趣向、臨入，隨所欲樂能正安住故。

寅十七、極七返有<sup>3</sup> 卯一、徵

云何名為極七返有補特伽羅？

卯二、釋<sup>2</sup> 辰一、顯果證

謂有補特伽羅，已能永斷薩迦耶見、戒禁取、疑三種結故，得預流果，成無

墮法，定趣菩提。

辰二、釋得名

極七返有天人往來。極至七返，證苦邊際。

卯三、結

如是名為極七返有補特伽羅。

成無墮法等者：謂能畢竟不墮惡趣，是名成無墮法。從是以後善修聖道，故說定趣菩提。

寅十八、家家<sup>2</sup> 卯一、徵

云何家家補特伽羅？

卯二、釋<sup>2</sup> 辰一、辨二種類<sup>2</sup> 巳一、標列

謂有二種家家。一、天家家，二、人家家。

巳二、隨釋<sup>2</sup> 午一、天家家

天家家者，謂於天上，從家至家，若往、若來，證苦邊際。

午二、人家家

人家家者，謂於人間，從家至家，若往、若來，證苦邊際。

辰二、結顯果證

當知此二，俱是預流補特伽羅。

寅十九、一間<sup>3</sup> 卯一、徵

云何一間補特伽羅？

卯二、釋<sup>2</sup> 辰一、顯果斷

謂即一來補特伽羅，行不還果向，已能永斷欲界煩惱上品、中品，唯餘下品。

辰二、辨得名

唯更受一欲界天有，即於彼處得般涅槃，不復還來生此世間。

卯三、結

是名一間補特伽羅。

寅二十、中般涅槃<sup>4</sup> 卯一、徵



云何中般涅槃補特伽羅？

卯二、標

謂有三種中般涅槃補特伽羅。

卯三、釋<sup>3</sup>

辰一、於中有纔生位<sup>2</sup>

巳一、辨相

一、有一種中般涅槃補特伽羅，從此沒已，中有續生；中有生已，便般涅槃。

巳二、舉喻

如小札火，微星纔舉，即便謝滅。

辰二、於未趣生有位<sup>2</sup>

巳一、辨相

二、有一種中般涅槃補特伽羅，從此沒已，中有續生；中有生已，少時經停，未趣生有，便般涅槃。

巳二、舉喻

如鐵搏鋌，炎熾赫然，鎚鍛星流，未下便滅。

辰三、於往趣生有位<sup>2</sup>

巳一、辨相

三、有一種中般涅槃補特伽羅，從此沒已，中有續生；中有生已，往趣生有，未得生有，便般涅槃。

巳二、舉喻

如彼熱鐵，鎚鍛星流，下未至地，即便謝滅。

卯四、結

如是三種中般涅槃補特伽羅，總說為一中般涅槃補特伽羅。

寅二十一、生般涅槃<sup>3</sup> 卯一、徵

云何生般涅槃補特伽羅？

卯二、釋

謂纔生彼已，便般涅槃。

卯三、結

是名生般涅槃補特伽羅。

寅二十二、無行般涅槃<sup>3</sup> 卯一、徵

云何無行般涅槃補特伽羅？

卯二、釋

謂生彼已，不起加行、不作功用、不由勞倦，道現在前而般涅槃。

卯三、結

是名無行般涅槃補特伽羅。

不起加行等者：顯揚論說：即此聖者，行少行已，及少精進，而證寂滅。

（顯揚論三卷十二頁）由是當知此所說義，非全不起加行、不作功用，而作是說。

寅二十三、有行般涅槃<sup>3</sup> 卯一、徵

云何有行般涅槃補特伽羅？

卯二、釋

謂彼生已，發起加行、作大功用、由極勞倦，道現在前而般涅槃。

卯三、結

是名有行般涅槃補特伽羅。

寅二十四、上流<sup>3</sup> 卯一、徵

云何上流補特伽羅？

卯二、釋

謂有不還補特伽羅，從此上生初靜慮已，住於彼處，不般涅槃。從彼沒已，展轉上生諸所生處，乃至或到色究竟天，或到非想非非想處。

卯三、結

是名上流補特伽羅。

寅二十五、時解脫<sup>3</sup> 卯一、徵

云何時解脫補特伽羅？

卯二、釋<sup>2</sup> 辰一、標有退

謂有補特伽羅，鈍根種性，

云何時解脫補特伽羅者：謂時愛心解脫，此名時解脫。攝事分說：若阿羅

漢根性鈍故，於世間定是其退法，未能解脫所有定障，故名時愛心解脫。以退法故，時時退失，時時現前，故說名時。於現法樂喜欲證住，故說名愛。（陵本九十卷二十一頁<sup>6849</sup>）此時解脫，準義應知。

於諸世間現法樂住容有退失，或思自害、或守解脫，勵力勤修不放逸行。

辰二、隨難釋

謂防退失增上力故，或唯安住自分善品；或經彼彼日夜、剎那、瞬息、須臾，勵力昇進，乃至未證最極猛利。

卯三、結

是名時解脫補特伽羅。

於諸世間現法樂住容有退失等者：顯揚論說：成就如是軟根，若思自害，不思自害，若放逸，若不放逸，俱可退失現法樂住。（顯揚論三卷十二頁）此說容有退失，準義應知。又復此中，言自害者，謂作是思惟：使我勝諸魔，不令諸魔勝我，如是思已，而思自害。亦如顯揚論釋。言守解脫

等者，謂如下說，或唯安住自分善品，名守解脫；或復勵力昇進，是名勵力勤修不放逸行。

寅二十六、不動法<sup>2</sup> 卯一、徵

云何不動法補特伽羅？

卯二、釋

謂有補特伽羅，與上相違，當知是名不動法補特伽羅。

寅二十七、慧解脫<sup>3</sup> 卯一、徵

云何慧解脫補特伽羅？

卯二、釋

謂有補特伽羅，已能證得諸漏永盡，於八解脫未能身證具足安住。

卯三、結

是名慧解脫補特伽羅。

寅二十八、俱分解脫<sup>3</sup> 卯一、徵

云何俱分解脫補特伽羅？

卯二、釋

謂有補特伽羅，已能證得諸漏永盡，於八解脫身已作證具足安住，於煩惱障分及解脫障分心俱解脫。

卯三、結

是名俱分解脫補特伽羅。

子二、建立補特伽羅<sup>3</sup> 丑一、徵

云何建立補特伽羅？

丑二、釋<sup>4</sup> 寅一、標

謂由十一差別道理，應知建立補特伽羅。

寅二、徵

云何十一差別道理？

寅三、列

一、根差別故；二、眾差別故；三、行差別故；四、願差別故；五、行跡差別故；六、道果差別故；七、加行差別故；八、定差別故；九、生差別故；十、退不退差別故；十一、障差別故。

寅四、辨<sup>11</sup>

卯一、由根差別<sup>3</sup>

辰一、徵

云何由根差別建立補特伽羅？

辰二、標

謂根差別故，建立二種補特伽羅。

辰三、列

一者、鈍根，二者、利根。

卯二、由眾差別<sup>3</sup>

辰一、徵

云何由眾差別建立補特伽羅？

辰二、標

謂眾差別故，建立七種補特伽羅。



辰三、列

謂苾芻、苾芻尼、式叉摩那、勞策男、勞策女、近事男、近事女。

卯三、由行差別<sup>3</sup> 辰一、徵

云何由行差別建立補特伽羅？

辰二、釋<sup>3</sup> 巳一、標

謂行差別故，建立七種補特伽羅。

巳二、列

謂若貪增上補特伽羅，名貪行者。若瞋增上補特伽羅，名瞋行者。若癡增上補特伽羅，名癡行者。若慢增上補特伽羅，名慢行者。若尋思增上補特伽羅，名尋思行者。若得平等補特伽羅，名等分行者。若薄塵性補特伽羅，名薄塵行者。

巳三、廣<sup>5</sup> 午一、貪行者相<sup>3</sup> 未一、問

問：貪行補特伽羅應知何相？

未二、答<sup>2</sup> 申一、出彼貪纏<sup>2</sup> 酉一、明增上<sup>2</sup> 戌一、猛利

答：貪行補特伽羅，於諸微劣所愛事中，尚能生起最極、厚重、上品貪纏，何況中品、上品境界。

戌二、長時

又此貪纏住在身中，經久相續，長時隨縛。

於諸微劣所愛事中至長時隨縛者：此說猛利、長時二種貪相，如文可知。

酉二、出過患

由貪纏故，為可愛法之所制伏，不能制伏彼可愛法。

申二、辨隨行相

諸根悅懌、諸根不彊、諸根不澀、諸根不羸，為性不好以惡身語損惱於他，難使遠離、難使厭患，下劣勝解，事業堅牢、事業久固，禁戒堅牢、禁戒久固，能忍能受，於資生具為性耽染，深生愛重，多喜多悅，遠離顰蹙，舒顏平視，含笑先言。

未三、結

如是等類，應知是名貪行者相。

諸根悅懌等者：此中諸相，多與瞋相相違。言難使遠離、難使厭患者，謂於諸欲貪著受用故。言下劣勝解者，謂於欲界極下劣事生勝解故。

午二、瞋行者相<sup>3</sup> 未一、問

問：瞋行補特伽羅應知何相？

未二、答<sup>2</sup> 申一、出彼瞋纏<sup>2</sup> 酉一、明增上<sup>2</sup> 戌一、猛利

答：瞋行補特伽羅，於諸微劣所憎事中，尚能生起最極、厚重、上品瞋纏，何況中品、上品境界。

戌二、長時

又此瞋纏住在身中，經久相續，長時隨縛。

酉二、出過患

由此瞋纏，為可憎法之所制伏，不能制伏彼可憎法。

申二、辨隨行相

諸根枯槁、諸根剛彊、諸根疏澀、諸根麤燥，為性好樂以惡身語損惱於他，易令遠離、易令厭患，凶暴彊口、形相稜層，無多勝解，事業不堅、事業不固，禁戒不堅、禁戒不固，不忍不受，多憂多惱，性好違背，所取不順，性多愁感，性好麤言，多懷嫌恨，意樂慘烈，悖惡尤蛆，好相拒對，得少語言多患多憤，憔悴而住，喜生忿怒，眉面顰蹙，恆不舒顏，邪睛下視，於他榮利多憎多嫉。

未三、結

如是等類，應知是名瞋行者相。

午三、癡行者相<sup>3</sup> 未一、問

問：癡行補特伽羅應知何相？

未二、答<sup>2</sup> 申一、出彼癡纏<sup>2</sup> 酉一、明增上<sup>2</sup> 戌一、猛利

答：癡行補特伽羅，於諸微劣所愚事中，尚能生起最極、厚重、上品癡纏，

何況中品、上品境界。

戌二、長時

又此癡纏住在身中，經久相續，長時隨縛。

酉二、出過患

由此癡纏，為可癡法之所制伏，不能制伏彼可癡法。

申二、辨隨行相

諸根闇鈍、諸根愚昧、諸根羸劣，身業慢緩、語業慢緩，惡思所思、惡說所說、惡作所作，懶惰懈怠，起不圓滿，詞辯薄弱，性不聰敏，念多忘失，不正知住，所取左僻，難使遠離、難使厭患，下劣勝解，頑駭瘡痂，以手代言，無有力能領解善說、惡說法義，緣所牽纏，他所引奪，他所策使。

未三、結

如是等類，應知是名癡行者相。

午四、慢行者相<sup>3</sup> 未一、問

問：慢行補特伽羅應知何相？

未二、答<sup>2</sup> 申一、出彼慢纏<sup>2</sup> 酉一、明增上<sup>2</sup> 戌一、猛利

答：慢行補特伽羅，於諸微劣所慢事中，尚能生起最極、厚重、上品慢纏，何況中品、上品境界。

戌二、長時

又此慢纏住在身中，經久相續，長時隨縛。

酉二、出過患

由慢纏故，為可慢法之所制伏，不能制伏彼可慢法。

申二、辨隨行相

諸根掉動、諸根高舉、諸根散亂，勤樂嚴身，言語高大，不樂謙下，於其父母、眷屬、師長不能時時如法承事，多懷憍傲，不能以身禮敬、問訊、合掌、迎逆、修和敬業，自高自舉，陵懣他人，樂著利養、樂著恭敬、樂著世間稱譽聲頌，所為輕舉，喜作嘲調，難使遠離、難使厭患，廣大勝解，微劣

慈悲，計我有情、命者、養者、補特伽羅、生者等見，多分上品，多怨、多恨。

未三、結

如是等類，應知是名慢行者相。

午五、尋思行者相<sup>3</sup> 未一、問

問：尋思行補特伽羅應知何相？

未二、答<sup>2</sup> 申一、出尋思纏<sup>2</sup> 酉一、明增上<sup>2</sup> 戌一、猛利

答：尋思行補特伽羅，於諸微劣所尋思事，尚能發起最極、厚重、上品尋思纏，何況中品、上品境界。

戌二、長時

此尋思纏住在身中，經久相續，長時隨縛。

酉二、出過患

由此纏故，為可尋思法之所制伏，不能制伏可尋思法。

申二、辨隨行相

諸根不住、諸根飄舉、諸根掉動、諸根散亂，身業誤失、語業誤失，難使遠離、難使厭患，喜為戲論、樂著戲論，多惑、多疑、多懷樂欲，禁戒不堅、禁戒不定，事業不堅、事業不定，多懷恐慮，念多忘失，不樂遠離，多樂散動，於諸世間種種妙事貪欲隨流，翹勤無惰，起發圓滿。

未三、結

如是等類，應知是名尋思行者相。

辰三、結

如是名為由行差別建立補特伽羅。

卯四、由願差別<sup>3</sup> 辰一、徵

云何由願差別建立補特伽羅？

辰二、釋<sup>2</sup> 巳一、廣辨一切<sup>2</sup> 午一、列

謂或有補特伽羅於聲聞乘已發正願，或有補特伽羅於獨覺乘已發正願，或有



補特伽羅於其大乘已發正願。

午二、辨<sup>2</sup> 未一、種性別

當知此中，若補特伽羅於聲聞乘已發正願，彼或聲聞種性，或獨覺種性，或大乘種性；若補特伽羅於獨覺菩提已發正願，彼或獨覺種性，或聲聞種性，或大乘種性；若補特伽羅於其大乘已發正願，彼或大乘種性，或獨覺種性，或聲聞種性。

未二、住捨別<sup>2</sup> 申一、別辨相<sup>2</sup> 酉一、舉聲聞

若聲聞種性補特伽羅，於獨覺菩提、或於無上正等菩提已發正願，彼是聲聞種性故，後時決定還捨彼願，必唯安住聲聞乘願。

酉二、例餘乘

獨覺乘種性、大乘種性補特伽羅，應知亦爾。

申二、顯決定

此中所有補特伽羅，願可移轉、願可捨離，決定不可移轉種性、捨離種性。

巳二、結簡今義

今此義中，當知唯說聲聞乘願、聲聞種性補特伽羅。

辰三、結

如是名為由願差別建立補特伽羅。

卯五、由行跡差別<sup>3</sup> 辰一、徵

云何由行跡差別建立補特伽羅？

辰二、釋<sup>4</sup> 巳一、標

謂如所舉、如所開示補特伽羅，依四行跡而得出離。

巳二、徵

何等為四？

巳三、列

謂或有行跡是苦遲道，或有行跡是苦速道，或有行跡是樂遲道，或有行跡是樂速道。

巳四、釋<sup>4</sup> 午一、苦遲道

當知此中，若鈍根性補特伽羅，未得根本靜慮，所有行跡，名苦遲道。

午二、苦速道

若利根性補特伽羅，未得根本靜慮，所有行跡，名苦速道。

午三、樂遲道

若鈍根性補特伽羅，已得根本靜慮，所有行跡，名樂遲道。

午四、樂速道

若利根性補特伽羅，已得根本靜慮，所有行跡，名樂速道。

辰三、結

如是名為由行跡差別建立補特伽羅。

卯六、由道果差別<sup>3</sup> 辰一、徵

云何由道果差別建立補特伽羅？

辰二、釋<sup>3</sup> 巳一、總標

謂行四向及住四果。

巳二、別列<sup>2</sup> 午一、行四向

行四向者，一、預流果向補特伽羅，二、一來果向補特伽羅，三、不還果向補特伽羅，四、阿羅漢果向補特伽羅。

午二、住四果

住四果者，一、預流果，二、一來果，三、不還果，四、阿羅漢果。

巳三、釋義<sup>2</sup> 午一、向道

若於向道轉，彼名行向者。由向道故，建立四種補特伽羅。

午二、道果

若得沙門果，彼名住果者。由道果故，建立四種補特伽羅。

辰三、結

如是名為由道果差別建立補特伽羅。

卯七、由加行差別<sup>4</sup> 辰一、徵

云何由加行差別建立補特伽羅？

辰二、標

謂隨信行及隨法行補特伽羅。

辰三、釋<sup>2</sup> 巳一、隨信行

若隨補特伽羅信，勤修正行，名隨信行補特伽羅。

巳二、隨法行

若於諸法不待他緣，隨毗奈耶勤修正行，名隨法行補特伽羅。

辰四、結

如是名為由加行差別建立補特伽羅。

卯八、由定差別<sup>4</sup> 辰一、徵

云何由定差別建立補特伽羅？

辰二、標

謂身證補特伽羅，於八解脫身已作證具足安住，而未獲得諸漏永盡。

辰三、釋

當知如是補特伽羅，於有色觀諸色解脫、內無色想觀外諸色解脫、淨解脫身作證具足住、空無邊處解脫、識無邊處解脫、無所有處解脫、非想非非想處解脫、想受滅解脫，已能順逆入出自在。

辰四、結

如是名為由定差別建立補特伽羅。

卯九、由生差別<sup>3</sup> 辰一、徵

云何由生差別建立補特伽羅？

辰二、釋

謂極七返有、家家、一間、中般涅槃、生般涅槃、無行般涅槃、有行般涅槃，及以上流補特伽羅。

辰三、結

如是名為由生差別建立補特伽羅。

卯十、由退不退差別<sup>3</sup> 辰一、徵

云何由退不退差別建立補特伽羅？

辰二、釋<sup>2</sup> 巳一、退

謂由退故，建立時解脫阿羅漢，彼於現法樂住容有退失。

巳二、不退

由不退故，建立不動法阿羅漢，彼於現法樂住定無退失。

辰三、結

如是名為由退不退差別建立補特伽羅。

卯十一、由障差別<sup>4</sup> 辰一、徵

云何由障差別建立補特伽羅？

辰二、標

謂慧解脫及俱分解脫阿羅漢。

辰三、釋<sup>2</sup> 巳一、慧解脫

慧解脫阿羅漢者，謂已解脫煩惱障，未解脫定障。

巳二、俱分解脫

俱分解脫阿羅漢者，謂已解脫煩惱障及已解脫定障，是故說名俱分解脫。

辰四、結

如是名為由障差別建立補特伽羅。

丑三、結

由此所舉及所開示差別道理，如其次第，應知建立補特伽羅。

子三、所緣<sup>3</sup> 丑一、徵

云何所緣？

丑二、釋<sup>4</sup> 寅一、標

謂有四種所緣境事。

寅二、徵

何等為四？



寅三、列

一者、遍滿所緣境事，二者、淨行所緣境事，三者、善巧所緣境事，四者、淨惑所緣境事。

寅四、釋<sup>4</sup> 卯一、遍滿所緣境事<sup>5</sup> 辰一、徵

云何遍滿所緣境事？

辰二、標

謂復四種。

辰三、列

一、有分別影像，二、無分別影像，三、事邊際性，四、所作成辦。

辰四、釋<sup>2</sup> 巳一、辨相<sup>2</sup> 午一、別辨四種<sup>3</sup> 未一、前二種<sup>2</sup> 申一、辨異相<sup>2</sup> 酉

一、有分別影像<sup>3</sup> 戌一、徵

云何有分別影像？

戌二、釋<sup>2</sup> 亥一、標

謂如有一，或聽聞正法、或教授教誡為所依止，或見、或聞、或分別故，於所知事同分影像，由三摩呬多地毗鉢舍那行觀察揀擇、極揀擇、遍尋思、遍伺察。

或聽聞正法等者：若隨法行補特伽羅，彼以聽聞正法為所依止；若隨信行補特伽羅，彼以教授教誡為所依止。現見世間自他種種衰損，或復傳聞，或內覺知，是名或見、或聞，及或分別。由是種種為因緣故，於自心中極善取相，如現領受勝解而轉，齊爾所時，名所知事同分影像。此為所緣，由等引地如理作意，觀察彼彼功德過失。於觀察時，若正思擇盡所有性，是名揀擇。若復思惟如所有性，名極揀擇。由慧俱行有分別作意，取彼相狀，名遍尋思。審諦推求，名遍伺察。如是名為四種毗鉢舍那，義如下說。（陵本三十卷十一頁<sup>2518</sup>）

亥二、廣<sup>2</sup> 天一、所知事<sup>2</sup> 地一、列

所知事者，謂或不淨，或慈愍，或緣性緣起，或界差別，或阿那波那念，或

蘊善巧，或界善巧，或處善巧，或緣起善巧，或處非處善巧，或下地麤性、上地靜性，或苦諦、集諦、滅諦、道諦。

地二、結

是名所知事。

謂或不淨等者：如是諸事，或為淨行所緣境事，或為善巧所緣境事，或為淨惑所緣境事，如下廣說應知。

天二、所知事同分影像<sup>2</sup>

地一、釋得名<sup>2</sup>

玄一、釋<sup>2</sup>

黃一、由勝解

此所知事，或依教授教誡、或聽聞正法為所依止，令三摩呬多地作意現前，即於彼法而起勝解，即於彼所知事而起勝解。

黃二、明同分

彼於爾時，於所知事，如現領受勝解而轉。雖彼所知事非現領受和合現前，亦非所餘彼種類物，然由三摩呬多地勝解，領受相似作意、領受彼所知事相似顯現。

玄二、結

由此道理，名所知事同分影像。

令三摩呬多地作意現前等者：七作意中，最初了相作意，能令彼所知事現前；由此作意猶為聞思間雜，是故說言或依教授教誡、或聽聞正法為所依止。從此以後，超過聞思，唯用修行，於所緣相發起勝解，是即勝解作意。由是說言即於彼法而起勝解，即於彼所知事而起勝解。

地二、明方便

修觀行者，推求此故，於彼本性所知事中，觀察審定功德過失。

戌三、結

是名有分別影像。

修觀行者推求此故等者：此謂影像，是所知事相似種類故。彼謂本性，即所知事自相、共相故。

酉二、無分別影像<sup>4</sup> 戌一、徵

云何無分別影像？

戌二、標

謂修觀行者，受取如是影像相已，不復觀察揀擇、極揀擇、遍尋思、遍伺察。然即於此所緣影像，以奢摩他行寂靜其心，即是九種行相令心安住。

戌三、釋

謂令心內住、等住、安住、近住、調伏、寂靜、最極寂靜、一趣、等持。彼於爾時，成無分別影像所緣，即於如是所緣影像，一向一趣安住其念，不復觀察揀擇、極揀擇、遍尋思、遍伺察。

戌四、結

是名無分別影像。

不復觀察揀擇等者：此中義顯，於所緣境不捨、不取，名無分別影像。謂於所緣修觀行已，還捨觀相，復於所緣思惟止行。由於所緣止行轉故，不名為捨；即於所緣不作相故，無分別故，不名為取。如下自說。（陵本三

十一卷十一頁<sup>2583</sup>義應準知。

申二、列異名

即此影像，亦名影像，亦名三摩地相，亦名三摩地所行境界，亦名三摩地口，亦名三摩地門，亦名作意處，亦名內分別體，亦名光影。如是等類，當知名為所知事同分影像諸名差別。

未二、事邊際性<sup>2</sup> 申一、徵

云何事邊際性？

申二、釋<sup>3</sup> 酉一、標列

謂若所緣盡所有性、如所有性。

酉二、隨釋<sup>2</sup> 戌一、盡所有性<sup>3</sup> 亥一、徵

云何名為盡所有性？

亥二、釋

謂色蘊外更無餘色，受想行識蘊外更無有餘受想行識；一切有為事，皆五法

所攝；一切諸法，界處所攝；一切所知事，四聖諦攝。

亥三、結

如是名為盡所有性。

一切諸法界處所攝者：若有為，若無為，若種子，若現行，是名一切諸法應知。

戌二、如所有性<sup>2</sup> 亥一、徵

云何名為如所有性？

亥二、釋

謂若所緣是真實性、是真如性，由四道理，具道理性。謂觀待道理、作用道理、證成道理、法爾道理。

酉三、總結

如是若所緣境盡所有性、如所有性，總說為一事邊際性。

未三、所作成辦<sup>3</sup> 申一、徵

云何所作成辦？

申二、釋<sup>2</sup> 酉一、出所作事<sup>2</sup> 戌一、依止清淨

謂修觀行者，於奢摩他、毗鉢舍那，若修、若習、若多修習為因緣故，諸緣影像所有作意皆得圓滿。

於奢摩他毗鉢舍那若修若習等者：攝異門分說：若修者，謂由了相作意故。若習者，謂由勝解作意故。多修習者，謂由餘作意故。又若修者，謂於所知事而發趣故。若習者，謂無間、殷重修加行故。多修習者，謂於長時熟修習故。（陵本八十三卷二十頁<sup>6338</sup>）此說修相，義應準知。

此圓滿故，便得轉依，一切麤重悉皆息滅。

此圓滿故便得轉依等者：此謂定地。轉捨身心麤重，轉得身心輕安，名得轉依。

戌二、所緣清淨

得轉依故，超過影像，即於所知事，有無分別現量智見生。



有無分別現量智見生者：此說心入根本定已，得無加行無功用任運轉道，如實知見一切所知，名無分別現量智見。當知此說意受現量，唯世間攝。

酉二、顯所行境

入初靜慮者，得初靜慮時，於初靜慮所行境界；入第二、第三、第四靜慮者，得第二、第三、第四靜慮時，於第二、第三、第四靜慮所行境界；入空無邊處、識無邊處、無所有處、非想非非想處者，得彼定時，即於彼定所行境界。

申三、結

如是名為所作成辦。

午二、結名遍滿<sup>2</sup> 未一、初義

如是四種所緣境事，遍行一切，隨入一切所緣境中，去來今世正等覺者共所宣說，是故說名遍滿所緣。

如是四種所緣境事等者：此說四種所緣境事，謂即有分別影像，乃至所作

成辦。如是四種，於所知事次第現前，是名遍行一切。於淨行所緣乃至淨惑所緣，隨應能入，是名隨入一切所緣境中。

未二、後義<sup>2</sup> 申一、釋

又此所緣，遍毗鉢舍那品、遍奢摩他品、遍一切事、遍真實事、遍因果相屬事，故名遍滿。

申二、配

謂若說有分別影像，即是此中毗鉢舍那品。若說無分別影像，即是此中奢摩他品。若說事邊際性，即是此中一切事、真實事。若說所作成辦，即是此中因果相屬事。

巳二、引教<sup>2</sup> 午一、證<sup>2</sup> 未一、契經<sup>2</sup> 申一、指說

如佛世尊曾為長老頡隸伐多說如是義。

申二、顯義<sup>2</sup> 酉一、頡隸伐多問

曾聞長老頡隸伐多問世尊言：大德！諸有苾芻勤修觀行，是瑜伽師，能於所

緣安住其心。為何於緣安住其心？云何於緣安住其心？齊何名為心善安住？

諸有苾芻勤修觀行是瑜伽師者：修瑜伽師略有三種。一、於作意初修業者，是名初修業瑜伽師。此中作意，謂了相作意。二、除了相作意，於餘乃至加行究竟五作意中已善修習，是名已習行瑜伽師。三、已超過加行方便所修作意，安住加行究竟果作意位中，是名已度作意瑜伽師。如下自說。（陵本二十八卷十三頁<sup>2371</sup>）此說修瑜伽師隨應當知。

酉二、佛告<sup>2</sup> 戌一、讚問許說

佛告長老頡隸伐多：善哉！善哉！汝今善能問如是義。汝今諦聽，極善思惟，吾當為汝宣說開示。

戌二、正廣開示<sup>2</sup> 亥一、答所問<sup>2</sup> 天一、標

頡隸伐多！諸有苾芻勤修觀行，是瑜伽師，能於所緣安住其心。或樂淨行、或樂善巧、或樂令心解脫諸漏，於相稱緣安住其心，於相似緣安住其心，於緣無倒安住其心，能於其中不捨靜慮。

或樂令心解脫諸漏者：世間離欲、出世離欲皆此所攝應知。

天二、釋<sup>4</sup> 地一、於相稱緣安住其心<sup>3</sup> 玄一、徵

云何苾芻勤修觀行，是瑜伽師，於相稱緣安住其心？

玄二、釋<sup>3</sup> 黃一、為修淨行<sup>2</sup> 宇一、貪行

謂彼苾芻若唯有貪行，應於不淨緣安住於心，如是名為於相稱緣安住其心。

宇二、瞋等行

若唯有瞋行，應於慈愍安住其心；若唯有癡行，應於緣性緣起安住其心；若唯有慢行，應於界差別安住其心；若唯有尋思行，應於阿那波那念安住其心。如是名為於相稱緣安住其心。

黃二、為得善巧<sup>4</sup> 宇一、蘊善巧

頡隸伐多！又彼苾芻若愚諸行自相，愚我、有情、命者、生者、能養育者、補特伽羅事，應於蘊善巧安住其心。

若愚諸行自相等者：諸行自相及有情事唯五取蘊。於此取蘊，或執為我，

或復執我有種種相，迷之不了，是故名愚。

字二、界善巧

若愚其因，應於界善巧安住其心。

若愚其因者：謂執不平等因、或無因故。

字三、處善巧

若愚其緣，應於處善巧安住其心。

若愚其緣者：謂執實有觸者及受者故。

字四、緣起及處非處善巧

若愚無常、苦、空、無我，應於緣起、處非處善巧安住其心。

若愚無常苦空無我者：謂起常等四顛倒故。

黃三、為令解脫<sup>2</sup> 字一、世間

若樂離欲界欲，應於諸欲麤性、諸色靜性安住其心；若樂離色界欲，應於諸色麤性、無色靜性安住其心。

字二、出世間

若樂通達及樂解脫遍一切處薩迦耶事，應於苦諦、集諦、滅諦、道諦安住其心。

若樂通達等者：意地中說：若於一處有染欲，即說於一切處有染欲。若於一處得離欲，即說於一切處得離欲。（陵本二卷二頁<sup>111</sup>）是即遍一切處薩迦耶事。欲證現觀，名樂通達。欲永出離，名樂解脫。

玄三、結

是名苾芻勤修觀行，是瑜伽師，於相稱緣安住其心。

地二、於相似緣安住其心<sup>3</sup> 玄一、徵

頡隸伐多！云何苾芻勤修觀行，是瑜伽師，於相似緣安住其心？

玄二、釋<sup>2</sup> 黃一、由勝解

謂彼苾芻，於彼彼所知事，為欲揀擇、極揀擇、遍尋思、遍伺察故，於先所見、所聞、所覺、所知事，由見聞覺知增上力故，以三摩呬多地作意，思惟

分別而起勝解。彼雖於其本所知事不能和合現前觀察，然與本事相似而生，於彼所緣有彼相似唯智、唯見、唯正憶念。

然與本事相似而生等者：此中說二相似，義有差別。一、謂影像與彼本事相似，二、謂能緣唯智、唯見、唯正憶念與彼所緣影像相似。

黃二、由止觀

又彼苾芻，於時時間令心寂靜，於時時間依增上慧法毗鉢舍那勤修觀行。

玄三、結

是名苾芻勤修觀行，是瑜伽師，於相似緣安住其心。

地三、於緣無倒安住其心<sup>3</sup> 玄一、徵

頡隸伐多！云何苾芻勤修觀行，是瑜伽師，於緣無倒安住其心？

玄二、釋

謂若苾芻勤修觀行，是瑜伽師，於所緣境安住其心，隨應解了所知境界，如實無倒能遍了知。

玄三、結

是名苾芻勤修觀行，是瑜伽師，於緣無倒安住其心。

地四、能於其中不捨靜慮<sup>3</sup> 玄一、徵

頡隸伐多！云何苾芻勤修觀行，是瑜伽師，能於其中不捨靜慮？

玄二、釋<sup>2</sup> 黃一、明修相

謂若苾芻勤修觀行，是瑜伽師，如是於緣正修行時，無間加行、殷重加行，於時時間修習止相、舉相、捨相。

如是於緣正修行時者：謂如前說，於相稱緣安住其心，於相似緣安住其心，於緣無倒安住其心，即於所緣正修應時加行，是名如是於緣正修行時。應時加行者，如下自釋。（陵本三十一卷八頁<sup>2571</sup>）

黃二、顯隨證

由修、由習、由多修習為因緣故，一切麤重悉皆息滅，隨得觸證所依清淨。於所知事，由現見故，隨得觸證所緣清淨。由離貪故，隨得觸證心遍清淨。



離無明故，隨得觸證智遍清淨。

一切麤重悉皆息滅等者：此中義顯修瑜伽者四種瑜伽所作。何等為四？一、所依滅，二、所依轉，三、遍知所緣，四、愛樂所緣。此說一切麤重悉皆息滅，即所依滅。此說觸證所依清淨，即所依轉。此說由離貪故，隨得觸證心遍清淨，是即愛樂所緣。此說離無明故，隨得觸證智遍清淨，是即遍知所緣。由此二種所緣，用所依清淨而為上首，是故此說於所知事由現見故，隨得觸證所緣清淨。義如下說。（陵本二十八卷十三頁<sup>2369</sup>）

玄三、結

是名苾芻勤修觀行，是瑜伽師，能於其中不捨靜慮。

亥二、答略義

頡隸伐多！為此苾芻於所緣境安住其心，如是於緣安住其心，如是於緣安住心已，名善安住。

為此苾芻於所緣境安住其心等者：此中結答前三種問。前說於相稱緣安住

其心，此答初問，是即為此於所緣境安住其心。前說於相似緣安住其心，於緣無倒安住其心，答第二問，此即如是於緣安住其心。前說能於其中不捨靜慮，答第三問，是即於緣安住心已，名善安住。

未二、重頌<sup>2</sup> 申一、第一頌<sup>2</sup> 酉一、舉說

世尊此中重說頌曰：

行者行諸相 知一切實義 常於影靜慮 得證遍清淨

酉二、配釋<sup>4</sup> 戌一、第一句

此中說言：行者行諸相者。由此宣說修觀行者，於止、舉、捨相，無間修行、殷重修持。

戌二、第二句

若復說言：知一切實義者。由此宣說事邊際性。

戌三、第三句

若復說言：常於影靜慮者。由此宣說有分別影像、無分別影像。

戌四、第四句

若復說言：得證遍清淨者。由此宣說所作成辦。

申二、第二頌<sup>2</sup> 酉一、舉說

此中世尊復說頌曰：

於心相遍知 能受遠離味 靜慮常委念 受喜樂離染

於心相遍知等者：思所成地亦引此頌。彼第四句說：受無染喜樂。謂受解脫喜樂及無染樂，此應準釋。

酉二、配釋<sup>4</sup> 戌一、第一句

此中說言：於心相遍知者。謂有分別影像、無分別影像，以心相名說；事邊際性，以遍知名說。

戌二、第二句

若復說言：能受遠離味者。由此宣說於其所緣正修行者樂斷樂修。

戌三、第三句

若復說言：靜慮常委念者。由此宣說於奢摩他、毗鉢舍那，常勤修習、委練修習。

戌四、第四句

若復說言：受喜樂離染者。由此宣說所作成辦。

午二、結

當知如是遍滿所緣，隨順淨教，契合正理。

辰五、結

如是名為遍滿所緣。

卯二、淨行所緣<sup>4</sup> 辰一、徵

云何名為淨行所緣？

辰二、標

謂不淨、慈愍、緣性緣起、界差別、阿那波那念等所緣差別。

辰三、釋<sup>5</sup>

巳一、不淨所緣<sup>4</sup>

午一、徵

云何不淨所緣？

午二、標

謂略說有六種不淨。

午三、列

一、朽穢不淨，二、苦惱不淨，三、下劣不淨，四、觀待不淨，五、煩惱不淨，六、速壞不淨。

午四、釋<sup>2</sup>

未一、別辨相<sup>6</sup>

申一、朽穢不淨<sup>5</sup>

酉一、徵

云何名為朽穢不淨？

酉二、標

謂此不淨，略依二種。

酉三、列

一者、依內，二者、依外。

酉四、釋<sup>2</sup>

戌一、依內<sup>3</sup>

亥一、徵

云何依內朽穢不淨？

亥二、列

謂內身中，髮、毛、爪、齒、塵垢、皮、肉、骸骨、筋、脈、心、膽、肝、肺、大腸、小腸、生臟、熟臟、肚、胃、脾、腎、膿血、熱痰、肪、膏、肌、髓、腦、膜、涕、唾、淚、汗、尿、屎、尿。

亥三、結

如是等類，名為依內朽穢不淨。

戌二、依外<sup>3</sup> 亥一、徵

云何依外朽穢不淨？

亥二、列

謂或青瘀、或復膿爛、或復變壞、或復膨脹、或復食噉、或復變赤、或復散壞、或骨、或鎖、或復骨鎖、或屎所作、或尿所作、或唾所作、或涕所作、或血所塗、或膿所塗、或便穢處。

亥三、結

如是等類，名為依外朽穢不淨。

酉五、結

如是依內朽穢不淨及依外朽穢不淨，總說為一朽穢不淨。

申二、苦惱不淨<sup>3</sup> 酉一、徵

云何名為苦惱不淨？

酉二、釋

謂順苦受觸為緣所生，若身、若心不平等受，受所攝。

酉三、結

如是名為苦惱不淨。

若身若心不平等受受所攝者：此說苦受，名為不平等受。如是苦受復有分別，謂身及心，與彼俱有及相應法，名受所攝。

申三、下劣不淨<sup>3</sup> 酉一、徵

云何名為下劣不淨？

酉二、釋

謂最下劣事、最下劣界，所謂欲界。除此更無極下、極劣、最極鄙穢餘界可得。

酉三、結

如是名為下劣不淨。

申四、觀待不淨<sup>3</sup> 酉一、徵

云何名為觀待不淨？

酉二、釋<sup>2</sup> 戌一、標

謂如有一劣清淨事，觀待其餘勝清淨事，便似不淨。

戌二、例<sup>2</sup> 亥一、有色待無色

如待無色勝清淨事，色界諸法便似不淨。

亥二、生死待涅槃



待薩迦耶寂滅涅槃，乃至有頂皆似不淨。

酉三、結

如是等類，一切名為觀待不淨。

申五、煩惱不淨<sup>2</sup> 酉一、徵

云何名為煩惱不淨？

酉二、釋

謂三界中，所有一切結、縛、隨眠、隨煩惱、纏，一切名為煩惱不淨。

申六、速壞不淨<sup>3</sup> 酉一、徵

云何名為速壞不淨？

酉二、釋

謂五取蘊，無常、無恆、不可保信、變壞法性。

酉三、結

如是名為速壞不淨。

謂五取蘊無常無恆等者：攝事分說：剎那剎那壞，故無常。自體繫屬有限住壽，故無恆。壽量未滿，容被緣壞，非時而死，故不可保。乃至爾所時住，於其中間不定安樂，故變壞法。（陵本八十六卷一頁<sup>6486</sup>）此應準知。

未二、總料簡<sup>2</sup>

申一、總說一切<sup>2</sup>

酉一、顯義<sup>2</sup>

戌一、標建立<sup>3</sup>

亥一、顯方便

如是不淨，是能清淨貪行所緣。

亥二、辨所治

貪有五種。一、於內身欲欲貪，二、於外身姪欲姪貪，三、境欲境貪，四、色欲色貪，五、薩迦耶欲薩迦耶貪。是名五貪。

貪有五種等者：此中貪相略別為二，一、欲，二、貪。攝異門分說：欲者，謂於未得、已得，希求獲得及受用故。貪者，謂於受用喜樂堅著故。（陵本八十四卷十六頁<sup>6401</sup>）言五種者，三唯欲界，一唯色界，一通三界，如文可知。希求當來人天樂異熟果，樂著現在已得自體，不離欲界起欲貪故，名於內身欲欲貪。餘文易了。

亥三、明所為

為欲令此五種欲貪斷滅、除遣、不現行故，建立六種不淨所緣。

戌二、配對治<sup>5</sup> 亥一、於內身欲欲欲貪

謂由依內朽穢不淨所緣故，令於內身欲欲欲貪，心得清淨。

亥二、於外身姪欲姪貪<sup>3</sup> 天一、標

由依外朽穢不淨所緣故，令於外身姪欲姪貪，心得清淨。

天二、釋<sup>2</sup> 地一、廣分別<sup>3</sup> 玄一、總標

姪相應貪復有四種。一、顯色貪，二、形色貪，三、妙觸貪，四、承事貪。

由依四外不淨所緣，於此四種相應姪貪，心得清淨。

玄二、別釋<sup>4</sup> 黃一、於顯色貪

若於青瘀、或於膿爛、或於變壞、或於膨脹、或於食噉作意思惟，於顯色貪令心清淨。

黃二、於形色貪

若於變亦作意思惟，於形色貪令心清淨。

黃三、於妙觸貪

若於其骨、若於其鎖、若於骨鎖作意思惟，於妙觸貪令心清淨。

黃四、於承事貪

若於散壞作意思惟，於承事貪令心清淨。

玄三、總結

如是四種，名於姪貪令心清淨。

地二、引教證<sup>2</sup> 玄一、舉教

是故世尊乃至所有依外朽穢不淨差別，皆依四種擔怕路而正建立。

玄二、配說<sup>4</sup> 黃一、顯青瘀等

謂若說言：由擔怕路見彼彼尸，死經一日，或經二日，或經七日，烏鵲、餓狗、鷄鷲、狐狼、野干、禽獸之所食噉，便取其相，以譬彼身亦是性，亦如是類，不能超過如是法性。此即顯示始從青瘀乃至食噉。

黃二、顯示變赤

若復說言：由擔怕路見彼彼尸，離皮肉血，筋脈纏裹。此即顯示所有變赤。

黃三、顯骨鎖等

若復說言：由擔怕路見彼彼骨、或骨、或鎖。此即顯示或骨、或鎖、或復骨鎖。

黃四、顯示散壞

若復說言：由擔怕路見彼彼骨，手骨異處，足骨異處，髕骨異處，膝骨異處，臂骨異處，肘骨異處，脊骨異處，髀骨異處，肋骨異處，頷輪、齒鬣、頂髑髏等各各分散，或經一年，或二、或三，乃至七年，其色鮮白，猶如螺貝，或如鵠色，或見彼骨和雜塵土。此即顯示所有散壞。

天三、結

如是依外所有朽穢不淨所緣，令於四種婬相應貪，心得清淨。

亥三、於境欲境貪

由苦惱不淨所緣，及下劣不淨所緣故，令於境相應若欲若貪，心得清淨。

亥四、於色欲色貪

由觀待不淨所緣故，令於色相應若欲若貪，心得清淨。

亥五、於薩迦耶欲薩迦耶貪

由煩惱不淨所緣，及速壞不淨所緣故，令於從欲界乃至有頂諸薩迦耶若欲若貪，心得清淨。

酉二、結名

是名貪行淨行所緣。

申二、顯所說義<sup>2</sup> 酉一、結前說

如是且約能淨貪行，總說一切通治所攝不淨所緣。

酉二、明今義

今此義中，本意唯取朽穢不淨，所餘不淨亦是其餘淨行所緣。

所餘不淨亦是其餘淨行所緣者：所餘苦惱不淨乃至速壞不淨，亦是能淨其

餘貪行所緣，由是六種總說名為不淨所緣。

巳二、慈愍所緣<sup>2</sup> 午一、徵

云何慈愍所緣？

午二、釋<sup>4</sup> 未一、略辨相<sup>2</sup> 申一、標義

謂或於親品、或於怨品、或於中品，平等安住利益意樂，能引下中上品快樂定地勝解。

申二、釋名

當知此中，親品、怨品，及以中品是為所緣；利益意樂、能引快樂定地勝解，是為能緣。所緣、能緣總略為一，說名慈愍所緣。

未二、配經說<sup>4</sup> 申一、慈俱心

若經說言：慈俱心者。此即顯示於親怨中三品所緣利益意樂。

申二、無怨無敵無損害<sup>2</sup> 酉一、標顯

若復說言：無怨、無敵、無損害者。此則顯示利益意樂有三種相。

酉二、逐釋

由無怨故，名為增上利益意樂。此無怨性一句所顯，謂無敵對故、無損惱故。不欲相違諍義，是無敵對。不欲不饒益義，是無損害。

申三、廣大無量<sup>2</sup> 酉一、標顯

若復說言：廣大無量者。此則顯示能引下中上品快樂。

酉二、隨釋

欲界快樂名廣，初二靜慮地快樂名大，第三靜慮地快樂名無量。

申四、勝解遍滿具足住

若復說言：勝解遍滿具足住者。此則顯示能引快樂定地勝解。又此勝解，即是能引快樂利益增上意樂所攝勝解作意俱行。

未三、廣差別<sup>2</sup> 申一、能緣

若於無苦無樂親怨中三品有情，平等欲與其樂，當知是慈。若於有苦、或於有樂親怨中三品有情，平等欲拔其苦，欲慶其樂，當知是悲、是喜。



申二、所緣

有苦有情是悲所緣，有樂有情是喜所緣，是名慈愍所緣。

未四、顯方便

若有瞋行補特伽羅，於諸有情修習慈愍，令瞋微薄，名於瞋恚心得清淨。

瑜伽師地論科句披尋記卷第二十六



瑜伽師地論科句披尋記卷第二十七

彌勒菩薩說

唐三藏沙門玄奘奉詔譯

韓清淨科記

本地分中聲聞地第二瑜伽處之二

已三、緣性緣起所緣<sup>3</sup> 午一、徵

云何緣性緣起所緣？

午二、釋<sup>2</sup> 未一、明所緣

謂於三世唯行、唯法、唯事、唯因、唯果，墮正道理。謂觀待道理、作用道理、證成道理、法爾道理。

謂於三世唯行唯法等者：謂緣生法本無而有，有已散滅，是名唯行。唯法所顯、唯法能潤、唯法所潤，是名唯法。五有取蘊，唯業異熟，是名唯事。因有二種，謂牽引因及生起因，是名唯因。果亦有二，謂自體果及受

用境界果，是名唯果。於去來今，唯此諸相可得，無有作者及以受者，由是思惟，墮四道理。此復云何？謂若有因，苦便隨逐，招集一切純大苦蘊，是即觀待道理。於緣起觀善修、善習、善多修習，能斷愚癡，是即作用道理。此緣起義有至數量，有內現證，有比度法，是即證成道理。又緣起法安住法性、法住、法界，是即法爾道理。

唯有諸法能引諸法，無有作者及以受者，是名緣性緣起所緣。

未二、顯方便

於此所緣作意思惟，癡行增上補特伽羅所有癡行皆得微薄，於諸癡行，心得清淨。

午三、結

是名緣性緣起所緣。

唯有諸法能引諸法等者：為顯緣起非無因生，是故說言唯有諸法能引諸法。為顯緣起非自作、非他作，是故說言無有作者及以受者。

巳四、界差別所緣<sup>5</sup> 午一、徵

云何界差別所緣？

午二、標

謂六界差別。

午三、列

一、地界，二、水界，三、火界，四、風界，五、空界，六、識界。

午四、釋<sup>2</sup> 未一、辨類別<sup>6</sup> 申一、地界<sup>4</sup> 酉一、徵

云何地界？

酉二、標

地界有二。

酉三、列

一、內，二、外。

酉四、釋<sup>2</sup> 戌一、出體<sup>2</sup> 亥一、內地界

內地界者，謂此身中內別堅性，堅硬所攝、地地所攝，親附、執受。

亥二、外地界

外地界者，謂外堅性，堅硬所攝，地地所攝，非親附、非執受。

戌二、舉事<sup>2</sup>

亥一、內地界<sup>2</sup>

天一、徵

又內地界其事云何？

天二、列

謂髮、毛、爪、齒、塵垢、皮、肉、骸骨、筋、脈、肝、膽、心、肺、脾、腎、肚、胃、大腸、小腸、生藏、熟藏，及糞穢等，名內地界。

亥二、外地界<sup>2</sup>

天一、徵

又外地界其事云何？

天二、列

謂瓦、木、塊、礫、樹、石、山、巖，如是等類，名外地界。

內別堅性等者：於內身中所有四大，名內大種。內大種中唯說地大，是名

內別堅性。說彼種類，名堅硬所攝，如是亦名地地所攝。約細麤別，故作異說。即於身中，所有屬根髮毛爪等，非執受故，唯名親附；根及根所依屬，有執受故，說名執受。下說水等，隨應準知。

申二、水界<sup>4</sup> 西一、徵

云何水界？

西二、標

水界有二。

西三、列

一、內，二、外。

西四、釋<sup>2</sup> 戌一、內水界<sup>2</sup> 亥一、出體

內水界者，謂此身中內別濕性，濕潤所攝、水水所攝，親附、執受。

亥二、舉事<sup>2</sup> 天一、徵

其事云何？

天二、列

謂淚、汗、涕、唾、肪、膏、脂、髓、熱痰、膿血、腦、膜、尿等，名內水界。

戌二、外水界<sup>2</sup> 亥一、出體

外水界者，謂外濕性，濕潤所攝、水水所攝，非親附、非執受。

亥二、舉事<sup>2</sup> 天一、徵

其事云何？

天二、列

謂井、泉、池、沼、陂、湖、河、海，如是等類，名外水界。

申三、火界<sup>4</sup> 酉一、徵

云何火界？

酉二、標

火界有二。



酉三、列

一、內，二、外。

酉四、釋<sup>2</sup> 戌一、內火界<sup>2</sup> 亥一、出體

內火界者，謂此身中內別溫性，溫熱所攝、煖煖所攝，親附、執受。

亥二、舉事<sup>3</sup> 天一、徵

其事云何？

天二、釋<sup>2</sup> 地一、辨相

謂於身中所有溫煖，能令身熱、等熱、遍熱。

地二、明業

由是因緣，所食、所飲、所噉、所嘗，易正消變。彼增盛故，墮蒸熱數。

天三、結

如是等類，名內火界。

戌二、外火界<sup>2</sup> 亥一、出體

外火界者，謂外溫性，溫熱所攝、煖煖所攝，非親附、非執受。

亥二、舉事<sup>3</sup> 天一、徵

其事云何？

天二、釋<sup>2</sup> 地一、辨相

謂於人間依鑽燧等、牛糞末等，以求其火。

地二、明業

火既生已，能燒牛糞、或草、或薪、或榛、或野、或山、或渚、或村、村分、或城、城分、或國、國分。

天三、結

或復所餘如是等類，名外火界。

申四、風界<sup>4</sup> 酉一、徵

云何風界？

酉二、標

風界有二。

酉三、列

一、內，二、外。

酉四、釋<sup>2</sup>

戌一、內風界<sup>2</sup>

亥一、出體

內風界者，謂此身中內別風性，風飄所攝，輕性、動性，非親附、非執受。

亥二、舉事<sup>3</sup>

天一、徵

其事云何？

天二、列

謂內身中，有上行風、有下行風、有脅臥風、有脊臥風、有腰間風、有髀間風、有小刀風、有大刀風、有針刺風、有畢鉢羅風、有入出息風、有隨支節風。

天三、結

如是等類，名內風界。

戌二、外風界<sup>2</sup> 亥一、出體

外風界者，謂外風性，風飄所攝，輕性、動性，非親附、非執受。

亥二、舉事<sup>3</sup> 天一、徵

其事云何？

天二、列<sup>2</sup> 地一、種類

謂在身外，有東來風、有西來風、有南來風、有北來風、有有塵風、有無塵風、有狹小風、有廣大風、有毗濕婆風、有吠藍婆風、有風輪風。

地二、業用

有時大風卒起積集，折樹、頽牆、崩山、蕩海；既飄鼓已，無所依憑，自然靜息。若諸有情欲求風者，動衣、搖扇，及多羅掌。

天三、結

如是等類，名外風界。

申五、空界<sup>3</sup> 酉一、徵

云何空界？

酉二、釋<sup>2</sup> 戌一、種類

謂眼、耳、鼻、口、咽喉等所有孔穴。

戌二、業用

由此吞咽、於此吞咽，既吞咽已，由此孔穴便下漏泄。

酉三、結

如是等類，說名空界。

由此吞咽於此吞咽者：此中略顯孔穴業用及與依處，故作是說。

申六、識界<sup>3</sup> 酉一、徵

云何識界？

酉二、釋<sup>2</sup> 戌一、六種

謂眼、耳、鼻、舌、身、意識。

戌二、三種

又心、意、識三種差別。

酉三、結

是名識界。

未二、顯方便

若諸慢行補特伽羅，於界差別作意思惟，便於身中離一合想，得不淨想。無復高舉，憍慢微薄，於諸慢行，心得清淨。

午五、結

是名慢行補特伽羅由界差別淨行所緣。

便於身中離一合想者：謂不為我我所執之所積集故。

巳五、阿那波那念所緣<sup>3</sup> 午一、徵

云何阿那波那念所緣？

午二、釋<sup>2</sup> 未一、顯修念<sup>2</sup> 申一、略標

謂緣入息、出息念，是名阿那波那念。此念所緣入出息等，名阿那波那念所

緣。

此念所緣入出息等者：謂入出息是念所緣，及此為依五種修習亦念所緣，故置等言。如是總名阿那波那念所緣。五種修習者，如下自說。

申二、廣辨<sup>2</sup> 酉一、入出息修<sup>2</sup> 戌一、辨入出息<sup>6</sup> 亥一、種類<sup>2</sup> 天一、標列<sup>2</sup>

地一、入息

當知此中，入息有二。何等為二？一者、入息，二者、中間入息。

地二、出息

出息亦二。何等為二？一者、出息，二者、中間出息。

天二、隨釋<sup>2</sup> 地一、舉入息<sup>2</sup> 玄一、入息

入息者，謂出息無間，內門風轉，始從面門、鼻門乃至臍處。

玄二、中間入息

中間入息者，謂入息滅已，乃至出息未生，於其中間在停息處，暫時相似微細風起，是名中間入息。

地二、例出息<sup>2</sup> 玄一、例前

如入息、中間入息，出息、中間出息，當知亦爾。

玄二、顯別

此中差別者，謂入息無間，外門風轉，始從臍處，乃至面門、或至鼻端、或復出外。

亥二、因緣<sup>3</sup> 天一、標

入息、出息有二因緣。

天二、徵

何等為二？

天三、列

一、牽引業；二、臍處孔穴，或上身分所有孔穴。

一牽引業者：謂有所作為牽引因。

亥三、所依<sup>2</sup> 天一、標列二依



入息、出息有二所依。何等為二？一、身，二、心。

天二、釋其所以<sup>3</sup> 地一、標義

所以者何？要依身心，入出息轉，如其所應。

要依身心入出息轉如其所應者：入出息轉非唯依身、非唯依心，是故前說有二所依。然亦非唯依身心轉，由諸有情業差別故，或時不轉，是故說言如其所應。如下妨難，其義可知。

地二、遮非

若唯依身而息轉者，入無想定、入滅盡定、生無想天諸有情類，彼息應轉。若唯依心而息轉者，入無色定、生無色界，彼息應轉。若唯依身心而轉，非如其所應者，入第四靜慮，若生於彼諸有情類，及羯羅藍、頰部曇、閉尸等位諸有情類，彼息應轉。然彼不轉。

地三、結成

是故當知，要依身心，入出息轉，如其所應。

羯羅藍頻部曇閉尸等位者：意地中說，處胎藏中有八位別，此舉前三，略無餘位，故置等言。

亥四、行別<sup>3</sup> 天一、標

入息、出息有二種行。

天二、徵

何等為二？

天三、列

一者、入息向下而行；二者、出息向上而行。

亥五、地別<sup>4</sup> 天一、標

入息、出息有二種地。

天二、徵

何等為二？

天三、列

一、麤孔穴，二、細孔穴。

天四、釋<sup>2</sup> 地一、麤孔穴

云何麤孔穴？謂從臍處孔穴乃至面門、鼻門，復從面門、鼻門乃至臍處孔穴。

地二、細孔穴

云何細孔穴？謂於身中一切毛孔。

亥六、異名<sup>4</sup> 天一、標

入息、出息有四異名。

天二、徵

何等為四？

天三、列

一名風，二名阿那波那，三名入息出息，四名身行。

天四、辨

風名一種，是風共名；餘之三種，是不共名。

戌二、明修過患<sup>4</sup> 亥一、標

修入出息者有二過患。

亥二、徵

何等為二？

亥三、列

一、太緩方便，二、太急方便。

亥四、釋<sup>2</sup> 天一、太緩方便

由太緩方便故，生起懈怠，或為惛沈睡眠纏擾其心，或令其心於外散亂。

天二、太急方便<sup>2</sup> 地一、標

由太急方便故，或令其身生不平等，或令其心生不平等。

地二、釋<sup>2</sup> 玄一、令身生不平等<sup>3</sup> 黃一、徵

云何令身生不平等？

黃二、釋<sup>2</sup> 宇一、明因緣

謂彊用力持入出息。由入出息被執持故，便令身中不平風轉。

宇二、出過患

由此最初於諸支節皆生戰掉，名能戰掉。此戰掉風若增長時，能生疾病。由是因緣，於諸支節生諸疾病。

黃三、結

是名令身生不平等。

玄二、令心生不平等<sup>3</sup> 黃一、徵

云何令心生不平等？

黃二、釋

謂或令心生諸散亂，或為極重憂惱逼切。

黃三、結

是名令心生不平等。

酉二、五種修習<sup>4</sup> 戌一、標

又此阿那波那念，應知略有五種修習。

戌二、徵

何等為五？

戌三、列

一、算數修習，二、悟入諸蘊修習，三、悟入緣起修習，四、悟入聖諦修習，五、十六勝行修習。

戌四、釋<sup>2</sup> 亥一、別辨五種<sup>5</sup> 天一、算數修習<sup>2</sup> 地一、徵

云何名為算數修習？

地二、釋<sup>2</sup> 玄一、依法辨<sup>5</sup> 黃一、標

謂略有四種算數修習。

黃二、徵

何等為四？

黃三、列

一者、以一為一算數，二者、以二為一算數，三者、順算數，四者、逆算數。

黃四、釋<sup>2</sup> 字一、算數差別<sup>2</sup> 宙一、四種算數<sup>4</sup> 洪一、以一為一算數<sup>3</sup> 荒一、徵

云何以一為一算數？

荒二、釋<sup>3</sup> 日一、一數

謂若入息入時，由緣入息出息住念，數以為一。

由緣入息出息住念者：內門風轉，始從面門、鼻門乃至臍處，是名入息。於爾所時，出息已住，是故能緣彼念，名緣入息出息住念。

日二、二數

若入息滅，出息生，出向外時，數為第二。

日三、十數

如是展轉數至其十。由此算數非略非廣，故唯至十。

荒三、結

是名以一為一算數。

由此算數非略非廣等者：若緣入息數以為一，及緣出息數以為二，不更展轉數至其十，是名為略。若數至十，後後勝進，是名為廣。唯此十數處二中間，故名非略非廣。

洪二、以二為一算數<sup>2</sup> 荒一、徵

云何以二為一算數？

荒二、釋<sup>2</sup> 日一、辨相

謂若入息入而已滅，出息生而已出，爾時總合數以為一。即由如是算數道理，數至其十，是名以二為一算數。

日二、釋名

入息、出息說名為二，總合二種數之為一，故名以二為一算數。

洪三、順算數<sup>2</sup> 荒一、徵

云何順算數？

荒二、釋



謂或由以一為一算數，或由以二為一算數，順次展轉數至其十，名順算數。

洪四、逆算數<sup>2</sup> 荒一、徵

云何逆算數？

荒二、釋

謂即由前二種算數，逆次展轉從第十數，次九、次八、次七、次六、次五、次四、次三、次二、次數其一，名逆算數。

宙二、勝進算數<sup>3</sup> 洪一、結前生後

若時行者，或以一為一算數為依，或以二為一算數為依，於順算數及逆算數已串修習，於其中間心無散亂。無散亂心善算數已，復應為說勝進算數。

洪二、釋其勝進<sup>2</sup> 荒一、徵

云何名為勝進算數？

荒二、辨<sup>2</sup> 日一、合二為一<sup>3</sup> 月一、標差別

謂或依以一為一算數，或依以二為一算數，合二為一而算數之。

月二、辨二種

若依以一為一而算數者，即入息、出息二合為一。若依以二為一而算數者，即入息、出息四合為一。

月三、結展轉

如是展轉數乃至十。

日二、增百為一

如是後後漸增，乃至以百為一而算數之。由此以百為一算數，漸次數之乃至其十。

洪三、結串修習

如是勤修數息念者，乃至十十數以為一，漸次數之乃至滿十。由此以十為一算數，於其中間心無散亂，齊此名為已串修習。

字二、修習差別<sup>2</sup> 宙一、有散亂

又此勤修數息念者，若於中間其心散亂，復應退還從初數起，或順、或逆。

若於中間其心散亂等者：從一至十，從十至一，次第算數，是名中間。如是中間，當知通說最初算數修習，及與後後勝進算數。於爾所時，心若散亂，復應退還，依順或逆，隨其所應，從初數起。

宙二、極串習<sup>2</sup>

洪一、安住所緣<sup>2</sup>

荒一、釋

若時算數極串習故，其心自然乘任運道，安住入息、出息所緣，無斷無間相續而轉。先於入息有能取轉，入息滅已，於息空位有能取轉；次於出息有能取轉，出息滅已，於息空位有能取轉。

荒二、結

如是展轉相續流注，無動無搖，無散亂行，有愛樂轉。齊此名為過算數地，不應復數。唯於入息、出息所緣，令心安住。

先於入息有能取轉等者：此中能取，謂緣彼念。由彼念故，於入出息展轉算數，心無散亂，無動無搖，相續流注適悅相應，是故說言有愛樂轉。

洪二、應勤加行

於入出息應正隨行、應審了達。於入出息及二中間，若轉、若還分位差別，皆善覺了。

黃五、結

如是名為算數修習。

於入出息應正隨行等者：前說入息向下而行，出息向上而行，念隨彼轉，名正隨行。念與慧俱，名審了達。於入出息及二中間，順次算數，是名為轉；逆次算數，是名為還。入息轉時，初從面門、鼻門乃至臍處孔穴；出息轉時，初從臍處孔穴乃至面門、鼻門；是名分位差別。

玄二、依人辨<sup>2</sup> 黃一、安住息念<sup>2</sup> 字一、鈍根<sup>2</sup> 宙一、標

又鈍根者，應為宣說如是息念算數修習。彼由此故，於散亂處，令心安住、令心愛樂。

宙二、釋

若異算數入出息念，彼心應為惛沈睡眠之所纏擾，或應彼心於外馳散。由正

勤修數息念故，彼皆無有。

字二、利根

若有利根，覺慧聰俊，不好乘此算數加行。若為宣說算數加行，亦能速疾無倒了達，然不愛樂。

黃二、能勤加行<sup>2</sup> 字一、辨相

彼復於此入出息緣安住念已，若是處轉、若乃至轉、若如所轉、若時而轉，於此一切，由安住念，能正隨行，能正了達如是加行有如是相。

若是處轉等者：入息生時，始從面門、鼻門；出息生時，始從臍處孔穴；名是處轉。入息生已，乃至臍處孔穴；出息生已，乃至面門、鼻門；名乃至轉。出息入息向下而行，入息出息向上而行，遠離太緩、太急方便過患，名如所轉。出息無間內門風轉，入息無間外門風轉，於二中間亦有暫時相似微細風起，是名若時而轉。

字二、顯業

於此加行若修、若習、若多修習為因緣故，起身輕安及心輕安，證一境性，於其所緣愛樂趣入。

天二、悟入諸蘊修習<sup>4</sup> 地一、標

如是彼於算數息念善修習已，復於所取、能取二事，作意思惟，悟入諸蘊。復於所取能取二事作意思惟者：此中所取，意說色蘊；能取，意說四無色蘊。如下自釋，易可了知。

地二、徵

云何悟入？

地三、釋<sup>2</sup> 玄一、悟入<sup>5</sup> 黃一、色蘊

謂於入息、出息，及息所依身，作意思惟，悟入色蘊。

黃二、受蘊

於彼入息、出息能取念相應領納，作意思惟，悟入受蘊。

黃三、想蘊

即於彼念相應等了，作意思惟，悟入想蘊。

黃四、行蘊

即於彼念，若念相應思及慧等，作意思惟，悟入行蘊。

黃五、識蘊

若於彼念相應諸心、意、識，作意思惟，悟入識蘊。

玄二、多住

如是行者，於諸蘊中乃至多住，名已悟入。

地四、結

是名悟入諸蘊修習。

天三、悟入緣起修習<sup>2</sup>

地一、釋<sup>2</sup>

玄一、悟入<sup>4</sup>

黃一、標

若時無倒，能見能知唯有諸蘊、唯有諸行、唯事、唯法。彼於爾時，能於諸行悟入緣起。

黃二、徵

云何悟入？

黃三、釋<sup>2</sup> 字一、尋求<sup>4</sup> 宙一、入息出息

謂觀行者，如是尋求：此入出息何依何緣？既尋求已，如實悟入：此入出息依身緣身、依心緣心。

依身緣身等者：依謂依處，緣謂增上。謂入出息，要以身心為所依處，及為增上緣故。下說依緣，隨應準釋。

宙二、身心

復更尋求：此身此心何依何緣？既尋求已，如實悟入：此身此心依緣命根。

宙三、命根

復更尋求：如是命根何依何緣？既尋求已，如實悟入：如是命根依緣先行。

宙四、先行

復更尋求：如是先行何依何緣？既尋求已，如實悟入：如是先行依緣無明。

宙二、了知<sup>2</sup> 宙一、流轉



如是了知無明依緣先行，先行依緣命根，命根依緣身心，身心依緣入息、出息。

如是了知無明依緣先行等者：前說尋求，從後向前顯緣起理。此說了知，從前向後顯流轉相。謂由無明為所依緣先行得生，如是乃至身心為所依緣入息、出息得轉。

宙二、還滅

又等了知無明滅故行滅，行滅故命根滅，命根滅故身心滅，身心滅故入出息滅。

黃四、結

如是名為悟入緣起。

玄二、多住

彼於緣起悟入多住，名善習修。

地二、結

是名悟入緣起修習。

天四、悟入聖諦修習<sup>2</sup>

地一、釋<sup>2</sup>

玄一、悟入<sup>2</sup>

黃一、苦諦<sup>2</sup>

宇一、釋<sup>3</sup>

宙

一、無常<sup>2</sup>

洪一、標

如是彼於緣起悟入善修習已，復於諸行如實了知從眾緣生，悟入無常。

洪二、釋

謂悟入諸行是無常故，本無而有，有已散滅。

宙二、苦

若是本無而有，有已散滅，即是生法、老法、病法、死法。若是生法、老法、病法、死法，即是其苦。

宙三、空無我

若是其苦，即是無我，不得自在，遠離宰主。

宇二、結

如是名為由無常、苦、空、無我行，悟入苦諦。

黃二、餘諦<sup>2</sup> 宇一、別辨<sup>3</sup> 宙一、集諦

又彼如是能正悟入諸所有行眾緣生起，其性是苦，如病、如癰，一切皆以貪愛為緣。

如病如癰者：攝事分說：如病者，謂如有一，因界錯亂所生病苦，修厭背想。如癰者，謂如有一，因於先業所生癰苦，修厭背想。（陵本八十六卷四頁<sup>6497</sup>）由是譬喻，當知諸行勝義唯苦。

宙二、滅諦

又正悟入即此能生眾苦貪愛若無餘斷，即是畢竟寂靜微妙。

宙三、道諦

我若於此如是了知、如是觀見、如是多住，當於貪愛能無餘斷。

宇二、總結

如是名能悟入集諦、滅諦、道諦。

玄二、多住

於此悟入能多住已，於諸諦中證得現觀。

地二、結

是名悟入聖諦修習。

天五、十六勝行修習<sup>3</sup> 地一、標

如是於聖諦中善修習已，於見道所斷一切煩惱皆悉永斷，唯餘修道所斷煩惱。為斷彼故，復進修習十六勝行。

復進修習十六勝行者：此中勝行無漏後得智攝，見諦諸聖所修習故。

地二、釋<sup>2</sup> 玄一、顯有學行<sup>2</sup> 黃一、舉十六行<sup>2</sup> 字一、徵

云何名為十六勝行？

字二、列

謂於念入息，我今能學念於入息；於念出息，我今能學念於出息。若長、若短。

若長若短者：入息、出息，名之為長。中間入息、中間出息，名之為短。

於覺了遍身入息，我今能學覺了遍身入息；於覺了遍身出息，我今能學覺了遍身出息。

遍身入息等者：謂於身中一切毛孔入息、出息應知。

於息除身行入息，我今能學息除身行入息；於息除身行出息，我今能學息除身行出息。

息除身行入息等者：謂於入息、出息中間暫停息處應知。

於覺了喜入息，我今能學覺了喜入息；於覺了喜出息，我今能學覺了喜出息。

喜入息等者：謂於初二靜慮地中，入出息念有喜相應故。

於覺了樂入息，我今能學覺了樂入息；於覺了樂出息，我今能學覺了樂出息。

樂入息等者：謂於第三靜慮地中，入出息念樂相應故。

於覺了心行入息，我今能學覺了心行入息；於覺了心行出息，我今能學覺了心行出息。

覺了心行入息等者：此中心行，謂即受、想。若時忘念，我見慢等相應俱

轉，速疾通達故。

於息除心行入息，我今能學息除心行入息；於息除心行出息，我今能學息除心行出息。

息除心行入息等者：謂如我慢見等受、想俱行，既覺了已，方便除滅故。於覺了心入息，我今能學覺了心入息；於覺了心出息，我今能學覺了心出息。覺了心入息等者：謂有貪、離貪心等，有二十種，是名為心。於此一切如實了知故。

於喜悅心入息，我今能學喜悅心入息；於喜悅心出息，我今能學喜悅心出息。喜悅心入息等者：謂心若為昏沈睡眠所覆蓋時，隨緣一種淨妙境界，極善示現、勸導、讚勵、慶慰其心故。

於制持心入息，我今能學制持心入息；於制持心出息，我今能學制持心出息。制持心入息等者：謂心若為掉舉惡作所覆蓋時，內住寂止，不外馳散故。於解脫心入息，我今能學解脫心入息；於解脫心出息，我今能學解脫心出息。

解脫心入息等者：心離蓋纏，名解脫心，不障修定故。

於無常隨觀入息，我今能學無常隨觀入息；於無常隨觀出息，我今能學無常隨觀出息。

無常隨觀入息等者：為斷隨眠，觀察諸行無常法性故。

於斷隨觀入息，我今能學斷隨觀入息；於斷隨觀出息，我今能學斷隨觀出息。

斷隨觀入息等者：斷謂斷界，見道所斷諸行永斷得此名故。於此思惟，名斷隨觀。

於離欲隨觀入息，我今能學離欲隨觀入息；於離欲隨觀出息，我今能學離欲隨觀出息。

離欲隨觀入息等者：此中離欲，謂離欲界，修道所斷諸行永斷得此名故。於此思惟，名離欲隨觀。

於滅隨觀入息，我今能學滅隨觀入息；於滅隨觀出息，我今能學滅隨觀出息。滅隨觀入息等者：滅謂滅界，有餘依滅得此名故。於此思惟，名滅隨觀。

黃二、釋其差別<sup>2</sup> 宇一、問

問：如是十六差別云何？

宇二、答<sup>13</sup> 宙一、念入出息

答：有學見跡已得四念住等，於入出息所緣作意復更進修，為斷餘結。

有學見跡至為斷餘結者：若初獲得七種覺支，名初有學見聖諦跡，由是此說已得四念住等。等言，等取四正斷、四神足、五根、五力、七覺支應知。彼於下分結中，唯斷薩迦耶見、戒禁取、疑，所餘愛、恚及上分結皆未能斷。為斷此故，復應進修三蘊所攝八支聖道，是故此中作如是說。

是故念言：於念入息，我今能學念於入息；於念出息，我今能學念於出息。

宙二、念長短息<sup>2</sup> 洪一、釋<sup>2</sup> 荒一、作念<sup>2</sup> 日一、長息

若緣入息、出息境時，便作念言：我今能學念長入息、念長出息。

日二、短息

若緣中間入息、中間出息境時，便作念言：我今能學念短入息、念短出息。



荒二、了知

如入息、出息長轉，及中間入息、中間出息短轉，即如了知。

洪二、結

如是名為若長、若短。

宙三、念遍身息

若緣身中微細孔穴，入息、出息周遍隨入諸毛孔中，緣此為境，起勝解時，便作念言：我於覺了遍身入息出息，我今能學覺了遍身入息出息。

宙四、念息除身行息<sup>2</sup>

洪一、第一義

若於是時，或入息、中間入息已滅，出息、中間出息未生，緣入息出息空無位、入息出息遠離位為境；或出息、中間出息已滅，入息、中間入息未生，緣出息入息空無位、出息入息遠離位為境。即於此時便作念言：於息除身行入息，我今能學息除身行入息；於息除身行出息，我今能學息除身行出息。

緣入息出息空無位等者：入息出息已滅未生，名空無位。即於爾時暫非有

故，名遠離位。

洪二、第二義

又即於此若修、若習、若多修習為因緣故，先未串習入出息時，所有剛彊苦觸隨轉，今已串習入出息故，皆得息除，有餘柔軟樂觸隨轉。便作念言：於息除身行入息，我今能學息除身行入息；於息除身行出息，我今能學息除身行出息。

宙五、念覺喜息

又於如是阿那波那念勤修行者，若得初靜慮，或得第二靜慮時，便作念言：於覺了喜入息出息，我今能學覺了喜入息出息。

宙六、念覺樂息<sup>2</sup> 洪一、正作念

若得離喜第三靜慮時，便作念言：於覺了樂入息出息，我今能學覺了樂入息出息。

洪二、簡邊際

第三靜慮已上，於阿那波那念無有更修加行道理，是故乃至第三靜慮，宣說息念加行所攝。

第三靜慮已上等者：由說入第四靜慮，及生於彼諸有情類彼息不轉，是故此說無有更修加行道理。

宙七、念心行息及息除息<sup>2</sup> 洪一、對治忘念

又即如是覺了喜者、覺了樂者，或有暫時生起忘念。或謂有我我所，或發我慢，或謂我當有，或謂我當無，或謂我當有色，或謂我當無色，或謂我當有想，或謂我當無想，或謂我當非有想非無想。生起如是愚癡想思俱行種種動慢、戲論、造作、貪愛；纔生起已，便能速疾以慧通達，不深染著，方便斷滅、除遣、變吐。

生起如是愚癡等者：不了諸行，執我我所，是名愚癡。我慢俱行任運而轉，是名動慢。謂我當有、或當無等，是名戲論。於此一切不如理思，是名造作。愛味相應，是名貪愛。

洪二、作念能學

由是加行，便作念言：於覺了心行入息出息，我今能學覺了心行入息出息；於息除心行入息出息，我今能學息除心行入息出息。

宙八、念覺心息<sup>2</sup>

洪一、觀察生心<sup>2</sup>

荒一、標

又若得根本第一、第二、第三靜慮，彼定已得初靜慮近分未至依定，依此觀察所生起心。

荒二、列

謂如實知、如實覺了，或有貪心、或離貪心、或有瞋心、或離瞋心、或有癡心、或離癡心、略心、散心、下心、舉心、有掉動心、無掉動心、有寂靜心、無寂靜心、有等引心、無等引心、善修習心、不善修習心、善解脫心、不善解脫心。

洪二、作念能學

於如是心皆如實知、如實覺了，是故念言：於覺了心入息出息，我今能學覺

了心入息出息。

或有貪心等者：此中從有貪心，乃至不善解脫心，總有二十種心。下念住中一一別釋應知。（陵本二十八卷十八頁<sup>2389</sup>）

宙九、念喜悅心息

彼若有時，見為惛沈睡眠蓋覆障其心，由極於內住寂止故，爾時於外隨緣一種淨妙境界，示現、教導、讚勵、慶喜，策發其心。是故念言：於喜悅心入息出息，我今能學喜悅心入息出息。

隨緣一種淨妙境界等者：謂或念佛、或法、或僧、或戒、或捨、或復念天。義如前說。（陵本二十四卷二頁<sup>2009</sup>）如所示現、教導、讚勵、慶喜種種方便，善自憶念，策發其心。

宙十、念制持心息

彼若有時，見為掉舉惡作蓋覆障其心，由極於外住囂舉故，爾時於內安住寂靜，制持其心。是故念言：於制持心入息出息，我今能學制持心入息出息。

宙十一、念解脫心息

若時於心善修、善習、善多修習為因緣故，令現行蓋皆得遠離，於諸蓋中心得清淨。是故念言：於解脫心入息出息，我今能學解脫心入息出息。

宙十二、念無常息<sup>2</sup>

洪一、標應斷

彼於諸蓋障修道者心已解脫，餘有隨眠，復應當斷。

洪二、明作念

為斷彼故，起道現前。謂於諸行無常法性，極善精懇，如理觀察。是故念言：於無常隨觀入息出息，我今能學無常隨觀入息出息。

宙十三、念斷等息<sup>2</sup>

洪一、重修解脫<sup>3</sup>

荒一、明漸次<sup>2</sup>

日一、修瑜伽

又彼先時，或依下三靜慮，或依未至依定，已於奢摩他修瑜伽行。今依無常隨觀，復於毗鉢舍那修瑜伽行。

日二、求解脫

如是以奢摩他、毗鉢舍那熏修心已，於諸界中，從彼隨眠而求解脫。

又彼先時或依下三靜慮等者：由前已說，第三靜慮已上，於阿那波那念無有更修加行道理。是故此中，唯說或依下三靜慮，或依未至依定，修瑜伽行。又前觀察所生起心，亦說下三靜慮及未至定為所依止，義與此同。

荒二、辨諸界<sup>4</sup> 日一、徵

云何諸界？

日二、標

所謂三界。

日三、列

一者、斷界，二者、離欲界，三者、滅界。

日四、釋

見道所斷一切行斷，名為斷界；修道所斷一切行斷，名離欲界；一切依滅，名為滅界。

荒三、修止觀

思惟如三界寂靜、安隱、無患，修奢摩他、毗鉢舍那。

洪二、作念能學

彼由修習、多修習故，從餘修道所斷煩惱，心得解脫。是故念言：於斷隨觀、離欲隨觀、滅隨觀入息出息，我今能學斷隨觀、離欲隨觀、滅隨觀入息出息。

玄二、結成無學

如是彼於見、修所斷一切煩惱皆永斷故，成阿羅漢，諸漏永盡。此後更無所應作事，於所決擇已得究竟。

地三、結

是名十六勝行。

亥二、總結勸學

修習如是，名為五種修習阿那波那念。多尋思行補特伽羅，應於是中正勤修學，愛樂乘御。若於所緣有忽遽務、有散亂者，於內各別應當親近如是觀



行。

若於所緣有忽遽務等者：欲恚害等諸惡尋思，令心遽務，亦令散動，名有遽務及有散亂。

未二、顯方便

若於此中勤修習者，尋思散動皆無所有，心於所緣速疾安住，深生愛樂。

午三、結

是名第五多尋思行補特伽羅淨行所緣。

辰四、結

如是總名淨行所緣。

卯三、善巧所緣<sup>5</sup> 辰一、徵

云何名為善巧所緣？

辰二、標

謂此所緣略有五種。

辰三、列

一、蘊善巧，二、界善巧，三、處善巧，四、緣起善巧，五、處非處善巧。

辰四、釋<sup>2</sup> 巳一、別辨相<sup>5</sup> 午一、蘊善巧<sup>2</sup> 未一、徵

蘊善巧者，云何蘊？云何蘊善巧？

未二、釋<sup>2</sup> 申一、蘊<sup>4</sup> 酉一、標

謂蘊有五。

酉二、列

則色蘊、受蘊、想蘊、行蘊、識蘊。

酉三、釋<sup>2</sup> 戌一、色蘊<sup>3</sup> 亥一、徵

云何色蘊？

亥二、釋<sup>2</sup> 天一、出體性

謂諸所有色，一切皆是四大種及四大種所造。

天二、顯差別

此復若過去、若未來、若現在、若內、若外、若麤、若細、若劣、若勝、若遠、若近。

亥三、結

總名色蘊。

戌二、餘蘊<sup>2</sup>

亥一、出體性<sup>4</sup>

天一、受蘊<sup>3</sup>

地一、徵

云何受蘊？

地二、釋<sup>2</sup>

玄一、三種

謂或順樂觸為緣諸受，或順苦觸為緣諸受，或順不苦不樂觸為緣諸受。

玄二、六種

復有六受身。則眼觸所生受，耳、鼻、舌、身、意觸所生受。

地三、結

總名受蘊。

天二、想蘊<sup>3</sup>

地一、徵

云何想蘊？

地二、釋<sup>2</sup> 玄一、有相等

謂有相想、無相想、狹小想、廣大想、無量想、無諸所有無所有處想。

謂有相想等者：集論中說：何等有相想？謂除不善言說、無想界定，及有頂定想，所餘諸想。何等無相想？謂所餘想。何等小想？謂能了欲界想。何等大想？謂能了色界想。何等無量想？謂能了空無邊處、識無邊處想。何等無少所有無所有處想？謂能了無所有處想。（集論一卷四頁）此應準釋。

玄二、六想身

復有六想身。則眼觸所生想，耳、鼻、舌、身、意觸所生想。

地三、結

總名想蘊。

天三、行蘊<sup>3</sup>

地一、徵

云何行蘊？

地二、釋<sup>2</sup> 玄一、六思身

謂六思身。則眼觸所生思，耳、鼻、舌、身、意觸所生思。

玄二、所餘法

復有所餘，除受及想諸心法等。

地三、結

總名行蘊。

天四、識蘊<sup>3</sup> 地一、徵

云何識蘊？

地二、釋<sup>2</sup> 玄一、三種

謂心、意、識。

玄二、六種

復有六識身。則眼識，耳、鼻、舌、身、意識。

地三、結

總名識蘊。

亥二、例差別

前受、想、行蘊及此識蘊，皆有過去、未來、現在、內、外等差別，如前廣說。

酉四、結

是名為蘊。

申二、蘊善巧<sup>2</sup> 酉一、徵

云何蘊善巧？

酉二、釋<sup>2</sup> 戌一、略

謂善了知如所說蘊種種差別性、非一眾多性，除此法外，更無所得、無所分別，是名略說蘊善巧義。

戌二、廣<sup>3</sup> 亥一、蘊種種差別性<sup>2</sup> 天一、徵

云何名蘊種種差別性？

天二、釋

謂色蘊異、受蘊異，乃至識蘊異，是名種種差別性。

亥二、蘊非一眾多性<sup>2</sup> 天一、徵

云何名蘊非一眾多性？

天二、釋<sup>2</sup> 地一、舉色蘊<sup>3</sup> 玄一、標

謂色蘊非一眾多品類。

玄二、釋

大種所造差別故，去來今等品類差別故。

玄三、結

是名色蘊非一眾多性。

地二、例餘蘊

如是餘蘊，隨其所應皆當了知。

亥三、除此法外更無所得無所分別<sup>3</sup> 天一、徵

云何除此法外，更無所得、無所分別？

天二、釋

謂唯蘊可得、唯事可得。

唯蘊可得等者：總說諸蘊苦相廣大，是名唯蘊可得。別說諸蘊唯色等五，是名唯事可得。

非離蘊外有我可得，有常恆住無變易法是可得者，亦無少法是我所有。

天三、結

故除此外，更無所得、無所分別。

有常恆住無變易法等者：此中義顯有情世間決定無常無恆，及器世間定非久住，皆是有變易法，故作是說。以離蘊外無變易法定非有故。

午二、界善巧<sup>2</sup> 未一、徵

云何界？云何界善巧？



未二、釋<sup>2</sup> 申一、界<sup>3</sup> 酉一、標

謂界有十八。

酉二、列

則眼界、色界、眼識界，耳界、聲界、耳識界，鼻界、香界、鼻識界，舌界、味界、舌識界，身界、觸界、身識界，意界、法界、意識界。

酉三、結

是名為界。

申二、界善巧<sup>2</sup> 酉一、出體性

若復於彼十八種法，從別別界、別別種子、別別種性生起出現，如實了知、忍可、審察，名界善巧。

從別別界等者：謂從眼界乃至意識界種種差別，名別別界。為顯差別為因，是故更說別別種子、別別種性，由種子義、或種性義是界義故。如決擇分說。（陵本五十六卷十頁<sup>4519</sup>）

酉二、顯所為

如實了知十八種法，從別別界別別而轉，即於因緣而得善巧，是故說此名界善巧。

午三、處善巧<sup>2</sup> 未一、徵

云何處？云何處善巧？

未二、釋<sup>2</sup> 申一、處<sup>3</sup> 酉一、標

謂處有十二。

酉二、列

則眼處、色處、耳處、聲處、鼻處、香處、舌處、味處、身處、觸處、意識、法處。

酉三、結

是名為處。

申二、處善巧<sup>3</sup> 酉一、出體性<sup>3</sup> 戌一、生眼識等

處善巧者，謂眼為增上緣，色為所緣緣，等無間滅意為等無間緣，生起眼識及相應法。

戌二、生耳識等

耳為增上緣，聲為所緣緣，等無間滅意為等無間緣，生起耳識及相應法。

戌三、生餘識等

如是乃至意為等無間緣，此生作意為增上緣，法為所緣緣，生起意識及相應法。

此生作意為增上緣者：此說能生意識作意，名為意識增上緣。當知此依不了義說，若依了義，應說末那為增上緣。

酉二、顯所為

如是六識身及相應法，皆由三緣而得流轉。謂增上緣、所緣緣、等無間緣。

酉三、結名

若於如是諸內外處緣得善巧，名處善巧。

午四、緣起善巧<sup>2</sup> 未一、徵

云何緣起？云何緣起善巧？

未二、釋<sup>2</sup> 申一、緣起<sup>2</sup> 酉一、釋

謂無明緣行，行緣識，識緣名色，名色緣六處，六處緣觸，觸緣受，受緣愛，愛緣取，取緣有，有緣生，生緣老死，乃至招集如是純大苦蘊。

酉二、結

是名緣起。

申二、緣起善巧<sup>2</sup> 酉一、顯所為<sup>3</sup> 戌一、無常義

若復了知唯有諸法滋潤諸法，唯有諸法等潤諸法，唯有諸行引發諸行；而彼諸行因所生故、緣所生故，本無而有，有已散滅，體是無常。

唯有諸法滋潤諸法等者：緣起支中，愛、取煩惱，名能潤法。行等種子，名所潤法。潤唯少分，是名滋潤；潤已遍滿，是名等潤。

戌二、苦義

是無常故，即是生法，老法，病法，死法，愁、悴、悲、歎、憂、苦、惱法；是生法故，乃至是惱法故，則名為苦。

戌三、無我義

由是苦故，不得自在，其力羸劣，由是因緣，定無有我。

酉二、結得名

若於如是緣生法中，由如是等種種行相，善巧了達，或無常智、或苦智、或無我智，是名緣起善巧。

午五、處非處善巧<sup>2</sup> 未一、釋<sup>2</sup> 申一、例緣起

又處非處善巧，當知即是緣起善巧差別。

申二、顯差別<sup>2</sup> 酉一、標

此中差別者，謂由處非處善巧故，能正了知非不平等因果道理。則善不善法有果異熟。

酉二、釋

若諸善法能感可愛果異熟法，諸不善法能感非愛果異熟法。

未二、結

若能如是如實了知，名處非處善巧。

巳二、結略義<sup>3</sup> 午一、標

此五善巧略則為二。

午二、列

一、自相善巧，二、共相善巧。

午三、釋

由蘊善巧顯自相善巧，由餘善巧顯共相善巧。

辰五、結

如是總名善巧所緣。

卯四、淨惑所緣<sup>2</sup> 辰一、徵

云何淨惑所緣？

辰二、釋<sup>2</sup> 巳一、由世俗道<sup>2</sup> 午一、顯所緣<sup>2</sup> 未一、略標

謂觀下地麤性、上地靜性。如欲界對初靜慮，乃至無所有處對非想非非想處。

未二、廣辨<sup>2</sup> 申一、明體相<sup>2</sup> 酉一、標列麤性

云何麤性？謂麤性有二。一、體麤性，二、數麤性。

酉二、別釋相望<sup>2</sup> 戌一、欲界最初靜慮相望<sup>2</sup> 亥一、體麤性<sup>2</sup> 天一、正顯欲界

體麤性者，謂欲界望初靜慮，雖皆具五蘊，而欲界中過患深重，苦住增上，最為鄙劣，甚可厭惡，是故說彼為體麤性。

天二、簡初靜慮

初靜慮中則不如是，極靜、極妙，是故說彼為體靜性。

亥二、數麤性

數麤性者，謂欲界色蘊有多品類，應知應斷，如是乃至識蘊亦爾，是故說彼為數麤性。

戌二、諸餘上地展轉相望<sup>2</sup> 亥一、總顯

如是上地展轉相望，若體麤性、若數麤性，隨其所應，當知亦爾。如是麤性，於諸上地展轉相望，乃至極於無所有處，一切下地苦惱增多，壽量減少；一切上地苦惱減少，壽量增多。

亥二、別簡

非想非非想處唯靜、唯妙，更無上地勝過此故。

申二、舉要義<sup>2</sup> 酉一、標

以要言之，有過患義是麤性義。

酉二、釋<sup>2</sup> 戌一、麤性

若彼彼地中過患增多，即由如是過患增多性故，名為麤性。

戌二、靜性

若彼彼地中過患減少，即由如是過患減少性故，名為靜性。

午二、顯淨惑<sup>3</sup> 未一、標

此是世間由世俗道淨惑所緣。



未二、徵

何以故？

未三、釋

彼觀下地多諸過患，如病、如癰，猶如毒箭，不安隱性，以為羸性；觀於上地與彼相違，以為靜性。

如病如癰等者：苦所逼切，故喻病癰。苦所隨逐，故喻毒箭。苦惱增多，名不安隱。

斷除下地所有煩惱，始從欲界乃至上極無所有處。此是暫斷，非究竟斷，以於後時更相續故。

已二、由出世道<sup>4</sup> 午一、標

出世間道淨惑所緣復有四種。

午二、列

一、苦聖諦，二、集聖諦，三、滅聖諦，四、道聖諦。

午三、釋<sup>2</sup> 未一、辨相<sup>2</sup> 申一、別<sup>4</sup> 酉一、苦聖諦

云何苦聖諦？謂生苦、老苦、病苦、死苦、怨憎會苦、愛別離苦、求不得苦，略說一切五取蘊苦，名苦聖諦。

謂生苦老苦等者：此中八苦，各由五相。生苦五相者，謂眾苦所隨故，羸重所隨故，眾苦所依故，煩惱所依故，不隨所欲離別法故。老苦五相者，謂於五處衰退故苦。一、盛色衰退故；二、氣力衰退故；三、諸根衰退故；四、受用境界衰退故；五、壽量衰退故。病苦五相者，一、身性變壞故；二、憂苦增長多住故；三、於可意境不喜受用故；四、於不可意境非其所欲彊受用故；五、能令命根速離壞故。死苦五相者，一、離別所愛盛財寶故；二、離別所愛盛朋友故；三、離別所愛盛眷屬故；四、離別所愛盛自身故；五、於命終時備受種種極重憂苦故。怨憎會苦五相者，一、與彼會生憂苦故；二、治罰畏所依止故；三、惡名畏所依止故；四、苦逼迫命終怖畏所依止故；五、越正法惡趣怖畏所依止故。愛別離苦五相者，謂

不與彼會生愁惱故，由此因緣生怨歎故，由此因緣身擾惱故，念彼眾德思戀因緣意熱惱故，應受用等有所闕故。如愛別離苦，求不得苦當知亦爾。五取蘊苦五相者，謂生苦器故，依生苦器故，苦苦器故，壞苦器故，行苦性故。如決擇分說。（陵本六十一卷一十四頁<sup>4934</sup>）

西二、集聖諦

云何集聖諦？謂若愛、若後有愛、若喜貪俱行愛、若彼彼喜樂愛等，名集聖諦。

謂若愛若後有愛等者：決擇分說：愛云何？謂於自體親昵藏護。後有愛云何？謂求當來自體差別。喜貪俱行愛云何？謂於現前、或於已得可愛色聲香味觸法起貪著愛。彼彼希望愛云何？謂於所愛色等起希求愛。（陵本五十五卷十三頁<sup>4442</sup>）此應準釋。

西三、滅聖諦

云何滅聖諦？謂即此愛等無餘斷滅，名滅聖諦。

酉四、道聖諦

云何道聖諦？謂八支等聖道，名道聖諦。

申二、總<sup>3</sup> 酉一、明建立<sup>2</sup> 戌一、標

當知此中，依黑品白品果因建立故，建立四聖諦。

戌二、釋

謂苦諦是黑品果；集諦是黑品因；滅諦是白品果；道諦是白品因，能得、能證故。

能得能證故者：謂由道諦四種行相善多修習，能得、能證滅諦果故。

酉二、喻次第

又苦諦如病，初應遍知；集諦如病因緣，次應遠離；滅諦如無病，次應觸證；道諦如良藥，復應修習及多修習。

苦諦如病初應遍知等者：此中遍知唯說苦諦，義顯苦諦有二種相，名遍知故，所謂自相及與共相。餘諦不爾，但知自相，是故不說。又復遠離唯說

集諦，義顯集諦是黑品因，因若遠離，苦亦永斷，是故偏說。

酉三、辨得名<sup>2</sup> 戌一、諦義<sup>2</sup> 亥一、第一義

又苦諦苦義，乃至道諦道義，是如是實，非不如實；是無顛倒，非是顛倒；故名為諦。

是如是實等者：理成就性，是名為如。義無虛妄，是名為實。如應安立，名無顛倒。

亥二、第二義

又彼自相無有虛誑，及見彼故無倒覺轉，是故名諦。

又彼自相無有虛誑等者：世間愚夫於彼諸法覺無乖諍，名彼自相無有虛誑。又諸聖者已見諦故，如其法性證無乖諍，名見彼故無倒覺轉。此依世俗及與勝義建立差別，是故名諦。

戌二、聖諦<sup>2</sup> 亥一、問

問：何故諸諦唯名聖諦？

亥二、答<sup>2</sup> 天一、唯諸聖證

答：唯諸聖者於是諸諦同謂為諦，如實了知、如實觀見；一切愚夫不如實知、不如實見；是故諸諦唯名聖諦。

天二、具二諦義

又於愚夫，唯由法爾說名為諦，不由覺悟。於諸聖者俱由二種。

未二、顯義<sup>4</sup> 申一、苦差別<sup>3</sup> 酉一、釋得名<sup>3</sup> 戌一、生苦

又生苦者，謂於生時發生種種身心苦受，非生自體即是其苦。為苦因緣，故名為苦。

戌二、老苦等

廣說乃至求不得苦，謂由所求不得因緣發生種種身心苦受，非求不得體即是苦。為苦因緣，故名為苦。

戌三、略說一切五取蘊苦<sup>3</sup> 亥一、標

如是當知略說一切五取蘊苦。謂由生等異門，唯顯了苦苦；由此五取蘊苦，

亦顯了所餘壞苦、行苦。

亥二、徵

所以者何？

亥三、釋

如五取蘊具攝三受，如是能與如前所說苦苦為器；當知此中，亦即具有前所未說壞苦、行苦。

酉二、顯異說<sup>2</sup> 戌一、問

問：何故世尊苦苦一種以自聲說，壞苦、行苦以異門說？

苦苦一種以自聲說等者：謂於苦受安立苦苦，是名以自聲說。依樂受、不苦不樂受安立壞苦及與行苦，是名以異門說。

戌二、答<sup>3</sup> 亥一、由等轉

答：於苦苦中，若凡、若聖，一切等有苦覺慧轉。

亥二、由厭患

又苦苦性極可厭患。

亥三、由易入<sup>2</sup> 天一、於纔說

又從先來未習慧者，纔為說時則便易入。

天二、於諸諦

又於諸諦，令所調伏可化有情易得入故。

酉三、廣建立<sup>2</sup> 戌一、徵

云何建立三種苦性？

戌二、釋<sup>3</sup> 亥一、苦苦性<sup>2</sup> 天一、總標義

謂先所說生苦乃至求不得苦，即顯苦受及所依處為苦苦性，如是名為建立苦苦性。

即顯苦受及所依處為苦苦性者：前說生等異門，唯顯了苦苦。又說生等為苦因緣，故名為苦。由是當知，此說苦受，即彼苦苦；此所依處，即苦因緣。



天二、別釋相

諸有是彼所對治法。謂少是老所治，無病是病所治，命是死所治，親愛合會是怨憎會所治，非愛別離是愛別離所治，所求稱遂是求不得所治。

諸有是彼所對治法者：此中諸有，謂諸有情有所依身。由是便為眾苦之所隨逐，是即名為苦所治法。

亥二、壞苦性<sup>4</sup> 天一、總標義

復有苦受及所依處所起煩惱，復有無病等順樂受處等及彼所生受所起煩惱，如是總說為壞苦性。

天二、釋得名

此中樂受及所依處，由無常故，若變若異，受彼增上所生眾苦。若諸煩惱，於一切處正生起時，纏縛其心，令心變壞，即生眾苦。故名壞苦。

天三、引教證

如世尊言：入變壞心，執母邑手，乃至廣說。又如說言：住貪欲纏，領受貪

欲纏緣所生身心憂苦；如是住瞋恚、惛沈睡眠、掉舉惡作、疑纏，領受彼纏緣所生身心憂苦。由此至教第一至教，諸煩惱中苦義可得，壞義可得，故說煩惱為壞苦性。

天四、結建立

如是名為建立壞苦性。

亥三、行苦性<sup>3</sup> 天一、出體性<sup>2</sup> 地一、標遍行

若行苦性，遍行一切五取蘊中。

地二、舉要義

以要言之，除苦苦性，除煩惱攝變壞苦性，除樂受攝及所依處變壞苦性，諸餘不苦不樂受俱行，若彼所生、若生彼緣、若生住器所有諸蘊，名行苦性。

若彼所生若生彼緣等者：謂若諸蘊從煩惱生，名彼所生。蘊為所依，能生煩惱，名生彼緣。諸有情生及盡壽住，要以諸蘊為所受用，名生住器。

天二、釋苦名

由彼諸蘊其性無常，生滅相應，有一切取，三受麤重之所隨逐，不安隱攝，不脫苦苦及以壞苦，不自在轉。由行苦故，說名為苦。

天三、結建立

如是名為建立行苦性。

有一切取三受麤重之所隨逐者：欲取、見取、戒禁取、我語取，名一切取。苦、樂等受，是名三受。三界有情所依自體，皆為如是一切麤重之所隨逐，是故彼蘊名有取蘊。

申二、愛差別<sup>2</sup> 酉一、出異名

又即彼愛亦名希求，亦名欣欲，亦名喜樂。

酉二、顯差別<sup>2</sup> 戌一、標

即此希求由三門轉。

戌二、釋<sup>2</sup> 亥一、由二種

謂希求後有，及希求境界。

亥二、配三門<sup>2</sup> 天一、後有愛

若希求後有，名後有愛。

天二、餘二愛<sup>2</sup> 地一、標列

希求境界復有二種。謂於已得境界，有喜著俱行愛；若於未得境界，有希求和合俱行愛。

地二、別配

當知此中，於已得境界喜著俱行愛，名喜貪俱行愛；於未得境界希求和合俱行愛，名彼彼喜樂愛。

又即彼愛亦名希求等者：前說若愛、若後有愛、若喜貪俱行愛、若彼彼喜樂愛，名集聖諦。當知此中，愛是總名，後有愛等是其差別。今依此義，說即彼愛名希求等。又說即此希求由三門轉，如文可知。

申三、減差別<sup>2</sup> 酉一、標

減有二種。

酉二、列

一、煩惱滅，二、所依滅。

申四、道差別<sup>2</sup> 酉一、標

道有二種。

酉二、列

一、有學道，二、無學道。

午四、結

如是當知名出世道淨惑所緣。

丑三、結

如是已說四種所緣。一、遍滿所緣，二、淨行所緣，三、善巧所緣，四、淨惑所緣。

子四、教授<sup>2</sup> 丑一、徵

云何教授？

丑二、釋<sup>2</sup> 寅一、四教授<sup>3</sup> 卯一、標

謂四教授。

卯二、列

一、無倒教授，二、漸次教授，三、教教授，四、證教授。

卯三、釋<sup>4</sup> 辰一、無倒教授<sup>3</sup> 巳一、徵

云何無倒教授？

巳二、釋

謂無顛倒宣說法義，令其受持、讀誦、修學，如實出離，正盡眾苦，作苦邊際。

巳三、結

如是名為無倒教授。

令其受持讀誦修學等者：此中略顯五道差別。言受持、讀誦、修學者，謂由資糧道及加行道。言如實出離者，謂由見道。言正盡眾苦者，謂由修

道。言作苦邊際者，謂由究竟道。

辰二、漸次教授<sup>3</sup> 巳一、徵

云何漸次教授？

巳二、釋<sup>3</sup> 午一、為說法義

謂稱時機宣說法義，先令受持讀誦淺近，後方令彼學深遠處。

午二、為入現觀

又為令人初諦現觀，先教苦諦，後集滅道。

午三、為得諸定

又為令得靜慮等至，先教最初靜慮等至，後教其餘靜慮等至。

巳三、結

如是等類，應知名為漸次教授。

辰三、教教授<sup>2</sup> 巳一、徵

云何教教授？

已二、釋

謂從尊重、若似尊重，達解瑜伽軌範、親教，或諸如來，或佛弟子所聞正教，即如其教不增不減教授於他，名教教授。

謂從尊重若似尊重等者：此說尊重、若似尊重，謂即達解瑜伽或軌範師、或親教師，或復說餘尊重、若似尊重。如下說言：若有自愛補特伽羅初修業者，始修業時，為隨證得自義利故，先應四處安住正念，然後往詣善達瑜伽或軌範師、或親教師、或餘尊重、似尊重所。（陵本三十卷一頁<sup>2483</sup>）此可準知。

辰四、證教授<sup>2</sup> 已一、徵

云何證教授？

已二、釋

謂如自己獨處空閑所得、所觸、所證諸法，為欲令他得、觸、證故，方便教授，名證教授。



所得所觸所證者：得先未得預流果故，是名所得。即此為依，復能契會上學果故，是名所觸。證得究竟阿羅漢果，於諸惑斷能作證故，是名所證。

寅二、諸相圓滿教授<sup>4</sup> 卯一、標

復有諸相圓滿教授。

卯二、徵

其事云何？

卯三、釋<sup>2</sup> 辰一、標列三種

謂由三種神變教授。三神變者，一、神境神變，二、記說神變，三、教誡神變。

辰二、別顯堪能<sup>3</sup> 巳一、神境神變

由神境神變，能現種種神通境界，令他於己生極尊重；由彼於己生尊重故，於屬耳聽瑜伽作意，極生恭敬。

巳二、記說神變

由記說神變，能尋求他心行差別。

已三、教誡神變

由教誡神變，如根、如行、如所悟入為說正法，於所修行能正教誡。

卯四、結

故三神變能攝諸相圓滿教授。

謂由三種神變教授等者：此中神境神變，當知攝屬神境智通。記說神變，當知攝屬心差別智通。教誡神變，當知攝屬漏盡智通。義如菩薩地說。

（陵本三十七卷十九頁<sup>3073</sup>）

瑜伽師地論科句披尋記卷第二十七

瑜伽師地論科句披尋記卷第二十八

彌勒菩薩說

唐三藏沙門玄奘奉詔譯

韓清淨科記

本地分中聲聞地第二瑜伽處之三

子五、學<sup>4</sup> 丑一、徵

云何為學？

丑二、標

謂三勝學。

丑三、列

一、增上戒學，二、增上心學，三、增上慧學。

謂三勝學者：三學方便唯聖教有，不共外道，是故名勝，亦名增上。

丑四、釋<sup>2</sup> 寅一、略別辨<sup>3</sup> 卯一、增上戒學<sup>3</sup> 辰一、徵

云何增上戒學？

辰二、釋

謂安住具戒等，如前廣說。

辰三、結

是名增上戒學。

卯二、增上心學<sup>2</sup> 辰一、徵

云何增上心學？

辰二、釋<sup>2</sup> 巳一、舉一切<sup>2</sup> 午一、四靜慮

謂離欲惡不善法，有尋、有伺，離生喜樂，入初靜慮具足安住，乃至能入第四靜慮具足安住，是名增上心學。

午二、無色等

又諸無色，及餘所有等持、等至，亦皆名為增上心學。

又諸無色等者：此說無色等至，及餘所有等持、等至，皆如三摩呬多地說

應知。(陵本十一卷一頁834)

巳二、顯偏勝

然依靜慮，能最初入聖諦現觀，正性離生，非全遠離一切靜慮能成此事，是故靜慮最為殊勝，故偏說為增上心學。

卯三、增上慧學<sup>3</sup> 辰一、徵

云何增上慧學？

辰二、釋

謂於四聖諦等所有如實智見。

辰三、結

是名增上慧學。

寅二、廣分別<sup>2</sup> 卯一、三學差別<sup>6</sup> 辰一、數<sup>3</sup> 巳一、問

問：何緣唯有三學，非少非多？

巳二、答<sup>2</sup> 午一、標義

答：建立定義故，智所依義故，辦所作義故。

午二、隨釋<sup>3</sup> 未一、建立定義<sup>3</sup> 申一、標

建立定義者，謂增上戒學。

申二、徵

所以者何？

申三、釋

由戒建立心一境性，能令其心觸三摩地。

未二、智所依義<sup>3</sup> 申一、標

智所依義者，謂增上心學。

申二、徵

所以者何？

申三、釋

由正定心念一境性，於所知事有如實智、如實見轉。

未三、辦所作義<sup>3</sup> 申一、標

辦所作義者，謂增上慧學。

申二、徵

所以者何？

申三、釋

由善清淨若智、若見，能證究竟諸煩惱斷。以煩惱斷是自義利，是勝所作，過此更無勝所作故。

已三、結

由是因緣，唯有三學。

辰二、次第<sup>3</sup> 已一、問

問：何緣三學如是次第？

已二、答<sup>2</sup> 午一、別辨

答：先於尸羅善清淨故，便無憂悔；無憂悔故，歡喜安樂；由有樂故，心得

正定；心得定故，能如實知、能如實見；如實知見，故能起厭；厭故離染；由離染故，便得解脫；

歡喜安樂者：三摩呬多地說：歡者，謂從本來清淨行者，觀資糧地所修淨行，無悔為先，慰意適悅，心欣踊性。喜者，謂正修習方便為先，深慶適悅，心欣踊性。安者，謂離麤重，身心調適性。樂者，謂由如是心調適故，便得身心無損害樂及解脫樂；以離彼品麤重性故，於諸煩惱而得解脫。（陵本十一卷三頁<sup>841</sup>）此應準釋。

得解脫故，證無所作究竟涅槃。

午二、略顯

如是最初修習淨戒，漸次進趣，後證無作究竟涅槃。

巳三、結

是故三學如是次第。

證無所作究竟涅槃者：所作已辦，過此更無勝所作故，名無所作，是即無



學，由是說名究竟涅槃。思所成地說：若婆羅門作所作已，數復應作，更有勝上所應作事，當知此非真婆羅門。若婆羅門證婆羅門所應作事，超登一切薩迦耶岸，安住陸地，當知此是真婆羅門。（陵本十八卷十頁<sup>1563</sup>）其義應知。

辰三、名增上<sup>2</sup> 巳一、問

問：何緣三學名為增上戒、心、慧耶？

巳二、答<sup>2</sup> 午一、標義

答：所趣義故，最勝義故，名為增上。

午二、隨釋<sup>2</sup> 未一、所趣義<sup>3</sup> 申一、徵

云何所趣義？

申二、釋

謂為趣增上心而修淨戒，名增上戒學。為趣增上慧而修定心，名增上心學。為趣煩惱斷而修智見，名增上慧學。

申三、結

如是名為所趣義故，名為增上。

未二、最勝義<sup>3</sup> 申一、徵

云何最勝義？

申二、釋

謂若增上戒學、若增上心學、若增上慧學，唯於聖教獨有此三，不共外道。

申三、結

如是名為最勝義故，名為增上。

辰四、引發差別<sup>2</sup> 巳一、標

又或有增上心學能引發增上慧學，或有增上慧學能引發增上心學。

巳二、釋<sup>2</sup> 午一、慧引發心

謂聖弟子未得根本靜慮，先學見跡，後為進斷修道所斷一切煩惱，正勤加行，修念覺支，乃至修捨覺支，是名增上慧學引發增上心學。

謂聖弟子至修捨覺支者：此顯諸聖弟子，或有依未至定，已證現觀，是故說言未得根本靜慮，先學見跡。從是以後，修念覺支，乃至修捨覺支，是即七種覺支。七覺支中，念為最初，捨為後邊，略無中間，說乃至言。

午二、心引發慧

增上心學引發增上慧學者，如前已說。

如前已說者：謂如前說：心得定故，能如實知、能如實見。是即增上心學引發增上慧學應知。

辰五、具不具學<sup>2</sup> 巳一、舉差別

又或有增上戒學，無增上心、無增上慧；或有增上戒學，亦有增上心，唯無增上慧；非有增上慧學，而無增上戒及無增上心。是故若有增上慧學，當知必定具足三學。

巳二、勤修學

於此建立三種學中，諸瑜伽師當勤修學。

辰六、依入現觀<sup>4</sup> 巳一、標

復有三種補特伽羅，依此三學入諦現觀。

巳二、徵

何等為三？

巳三、列

一、未離欲，二、倍離欲，三、已離欲。

巳四、釋<sup>3</sup> 午一、證預流

當知此中，於一切欲全未離者，勤修加行，入諦現觀；既於諸諦得現觀已，證預流果。

午二、證一來

倍離欲者，當於爾時證一來果。

午三、證不還

已離欲者，當於爾時證不還果。

卯二、最勝差別<sup>2</sup> 辰一、三根<sup>2</sup> 巳一、標列名

復有三根。一、未知欲知根，二、已知根，三、具知根。

巳二、明建立<sup>2</sup> 午一、徵

云何建立如是三根？

午二、釋<sup>3</sup> 未一、未知欲知根

謂於諸諦未現觀者，加行勤修諸諦現觀，依此建立未知欲知根。

未二、已知根

若於諸諦已得現觀，而居有學，依此建立已知根。

未三、具知根

若阿羅漢所作已辦，住無學位，依此建立具知根。

辰二、三解脫門<sup>2</sup> 巳一、標列名

復有三解脫門。一、空解脫門，二、無願解脫門，三、無相解脫門。

巳二、明建立<sup>3</sup> 午一、徵

云何建立三解脫門？

午二、釋<sup>2</sup> 未一、舉所知境<sup>3</sup> 申一、標

謂所知境略有二種。

申二、列

有及非有。

申三、釋<sup>2</sup> 酉一、有<sup>3</sup> 戌一、標

有有二種。

戌二、列

一者、有為，二者、無為。

戌三、釋

於有為中，且說三界所繫五蘊；於無為中，且說涅槃。如是二種有為、無為，合說名有。

酉二、非有

若說於我，或說有情、命者、生者等，是名非有。

未二、辨相差別<sup>3</sup> 申一、無願

於有為中見過失故、見過患故，無所祈願；無祈願故，依此建立無願解脫門。

申二、無相

於有為中無祈願故，便於涅槃深生祈願，見極寂靜、見甚微妙、見永出離；由於中見永出離故，依此建立無相解脫門。

申三、空

於其非有無所有中，非有祈願、非無祈願；如其非有，還則如是知為非有、見為非有，依此建立空解脫門。

午三、結

是名建立三解脫門。

子六、隨順學法<sup>2</sup> 丑一、徵

云何隨順學法？

丑二、釋<sup>2</sup> 寅一、第一義<sup>2</sup> 卯一、標

謂有十種違逆學法，對治彼故，應知十種隨順學法。

卯二、辨<sup>2</sup> 辰一、初舉違逆<sup>3</sup> 巳一、徵

云何十種違逆學法。

巳二、列<sup>10</sup> 午一、第一法

一者、所有母邑少年、盛壯、可愛形色，是正修學善男子等上品障礙。

午二、第二法

二者、於薩迦耶所攝諸行生起愛著。

午三、第三法

三者、懶惰懈怠。

午四、第四法

四者、薩迦耶見。

午五、第五法



五者、依於段食貪著美味。

午六、第六法

六者、於諸世間種種戲論非一眾多別別品類所思念中，發欲貪愛。

午七、第七法<sup>4</sup> 未一、標

七者、思惟諸法瑜伽作意所有過患。

未二、徵

此復云何？

未三、釋<sup>2</sup> 申一、標

謂十一種。

謂十一種者：如前三摩呬多地中說，有十一一定障差別。又修所成地中說，十一法為所對治。其義大同，隨應準釋。

申二、列

一、於諸諦寶蘊業果中猶豫疑惑。

於諸諦寶蘊業果中猶豫疑惑者：諦謂四諦，寶謂三寶，蘊謂三世諸行，業謂妙行、惡行因性，果謂彼業異熟果性。於是一切心懷二分，迷之不了，猶豫猜度，是名猶豫疑惑。

二、樂修斷者，身諸麤重。

樂修斷者身諸麤重者：此說住於晝分，習近邪惡飲食，身不調柔故。

三、有慢緩者，於修止觀過患作意，惛沈睡眠映蔽其心，令心極略。

有慢緩者至令心極略者：此說住於夜分，懶惰懈怠，多習睡眠，虛度時分故。

四、太猛精進者，身疲心惱。

太猛精進等者：一向修舉，故有此失。

五、太劣精進者，不得勝進，善品衰退。

太劣精進等者：一向修止，故有此失。

六、於少利養名譽稱讚隨一樂中，深生欣喜。七、掉舉不靜踊躍躁擾。八、

於薩迦耶永滅涅槃而生驚恐。九、於諸言說非量加行，言論太過；雖說法論，而好折伏，起諍方便。

於諸言說非量加行等者：此說於法精勤論議決擇，於立破門多生言論，相續不捨故。

十、於先所見、所聞、所受非一眾多別別品類諸境界中，心馳、心散。

於先所見所聞所受等者：此說於色聲香味觸中，不如正理執取相好，不正尋思，令心散亂故。

十一、不應思處而彊沈思。

未四、結

應知是名思惟諸法瑜伽作意所有過患。

不應思處而彊沈思者：不應思處，略有六種。謂思議我，乃至思議諸佛諸佛境界。如前已說。（陵本二十五卷八頁<sup>2101</sup>）於是處所彊攝其心，思擇諸法，是名不應思處而彊沈思。

午八、第八法

八者、於諸靜慮、等至樂中深生愛味。

午九、第九法

九者、樂欲證入無相定者，於諸行中隨順流散。

午十、第十法

十者、觸身苦受乃至奪命苦受時，貪愛壽命，希望存活；隨此希望，傷歎迷悶。

貪愛壽命希望存活者：謂於命根不取中天相故，致有此失。

巳三、結

是名十種違逆學法。

辰二、正顯隨順<sup>2</sup> 巳一、徵

云何對治如是十種違逆學法隨順學法？

巳二、釋<sup>2</sup> 午一、明能治法<sup>3</sup> 未一、標

謂有十種。

未二、列

一、不淨想，二、無常想，三、無常苦想，四、苦無我想，五、厭逆食想，六、一切世間不可樂想，七、光明想，八、離欲想，九、滅想，十、死想。

未三、結

如是十想善修、善習、善多修習，能斷十種障礙學法、違逆學法。

謂有十種等者：此中十想，如其次第，對治前說十種違逆學法應知。

午二、隨釋光明<sup>2</sup> 未一、明建立

當知此中，有四光明。一、法光明，二、義光明，三、奢摩他光明，四、毗鉢舍那光明。依此四種光明增上立光明想。

未二、簡今義

今此義中，意取能斷思惟諸法瑜伽作意障礙法者。

意取能斷思惟諸法等者：謂第一義思所成慧、修所成慧俱光明想，隨順能

生思惟諸法瑜伽作意。若有前說十一過患障礙法時，此光明想能正對治。即於前說四光明中，隨其所應，取其少分，不遍一切。今依此義，故作是說。

寅二、第二義<sup>5</sup> 卯一、標

當知此中，復有十種隨順學法。

卯二、徵

何等為十？

卯三、列

一者、宿因，二者、隨順教，三者、如理加行，四者、無間、殷重所作，五者、猛利樂欲，六者、持瑜伽力，七者、止息身心麤重，八者、數數觀察，九者、無有怯弱，十者、離增上慢。

卯四、釋<sup>10</sup> 辰一、宿因

云何宿因？謂先所習諸根成熟、諸根積集。

辰二、隨順教

云何隨順教？謂所說教無倒、漸次。

謂所說教無倒漸次者：前說無倒教授、漸次教授，義應準知。

辰三、如理加行

云何如理加行？謂如其教無倒修行，如是修行能生正見。

辰四、無間殷重所作

云何無間、殷重所作？謂由如是正加行故，於諸善品不虛捨命，速能積習所有善品。

辰五、猛利樂欲

云何猛利樂欲？謂如有一，於上解脫發生希慕。謂我何時當於是處能具足住，如諸聖者於是處所具足而住？

辰六、持瑜伽力<sup>2</sup> 巳一、徵

云何持瑜伽力？

巳二、釋<sup>2</sup> 午一、標

謂二因緣能令獲得持瑜伽力。

午二、列

一者、本性是利根故；二者、長時串修習故。

辰七、止息身心麤重<sup>2</sup> 巳一、徵

云何止息身心麤重？

巳二、釋<sup>4</sup> 午一、息勞乏

謂如有一，或由身勞身乏，發身麤重、發心麤重；此因易脫威儀而便止息。

午二、息尋伺

或由太尋太伺，發身麤重、發心麤重；此因內心寂止方便而便止息。

午三、息惛睡

或由心略心劣，惛沈睡眠之所纏繞，發身麤重、發心麤重；此因增上慧法毗鉢舍那順淨作意而便止息。



午四、息煩惱

或由本性煩惱未斷，有煩惱品身心羸重未能捨離；此因相續勤修正道而便止息。

辰八、數數觀察<sup>2</sup> 巳一、徵

云何數數觀察？

巳二、釋<sup>2</sup> 午一、依尸羅<sup>2</sup> 未一、標

謂依尸羅，數數觀察惡作不作，數數觀察善作而作。

數數觀察惡作不作等者：嫌惡所作，是名惡作。若犯所犯，惡作定生，由是說有惡作罪聚。攝事分說：由五種相，除彼所生五種惡作，乃至廣說。（陵本九十九卷九頁<sup>7428</sup>）是名惡作不作。與此相違，若有所作非惡作攝，是名善作。於此善作應勤加行，是名善作而作。

未二、辨

於其惡作不作不轉，於其善作不作不退。

於其惡作不作不轉等者：未生惡作令其不生，是名惡作不作不轉。於未得善雖或未生，然於已得住不退失，是名善作不作不退。

於其惡作作而棄捨，於其善作作而不捨。

於其惡作作而棄捨等者：惡作作已，速疾悔除，是名惡作作而棄捨。善作作已，數數修習無忘失念，是名善作作而不捨。

午二、依作意<sup>2</sup> 未一、標

又於煩惱斷與未斷觀察作意增上力故，數數觀察。

未二、辨

若知已斷，便生歡喜；若知未斷，則便數數勤修正道。

辰九、無有怯弱

云何無有怯弱？謂於後時應知、應見、應證得中，未知、未見、未證得故，發生怯弱，其心勞倦、其心匱損，彼既生已而不堅執，速能斷滅。

辰十、離增上慢

云何離增上慢？謂於所得、所觸、所證，無增上慢，離顛倒執。於真所得起於得想，於真所觸起於觸想，於真所證起於證想。

卯五、結

如是十法，於樂修學諸瑜伽師所應修學，初中後時恆常隨順，無有違逆，是故名為隨順學法。

子七、瑜伽壞<sup>2</sup> 丑一、徵

云何瑜伽壞？

丑二、釋<sup>2</sup> 寅一、略辨四種<sup>4</sup> 卯一、標

謂壞瑜伽略有四種。

卯二、徵

何等為四？

卯三、列

一者、畢竟瑜伽壞，二者、暫時瑜伽壞，三者、退失所得瑜伽壞，四者、邪

行所作瑜伽壞。

卯四、釋<sup>4</sup> 辰一、畢竟瑜伽壞<sup>3</sup> 巳一、標

畢竟瑜伽壞者，謂無種性補特伽羅。

巳二、徵

何以故？

巳三、釋

由彼身中無能趣向涅槃法故，畢竟失壞出世瑜伽。

辰二、暫時瑜伽壞<sup>4</sup> 巳一、標

暫時瑜伽壞者，謂有種性補特伽羅。

巳二、徵

何以故？

巳三、釋

由彼身中有能趣向涅槃法故，雖闕外緣，時經久遠，定當緣會；修習瑜伽，

令其現起；善修習已，當般涅槃。

巳四、結

是故說彼所有瑜伽暫時失壞。

辰三、退失所得瑜伽壞

退失所得瑜伽壞者，謂如有一，退失所得、所觸、所證，若智、若見、若安樂住。

辰四、邪行所作瑜伽壞<sup>2</sup> 巳一、釋<sup>2</sup> 午一、不如理行

邪行所作瑜伽壞者，謂如有一，不如正理精勤修行，雖多用功，無所成辦，不能成辦一切瑜伽，亦非善法。

亦非善法者：謂雖精勤修行，然由非理作意所引，或起顛倒、或起邪見，是故名非善法。

午二、虧損淨命<sup>2</sup> 未一、別辨相<sup>2</sup> 申一、起惡欲樂<sup>2</sup> 酉一、招集利敬<sup>2</sup> 戌一、舉

因緣<sup>2</sup> 亥一、為說法

又如有一，多諸煩惱，性多塵穢，而識聰銳，覺慧猛利，成俱生覺，善攝所聞；於聞究竟，或少或多。或住空閑，有在家者及出家者，為性質直，來至其所，因為說法，令心歡喜。

亥二、行矯詐

又行矯詐，妄現種種身語相應調善所作。

戌二、顯所為

由是因緣，招集利養恭敬稱頌、大福德想，及得種種衣、食、臥具、病緣醫藥資身什物，為諸國王、大臣、居士乃至商主恭敬尊重，咸共謂之是阿羅漢。

又行矯詐等者：謂如前說：方便顯已有勝功德，矯詐構集非常威儀。為誑他故，恆常詐現諸根無掉、諸根無動、諸根寂靜，由是令他謂其有德，當有所施、當有所作，乃至廣說。（陵本二十二卷十頁<sup>1919</sup>）此應準知。

酉二、恐失利敬<sup>2</sup>

戌一、戀著愛眾

或於隨彼迴轉弟子，若諸出家、若在家眾，戀著親愛，隨順而轉。

戊二、妄立瑜伽<sup>2</sup> 亥一、明彼念

為多招引，復生是念：此諸出家在家弟子，信順於我，咸共謂我是阿羅漢。彼若依於瑜伽作意止觀等處來請問我，我得彼問或不能對，彼因是事，當於我所捨信向心，不復謂我是阿羅漢，由斯退失利養恭敬。我於今者，應自思惟、籌量、觀察，安立瑜伽。

亥二、顯妄立

彼由是事增上力故，耽著利養恭敬名譽，獨處空閑，自諦思惟、籌量、觀察，安立瑜伽。

應自思惟籌量觀察者：此中思惟，謂由隨相行。籌量，謂由隨尋思行。觀察，謂由隨伺察行。

然此瑜伽，不順契經、不現戒律、違逆法性。

不順契經等者：謂於攝聖教義不相符順，是名不順契經。於諸制立學處，

或增或減，是名不現戒律。違正教量，是名違逆法性。謂違聖言，或違法相等。如聞所成地說應知。（陵本十五卷十三頁<sup>1323</sup>）

申二、起覆藏想<sup>2</sup> 酉一、略標

若諸苾芻善持三藏，彼於其所覆自瑜伽，不欲開示。若諸在家、出家弟子，於此瑜伽私竊教示，不令彰顯。

酉二、釋因<sup>2</sup> 戌一、恐有詰發

所以者何？恐有善持三藏教者，聞彼如是瑜伽處已，以經檢驗，不順契經；以律顯照，不現戒律；以法觀察，違逆法性。由是因緣，便不信受，以不信言詰難於我，諍競舉發。

戌二、恐失利敬

由是國王、大臣、居士乃至饒財長者、商主，不復恭敬尊重於我，更不獲得衣、食、臥具、病緣醫藥資身什物。

未二、略顯義



彼由貪著利養恭敬增上力故，於非法中起於法想、起覆藏想、起惡欲樂，顯發開示非法為法。

起覆藏想等者：謂如前說，覆自瑜伽，不欲開示，私竊教示，不令彰顯，是即起覆藏想。耽著利養恭敬名譽，是即起惡欲樂。自諦思惟、籌量、觀察，安立瑜伽，是即顯發開示非法為法。

諸有忍許彼所見者，亦於非法起是法想，愚昧頑鈍。於非法中起法想故，雖如其教精進修行，當知一切皆是邪行。

已二、結

如是名為邪行所作瑜伽失壞，像似正法，非真正法，能障正法。

寅二、結勸知捨

諸有苾芻勤修靜慮，是瑜伽師，於此四種瑜伽壞法，應正遍知，當遠捨離。

子八、瑜伽<sup>2</sup> 丑一、徵

云何瑜伽？

丑二、釋<sup>2</sup> 寅一、辨四種類<sup>4</sup> 卯一、標

謂四瑜伽。

卯二、徵

何等為四？

卯三、列

一、信，二、欲，三、精進，四、方便。

卯四、釋<sup>4</sup> 辰一、信<sup>2</sup> 巳一、標

當知其信有二行相及二依處。

巳二、釋<sup>2</sup> 午一、行相

二行相者，一、信順行相，二、清淨行相。

午二、依處

二依處者，一、觀察諸法道理依處，二、信解補特伽羅神力依處。

有二行相及二依處等者：攝異門分說：於一切事現正隨從，故名信順。隨

順理門，故名淨信。即由如是增上力故，身毛為豎、悲泣墮淚，如是等事是淨信相。（陵本八十三卷二頁<sup>6278</sup>）由是當知，信順行相，即以信解補特伽羅神力依處為所依處。清淨行相，即以觀察諸法道理為所依處。

辰二、欲<sup>4</sup> 巳一、標

欲有四種。

巳二、徵

何等為四？

巳三、列

一、為證得欲，二、為請問欲，三、為修集資糧欲，四、為隨順瑜伽欲。

巳四、釋<sup>4</sup> 午一、為證得欲

為證得欲者，謂如有一，於上解脫發生希慕，如前廣說。

於上解脫發生希慕等者：謂修瑜伽因緣，唯依涅槃而為上首。如修所成地說。（陵本二十卷三頁<sup>1711</sup>）依此義故，名上解脫。前說猛利樂欲，謂我何

時當於是處能具足住，如諸聖者於是處所具足而住？是即如前廣說應知。

午二、為請問欲

為請問欲者，謂如有一，生希慕已，往僧伽藍，詣諸有識同修梵行成就瑜伽妙智者所，為聽未聞，為聞究竟。

午三、為修集資糧欲

為修集資糧欲者，謂如有一，為戒律儀清淨、為根律儀清淨故，於食知量、減省睡眠、正知住中，展轉增勝，發生希慕。

為修集資糧欲等者：此中資糧定地所攝，如下說有護養定資糧處。（陵本三十卷五頁<sup>2499</sup>）與此義同。

午四、為隨順瑜伽欲

為隨順瑜伽欲者，謂於無間加行、殷重加行修習道中，發生希慕、發生欣樂，欲有所作。

辰三、精進<sup>4</sup> 巳一、標

精進有四。

已二、徵

何等為四？

已三、列

一、為聞精進，二、為思精進，三、為修精進，四、為障淨精進。

已四、釋<sup>4</sup> 午一、為聞精進

為聞精進者，謂為聽未聞，聞已究竟，勤心勇猛審決加行。

午二、為思精進

為思精進者，謂如所聞法，獨處空閑，思惟其義，籌量、觀察。

午三、為修精進

為修精進者，謂入寂靜，於時時間勤修止觀。

午四、為障淨精進

為障淨精進者，謂於晝夜策勵精勤經行、宴坐，從諸障法淨修其心，勤心勇

猛，審決精進。

辰四、方便<sup>2</sup> 巳一、標

方便有四。

巳二、列

謂尸羅律儀增上力故，善守其念；善守念故，能無放逸，防護其心，修諸善法；無放逸故，心正於內修奢摩他、增上慧法毗鉢舍那。

方便有四等者：謂尸羅律儀為初，次念，次無放逸，奢摩他、毗鉢舍那為後，名四方便應知。

寅二、結名瑜伽

此四瑜伽有十六種。當知此中，初由信故，於應得義深生信解；信應得已，於諸善法生起樂欲；由樂欲故，晝夜策勵，安住精勤、堅固、勇猛；發精進已，攝受方便，能得未得、能觸未觸、能證未證；故此四法說名瑜伽。

由樂欲故等者：謂於未生一切善法欲令其生，及於已生一切善法欲令堅

住、欲令不忘、欲令修滿，是名樂欲差別。為於已得令現前故，由是說言晝夜策勵。為於未得令其得故，由是說言安住精勤、堅固、勇猛。

子九、作意<sup>2</sup> 丑一、徵

云何作意？

丑二、釋<sup>2</sup> 寅一、別辨相<sup>2</sup> 卯一、初四種<sup>4</sup> 辰一、標

謂四作意。

辰二、徵

何等為四？

辰三、列

一、力勵運轉作意，二、有間運轉作意，三、無間運轉作意，四、無功用運轉作意。

謂四作意等者：此四作意，三摩呬多地中已略顯示，與此義同。

辰四、釋<sup>4</sup> 巳一、力勵運轉

云何力勵運轉作意？謂初修業者，令心於內安住等住，或於諸法無倒揀擇，乃至未得所修作意，爾時作意力勵運轉。由倍勵力挫折其心，令住一境，故名力勵運轉作意。

謂初修業者至未得所修作意者：此說初修作意瑜伽師，乃至未得所修作意，未能觸證心一境性，故名初修業者，如下自說。此中未得所修作意，謂猶未得初靜慮近分定，於爾時，不名墮在有作意數。有作意相，如下自釋。（陵本三十二卷二十頁<sup>2666</sup>）言令心於內安住等住者，謂修奢摩他行。言於諸法無倒揀擇者，謂修毗鉢舍那行。

已二、有間運轉

云何有間運轉作意？謂得所修作意已後，世出世道漸次昇進了相作意，由三摩地思所間雜，未能一向純修行轉，故名有間運轉作意。

已三、無間運轉

云何無間運轉作意？謂從了相作意已後，乃至加行究竟作意，是名無間運轉



作意。

巳四、無功用運轉

云何無功用運轉作意？謂加行究竟果作意，是名無功用運轉作意。

卯二、次四種<sup>3</sup> 辰一、標

復有所餘四種作意。

辰二、列

一、隨順作意，二、對治作意，三、順清淨作意，四、順觀察作意。

復有所餘四種作意等者：三摩呬多地中亦有此四作意，應參彼釋。

辰三、釋<sup>4</sup> 巳一、隨順

云何隨順作意？謂於所緣深生厭壞，起正加行，而未斷惑。

巳二、對治

云何對治作意？謂能斷惑。

巳三、順清淨

云何順清淨作意？謂心下蹙，取淨妙相策令歡悅。

巳四、順觀察

云何順觀察作意？謂觀察作意。由此作意增上力故，順觀煩惱斷與未斷。

寅二、廣分別<sup>2</sup> 卯一、所緣境相<sup>2</sup> 辰一、問

問：於所緣境正作意時，思惟幾相？

辰二、答<sup>4</sup> 巳一、標

答：四。

巳二、徵

何等為四？

巳三、列

一、所緣相，二、因緣相，三、應遠離相，四、應修習相。

巳四、釋<sup>3</sup> 午一、所緣相

所緣相者，謂所知事同分影像明了顯現。

午二、因緣相<sup>2</sup> 未一、資糧等攝<sup>2</sup> 申一、別列

因緣相者，謂三摩地資糧積集，隨順教導，與修俱行猛利樂欲，於可厭法深生厭患，能審遍知亂與不亂，他不惱觸。

申二、隨釋

或人所作，或非人作，或音聲作，或功用作。

謂三摩地資糧積集等者：成就戒律儀等，乃至成就所有沙門莊嚴，名三摩地資糧積集。隨順通達修瑜伽師殷勤教誨，是名隨順教導。樂斷樂修，於上解脫發生希慕，謂我何時當於是處能具足住，如諸聖者於是處所具足而住？是名與修俱行猛利樂欲。於諸世間衰損興盛，唯見其苦，不欲現前，是名於可厭法深生厭患。色等十相，八種尋思，貪等五蓋，令心散動、令心躁擾、令心染汙，是名為亂。依六種想作意思惟，能令心住一所緣境，是名不亂。云何六想？謂無相想、無分別想、寂靜想、無作用想、無所思慕無躁擾想、離諸煩惱寂滅樂想。於此亂不亂相，能於其中審諦周遍了

知，分明現前，是名能審遍知亂與不亂。若所居處，於晝日分無諸誼逸，於夜分中無蚊蟲等眾苦所觸，亦無種種人及非人怖畏驚恐，如是說名他不惱觸。

未二、止觀攝

若毗鉢舍那而為上首，內略其心，極猛盛觀後因緣相。

若毗鉢舍那而為上首等者：此說毗鉢舍那與奢摩他為其因緣。如下說言：依奢摩他所熏習心，為令後時奢摩他定皆清淨故，修習瑜伽毗鉢舍那所有加行，是名因緣相。（陵本三十一卷八頁<sup>2573</sup>）此應準知。

若奢摩他而為上首，發起勝觀，極猛盛止後因緣相。

若奢摩他而為上首等者：此說奢摩他與毗鉢舍那為其因緣。如下說言：依毗鉢舍那所熏習心，為令後時毗鉢舍那皆清淨故，修習內心奢摩他定所有加行。（陵本三十一卷八頁<sup>2575</sup>）此應準知。

午三、應遠離相<sup>4</sup> 未一、標

應遠離相復有四種。

未二、列

一者、沈相，二者、掉相，三者、著相，四者、亂相。

未三、釋<sup>4</sup> 申一、沈相

沈相者，謂由所緣相、因緣相故，令心下劣。

申二、掉相

掉相者，謂由所緣相、因緣相故，令心高舉。

申三、著相

著相者，謂由所緣相、因緣相故，令心於境起染、起著，作諸惱亂。

申四、亂相

亂相者，謂由所緣相、因緣相故，令心於外馳散擾動。

未四、指

如是諸相，如前等引地中已說。

如是諸相如前等引地中已說者：三摩呬多地中廣說四種應遠離相應知。

（陵本十一卷十九頁<sup>936</sup>）

卯二、所緣勝解<sup>2</sup> 辰一、問

問：如是作意於所緣境起勝解時，有幾勝解？

辰二、答<sup>4</sup> 巳一、標

答：九。

巳二、徵

何等為九？

巳三、列

一、有光淨勝解，二、無光淨勝解，三、遲鈍勝解，四、捷利勝解，五、狹小勝解，六、廣大勝解，七、無量勝解，八、清淨勝解，九、不清淨勝解。

巳四、釋<sup>9</sup> 午一、有光淨勝解

有光淨勝解者，謂於光明相澄心善取，與光明俱所有勝解。

午二、無光淨勝解

無光淨勝解者，謂於光明相不能善取，與闇昧俱所有勝解。

午三、遲鈍勝解

遲鈍勝解者，謂鈍根身中所有勝解。

午四、捷利勝解

捷利勝解者，謂利根身中所有勝解。

午五、狹小勝解

狹小勝解者，謂狹小信欲俱行勝解，及狹小所緣意解勝解。如是作意狹小故，及所緣狹小故，名狹小勝解。

狹小勝解等者：三摩呬多地中說有小三摩地。或由所緣故小，觀少色故；或由作意故小，小信、小欲、小勝解故。（陵本十二卷十頁<sup>1008</sup>）此應準知。

午六、廣大勝解

廣大勝解者，謂廣大信欲俱行勝解，及廣大所緣意解勝解。如是作意廣大故，及所緣廣大故，名廣大勝解。

廣大勝解等者：此如三摩呬多地中大三摩地釋相應知。（陵本十二卷十一頁<sup>1008</sup>）

午七、無量勝解

無量勝解者，謂無邊無際信欲俱行勝解，及無邊無際所緣意解勝解。如是作意無量故，及所緣無量故，名無量勝解。

無量勝解等者：此如三摩呬多地中無量三摩地釋相應知。（陵本十二卷十一頁<sup>1009</sup>）

午八、清淨勝解

清淨勝解者，謂已善修、已成滿、已究竟俱行勝解。

午九、不清淨勝解

不清淨勝解者，謂未善修、未成滿、未究竟俱行勝解。



子十、瑜伽師所作<sup>3</sup> 丑一、問

問：修瑜伽者凡有幾種瑜伽所作？

丑二、答<sup>4</sup> 寅一、標

答：四。

寅二、徵

何等為四？

寅三、列

一、所依滅，二、所依轉，三、遍知所緣，四、愛樂所緣。

寅四、釋<sup>2</sup> 卯一、初二種

所依滅及所依轉者，謂勤修習瑜伽作意故，所有麤重俱行所依漸次而滅，所有輕安俱行所依漸次而轉，是名所依滅及所依轉瑜伽所作。

卯二、後二種<sup>2</sup> 辰一、能淨所依

遍知所緣及愛樂所緣者，謂或有遍知所緣、愛樂所緣與所依滅轉而為上首；

由此遍知所緣、愛樂所緣增上力故，令所依滅及所依轉。

辰二、得善清淨

或有遍知所緣、愛樂所緣用所依清淨而為上首；由此所依清淨增上力故，令遍知所緣得善清淨，及愛樂所緣得善清淨，於其所作成辦時轉。

遍知所緣及愛樂所緣等者：謂若遍知事邊際性，是名遍知所緣。於其所緣樂斷樂修，是名愛樂所緣。此與所依滅轉互為增上，如文可知。

丑三、結

是名四種修瑜伽者瑜伽所作。

子十一、幾瑜伽師<sup>2</sup> 丑一、問

問：修瑜伽師凡有幾種？

丑二、答<sup>4</sup> 寅一、標

答：三。

寅二、徵

何等為三？

寅三、列

一、初修業瑜伽師，二、已習行瑜伽師，三、已度作意瑜伽師。

寅四、釋<sup>2</sup> 卯一、第一義<sup>3</sup> 辰一、初修業<sup>4</sup> 巳一、徵

云何初修業瑜伽師？

巳二、標

謂有二種初修業者。

巳三、列

一、於作意初修業者，二、淨煩惱初修業者。

巳四、釋<sup>2</sup> 午一、於作意初修業者

云何於作意初修業者？謂初修業補特伽羅，安住一緣，勤修作意，乃至未得所修作意，未能觸證心一境性。

未能觸證心一境性者：如下說言：數數隨念同分所緣，流注、無罪適悅相

應，令心相續，名三摩地，亦名為善心一境性。（陵本三十卷八頁<sup>2508</sup>）不能繫心於此一所緣境，名未觸證。

午二、淨煩惱初修業者

云何淨煩惱初修業者？謂已證得所修作意，於諸煩惱欲淨其心，發起攝受正勤修習了相作意，名淨煩惱初修業者。

辰二、已習行

云何已習行瑜伽師？謂除了相作意，於餘乃至加行究竟五作意中已善修習。

於餘乃至加行究竟五作意等者：謂勝解作意、遠離作意、攝樂作意、觀察作意、加行究竟作意，此五作意望初了相作意，說名為餘。當知此已習行，通說於修作意及淨煩惱，下說已度作意，當知亦爾。

辰三、已度作意

云何已度作意瑜伽師？謂住加行究竟果作意位中，由此超過加行方便所修作意，安住修果，是故說名已度作意。

卯二、第二義<sup>3</sup> 辰一、初修業

又始從修習善法欲已去，乃至未起順決擇分善根，於爾所時，名初修業。

辰二、已習行

若已起順決擇分善根，所謂煖、頂、隨順諦忍、世第一法，名已習行。

又始從修習善法欲已去等者：此第二義釋三差別，唯說淨煩惱瑜伽師應知。言順決擇分善根者，善根有四。謂煖、頂、忍、世第一法。於此善根勤修加行，能生真實決擇清淨智見。此隨順彼，及是彼分，故名順決擇分善根。此中煖、頂、忍、世第一法，如下別釋應知。（陵本三十四卷十九頁<sup>2791</sup>）

辰三、已度作意<sup>2</sup> 巳一、辨位

若已證入正性離生，得諦現觀，不由他緣，於佛聖教不為餘緣之所引奪，當於爾時，名度作意。

巳二、顯義

由彼超過他緣作意，住非他緣所有作意，是故名為已度作意。

子十二、瑜伽修<sup>4</sup> 丑一、徵

云何瑜伽修？

丑二、標

謂有二種。

丑三、列

一者、想修，二者、菩提分修。

丑四、釋<sup>2</sup> 寅一、想修<sup>3</sup> 卯一、徵

云何想修？

卯二、釋<sup>2</sup> 辰一、別列<sup>4</sup> 巳一、過患想

謂或修世間道時，於諸下地修過患想。

於諸下地修過患想者：謂觀欲界對初靜慮，乃至無所有處對非想非非想處，一切下地苦惱增多，壽量減少，是名於諸下地修過患想。由麤性義是

有過患義故，如前已說。

已二、斷等想

或修涅槃道時，於斷界、離欲界、滅界觀見最勝寂靜功德，修習斷想、離欲想、滅想。

已三、上下想

或修奢摩他時，修習止品上下想。

已四、前後想

或修毗鉢舍那時，修習觀品前後想。

辰二、隨釋<sup>2</sup> 已一、上下想

上下想者，謂觀察此身如其所住、如其所願。

如其所住如其所願者：住謂現法命根相續。願謂前際希求愛樂。願增上力，壽命和合相續安住，是故此中作差別說。

上從頂上，下至足下，種種雜類不淨充滿。謂此身中所有種種髮、毛、爪、

齒，如前廣說。

如前廣說者：如前已說朽穢不淨應知。（陵本二十六卷二十頁<sub>2230</sub>）

已二、前後想<sub>3</sub> 午一、標所觀相

前後想者，謂如有一，於所觀相殷勤懇到，善取、善思、善了、善達。

午二、顯其差別

謂住觀於坐，坐觀於臥，或在後行觀察前行。此則顯示以毗鉢舍那行，觀察三世緣生諸行。

謂住觀於坐等者：謂以現在作意，觀察未來所知諸行，即此說言住觀於坐。若以現在作意，觀察過去所知諸行，即此說言坐觀於臥。若以現在作意，觀無間滅現行作意，即此說言或在後行觀察前行，當知此即觀察現在所知諸行。一心剎那，名現在故。如是別配觀察三世緣生諸行應知。三摩呬多地中亦有此文，已略解釋，今不更述。

午三、配觀三世<sub>3</sub> 未一、住觀於坐<sub>3</sub> 申一、標



謂若說言：住觀於坐。此則顯示以現在作意，觀察未來所知諸行。

申二、徵

所以者何？

申三、釋

現在作意位，已現生故，說名為住；未來所知位，未現生故，臨欲起故，說名為坐。

未二、坐觀於臥<sup>3</sup> 申一、標

若復說言：坐觀於臥。此則顯示以現在作意，觀察過去所知諸行。

申二、徵

所以者何？

申三、釋

現在作意位，臨欲滅故，說名為坐；過去所知位，已謝滅故，說名為臥。

未三、或在後行觀察前行<sup>3</sup> 申一、標

若復說言：或在後行觀察前行。此則顯示以現在作意，觀無間滅現行作意。

申二、徵

所以者何？

申三、釋

若已生起無間謝滅所取作意，說名前行；若此無間新新生起能取作意，取前無間已謝滅者，說名後行。

卯三、結

當知此中，為修止觀，修彼二品勝光明想，是名想修。

寅二、菩提分修<sup>3</sup> 卯一、徵

云何菩提分修？

卯二、釋<sup>4</sup> 辰一、標

謂於三十七菩提分法親近積集，若修、若習、若多修習，是名菩提分修。

辰二、徵

何等名為三十七種菩提分法？

辰三、列<sup>2</sup> 已一、總

謂四念住、四正斷、四神足、五根、五力、七覺支、八聖道。

已二、別<sup>7</sup> 午一、四念住

四念住者，一、身念住，二、受念住，三、心念住，四、法念住。

午二、四正斷

四正斷者，一、於已生惡不善法為令斷故，生欲、策勵、發勤精進，策心、持心、正斷。二、於未生惡不善法為不生故，生欲、策勵、發勤精進，策心、持心、正斷。三、於未生善法為令生故，生欲、策勵、發勤精進，策心、持心、正斷。四、於已生善法為欲令住、令不忘失、令修圓滿、令倍修習、令其增長、令其廣大，生欲、策勵、發勤精進，策心、持心、正斷。

午三、四神足

四神足者，一、欲三摩地斷行成就神足，二、勤三摩地斷行成就神足，三、

心三摩地斷行成就神足，四、觀三摩地斷行成就神足。

午四、五根

五根者，一、信根，二、精進根，三、念根，四、定根，五、慧根。

午五、五力

五力者，一、信力，二、精進力，三、念力，四、定力，五、慧力。

午六、七覺支

七覺支者，一、念等覺支，二、擇法等覺支，三、精進等覺支，四、喜等覺支，五、安等覺支，六、定等覺支，七、捨等覺支。

午七、八聖道

八支聖道者，一、正見，二、正思惟，三、正語，四、正業，五、正命，六、正精進，七、正念，八、正定。

辰四、釋<sup>6</sup> 巳一、四念住<sup>2</sup> 午一、辨體相<sup>2</sup> 未一、略別辨<sup>2</sup> 申一、初身念住<sup>2</sup>

酉一、總徵

今於此中，云何為身？云何於身住循身觀？云何為念？云何念住？

西二、別釋<sup>4</sup> 戌一、身相差別<sup>3</sup> 亥一、標

略說身相有三十五。

亥二、列

謂內身、外身、根所攝身、非根所攝身、有情數身、非有情數身、麤重俱行身、輕安俱行身、能造身、所造身、名身、色身、那落迦身、傍生身、祖父國身、

祖父國身者：此說餓鬼趣身應知。

人身、天身、有識身、無識身、中身、表身、變異身、不變異身、

中身表身等者：如身內分，自性不淨，是名中身。如身皮分，相似清淨，是名表身。如命終已，青瘀等現，名變異身。若未命終，未至變壞，是名不變異身。

女身、男身、半擇迦身、親友身、非親友身、中庸身、劣身、中身、妙身、

幼身、少身、老身。

亥三、結

如是名為身相差別。

戌二、住循身觀<sup>2</sup> 亥一、標

住循身觀略有三種。

亥二、釋<sup>2</sup> 天一、出體

謂依身增上聞思修慧。

天二、釋義

由此慧故，於一切身、一切相，正觀察、正推求，隨觀隨覺。

隨觀隨覺者：此正釋前循身觀義。顯揚頌云：身等三差別，彼影像隨觀。

自下釋言：於彼身等影像隨觀，與所知事同分類故，名為影像。所言隨者，是相似義。（顯揚十九卷十八頁）今應準釋。

戌三、念

念，謂依身增上，受持正法，思惟法義，修習作證。於文、於義修作證中，心無忘失。

戌四、念住<sup>2</sup> 亥一、第一義<sup>2</sup> 天一、辨相

若審思惟：我於正法為正受持，為不爾耶？於彼彼義慧善了達，為不爾耶？善能觸證彼彼解脫，為不爾耶？

天二、結名

如是審諦安住其念，名為念住。

受持正法等者：如次別配聞思修慧。言修習作證者，謂由修習，觸證彼彼身相解脫故。

亥二、第二義<sup>3</sup> 天一、標

又為守護念、為於境無染、為安住所緣，名為念住。

天二、釋<sup>3</sup> 地一、為守護念

為守護念者，謂如說言：先守護念，若常委念。

謂如說言先守護念等者：根律儀中說有防守正念、常委正念。（陵本二十卷一頁<sup>1944</sup>）此應準知。

地二、為於境無染

為於境無染者，謂如說言：念守護心，行平等位，不取其相，不取隨好，廣說乃至守護意根，修意根律儀。

謂如說言念守護心等者：根律儀中說有念防護意，乃至守護意根，修意根律儀。（陵本二十三卷二頁<sup>1946</sup>）此應準知。

地三、為安住所緣

為安住所緣者，謂如說言：於四所緣安住其念。謂於遍滿所緣、淨行所緣、善巧所緣、淨惑所緣。

天三、結

由此三相，善住其念，故名念住。

謂如說言於四所緣等者：如前已說四種所緣境事應知。（陵本二十六卷十



三頁  
2208)

申二、餘三念住<sup>2</sup> 酉一、辨相差別<sup>2</sup> 戌一、列名<sup>3</sup> 亥一、受<sup>3</sup> 天一、徵

云何為受？

天二、列<sup>2</sup> 地一、明相依

謂樂受、苦受、不苦不樂受，樂身受、苦身受、不苦不樂身受。如說身受，心受亦爾。

地二、顯差別

樂有愛味受、苦有愛味受、不苦不樂有愛味受。無愛味受、依耽嗜受，當知亦爾。樂依出離受、苦依出離受、不苦不樂依出離受。

天三、結

如是總有二十一受，或九種受。

如是總有二十一受等者：謂受自相略有三種，若樂、若苦、若不苦不樂。如是受所依，謂身及心；受差別，謂有愛味、無愛味、依耽嗜、依出離；

各有若樂、若苦、若不苦不樂三種差別，如是總成為二十一。又或說受自相有三，所依有二，差別有四，故成九種。

亥二、心<sup>3</sup> 天一、徵

云何為心？

天二、列

謂有貪心、離貪心、有瞋心、離瞋心、有癡心、離癡心、略心、散心、下心、舉心、掉心、不掉心、寂靜心、不寂靜心、定心、不定心、善修心、不善修心、善解脫心、不善解脫心。

天三、結

如是總有二十種心。

亥三、法<sup>3</sup> 天一、徵

云何為法？

天二、列

謂若貪、貪毗奈耶法，若瞋、瞋毗奈耶法，若癡、癡毗奈耶法，若略、若散法，若下、若舉法，若掉、不掉法，若寂靜、不寂靜法，若定、不定法，若善修、不善修法，若善解脫、不善解脫法。

天三、結

如是當知建立黑品、白品、染品、淨品二十種法。

謂若貪貪毗奈耶法等者：此中貪毗奈耶、瞋毗奈耶、癡毗奈耶諸法，謂即無貪、無瞋、無癡應知。

戌二、釋義<sup>3</sup> 亥一、受<sup>2</sup> 天一、釋相依<sup>2</sup> 地一、舉樂受<sup>2</sup> 玄一、自相

又樂受者，謂順樂受觸為緣所生平等受，受所攝，是名樂受。  
玄二、所依

此若五識相應，名身受；若意識相應，名心受。

地二、例苦等受<sup>2</sup> 玄一、自相

如順樂受觸，如是順苦受觸、順不苦不樂受觸為緣所生不平等受，受所攝，

非平等非不平等受，受所攝，是名苦受、不苦不樂受。

玄二、所依

此若五識相應，名身受；若意識相應，名心受。

天二、釋差別<sup>4</sup> 地一、無愛味受

如是諸受，若隨順涅槃、隨順決擇，畢竟出離、畢竟離垢、畢竟能令梵行圓滿，名無愛味受。

地二、有愛味受

若墮於界，名有愛味受。

地三、依出離受

若色無色界繫，若隨順離欲，名依出離受。

地四、依耽嗜受

若欲界繫，若不順離欲，名依耽嗜受。

若隨順涅槃等者：此中義顯無漏相應受，說名無愛味受。此受為依，能證

有學，是故說言隨順涅槃、隨順決擇；能證無學，是故說言畢竟出離，乃至梵行圓滿。

亥二、心<sup>2</sup> 天一、行時所起<sup>2</sup> 地一、釋<sup>6</sup> 玄一、有貪心

又有貪心者，謂於可愛所緣境事，貪纏所纏。

玄二、離貪心

離貪心者，謂即遠離如是貪纏。

玄三、有瞋心

有瞋心者，謂於可憎所緣境事，瞋纏所纏。

玄四、離瞋心

離瞋心者，謂即遠離如是瞋纏。

玄五、有癡心

有癡心者，謂於可愚所緣境事，癡纏所纏。

玄六、離癡心

離癡心者，謂即遠離如是癡纏。

地二、結

如是六心，當知皆是行時所起三煩惱品，及此三品對治差別。

三煩惱品及此三品對治差別者：貪瞋癡纏相應於心，是名三煩惱品。離貪瞋癡，名此三品對治差別。

天二、住時所起<sup>2</sup> 地一、別辨相<sup>2</sup> 玄一、釋<sup>2</sup> 黃一、依淨蓋地<sup>8</sup> 宇一、略心

略心者，謂由止行，於內所緣繫縛其心。

宇二、散心

散心者，謂於外五妙欲隨順流散。

宇三、下心

下心者，謂惛沈睡眠俱行。

宇四、舉心

舉心者，謂於淨妙所緣明了顯現。

字五、掉心

掉心者，謂太舉故，掉纏所掉。

字六、不掉心

不掉心者，謂於舉時及於略時得平等捨。

字七、寂靜心

寂靜心者，謂從諸蓋已得解脫。

字八、不寂靜心

不寂靜心者，謂從諸蓋未得解脫。

黃二、依淨煩惱地<sup>6</sup> 字一、定心

定心者，謂從諸蓋得解脫已，復能證入根本靜慮。

字二、不定心

不定心者，謂未能入。

字三、善修心

善修心者，謂於此定長時串習，得隨所欲、得無艱難、得無梗澀，速能證入。

字四、不善修心

不善修心者，與此相違，應知其相。

字五、善解脫心

善解脫心者，謂從一切究竟解脫。

謂從一切究竟解脫者：謂阿羅漢，永害一切煩惱品麤重種子，其心於彼究竟解脫，證得畢竟種性清淨，由是說名善解脫心。

字六、不善解脫心

不善解脫心者，謂不從一切不究竟解脫。

不從一切不究竟解脫者：謂諸有學，未能永斷修道所斷一切煩惱故。

玄二、結

如是十四種心，當知皆是住時所起。

地二、結略義<sup>2</sup>

玄一、初八種心



依淨蓋地住時所起，有八種心。謂從略心、散心，乃至寂靜、不寂靜心。

玄二、後六種心

依淨煩惱地住時所起，有六種心。謂定心、不定心，乃至善解脫、不善解脫心。

玄三、法<sup>2</sup> 天一、釋<sup>3</sup> 地一、於蓋<sup>2</sup> 玄一、有無

又於內有蓋，能自了知我有諸蓋；於內無蓋，能自了知我無諸蓋。

玄二、生滅

如彼諸蓋未生而生，亦能了知；如彼諸蓋生已散滅，亦能了知。

地二、於結<sup>2</sup> 玄一、有無

於眼有結乃至於意有結，能自了知我有眼結乃至我有意結；於眼無結乃至於意無結，能自了知我眼無結乃至我意無結。

玄二、生滅

如彼眼結乃至意結未生而生，亦能了知；如彼諸結生已散滅，亦能了知。

地三、於等覺支<sup>2</sup> 玄一、舉念<sup>2</sup> 黃一、有無

於內有念等覺支，能自了知我有念等覺支；於內無念等覺支，能自了知我無念等覺支。

黃二、生長

如念等覺支未生而生，亦能了知；如生已住，不忘修滿，倍復修習，增長廣大，亦能了知。

玄二、例餘

如念等覺支，如是擇法、精進、喜、安、定、捨等覺支，當知亦爾。

天二、結

若能如是如實遍知諸雜染法自性、因緣、過患、對治，是為法念住體。

酉二、例循觀等

如說於身住循身觀，念及念住。如是於受、於心、於法，隨其所應，當知亦爾。

如說於身住循身觀等者：前說住循身觀，謂由三慧隨觀隨覺。又說於文、於義修作證中，心無忘失，名之為念。復由三相善住其念，故名念住。如是住循受觀、住循心觀、住循法觀，念及念住，其相亦爾。然受、心、法所依有別，是故說言隨其所應。

未二、廣差別<sup>3</sup>

申一、總徵

云何於內身等住循身等觀？云何於外身等住循身等觀？云何於內外身等住循身等觀？

申二、別釋<sup>6</sup>

酉一、第一義<sup>2</sup>

戌一、住循身觀<sup>3</sup>

亥一、內

謂若緣內自有情數身色為境，住循身觀，是名於內身住循身觀。

亥二、外

若緣外非有情數色為境，住循身觀，是名於外身住循身觀。

亥三、內外

若緣外他有情數身色為境，住循身觀，是名於內外身住循身觀。

謂若緣內自有情數身色為境等者：此依前說內身、外身差別為釋，其義可知。

戌二、住循三觀<sup>3</sup> 亥一、內

若緣依內自有情數身色所生受、心、法為境，住循三觀，是名於內受、心、法住循受、心、法觀。

亥二、外

若緣依外非有情數色所生受、心、法為境，住循三觀，是名於外受、心、法住循受、心、法觀。

亥三、內外

若緣依外他有情數身色所生受、心、法為境，住循三觀，是名於內外受、心、法住循受、心、法觀。

酉二、第二義<sup>2</sup> 戌一、舉循身觀<sup>3</sup> 亥一、內

復有差別。謂若緣根所攝、有執有受色為境，是名於內身住循身觀。

亥二、外

若緣非根所攝、無執無受色為境，是名於外身住循身觀。

亥三、內外

若緣非根所攝、有執有受色為境，是名於內外身住循身觀。

戌二、例循三觀

如是若緣依前三色所生受、心、法為境，隨其所應，當知即是住循三觀。

謂若緣根所攝有執有受色為境等者：此依前說有情數身、非有情數身差別為釋可知。又復此中，住循三觀，亦有若內、若外、若內外三種差別，例前可知。今此總說，故不分別，下皆準知。

酉三、第三義<sup>2</sup> 戌一、舉循身觀<sup>3</sup> 亥一、內

復有差別。謂若緣自內定地輕安俱行色為境，是名於內身住循身觀。

亥二、外

若緣自內不定地麤重俱行色為境，是名於外身住循身觀。

亥三、內外

若緣他輕安俱行、麤重俱行色為境，是名於內外身住循身觀。

戌二、例循三觀

如是若緣依前三色所生受、心、法為境，隨其所應，當知即是住循三觀。

謂若緣自內定地輕安俱行色為境等者：此依前說麤重俱行身、輕安俱行身差別為釋可知。

酉四、第四義<sup>2</sup> 戌一、舉循身觀<sup>3</sup> 亥一、內

復有差別。謂若緣內能造大種色為境，是名於內身住循身觀。

亥二、外

若緣外能造大種色為境，是名於外身住循身觀。

亥三、內外

若緣依能造大種色所生根境所攝造色為境，是名於內外身住循身觀。

戌二、例循三觀

如是若緣依前三色所生受、心、法為境，隨其所應，當知即是住循三觀。

謂若緣內能造大種色為境等者：此依前說能造身、所造身差別為釋可知。

西五、第五義<sup>2</sup> 戌一、舉循身觀<sup>3</sup> 亥一、內

復有差別。謂若緣有識身內色為境，是名於內身住循身觀。

亥二、外

若緣無識身有情數青瘀等位色為境，是名於外身住循身觀。

亥三、內外

若緣無識身色於過去時有識性，有識身色於未來時無識性，相似法性、平等法性為境，是名於內外身住循身觀。

戌二、例循三觀

如是若緣依前三色所生受、心、法為境，隨其所應，當知即是住循三觀。

謂若緣有識身內色為境等者：此依前說有識身、無識身差別為釋可知。

西六、第六義<sup>2</sup> 戌一、舉循身觀<sup>3</sup> 亥一、內

復有差別。謂若緣自中身髮、毛、爪、齒等相為境，是名於內身住循身觀。

亥二、外

若緣他中身髮、毛、爪、齒等相為境，是名於外身住循身觀。

亥三、內外

若緣內表身變異、不變異青瘀等相，及緣外表身變異、不變異青瘀等相，相似法性、平等法性為境，是名於內外身住循身觀。

戌二、例循三觀

如是若緣依前三色所生受、心、法為境，隨其所應，當知即是住循三觀。

謂若緣自中身髮毛爪齒等相為境等者：此依前說中身、表身、變異身、不變異身差別為釋可知。

申三、總結

如是等類，身、受、心、法諸差別門當知多種，今於此中，且顯少分諸門差別。



午二、明建立<sup>2</sup> 未一、顯四種<sup>4</sup> 申一、第一義<sup>2</sup> 酉一、總標

又為對治四顛倒故，世尊建立四種念住。

酉二、別釋<sup>4</sup> 戌一、身念住<sup>2</sup> 亥一、標立

謂為對治於不淨中計淨顛倒，立身念住。

亥二、釋義

以佛世尊於循身念住中，宣說不淨相應四擔怕路。若能於此多分思惟，便於不淨斷淨顛倒。

宣說不淨相應四擔怕路者：此顯依外朽穢不淨差別。世尊宣說四擔怕路，如前已說。（陵本二十六卷二十一頁<sup>2236</sup>）

戌二、受念住<sup>2</sup> 亥一、標立

為欲對治於諸苦中計樂顛倒，立受念住。

亥二、釋義

以於諸受住循受觀，如實了知諸所有受皆悉是苦，便於諸苦斷樂顛倒。

於諸苦中計樂顛倒者：此中諸苦，謂行苦性。由後有業煩惱所生諸行，於彼彼自體中，能隨順生一切煩惱及與眾苦故。

戌三、心念住<sup>2</sup> 亥一、標立

為欲對治於無常中計常顛倒，立心念住。

亥二、釋義

以能了知有貪心等種種差別，經歷彼彼日夜、剎那、瞬息、須臾非一眾多種種品類心生滅性，便於無常斷常顛倒。

戌四、法念住<sup>2</sup> 亥一、標立

為欲對治於無我中計我顛倒，立法念住。

亥二、釋義

由彼先來有有我見等諸煩惱故，無無我見等諸善法故，於諸蘊中生起我見。以於諸法住循法觀，如實了知所計諸蘊自相、共相，便於無我斷我顛倒。

申二、第二義<sup>2</sup> 酉一、由橫計

復有差別。謂諸世間，多於諸蘊唯有蘊性、唯有法性不如實知，橫計有我依止於身；由依身故，受用苦樂；受苦樂者，由法非法，有染有淨。

酉二、為除愚<sup>4</sup> 戌一、立身念住

為欲除遣我所依事愚故，立身念住。

戌二、立受念住

為欲除遣我所領受事愚故，立受念住。

戌三、立心念住

為欲除遣於心、意、識執我愚者我事愚故，立心念住。

戌四、立法念住

為欲除遣所執我心能染淨事愚故，立法念住。

橫計有我依止於身等者：此中計我依身，即我所依事愚。計我依身，受用苦樂，即我所領受事愚。計我受苦樂者，即我事愚。計我由法非法，有染有淨，即能染淨事愚。

申三、第三義<sup>2</sup> 酉一、標立

復有差別。謂若依此造作諸業，若為此故造作諸業，若造業者，若由此故造作諸業。為總顯示如是一切，立四念住。

酉二、釋義

當知此中，依止於身造作諸業，為求受故造作諸業，心能造業，由善不善法能造諸業。

申四、第四義<sup>2</sup> 酉一、標立

復有差別。謂若依此有染有淨，若為此故起染起淨，若染淨者，若由此故成染成淨。總為顯示如是一切，立四念住。

酉二、釋義

當知此中，依止於身有染有淨，為求受故起染起淨，心染淨者，由諸法故成染成淨。

未二、釋念住<sup>2</sup> 申一、問

問：念住何義？

申二、答<sup>2</sup> 酉一、標

答：若於此住念、若由此住念，皆名念住。

酉二、釋<sup>2</sup> 戌一、於此住念

於此住念者，謂所緣念住。

謂所緣念住者：謂緣身、受、心、法為境應知。

戌二、由此住念<sup>2</sup> 亥一、第一義

由此住念者，謂若慧、若念攝持於定，是自性念住；所餘相應諸心心法，是相雜念住。

亥二、第二義<sup>2</sup> 天一、出體性

又由身、受、心、法增上所生善有漏、無漏道，皆名念住。

天二、辨種類<sup>3</sup> 地一、標

此復三種。

地二、列

一、聞所成，二、思所成，三、修所成。

地三、辨

聞思所成，唯是有漏；修所成者，通漏無漏。

瑜伽師地論科句披尋記卷第二十八

瑜伽師地論科句披尋記卷第二十九

彌勒菩薩說

唐三藏沙門玄奘奉詔譯

韓清淨科記

本地分中聲聞地第二瑜伽處之四

已二、四正斷<sup>2</sup> 午一、結前顯後

如是於四念住串習行故，已能除遣麤麤顛倒，

已能除遣麤麤顛倒者：此中麤麤，義不可解，於餘處中不見此文，疑為麤重之誤。謂諸世間，於麤重行多起顛倒，修循身觀能正對治。辯中邊說：麤重由身而得顯了，故觀察此入苦聖諦。身以有麤重諸行為相故，以諸麤重即行苦性，由此聖觀有漏皆苦。今依此義，說已除遣麤重顛倒。已能了達善不善法。

已能了達善不善法者：當知此由修循三觀而得了達。前於受、心、法中建

立種種差別，善與不善隨應當知。

從此無間，於諸未生惡不善法，為不生故；於諸已生惡不善法，為令斷故；於其未生一切善法，為令生故；於其已生一切善法，為欲令住、令不忘失，廣說如前；乃至策心、持心。

午二、別顯一一<sup>2</sup> 未一、廣辨<sup>2</sup> 申一、體義<sup>3</sup> 酉一、釋善惡法未生已生<sup>2</sup> 戌一、

惡不善法<sup>2</sup> 亥一、徵

云何名為惡不善法？

亥二、釋<sup>2</sup> 天一、出體性

謂欲纏染汙身語意業，是身語意惡行所攝，及能起彼所有煩惱。

天二、辨差別

若未和合、未現在前，說名未生；若已和合、已現在前，說名已生。

戌二、一切善法<sup>2</sup> 亥一、徵

云何名為一切善法？



亥二、釋<sup>2</sup> 天一、出體性

謂若彼對治、若蓋對治、若結對治。

天二、例差別

未生、已生，應知如前惡不善法。

謂若彼對治等者：貪毗奈耶、瞋毗奈耶、癡毗奈耶，如次對治貪瞋癡法，名彼對治。當知此是行時所起。若略、若舉、若不掉、若寂靜，如次對治若散、若下、若掉、若不寂靜諸法，名蓋對治。當知此是淨蓋地住時所起。若定、若善修、若善解脫，如次對治不定、不善修、不善解脫諸法，名結對治。當知此是淨煩惱地住時所起。

酉二、辨生欲等<sup>2</sup> 戌一、於惡不善法<sup>2</sup> 亥一、生欲<sup>2</sup> 天一、為不生

若時未生惡不善法，先未和合，為令不生，發起希願：我當令彼一切一切皆不復生。是名於諸未生惡不善法，為不生故生欲。

天二、為令斷

若時已生惡不善法，先已和合，為令斷故，發起希願：我當於彼一切一切皆不忍受，斷滅、除遣。是名於諸已生惡不善法，為令斷故生欲。

亥二、策勵發動精進<sup>4</sup>

天一、約境差別辨<sup>2</sup>

地一、列所緣境<sup>2</sup>

玄一、標事

又彼一切惡不善法，或緣過去事生、或緣未來事生、或緣現在事生。

玄二、辨境

如是彼法，或緣不現見境、或緣現見境。若緣過去、未來事境，是名緣不現見境；若緣現在事境，是名緣現見境。

地二、配釋差別<sup>2</sup>

玄一、策勵

當知此中，於緣不現見境惡不善法，其未生者欲令不生，其已生者欲令永斷，自策、自勵，是名策勵。

玄二、發動精進<sup>3</sup>

黃一、配

於緣現見境惡不善法，其未生者欲令不生，其已生者欲令永斷，勇猛正勤，是名發動精進。

黃二、徵

所以者何？

黃三、釋

要當堅固，自策、自勵，勇猛正勤，方能令彼或不復生、或永斷滅。

天二、約纏品類辨<sup>2</sup> 地一、策勵

又於下品、中品諸纏，其未生者欲令不生，其已生者欲令永斷，故自策勵。

地二、發勤精進

於上品纏，其未生者欲令不生，其已生者欲令永斷，發勤精進。

天三、約三世境辨<sup>2</sup> 地一、策勵<sup>2</sup> 玄一、顯行境<sup>2</sup> 黃一、舉過去

又若行於過去境界，如是行時，不令煩惱緣彼生起；設復失念暫時生起，而不忍受，速能斷滅、除遣、變吐。

黃二、例未來

如緣過去，若行未來，當知亦爾。

玄二、配釋名

如是未生惡不善法能令不生，生已能斷，是名策勵。

地二、發勤精進<sup>2</sup> 玄一、顯行境

若行現在所緣境界，如是行時，不令煩惱緣彼生起；設復失念暫時生起，而不忍受，速能斷滅、除遣、變吐。

玄二、配釋名

如是未生惡不善法能令不生，生已能斷，是名發勤精進。

天四、約二增上力辨<sup>2</sup> 地一、列二力<sup>2</sup> 玄一、標

又或有惡不善法，唯由分別力生，非境界力；或有惡不善法，由分別力生，亦境界力。

唯由分別力生非境界力等者：非理作意正起，能生諸法，名分別力。當知此唯意識相應。若彼境界或極廣大、或極可意正現在前，心則於彼多作意生，名境界力。如意地說。（陵本三卷五頁<sup>208</sup>）當知此通一切識有。今說

唯由分別力生，非境界力，謂即意識。復說由分別力生，亦境界力，謂一切識。由五識身染汙法生，亦由意識分別力所引故。

玄二、釋<sup>2</sup> 黃一、唯分別力

唯由分別力生，非境界力者，謂於住時，思惟過去、未來境界而生於彼。

黃二、俱由二力

由思惟力生，亦境界力者，謂於行時，緣現在境界而生於彼。當於爾時，決定亦有非理分別。

地二、配二名<sup>2</sup> 玄一、策勵

當知此中，惡不善法唯由分別力生，非境界力者，彼若未生能令不生，生已能斷，是名策勵。

玄二、發勤精進

若由分別力生，亦境界力者，彼若未生能令不生，生已能斷，是名發勤精進。

戌二、於一切善法<sup>2</sup> 亥一、生欲<sup>2</sup> 天一、為令生

於其未生一切善法，為令生故生欲者，謂於未得、未現在前所有善法，為欲令得、令現在前，發心希願，發起猛利求獲得欲、求現前欲，而現在前，是名於其未生一切善法，為令生故生欲。

天二、為欲令住等<sup>2</sup> 地一、釋<sup>2</sup> 玄一、已生善法

於其已生一切善法，為欲令住、令不忘失、令修圓滿生欲者，謂已獲得、已現在前所有善法，是名已生善法。

玄二、生欲差別<sup>3</sup> 黃一、為欲令住

於此善法已得不失、已得不退，依是說言：為欲令住。

黃二、令不忘失

於此善法明了現前，無闇鈍性，依是說言：令不忘失。

黃三、令修圓滿

於此善法已得現前，數數修習，成滿究竟，依是說言：令修圓滿。

地二、結

於此善法發心希願，發起猛利求堅住欲、求不忘欲、求修滿欲，而現在前，是名於其已生一切善法，為欲令住、令不忘失、令修圓滿生欲。

亥二、策勵發勤精進<sup>3</sup>    天一、已得未得辨<sup>2</sup>    地一、策勵

策勵者，為於已得令現前故。

地二、發勤精進

發勤精進者，為於未得令其得故。

天二、住等三欲辨<sup>2</sup>    地一、策勵

又策勵者，於已生善為欲令住、令不忘故。

地二、發勤精進

發勤精進者，令修滿故。

天三、下中上品辨<sup>2</sup>    地一、策勵

又於下品、中品善法，未生令生，生已令住、令不忘失，是名策勵。

地二、發勤精進

於上品善法，未生令生，生已乃至令修圓滿，是名發勤精進。

西三、辨策持心<sup>2</sup> 戌一、策心<sup>2</sup> 亥一、釋

言策心者，謂若心於修奢摩他一境性中精勤方便，於諸未生惡不善法，為令不生；廣說乃至於其已生一切善法，為欲令住、令不忘失、令修圓滿。由是因緣，其心於內極略下劣、或恐下劣，觀見是已，爾時隨取一種淨妙舉相，殷勤策勵、慶悅其心。

亥二、結

是名策心。

戌二、持心<sup>3</sup> 亥一、徵

云何持心？

亥二、釋

謂修舉時，其心掉動、或恐掉動，觀見是已，爾時還復於內略攝其心，修奢摩他。



亥三、結

是名持心。

申二、異名<sup>2</sup> 酉一、正勝<sup>2</sup> 戌一、標

如是四種，亦名正勝。

戌二、釋<sup>2</sup> 亥一、於黑品法

謂於黑品諸法，其未生者為令不生，其已生者為令斷滅，生欲、策勵、發勤精進、策心、持心，是二正勝。

亥二、於白品法

於白品諸法，其未生者為欲令生，

其未生者為欲令生等者：此下疑有脫文。應言：其已生者為欲令住、令不忘失、令修圓滿、令倍修習、令其增長、令其廣大，於此一切生欲、策勵、發勤精進、策心、持心。是即如前黑品廣說應知。

如前黑品廣說，應知是二正勝。

酉二、正斷<sup>2</sup> 戌一、標

如是四種，亦名正斷。

戌二、釋<sup>2</sup> 亥一、於惡不善法<sup>2</sup> 天一、配名<sup>2</sup> 地一、律儀斷

一名律儀斷。謂於已生惡不善法，為令斷故，生欲、策勵，乃至廣說。

地二、斷斷

二名斷斷。謂於未生惡不善法，為不生故，生欲、策勵，乃至廣說。

天二、釋義<sup>2</sup> 地一、律儀斷

由於已生惡不善事，應修律儀，令其斷滅，不應忍受。由是因緣，名律儀斷。

地二、斷斷

於其未生惡不善事，為欲令彼不現行斷，為欲令彼不現前斷，為斷故斷，故名斷斷。

亥二、於一切善法<sup>2</sup> 天一、修斷<sup>2</sup> 地一、配

三名修斷。謂於未生一切善法，為令生故，廣說乃至策心、持心。

地二、釋

由於善法數修數習，先所未得能令現前，能有所斷，故名修斷。

天二、防護斷<sup>2</sup> 地一、配

四名防護斷。謂於已生一切善法，為欲令住，廣說乃至策心、持心。

地二、釋

由於已得、已現在前諸善法中，遠離放逸，修不放逸，能令善法住不忘失，修習圓滿，防護已生所有善法，能有所斷，故名防護斷。

未二、略義<sup>3</sup> 申一、結前生後

如是廣辯四正斷已，復云何知此中略義？

申二、總顯所作<sup>2</sup> 酉一、標二圓滿

謂為顯示於黑白品捨取事中，增上意樂圓滿及加行圓滿，是故宣說四種正斷。

酉二、配應作事<sup>2</sup> 戌一、標

當知此中，由生欲故，增上意樂圓滿；由自策勵、發勤精進、策心、持心

故，加行圓滿。修瑜伽師唯有爾所正應作事。

戌二、釋

謂為斷滅所應斷事，及為獲得所應得事，先當生起希願樂欲；為斷諸纏，復應時時正勤修習止、舉、捨相；

為斷諸纏者：此說蓋纏應知。

為斷諸纏及隨眠故，更應修習對治善法。

為斷諸纏及隨眠故者：此說一切煩惱應知。

申三、結攝一切

為顯如是一切所作，說四正勝及四正斷，是名略義。

巳三、四神足<sup>2</sup> 午一、釋成就<sup>2</sup> 未一、別辨<sup>2</sup> 申一、四三摩地<sup>3</sup> 酉一、標

從此復修四三摩地。

酉二、列

謂欲三摩地、勤三摩地、心三摩地、觀三摩地。

西三、釋<sup>2</sup> 戌一、略

當知由欲增上力所得三摩地，名欲三摩地；由勤增上力所得三摩地，名勤三摩地；由心增上力所得三摩地，名心三摩地；由觀增上力所得三摩地，名觀三摩地。

戌二、廣<sup>4</sup> 亥一、欲三摩地<sup>2</sup> 天一、釋<sup>2</sup> 地一、因緣

若於是時純生樂欲，生樂欲已，於諸所有惡不善法自性、因緣、過患、對治，正審思察，住一境念。

惡不善法自性因緣等者：如前已說，欲纏染汙身語意業，及能起彼所有煩惱，是名惡不善法自性。若未生、若已生，名彼因緣。能為自害、能為他害、能為俱害，生現法罪、生後法罪、生現法後法罪，受彼所生身心憂苦；又若煩惱起時，先惱亂其心，次於所緣發起顛倒，令諸睡眠皆得堅固，令等流行相續而轉；如是一切，名彼過患。若彼對治、若蓋對治、若結對治，是名對治。於此一境界事繫念思惟，不令流散，由是說言住一境

念。

於諸善法自性、因緣、功德、出離，正審思察，住一境念。

於諸善法自性因緣等者：謂若貪毗奈耶、瞋毗奈耶、癡毗奈耶，及餘白品、淨品諸所有法，是名善法自性。未生、已生，名彼因緣。能治過失，是名功德。能令離欲，是名出離。

即由如是多修習故，觸一境性。

地二、對治

於諸所有惡不善法現行諸纏，能令遠離，而未永害煩惱隨眠。

天二、結

是名欲增上力所得三摩地。

亥二、勤三摩地<sup>2</sup> 天一、釋<sup>2</sup> 地一、因緣

若於過去、未來、現在所緣境界，能順所有惡不善法，能順所有下中上品煩惱纏中，其未生者為令不生，其已生者為令斷滅，自策、自勵、發勤精進，

於彼所緣，於彼境界自性、因緣、過患、對治，正審思察，住一境念。

自策自勵發勤精進者：自策、自勵，謂於過去、未來所緣境界。發勤精進，謂於現在所緣境界。如是別配，義如前說。

即由如是多安住故，能正生起心一境性。

地二、對治

於諸所有惡不善法現行諸纏，能令遠離，而未永害煩惱隨眠。

天二、結

是名勤增上力所得三摩地。

亥三、心三摩地

若復策發諸下劣心，或復制持諸掉舉心，又時時間修增上捨。

若復策發諸下劣心等者：於時時間為治惛沈，修習舉相，是名策發諸下劣心。於時時間為治掉舉，修習止相，是名制持諸掉舉心。於時時間為得正定，修習捨相，是名修增上捨。

由是因緣，於諸所有惡不善法，若能隨順惡不善法，及諸善法，若能隨順所有善法自性、因緣、過患、功德、對治、出離，正審思察，住一境念。

自性因緣過患功德等者：此中差別，隨應配屬惡不善法及諸善法，準前應知。

即由如是多安住故，能正生起心一境性，乃至廣說。

乃至廣說者：謂如前說，於諸所有惡不善法現行諸纏，能令遠離，而不永害煩惱隨眠，是名廣說應知。

是名心增上力所得三摩地。

亥四、觀三摩地<sup>2</sup> 天一、釋<sup>2</sup> 地一、因緣<sup>2</sup> 玄一、由作意

若於能順惡不善法，作意思惟為不如理；復於能順所有善法，作意思惟以為如理。如是遠離彼諸纏故，及能生起諸纏對治定為上首諸善法故，能令所有惡不善法皆不現行。

玄二、由觀察



便自思惟：我今為有現有惡不善法不覺知耶？為無現無惡不善法不覺知耶？我今應當遍審觀察。彼由觀察作意增上力故，自正觀察斷與未斷，正審思察，住一境念。

便自思惟等者：為於現有惡不善法如實知有，及於現無惡不善法如實知無，是故作是二種思惟，正起觀察。

即由如是多安住故，能正觸證心一境性。

地二、對治

由是因緣，離增上慢，如實自知：我唯於纏心得解脫，未於一切一切隨眠心得解脫。我唯獲得及已修習諸纏對治定為上首所有善法，而未獲得及未修習隨眠對治。

未於一切一切隨眠心得解脫者：此中隨眠，說二一切，當知約彼煩惱品類說初一切，約彼煩惱自性說後一切。或復翻此。

天二、結

是名觀增上力所得三摩地。

申二、八種斷行<sup>3</sup> 酉一、標所為

彼由如是四三摩地增上力故，已遠諸纏。復為永害一切一切惡不善法諸隨眠故，及為修習能對治彼諸善法故，便更生起樂欲、策勵，廣說如前修四正斷加行道理。

廣說如前修四正斷加行道理者：如前四正斷中，說有發勤精進、策心、持心，即此所指廣說加行。依彼建立種種差別，即此所指廣說道理。

彼於如是正修習時，有八斷行，為欲永害諸隨眠故，為三摩地得圓滿故，差別而轉。

酉二、釋差別<sup>3</sup> 戌一、徵

何等名為八種斷行？

戌二、釋<sup>2</sup> 亥一、辨體相<sup>8</sup> 天一、欲

一者、欲。謂起如是希望樂欲：我於何時修三摩地當得圓滿？我於何時當能

斷滅惡不善法所有隨眠？

天二、策勵

二者、策勵。謂乃至修所有對治，不捨加行。

天三、信

三者、信。謂不捨加行正安住故，於上所證，深信解。

天四、安

四者、安。謂清淨信而為上首，心生歡喜；心歡喜故，漸次息除諸惡不善法品麤重。

天五、念

五者、念。謂九種相。於九種相安住其心，奢摩他品能攝持故。

謂九種相等者：謂念、等念、隨念、別念、不忘念、心明記、無失、無忘、無失法，是名念九種相。如決擇分說。（陵本五十七卷十六頁<sup>4637</sup>）當知此隨九種心住差別建立，由於奢摩他品能攝持故。

天六、正知

六者、正知。謂毗鉢舍那品慧。

天七、思

七者、思。謂心造作。於斷、未斷正觀察時，造作其心，發起能順止觀二品身業、語業。

發起能順止觀二品身業語業者：此中義顯靜慮律儀。謂由止觀二增上力，損伏一切犯戒種子，令身語業得善清淨，如是當知煩惱已斷。諸觀行者觀察煩惱斷、未斷時，正審思察，願證如是清淨身業、語業，此身語業名順止觀。

天八、捨

八者、捨。謂行過去、未來、現在隨順諸惡不善法中，心無染汙、心平等性。

亥二、明知斷

由二因緣，於隨眠斷分別了知。謂由境界不現見思，及由境界現見捨故。

謂由境界不現見思等者：觀察煩惱斷、未斷時，思惟發起能順止觀二品身業、語業，如是思惟，非於行時緣現見境，是名境界不現見思。若緣現見事境，惡不善法不復現行，心無染汙，行平等位，是名境界現見捨。

戌三、結

如是名為八種斷行，亦名勝行。

酉三、配瑜伽<sup>2</sup> 戌一、總標

如是八種斷行、勝行，即是為害隨眠瑜伽。

戌二、別配

此中欲者，即是彼欲；此中策勵，即彼精進；此中信者，即是彼信；此中安、念、正知、思、捨，即彼方便。

此中欲者即是彼欲等者：彼謂瑜伽。前說四種瑜伽，與此八種斷行，隨應配屬，如文可知。

未二、總結

如是此中，若先欲等四三摩地，若今所說八種斷行，於為永斷所有隨眠圓滿成辦三摩地時，一切總名欲三摩地斷行成就神足、勤三摩地斷行成就神足、心三摩地斷行成就神足、觀三摩地斷行成就神足。

午二、釋得名<sup>2</sup> 未一、問

問：何因緣故說名神足？

未二、答<sup>2</sup> 申一、約世間辨

答：如有足者，能往能還，騰躍勇健，能得能證世間所有殊勝之法。世殊勝法說名為神，彼能到此，故名神足。

如有足者等者：謂若成就四三摩地、八種斷行，堪能證得轉上、轉勝諸世間定。此約世間說名神足應知。

申二、約出世辨

如是若有如是諸法，有三摩地圓滿成辦，彼心如是清淨鮮白，無諸瑕穢，離隨煩惱，安住正直，有所堪能，獲得不動，能往能還，騰躍勇健，能得能證

出世間法。由出世法最勝自在，是最勝神，彼能證此，故名神足。

如是有如是諸法等者：已證根本三摩地故，名三摩地圓滿成辦。彼心不為三摩地生愛味、慢、見、疑、無明等諸隨煩惱之所染汙，是名清淨鮮白，無諸瑕穢，離隨煩惱。住正直見，善思法義，無惑無疑，加行出離，淨信相應，不可引奪，是名安住正直，有所堪能，獲得不動。若有如是諸法，堪能證得出世勝法。此約出世說名神足應知。

巳四、五根五力<sup>2</sup> 午一、別辨<sup>2</sup> 未一、五根<sup>2</sup> 申一、釋<sup>3</sup> 酉一、明勝進

彼由如是勝三摩地為所依持，勝三摩地為所依止，能進修習增上心學、增上慧學所有瑜伽。

酉二、出信根

由進修習此瑜伽故，於他大師、弟子所證，深生勝解、深生淨信。此清淨信增上義故，說名信根。

酉三、釋增上<sup>2</sup> 戌一、問

問：於何增上？

戌二、答<sup>3</sup> 亥一、信根

答：於能生起出世間法而為上首，及於能起精進、念、定、慧為其增上。

亥二、精進等根

餘精進等，於能生起出世間法，及於能起展轉乃至慧為其增上。

亥三、慧根

乃至其慧，唯於能起出世間法為其增上。

申二、結

是故信等說名五根。

及於能起展轉乃至慧為其增上者：謂若精進與念、定、慧能為增上，如是念與定、慧能為增上，定唯與慧能為增上，由是說言展轉至慧。

未二、五力<sup>2</sup> 申一、辨相<sup>2</sup> 酉一、舉信<sup>2</sup> 戌一、標義

若復了知前後所證而有差別，隨此能於後後所證出世間法，深生勝解、深生



淨信。此清淨信難伏義故，說名信力。

戌二、問答<sup>2</sup> 亥一、問

問：誰不能伏？

亥二、答

答：此清淨信，若天、若魔、若諸沙門、若婆羅門、若餘世間，無有如法能引奪者，諸煩惱纏亦不能屈，故名難伏。

酉二、例精進等

此為上首、此為前行，餘精進等亦名為力。

申二、結名

由此諸力具大威勢，摧伏一切魔軍勢力，能證一切諸漏永盡，是故名力。

午二、總顯<sup>2</sup> 未一、因果相屬<sup>5</sup> 申一、信根信力<sup>3</sup> 酉一、標

當觀此中信根、信力，即四證淨中所有淨信。

酉二、徵

何以故？

酉三、釋<sup>2</sup> 戌一、顯相

以其證入正性離生所有證淨，皆由此因、此緣、此序，由彼即是此增上果。

戌二、證義

是故世尊就其因果相屬道理，說言當觀即彼證淨，非即彼體、非即彼相。

皆由此因此緣此序者：因，謂種子相續。緣，謂所依助伴。序，謂託此事  
生，即引發緣義。如三摩呬多地中說。（陵本十一卷十頁<sup>882</sup>）

申二、精進根力<sup>3</sup> 酉一、標

當觀此中精進根、力，即四正斷中所有精進。

酉二、徵

此何正斷？

酉三、釋

謂能永斷見道所斷一切煩惱方便正斷，此中意說如是正斷。由此正斷，畢竟

能斷所有諸惡不善法故。

申三、念根念力<sup>2</sup> 酉一、標

當觀此中念根、念力，即四念住中所有正念。

酉二、釋

謂四念住能無餘斷一切顛倒。

申四、定根定力<sup>2</sup> 酉一、標

當觀此中定根、定力，即四靜慮中所有正定。

酉二、釋

謂諸靜慮能為方便，證不還果。

謂諸靜慮能為方便證不還果者：謂如已離欲界欲者，後入正性決定位，得不還果。今依此義，故作是說。

申五、慧根慧力<sup>2</sup> 酉一、標

當觀此中慧根、慧力，即四聖諦中所有正智。

酉二、釋

謂聖諦智於四聖諦能證現觀，得沙門果。

未二、順起加行<sup>3</sup> 申一、舉法<sup>3</sup> 酉一、標

即由如是諸根、諸力，漸修、漸習、漸多修習為因緣故，便能發起下中上品順決擇分四種善根。

酉二、徵

何等為四？

酉三、列

一、煖，二、頂，三、順諦忍，四、世第一法。

申二、引喻

譬如有人，欲以其火作火所作，為求火故，下安乾木，上施鑽燧，精勤、策勵、勇猛鑽求。彼於如是精勤、策勵、勇猛鑽時，於下木上最初生煖；次煖增長，熱氣上衝；次倍增盛，其煙遂發；次無焰火欻然流出；火出無間發生

猛焰；猛焰生已，便能造作火之所作。

申三、配合<sup>3</sup> 酉一、於初位

如鑽火人精勤、策勵、勇猛鑽求，五根、五力，漸修、漸習、漸多修習，當知亦爾。

酉二、於中位<sup>4</sup> 戌一、煖善根

如下木上初所生煖，其煖善根，當知亦爾，燒諸煩惱無漏法火生前相故。

燒諸煩惱無漏法火生前相故者：如火生時，最初生煖，是故煖名火之前相。如是無漏法生，先起善根，說名前相道理亦爾。由無漏法能斷煩惱，喻如火燒。最初善根是彼前相，故得煖名。

戌二、頂善根

如煖增長，熱氣上衝，其頂善根，當知亦爾。

戌三、順諦忍

如次煙發，其順諦忍，當知亦爾。

戌四、世第一法

如無焰火欻然流出，世第一法，當知亦爾。

酉三、於後位

如火無間發生猛焰，世第一法所攝五根、五力，無間所生出世無漏聖法，當知亦爾。

巳五、七覺支<sup>3</sup> 午一、乘徵

此復云何？

午二、標釋

謂七覺支。諸已證入正性離生補特伽羅如實覺慧用此為支，故名覺支。

謂七覺支等者：辯中邊說：此支助覺，故名覺支。由此覺支位在見道，廣有七種，略為五支。一、覺所依支，謂念。二、覺自性支，謂擇法。三、覺出離支，謂精進。四、覺利益支，謂喜。五、覺無染支，此復三種，謂安、定、捨。（辯中邊論中卷十四頁）今說如實覺慧用此為支，應如彼

釋。

午三、明攝<sup>3</sup> 未一、標

即此七種如實覺支，三品所攝。

未二、配

謂三覺支奢摩他品攝，三覺支毗鉢舍那品攝，一覺支通二品攝，是故說名七種覺支。

未三、釋

謂擇法覺支、精進覺支、喜覺支，此三觀品所攝；安覺支、定覺支、捨覺支，此三止品所攝；念覺支一種，俱品所攝，說名遍行。

巳六、八聖道<sup>3</sup> 午一、明漸次<sup>2</sup> 未一、略標

彼於爾時，最初獲得七覺支故，名初有學見聖諦跡。已永斷滅見道所斷一切煩惱，唯餘修道所斷煩惱。為斷彼故，修習三蘊所攝八支聖道。

未二、配釋

此中正見、正思惟、正精進，慧蘊所攝；正語、正業、正命，戒蘊所攝；正念、正定，定蘊所攝。

午二、釋得名<sup>2</sup> 未一、問

問：何因緣故名八支聖道？

未二、答<sup>2</sup> 申一、總

答：諸聖有學已見跡者，由八支攝行跡正道，能無餘斷一切煩惱，能於解脫究竟作證，是故名為八支聖道。

申二、別<sup>5</sup> 酉一、正見

當知此中，若覺支時所得真覺；若得彼已，以慧安立如證而覺，總略此二合名正見。

若覺支時所得真覺等者：此中真覺，謂根本無漏智，於聖諦理證現觀故。從此無間，得唯法智、得非斷智、得非常智、得緣生行如幻事智，善為他說宣揚開示，是名以慧安立如證而覺，當知此即後得無漏智攝。



酉二、正思惟

由此正見增上力故，所起出離、無恚、無害分別思惟，名正思惟。

所起出離無恚無害分別思惟者：謂即出離尋、無恚尋、無害尋、出離伺、無恚伺、無害伺應知。

若心趣入諸所尋思，彼唯尋思如是相狀所有尋思。

彼唯尋思如是相狀所有尋思者：謂唯尋思出離、無恚、無害分別相狀故。

酉三、正語業命<sup>2</sup> 戌一、第一義<sup>3</sup> 亥一、正語

若心趣入諸所言論，即由正見增上力故，起善思惟，發起種種如法言論，是名正語。

亥二、正業

若如法求衣服、飲食、諸坐臥具、病緣醫藥供身什物。於追求時，若往、若還正知而住，若覩、若瞻、若屈、若伸、若持衣鉢及僧伽胝、若食、若飲、若噉、若嘗正知而住；或於住時，於已追求衣服等事，若行、若住、若坐、

若臥，廣說乃至若解勞睡正知而住。是名正業。

或於住時於已追求衣服等事等者：前說追求衣服等事，行時業攝。既追求已，於其住時有五種業。一者、身業，二者、語業，三者、意業，四者、晝業，五者、夜業。謂若說言：若行、若住、若坐。此言顯示住時身業。若復說言：若語。此言顯示住時語業。若復說言：若臥、若默、若解勞睡。此言顯示住時意業。若復說言：若習恬寤。此言顯示住時晝業、夜業、身業、語業。又若臥者，此言顯示住時夜業。當知是名住時五業。如前正知而住中說。（陵本二十四卷二十頁<sup>2063</sup>）此應準知。

亥三、正命

如法追求衣服、飲食，乃至什物，遠離一切起邪命法，是名正命。

戌二、第二義<sup>3</sup> 亥一、標遠離攝

若遠離攝正語、業、命，彼於證得無漏作意諸覺支時，先已獲得。

若遠離攝正語業命者：謂即諸語惡行、諸身惡行、諸邪命事不作律儀，此

亦名為無漏律儀，由彼一切能往惡趣惡戒種子皆永害故。

亥二、釋聖愛名<sup>2</sup> 天一、問

問：何故此名聖所愛戒？

天二、答<sup>2</sup> 地一、明獲得

答：以諸聖者、賢善、正至，長時愛樂、欣慕、悅意：我於何時當正獲得諸語惡行、諸身惡行、諸邪命事不作律儀？由彼長夜於此尸羅深心愛樂、欣慕、悅意，故獲得時，名聖所愛。

地二、明不作

獲得如是聖愛戒已，終不正知而說妄語，終不故思害眾生命，終不故思不與而取，終不故思行欲邪行，終不非法求衣服等。

亥三、結通修道

即由如是聖所愛戒增上力故，於修道時，乃至所有語業、身業、養命事轉，亦得名為正語、業、命。

酉四、正精進

依止正見及正思惟、正語、業、命勤修行者，所有一切欲、勤、精進、出離勇猛、勢力發起、策勵其心，相續無間，名正精進。

酉五、正念正定

成就如是正精進者，由四念住增上力故，得無顛倒九種行相所攝正念，能攝九種行相心住，是名正念及與正定。

午三、明建立<sup>2</sup> 未一、遍攝一切<sup>3</sup> 申一、標

如是一切八支聖道，總立二種。

申二、列

謂無所作及住所作。

申三、釋<sup>2</sup> 酉一、無所作

無所作者，謂正語、正業、正命。

酉二、住所作<sup>3</sup> 戌一、標

住所作者，復有二種。

戌二、列

謂奢摩他、毗鉢舍那。

戌三、配

正見、正思惟、正精進是毗鉢舍那，正念、正定是奢摩他。

謂無所作及住所作者：不作律儀，名無所作。住時所作，名住所作。

未二、料簡無作<sup>2</sup> 申一、顯修道攝

如是清淨正語、業、命為所依止，於時時間修習止觀，能斷諸結。無餘永斷，能得最上阿羅漢果。長時相續，名為修道，多時串習斷煩惱故。

申二、簡除見道

率爾智生，名為見道，暫時智起，即能永斷諸煩惱故。由是因緣，正語、業、命，於修道中方始建立。

卯三、結

由如是等，漸次修習三十七種菩提分法加行方便，是名菩提分修。

子十三、修果<sup>2</sup> 丑一、正明修果<sup>5</sup> 寅一、徵

云何修果？

寅二、標

謂四沙門果。

寅三、列

一、預流果，二、一來果，三、不還果，四、最上阿羅漢果。

寅四、釋<sup>2</sup> 卯一、總釋名<sup>2</sup> 辰一、徵

此中云何名沙門？云何名果？

辰二、釋<sup>2</sup> 巳一、第一義

謂聖道名沙門，煩惱斷名果。

巳二、第二義

又後生道或中或上，是前生道所生之果。

卯二、別建立<sup>2</sup> 辰一、問

問：何故建立如是四果？

辰二、答<sup>2</sup> 巳一、標

答：對治四種諸煩惱故。

巳二、釋<sup>2</sup> 午一、初果<sup>3</sup> 未一、明對治

謂諸無事能感惡趣、往惡趣因煩惱斷故，及能斷彼對治生故，立預流果。

謂諸無事等者：謂若煩惱唯分別起，緣煩惱生，不緣事轉，是名無事煩惱。此即見性煩惱應知。

未二、會經說<sup>2</sup> 申一、釋義<sup>3</sup> 酉一、標

而薄伽梵說永斷三結立此果者，謂依三品，有三種結，障礙聖道令不生故。

酉二、列

一、在家品，二、惡說法毗奈耶品，三、善說法毗奈耶品。

酉三、釋<sup>3</sup> 戌一、薩迦耶見

依在家品，有薩迦耶見。由此見故，先生怖畏，最初不欲發趣聖道。

戌二、戒禁取

依惡說法毗奈耶品，有戒禁取。由此取故，雖已發趣，而行邪僻，由是不能生起聖道。

戌三、疑

依善說法毗奈耶品，有疑。由此疑故，雖已發趣，不行邪僻，而於正道未串習故，於如實見所知事中猶豫疑惑，障礙聖道不令生起。

申二、結立

由是因緣，唯說斷此，立預流果。

未三、顯彼生

此預流果極餘七有，由是因緣，多生相續。

午二、餘果<sup>2</sup> 未一、明對治<sup>3</sup> 申一、一來果<sup>2</sup> 酉一、標

若斷再生相續煩惱，生無重續，立一來果。



西二、釋

謂若永斷天有所攝、人有所攝再生相續所有煩惱，極唯更受天有一生、人有一生，故於爾時立一來果。

若斷再生相續煩惱等者：唯餘欲界天有一生、人有一生煩惱因性，名斷再生相續煩惱。來生此間，唯受天有一生、人有一生，依此說言生無重續，名一來果。

申二、不還果

若己永斷能感還來生此煩惱，唯於天有當可受生，即於爾時立不還果。

申三、阿羅漢果

若己永斷一切能感生有煩惱，建立最上阿羅漢果。

未二、引經說

而薄伽梵說：永斷三結，薄貪瞋癡，立一來果。

薄貪瞋癡者：顯揚論云：謂以籌慮作意觀察境時，心生於捨，無習向心、

無習趣心、無習著心，應知是人三毒微薄。（顯揚論三卷十一頁）此應準知。

永斷能順五下分結，立不還果。永斷一切煩惱究竟，建立最上阿羅漢果。

寅五、結

是名修果。

丑二、兼顯修人<sup>2</sup> 寅一、略顯一切<sup>2</sup> 卯一、明證心住<sup>2</sup> 辰一、為淨行

又於此中，貪、瞋、癡、慢、尋思行者，彼先應於淨行所緣淨修其行，然後方證心正安住。彼於各別所緣境界，定由所緣差別勢力，勤修加行。

辰二、隨愛樂<sup>2</sup> 巳一、舉等分行

若等分行補特伽羅，隨所愛樂，攀緣彼境勤修加行。如是勤修，唯令心住，非淨其行。

巳二、例薄塵行

如等分行補特伽羅，薄塵行者，當知亦爾。

卯二、加行差別<sup>2</sup> 辰一、標

而彼諸行，有其差別。

辰二、釋<sup>3</sup> 巳一、貪等行

謂貪等行者勤修行時，要經久遠，方證心住。

巳二、等分行

等分行者勤修行時，不甚久遠，能證心住。

巳三、薄塵行

薄塵行者勤修行時，最極速疾，能證心住。

寅二、廣辨二人<sup>2</sup> 卯一、問

問：前已廣說有貪等行補特伽羅行相差別，其等分行及薄塵行補特伽羅，有何行相？

卯二、答<sup>2</sup> 辰一、等分行者

答：等分行者，如貪等行補特伽羅所有行相，一切具有；然彼行相非上、非

勝，如貪等行。隨所遇緣，有其差別，施設此行與彼相似。

隨所遇緣有其差別等者：所緣境事，有下中上三品差別，如所遇緣煩惱生起，能緣行相與境相似，是故名為等分行者。

辰二、薄塵行者<sup>3</sup> 巳一、標列

其薄塵行補特伽羅行相差別者，謂無重障，最初清淨，資糧已具，多清淨信，成就聰慧，具諸福德，具諸功德。

巳二、隨釋<sup>7</sup> 午一、無重障<sup>4</sup> 未一、標

無重障者，謂無三障。

未二、徵

何等為三？

未三、列

一者、業障，二、煩惱障，三、異熟障。

未四、釋<sup>3</sup> 申一、業障<sup>2</sup> 酉一、出體

言業障者，謂五無間業，及餘所有故思造業諸尤重業。

酉二、明障

彼異熟果若成熟時，能障正道，令不生起，是名業障。

申二、煩惱障<sup>2</sup> 酉一、出體

煩惱障者，謂猛利煩惱、長時煩惱。

酉二、明障

由此煩惱，於現法中，以其種種淨行所緣不能令淨，是名煩惱障。

申三、異熟障<sup>2</sup> 酉一、釋<sup>2</sup> 戌一、生無暇

異熟障者，謂若生處，聖道依彼不生不長，於是生處異熟果生。

戌二、根有闕

或有生處，聖道依彼雖得生長，而於其中異熟果生，聾駃愚鈍，盲瞽瘡痂，以手代言，無有力能解了善說、惡說法義。

酉二、結

是名異熟障。

午二、最初清淨<sup>2</sup> 未一、標列

最初清淨者，謂善淨戒及正直見。

未二、隨釋<sup>2</sup> 申一、善淨戒

由十因緣，戒善清淨，如前應知。

申二、正直見<sup>3</sup> 酉一、標相

正直見者，謂若有見，淨信相應故、勝解相應故、遠離誑諂故、善思法義無惑無疑加行出離故，名為正直。

酉二、釋義<sup>4</sup> 戌一、淨信相應

如是正直見，淨信相應故，於佛正法及毗奈耶不可引奪。

戌二、勝解相應

勝解相應故，於諸如來及聖弟子不可思議威德神力、不可思議生處差別、

不可思議生處差別者：謂有情生及所依處，是名生處差別，此不應思。顯

揚論說：世共了知，現成相故，乃至廣說。（顯揚論十七卷八頁）謂即有情世間、器世間不可思議應知。

### 甚深法教、

甚深法教者：謂諸如來所說法教，空性甚深、緣起甚深，是名甚深法教。於此少分，仰推如來，言如是法是佛所行，非我境界，是名勝解相應。

### 不可記事，

不可記事者：決擇分說，有不可記事教，謂由四因緣故，宣說如是不可記事，乃至廣說。（陵本六十四卷七頁<sup>5100</sup>）此應準知。

### 深生勝解，無驚、無恐、無有怖畏。

### 戌三、遠離誑詔

遠離誑詔故，其見正直，是正直類，如其聖教而正修行，如其真實而自顯發。

如其真實而自顯發者：謂如有犯，如實發露，速疾悔除故。

### 戌四、善思加行

善思法義無惑無疑加行出離故，於一切法無常、苦、空、無我等義，善正思惟、善正籌量、善正觀察。由是為因，無惑無疑，遠離二路，逮得昇進。

酉三、結名

由此四相，先所說見，名正直見。

遠離二路者：於去來今及諦寶等，心懷二分，迷之不了，是名二路。此即是疑行相應知。無惑疑故，說名遠離。

午三、資糧已具<sup>2</sup> 未一、指廣

資糧已具者，廣說資糧，如前應知。

廣說資糧如前應知者：此如前說二道資糧，已廣分別應知。（陵本二十二

卷二頁<sup>1892</sup>）

未二、略說<sup>3</sup> 申一、標

略有四種。

申二、列



一、福德資糧，二、智慧資糧，三、先世資糧，四、現法資糧。

申三、釋<sup>4</sup> 酉一、福德資糧

福德資糧者，謂由此故，於今獲得隨順資具、豐饒財寶，遇真福田為善知識，離諸障礙，能勤修行。

於今獲得隨順資具等者：謂如出家獲得如法衣服、飲食、諸坐臥具、病緣醫藥，隨順淨命，正修梵行，是名隨順資具。生豪貴家，財寶具足，是名豐饒財寶。若生聖處，賢良、正至、善士皆往遊涉，能為善友，具善友性，是名遇真福田為善知識。離三重障，聖道得生，是名離諸障礙，能勤修行。

酉二、智慧資糧

智慧資糧者，謂由此故，成就聰慧，有力有能解了善說、惡說法義，獲得隨順法教、義教、教授教誡。

獲得隨順法教等者：知苦、斷集、證滅、修道，是名隨順法教。真義理

門，是名隨順義教。隨順教授教誡，如前已說。（陵本二十五卷四頁2082）

酉三、先世資糧

先世資糧者，謂由宿世積集善根，於今獲得諸根成熟。

酉四、現法資糧

現法資糧者，謂於今世有善法欲、諸根成熟、具戒律儀及根律儀，如前廣說。

午四、多清淨信<sup>2</sup> 未一、略說<sup>2</sup> 申一、舉大師

多清淨信者，謂於大師所無惑無疑，深生淨信及以勝解。

申二、例法等

如於大師，於法、於學亦復如是。

未二、指廣

其餘廣說，如前應知。

於法於學等者：法，謂四聖諦法。學，謂三無漏學。於誨、於證，名餘廣說。如前三摩呬多地說應知。（陵本十一卷五頁852）

午五、成就聰慧

成就聰慧者，謂由此故，於法於義速能領受；經久遠時，於法於義能無忘失，於法於義速能通達。

午六、具諸福德

具諸福德者，謂由此故，形色端嚴，眾所樂見，發清淨信，無病長壽，言辭敦肅，具大宗葉，眾所知識，成就大福，多獲衣等諸資生具，為諸國王及大臣等供養、恭敬、尊重、讚歎。

具諸福德等者：此中略顯成就福德異熟。形色端嚴，眾所樂見，當知此以惠施光明、鮮淨衣物為因。由是令他發清淨信。無病長壽，當知此以惠施飲食，及於眾生不加傷害為因。言辭敦肅，當知此以遠離四種不善語業為因。具大宗葉，當知此以捨離憍慢為因。眾所知識乃至尊重讚歎，當知此以供養三寶及諸尊長為因。

午七、具諸功德

具諸功德者，謂本性成就極少欲等種種功德。如前所說沙門莊嚴，應知其相。

巳三、總結

如是等類，應知是名諸薄塵行補特伽羅行相差別。

子十四、補特伽羅異門<sup>3</sup> 丑一、徵

云何補特伽羅異門？

丑二、釋<sup>4</sup> 寅一、標

謂有六種。

寅二、徵

何等為六？

寅三、列

一、沙門，二、婆羅門，三、梵行，四、苾芻，五、精勤，六、出家。

寅四、釋<sup>6</sup> 卯一、沙門<sup>4</sup> 辰一、標

第一沙門復有四種。

辰二、徵

何等為四？

辰三、列

一、勝道沙門，二、說道沙門，三、活道沙門，四、壞道沙門。

辰四、釋<sup>2</sup> 巳一、辨種類<sup>2</sup> 午一、第一義<sup>2</sup> 未一、略標

當知諸善逝，名勝道沙門；諸說正法者，名說道沙門；諸修善行者，名活道沙門；諸行邪行者，名壞道沙門。

未二、隨釋<sup>4</sup> 申一、諸善逝

諸善逝者，謂已證得貪瞋癡等無餘永盡。

申二、說正法

說正法者，謂為調伏貪瞋癡等，宣說正法。

申三、修善行

修善行者，謂為調伏貪瞋癡等，勤修正行。

申四、行邪行

行邪行者，謂犯尸羅，行諸惡法。

午二、第二義<sup>4</sup> 未一、勝道沙門<sup>2</sup> 申一、標名

又學無學名勝道沙門。

申二、釋義

以無漏道摧滅一切見、修所斷諸煩惱故。

又學無學名勝道沙門等者：此與前別，前說勝道唯無學故。

未二、說道沙門<sup>2</sup> 申一、標名

若無如來及諸菩薩，為菩提故勤修正行，諸聲聞眾持三藏者，名說道沙門。

申二、釋義

任持世俗法毗奈耶，轉正法眼令不斷故。

若無如來及諸菩薩等者：此與前別，前說正法，通說如來，及諸菩薩、聲聞眾故。

未三、活道沙門<sup>2</sup> 申一、標名

若諸異生補特伽羅，其性調善，為自利益勤修正行，有羞有悔，愛樂正學，為得未得、為觸未觸、為證未證勤修加行，有力有能堪得未得、堪觸未觸、堪證未證，名活道沙門。

申二、釋義

由彼現有諸善法煖，堪能生長聖慧命根，名活，非死，是故名為活道沙門。

若諸異生補特伽羅等者：此與前別，前修正行通說凡聖一切位故。

未四、壞道沙門<sup>2</sup> 申一、標名

若諸犯戒補特伽羅，多行惡法，廣說乃至實非梵行自稱梵行，名壞道沙門。

申二、釋義

由彼破壞最初所有正道根本，無力無能，非生道器。雖現前有說正道教，及現前有證正道者，而彼不得，是故名為壞道沙門。

若諸犯戒補特伽羅多行惡法等者：此中犯戒，多行惡法，又復內懷朽敗，

外現真實，如水所生雜穢蝸牛、螺音狗行。實非沙門，自稱沙門；非行梵行，自稱梵行。如是廣說，攝異門分中一一別釋。（陵本八十四卷十五頁<sup>6396</sup>）此戒學攝，是故說言破壞最初所有正道根本。

巳二、明建立<sup>2</sup> 午一、簡外

世尊依彼作如是說：此初沙門，廣說乃至第四沙門，於外沙門、婆羅門教空無所有。

午二、顯內

若於是處，八支聖道安立可得；即於是處有初沙門，廣說乃至第四沙門。

卯二、婆羅門<sup>3</sup> 辰一、標

第二婆羅門復有三種。

辰二、列

一、種性婆羅門，二、名想婆羅門，三、正行婆羅門。

辰三、釋<sup>3</sup> 巳一、種性婆羅門



種性婆羅門者，謂若生在婆羅門家，從母產門之所生出，父母圓備，名婆羅門。

巳二、名想婆羅門

名想婆羅門者，謂諸世間，由想等想，假立言說，名婆羅門。

由想等想假立言說者：構了相是想相，了取彼彼生類、種姓等相差別，是名等想。由此為先，施設言說，此是婆羅門，依此建立名想婆羅門。

巳三、正行婆羅門<sup>2</sup> 午一、釋

正行婆羅門者，謂所作事決定究竟，己能驅擯惡不善法。

午二、證

如說：當知婆羅門，更無有所作；所作事已辦，是謂婆羅門。

卯三、梵行<sup>3</sup> 辰一、標

第三梵行復有三種。

辰二、列

一、受遠離梵行，二、暫時斷梵行，三、畢竟斷梵行。

辰三、釋<sup>3</sup> 已一、受遠離梵行

受遠離梵行者，謂能受學遠離一切行非梵行習婬欲法。

已二、暫時斷梵行

暫時斷梵行者，謂諸異生，由世間道離欲界欲。

已三、畢竟斷梵行

畢竟斷梵行者，謂諸聖者得不還果，復得最上阿羅漢果。

謂諸聖者得不還果等者：若不還果，非梵行貪已永斷故，說名梵行已立。

今依此義，說彼畢竟斷梵行。若阿羅漢，八支聖道已善清淨，是故亦說畢竟斷梵行。

卯四、苾芻<sup>2</sup> 辰一、標

第四苾芻復有五種。

辰二、列

一、乞丐苾芻，二、自稱苾芻，三、名想苾芻，四、破壞煩惱苾芻，五、白四羯磨受具足戒苾芻。

卯五、精勤<sup>2</sup> 辰一、總標

第五精勤復有三種。

辰二、列釋<sup>3</sup> 巳一、止息犯戒精勤

一、止息犯戒精勤，謂能遠離一切不善身業、語業。

巳二、止息境界精勤

二、止息境界精勤，謂密護根門，修防守念及常委念，如前廣說。

巳三、止息煩惱精勤<sup>2</sup> 午一、廣一切

三、止息煩惱精勤，謂能永斷見、修所斷一切煩惱，及於一切先所生起，或欲尋思、或恚尋思、或害尋思、或貪、或瞋、或諸邪見、或忿恨覆惱誑諂等，能往惡處那落迦等諸險惡趣非沙門法，隨所生起能不忍受，尋即斷滅、除遣、變吐。

午二、略二種

當知此中，略有二種止息煩惱。一、止息隨眠，二、止息諸纏。

略有二種止息煩惱等者：謂若永斷見、修所斷一切煩惱，及於一切惡不善法能為變吐，是名止息隨眠。若於一切惡不善法能不受，斷滅、除遣，是名止息諸纏。

卯六、出家<sup>3</sup> 辰一、標

第六出家復有二種。

辰二、列

一、於善說法毗奈耶中而出家者，二、於惡說法毗奈耶中而出家者。

辰三、釋<sup>2</sup> 巳一、內道<sup>2</sup> 午一、名義出家

於善說法毗奈耶中而出家者，謂苾芻、苾芻尼、式叉摩那、沙彌、沙彌尼。

午二、真實出家

又若自能出離身中所有的一切惡不善法，當知是名真實出家。

巳二、外道<sup>2</sup> 午一、標

於惡說法毗奈耶中而出家者，謂諸外道。

午二、釋<sup>2</sup> 未一、舉增上

或全無衣、或壞色衣、或塗灰等增上外道。

未二、舉所餘

復有所餘如是等類眾多外道。

丑三、結

是故說言：若諸沙門、若婆羅門、若修梵行、若諸苾芻、若精勤者、若出家者，如是一切，是數取趣所有異門。

子十五、幾種補特伽羅<sup>4</sup> 丑一、總標<sup>2</sup> 寅一、種類

補特伽羅略有八種。

寅二、建立因緣

建立因緣略有四種。

丑二、別列<sup>2</sup> 寅一、八種補特伽羅<sup>2</sup> 卯一、徵

云何八種補特伽羅？

卯二、列

一、有堪能者，二、無堪能者，三、善知方便者，四、不善知方便者，五、有無間修者，六、無無間修者，七、已串修習者，八、未串修習者。

寅二、四種建立因緣<sup>3</sup> 卯一、徵

云何四種補特伽羅建立因緣？

卯二、標

謂由四種差別因緣，建立八種補特伽羅。

卯三、列

一、由根差別故，有根已成熟及根未成熟。

有根已成熟及根未成熟者：此已成熟及未成熟，如前種性地中已說應知。

（陵本二十一卷十五頁<sup>1862</sup>）

二、由瑜伽差別故，有善知瑜伽及不善知瑜伽。三、由加行差別故，有有無間、殷重修，及無無間、殷重修。四、由時差別故，有已長時修道及未長時修道。

丑三、配釋<sup>3</sup> 寅一、徵

云何如是四種差別能為前八補特伽羅建立因緣？

寅二、配<sup>4</sup> 卯一、由根差別

謂根已成熟即有堪能者，根未成熟即無堪能者。

卯二、由瑜伽差別

善知瑜伽即善知方便者，不善知瑜伽即不善知方便者。

卯三、由加行差別

有無間、殷重修即有無間修者，此亦名為有常委修；無無間、殷重修即無無間修者，此亦名為無常委修。

卯四、由時差別

已長時修道即已串修習者，未長時修道即未串修習者。

寅三、結

如是名為由根差別、瑜伽差別、加行差別及時差別，建立八種補特伽羅。

丑四、料簡<sup>5</sup> 寅一、根未成熟

若諸所有補特伽羅根未成熟，彼於所有善知方便、有無間修、已串修習，如理、如法、如其善巧，皆不能辦。

如理如法如其善巧等者：理，謂觀待等四種道理。法，謂苦等四聖諦法。

善巧，謂蘊、界等六種善巧。不能如佛施設開示無倒而知，名不能辦。

寅二、未善方便

若諸所有補特伽羅根雖成熟，而未善知善巧方便，於諸所有亦不能辦。

寅三、無無間修

若諸所有補特伽羅根已成熟，善知方便，無無間修，即不能得速疾通慧。

寅四、未串修習



若諸所有補特伽羅根已成熟，善知方便，有無間修，未串修習，即於所有自己所作事未得成辦。

寅五、已串修習

若諸所有補特伽羅根已成熟，善知方便，有無間修，已串修習，彼於所有皆能成辦，亦能獲得速疾通慧，於其所有自所作事已得成辦。

子十六、幾種魔及魔事<sup>2</sup> 丑一、總標

當知諸魔略有四種，魔所作事有無量種，勤修觀行諸瑜伽師，應善遍知，當正遠離。

丑二、別辨<sup>2</sup> 寅一、諸魔<sup>3</sup> 卯一、徵

云何四魔？

卯二、列

一、蘊魔，二、煩惱魔，三、死魔，四、天魔。

卯三、釋<sup>2</sup> 辰一、辨種類<sup>4</sup> 巳一、蘊魔

蘊魔者，謂五取蘊。

已二、煩惱魔

煩惱魔者，謂三界中一切煩惱。

已三、死魔

死魔者，謂彼彼有情，從彼彼有情眾，天喪殞歿。

彼彼有情從彼彼有情眾者：謂那落迦等有情，名彼彼有情。彼一切種類，名彼彼有情眾。

已四、天魔

天魔者，謂於勤修勝善品者，求欲超越蘊、煩惱、死三種魔時，有生欲界最上天子，得大自在，為作障礙，發起種種擾亂事業，是名天魔。

有生欲界最上天子者：有尋有伺地說：復有摩羅天宮，即他化自在天攝，然處所高勝。（陵本四卷三頁<sup>270</sup>）此於欲界，名為最上應知。

辰二、明建立<sup>2</sup> 已一、標義

當知此中，若死所依；若能令死；若正是死；若於其死作障礙事，不令超越。依此四種建立四魔。

已二、別釋<sup>4</sup> 午一、死所依

謂依已生、已入現在五取蘊故，方有其死。

午二、能令死

由煩惱故，感當來生，生已便有夭喪殞歿。

午三、正是死

諸有情類命根盡滅、夭喪殞歿，是死自性。

午四、障超死<sup>2</sup> 未一、略標

勤修善者，為超死故正加行時，彼天子魔得大自在，能為障礙。由障礙故，或於死法令不能出；或經多時，極大艱難，方能超越。

未二、別顯<sup>2</sup> 申一、辨相<sup>2</sup> 酉一、暫不自在

又魔於彼或有暫時不得自在。謂世間道離欲異生，或在此間，或生於彼。

或在此間或生於彼者：謂生欲界，依欲界身離欲界欲，名在此間。若生色無色界諸離欲地，名生於彼。

酉二、得大自在

或魔於彼得大自在。謂未離欲。

申二、釋義<sup>2</sup> 酉一、於未離欲

若未離欲，在魔手中隨欲所作。

酉二、於暫離欲

若世間道而離欲者，魔縛所縛，未脫魔羅，由必還來生此界故。

魔縛所縛未脫魔羅者：攝事分說：煩惱隨眠未永拔故，雖世間道方便逃避遠至有頂，復執將還。可愛妙欲譬之九結，由彼結故，令於生死自然樂著，於自繫縛不欲解脫。（陵本八十五卷十五頁<sup>6461</sup>）此中道理，應如是知。

寅二、魔事<sup>3</sup> 卯一、徵

云何魔事？

卯二、釋<sup>4</sup> 辰一、障正發趣<sup>5</sup> 巳一、捨善法欲

謂諸所有能引出離善法欲生，耽著諸欲增上力故，尋還退捨。當知此即是為魔事。

巳二、不護根門

若正安住密護根門，於諸所有可愛色聲香味觸法，由執取相、執取隨好，心樂趣入。當知此即是為魔事。

巳三、食不知量

若正安住於食知量，於諸美味不平等食，由貪愛欲，心樂趣入。當知此即是為魔事。

巳四、貪樂臥眠

若正安住精勤修習初夜後夜恬寤瑜伽，於睡眠樂、於偃臥樂、於脅臥樂，由懈怠力，心樂趣入。當知此即是為魔事。

巳五、不住正知等<sup>2</sup> 午一、列<sup>4</sup> 未一、於母邑等

若正安住正知而住，於往來等諸事業時，若見幼少、盛年、美色諸母邑等，由不如理，執取相好，心樂趣入。

未二、於妙好事

或見世間諸妙好事，心樂趣入。

未三、於多事業

或於多事多所作中，心樂趣入。

未四、於相雜住

或見在家及出家眾歡娛雜處，或見惡友共相雜住，便生隨喜，心樂趣入。

午二、結

當知一切皆是魔事。

辰二、障生淨信

於佛法僧、苦集滅道、此世他世若生疑惑。當知一切皆是魔事。

辰三、障修遠離

住阿練若、樹下、塚間、空閑靜室，若見廣大可怖畏事，驚恐毛豎；或見沙門婆羅門像、人非人像欸爾而來，不如正理勸捨白品、勸取黑品。當知一切皆是魔事。

若見廣大可怖畏事等者：謂閑居時，或於塵霧，或昏夜分，見大雲氣，聞震雷音；或逢雹雨獅子虎豹；或遭凶猾竊劫抄虜；或遇非人來相撓逼；便生驚怖，身毛為豎。如思所成地中說。（陵本十八卷八頁<sup>1557</sup>）此說廣大可怖畏事，及與沙門婆羅門像、人非人像，如應準釋。

辰四、障莊嚴法

若於利養恭敬稱譽，心樂趣入；或於慳吝、廣大希欲、不知喜足、忿、恨、覆、惱及矯詐等沙門莊嚴所對治法，心樂趣入。當知一切皆是魔事。

或於慳吝廣大希欲等者：此中慳吝，謂於大師等不修供養，此由正信能為對治。廣大希欲、不知喜足，此由少欲、喜足能為對治。忿、恨、覆、

惱，此由堪忍能為對治。及矯詐等，此由知量能為對治。等言，等取妄語、若假現相、若苦研逼、若利求利種種狀相應知。此中正信乃至知量，皆為沙門莊嚴所攝，如前已說。（陵本二十五卷十七頁<sup>2138</sup>）

卯三、結

如是等類無量無邊諸魔事業，一切皆是四魔所作。隨其所應，當正了知。

子十七、發趣無果<sup>5</sup> 丑一、標

由三因緣，正修行者精勤發趣，空無有果。

空無有果者：謂不獲得沙門果故。

丑二、徵

何等為三？

丑三、列

一、由諸根未積集故。

一由諸根未積集故者：此中諸根，謂信、精進、念等及慧。雖已趣入，而



未獲得轉上、轉勝、轉復微妙，於後後生展轉勝進，名未積集。

## 二、由教授不隨順故。

二由教授不隨順故者：謂於遠離寂靜瑜伽作意止觀，未能獲得無倒教授、漸次教授，名不隨順。

## 三、由等持力微劣故。

三由等持力微劣故者：謂雖已得三摩地，而未圓滿、自在故。

丑四、釋<sup>2</sup> 寅一、正顯無果<sup>3</sup> 卯一、根未積集

若有諸根猶未積集，雖復獲得隨順教授，彊盛等持；精勤發趣，空無有果。

卯二、教不隨順

若有諸根雖已積集，其等持力亦復彊盛，而不獲得隨順教授；精勤發趣，空無有果。

卯三、定力微劣

若有諸根雖已積集，亦復獲得隨順教授，而等持力若不彊盛；精勤發趣，空

無有果。

寅二、翻成有果

若有諸根已得積集，教授隨順，等持彊盛；精勤發趣，決定有果。

丑五、結

如是名為由三因緣，空無有果；由三因緣，決定有果。

瑜伽師地論科句披尋記卷第二十九

瑜伽師地論科句披尋記卷第三十

彌勒菩薩說

唐三藏沙門玄奘奉詔譯

韓清淨科記

本地分中聲聞地第三瑜伽處之一

辛三、安立瑜伽<sup>2</sup> 壬一、結前生後

如是已說補特伽羅品類、建立及所緣等，乃至趣修有果、無果。如應安立，我今當說。

壬二、標釋一切<sup>2</sup> 癸一、喩柁南標

總喩柁南曰：

往慶問尋求 方安立護養 遠離一境性 障淨修作意

癸二、長行釋<sup>5</sup> 子一、往問<sup>2</sup> 丑一、往詣師所<sup>3</sup> 寅一、標

若有自愛補特伽羅初修業者，始修業時，為隨證得自義利故，先應四處安住

正念，然後往詣善達瑜伽或軌範師、或親教師、或餘尊重、似尊重所。

寅二、徵

云何四處？

寅三、列

一、專求領悟，無難詰心處；二、深生恭敬，無憍慢心處；三、唯求勝善，非顯己能處；四、純為安立自他善根，非求利養恭敬名聞處。

純為安立自他善根等者：善達瑜伽諸瑜伽師，於彼一切初修業者，如理如法善巧宣說，能令得初正信、受持淨戒、攝受多聞、增長惠捨、調柔諸見，是名最初安立善根。初修業者，唯為彼瑜伽師堪能安立自他善根，往請教授，非為依護邪瑜伽師，貪求利養恭敬名聞。

丑二、請問瑜伽

如是正念到師處已，先求開許請問時分，然後安詳躬申請問。將請問時，偏覆左肩，右膝著地，或居下坐曲躬而坐，合掌恭敬，深生愧畏，低顏軟語請

問瑜伽：我於如是瑜伽行中欲求受學，唯願慈悲為我宣說。

子二、慶慰<sup>2</sup> 丑一、標所應

如是請已，善達瑜伽諸瑜伽師，為欲安立初修業者瑜伽作意，應以慈愍柔軟言詞讚勵慶慰，又應稱揚修斷功德。

丑二、舉歎詞<sup>2</sup> 寅一、讚勵慶慰<sup>2</sup> 卯一、總讚

歎言：善哉！善哉！

卯二、別慶<sup>9</sup> 辰一、於不放逸

賢首！汝今乃能於墮放逸、樂著放逸、沈沒境界、樂著境界眾生類中，獨不放逸，樂修出行。

於墮放逸樂著放逸等者：生豪貴家，財寶具足，於諸妙欲耽著受用，不見過患，不知出離，名放逸過。如前種性地說。（陵本二十一卷二頁<sup>1817</sup>）此說境界，謂諸妙欲。不見過患，是名沈沒。不知出離，是名樂著。如是應知。

辰二、於求解脫

汝今乃能於久墮在種種憂苦險惡牢獄眾生類中，獨求解脫如是牢獄。

墮在種種憂苦等者：此說墮諸惡趣，種種憂苦不令得出，如處牢獄應知。

辰三、於斷固縛

汝今乃能於彼種種貪瞋癡等柁械枷鎖常所固縛眾生類中，獨求斷壞如是固縛。

於彼種種貪瞋等者：此說一切世間貪瞋癡縛最極堅牢，令不逃避，恆時隨逐，終不解脫。如是顯示因處煩惱繫縛種種差別，喻如柁械枷鎖。

辰四、於超生死

汝今乃能於入生死曠野嶮道眾生類中，獨求超度曠野嶮道。

於入生死曠野嶮道等者：此中顯示，不了緣起、不修正行，猶如有人迷失道路，墮入曠野、或嶮道中，由是故有生死諸苦。緣起聖道經說：譬如有人遊行曠野、嶮穢稠林，欻然值遇舊道、舊徑、舊所行跡，古昔諸仙嘗所遊履，彼即尋行，乃至廣說。此中舊道、舊徑、舊所行跡，當知即是八聖

道支。與此相違，非道為道，是故喻如曠野嶮道。

辰五、於獲善根

汝今乃能於遭窮儉種種善根眾生類中，獨求獲得豐饒善根。

於遭窮儉種種善根等者：謂或信根、或精進根、或復念根、或復定根、或復慧根，是名種種善根。遭諸世間穢濁增時，有情世間多分見濁，虛妄推求邪法、邪義，匱乏善根，是名窮儉。

辰六、於證安隱

汝今乃能於墮種種煩惱怨賊、廣大怖畏眾生類中，獨求證得究竟安隱常樂涅槃。

於墮種種煩惱怨賊等者：謂三界中一切煩惱，說名種種煩惱怨賊。由煩惱故，感當來生，生已便有夭喪殞歿，是故煩惱名為怨賊。當來生苦常所隨逐，及為眾苦之所依止，由是說言廣大怖畏。

辰七、於證無病

汝今乃能於為煩惱重病吞食眾生類中，獨求證得第一無病常樂涅槃。

於為煩惱重病吞食等者：諸煩惱苦說名心病，望餘身病，難可對治，故名為重。諸眾生類隨彼而轉，不得自在，名為吞食。

辰八、於度瀑流

汝今乃能於為四種瀑流漂溺眾生類中，獨求越度如是瀑流。

辰九、於獲智明

汝今乃能於入廣大無明黑闇眾生類中，獨求獲得大智光明。

於入廣大無明黑闇等者：攝異門分說：無明者，於所知事不能善巧。黑闇者，於其實事不正了知。（陵本八十四卷二十頁<sup>6413</sup>）又智光明有五勝利，及德差別有十五種，如決擇分釋應知。（陵本七十卷一頁<sup>5449</sup>）

寅二、稱揚功德<sup>2</sup> 卯一、於修行

長老當知，汝若定能如是精勤修瑜伽行，乃得名為不虛受用國人信施，真實奉行如來聖教，不捨靜慮，成就勝觀，增長樂居空閑法侶，精勤修學自義瑜



伽，不辱有智同梵行者。

卯二、於樂欲

汝今為欲勤修自利利他正行，汝今為欲利益安樂無量眾生，哀愍世間及諸天、人阿素洛等，為令獲得義利安樂，故來問爾。

不捨靜慮成就勝觀者：謂時時間修習止相、舉相、捨相，隨得觸證所緣清淨、智遍清淨故。如前已說。（陵本二十六卷十八頁<sup>2224</sup>）

子三、審問<sup>2</sup> 丑一、標所應

以如是等柔軟言詞讚勵慶慰，稱揚修斷諸功德已，復於四種審問處法，應審問之。

丑二、舉告言<sup>4</sup> 寅一、於三寶所

告言：長老！汝已一向歸佛法僧，非外道師及彼邪法弟子眾不？

一向歸佛法僧等者：決擇分說：謂由五處觀察所歸，乃可歸依，乃至廣說。（陵本六十四卷一頁<sup>5071</sup>）此應準知。

寅二、於梵行等

汝已最初淨修梵行、善淨尸羅、正直見不？

最初淨修梵行等者：謂能受學遠離一切行非梵行習姪欲法，是名最初淨修梵行。戒善清淨，是名善淨尸羅。謂若有見，淨信相應故、勝解相應故、遠離誑諂故、善思法義無惑無疑加行出離故，名正直見。如前已說。（陵

本二十九卷十六頁<sub>2454</sub>）

寅三、於聖諦法

汝已於其總標、別辯諸聖諦法，若少、若多，聞受持不？

寅四、於真出家

汝於涅槃深心信解，為證寂滅而出家不？

子四、尋求<sub>3</sub> 丑一、略標

如是問已，彼若云：爾！次後復於四種處所，以四因緣應正尋求。

丑二、徵列<sub>2</sub> 寅一、四種處所

何等名為四種處所？一、應尋求其願，二、應尋求種性，三、應尋求其根，四、應尋求其行。

寅二、四種因緣

云何名為四種因緣？一、應以審問而正尋求，二、應以言論而正尋求，三、應以所作而正尋求，四、應以知他心差別智而正尋求。

丑三、配釋<sup>4</sup> 寅一、以審問<sup>2</sup> 卯一、尋求其願<sup>3</sup> 辰一、徵

云何名為應以審問尋求其願？

辰二、釋<sup>2</sup> 巳一、舉問詞

謂如是問：長老！於何已發正願？聲聞乘耶？獨覺乘耶？無上正等菩提乘耶？巳二、隨自答

彼得此問，隨自所願，當如是答。

辰三、結

如是名為應以審問尋求其願。

卯二、尋求種性根行<sup>2</sup> 辰一、徵

云何名為應以審問尋求種性及以根、行？

辰二、釋<sup>3</sup> 巳一、舉問詞<sup>2</sup> 午一、總

謂如是問：長老！於自種性、根、行能審察不？

午二、別<sup>3</sup> 未一、種性

謂我本來有何種性？聲聞乘耶？獨覺乘耶？大乘等耶？

未二、根

有何等根？為鈍？為中？為利根耶？

未三、行

有何等行？為貪行耶？為瞋行耶？廣說乃至尋思行耶？

巳二、如問答

彼若點慧，能自了知前後差別種性、根、行，善取其相，如問而答。

巳三、不能答

若性愚鈍，不能自知前後差別，乃至不能善取其相，由是不能如問而答。

能自了知前後差別種性根行等者：如先所問種性、根、行，前後相望種種差別，能自了知，及善取相，隨自所有而正答故。

寅二、以言論<sup>3</sup> 卯一、標

從此已後，應以言論尋求彼三。

卯二、釋<sup>3</sup> 辰一、尋求種性<sup>3</sup> 巳一、依聲聞乘<sup>2</sup> 午一、對彼說

謂對其前，應以顯了正理相應眾雜美妙易解言詞，說聲聞乘相應言論。

午二、觀彼相<sup>2</sup> 未一、信解

彼聞宣說此言論時，若身中有聲聞種性，於此言論便發最極踊躍歡喜，深生信解。

未二、不信解

若身中有獨覺種性、大乘種性，於此言論不發最極踊躍歡喜，不生信解。

應以顯了正理相應等者：善釋文句，是名顯了。與觀待等道理相應，是名

正理相應。助伴隨順，次第宣說，是名眾雜。其聲清美，是名美妙。顯然有趣，是名易解。如是等類說法語攝應知。

巳二、依獨覺乘<sup>2</sup> 午一、對彼說

次復為其說獨覺乘相應言論。

午二、觀彼相<sup>2</sup> 未一、信解

彼聞宣說此言論時，若身中有獨覺種性，於此言論便發最極踊躍歡喜，深生信解。

未二、不信解

若身中有聲聞種性、大乘種性，則不如是。

巳三、依菩薩乘<sup>2</sup> 午一、對彼說

後復為其宣說大乘相應言論。

午二、觀彼相<sup>2</sup> 未一、信解

彼聞宣說此言論時，若身中有大乘種性，於此言論便發最極踊躍歡喜，深生

信解。

未二、不信解

若身中有聲聞種性、獨覺種性，則不如是。

辰二、尋求其根<sup>3</sup> 巳一、鈍根

若有鈍根，雖聞宣說麤淺言論，而於法義勵力審思，方能領受解了通達。

巳二、利根

若有利根，雖聞宣說深細言論，而於法義速能領受解了通達。

巳三、中根

若有中根，則不如是。

雖聞宣說深細言論者：此中言論，謂如緣起等教應知。

辰三、尋求其行<sup>5</sup> 巳一、貪行

若有貪行，彼聞為說淨妙言論，便發最極淨信愛樂，悟入其趣；身毛皆豎，悲涕墮淚；其身外現潤滑相狀，其心內懷柔軟怡悅。

彼聞為說淨妙言論者：施論、戒論、生天之論，是名淨妙言論，感可愛生淨妙果故。

已二、瞋行

若有瞋行，當知一切與上相違。

已三、癡行<sup>2</sup> 午一、生怖畏

若有癡行，彼聞為說決定通達涅槃離染相應言論，便生最極驚恐怖畏。

午二、例鈍根

如說鈍根，如是癡行，當知亦爾。

彼聞為說決定通達等者：此中言論，謂即顯示諸行無常、諸法無我、涅槃寂靜法爾道理應知。依無常義，此說決定。依無我義，此說通達。依涅槃寂靜義，此說涅槃離染。

已四、慢行

若有慢行，彼聞為說正法言論，不甚恭敬屬耳樂聞，不極安住求欲領解奉教



行心。雖作方便引發其心，令受正化，而不分明發言稱善。

巳五、尋思行

若尋思行，彼聞為說正法言論，雖攝耳聽，而心散亂，惡受所受。凡所領受不堅不住，隨受隨失，數重請問。

卯三、結

如是名為應以言論尋求種性及以根、行。

寅三、以所作<sup>2</sup> 卯一、徵

云何名為應以所作尋求彼三？

卯二、釋

謂如前說聲聞種性，及貪等行補特伽羅所有相狀，是名所作。由此所作，如其所應，當正尋求種性、根、行。

謂如前說聲聞種性等者：種性地中，說有住種性相。又諸補特伽羅中，說有貪行等相。今指彼故，名如前說。

寅四、以知他心差別智<sup>2</sup> 卯一、徵

云何名為應以知他心差別智尋求種性及以根、行？

卯二、釋

謂如有一善達瑜伽修瑜伽師，已得知他心差別智。彼由如是他心智故，如實了知種性、根、行。

子五、安立<sup>4</sup> 丑一、標

於四種處，以四因緣正尋求已，復於五處如應安立。

丑二、徵

云何五處？

丑三、列

一、護養定資糧處，二、遠離處，三、心一境性處，四、障清淨處，五、修作意處。

丑四、釋<sup>4</sup>

寅一、護養定資糧處<sup>3</sup>

卯一、徵

云何護養定資糧？

卯二、釋<sup>2</sup> 辰一、舉戒律儀<sup>2</sup> 巳一、明護養

謂若成就戒律儀者，即於是處為令不退，住不放逸；如佛所誠、如佛所許，圓滿戒蘊學處差別，精進修行，常無懈廢。

巳二、顯堪能

如是能於已所證得尸羅相應學道無退，亦能證得先所未證尸羅相應殊勝學道。

辰二、例餘善法<sup>2</sup> 巳一、能防護

如說成就戒律儀，如是成就根律儀、於食知量、初夜後夜恬寤瑜伽、正知而住，如是乃至成就所有沙門莊嚴，隨所獲得資糧所攝善法差別，皆能防護令不退失。

巳二、能長養

於後勝進善法差別，為速圓滿，為如所說無增無減平等現行，發生樂欲，增上欣慕，恆常安住勇猛精進。

卯三、結

是名護養定資糧。

為如所說無增無減等者：前說於諸學處既得善巧及曉悟已，隨所教誨無增無減，復能受學，乃至廣說。（陵本二十二卷六頁<sup>1905</sup>）此應準知。

寅二、遠離處<sup>5</sup> 卯一、乘標

如是遠離順退分法，修習能順勝分法時，樂住遠離。

卯二、總徵

云何遠離？

卯三、略釋

謂處所圓滿、威儀圓滿、遠離圓滿，是名遠離。

如是遠離順退分法等者：若任放逸，是名順退分法。不生喜足，是名順勝分法。

卯四、廣顯<sup>3</sup>

辰一、處所圓滿<sup>2</sup>

巳一、徵

云何處所圓滿？

巳二、釋<sup>2</sup> 午一、出處所<sup>2</sup> 未一、別顯<sup>2</sup> 申一、列

謂或阿練若、或林樹下、或空閑室。

申二、釋<sup>3</sup> 酉一、空閑室

山谷、巖穴、稻稈積等，名空閑室。

酉二、林樹下

大樹林中，名林樹下。

酉三、阿練若

空迴、塚間、邊際臥坐，名阿練若。

未二、總攝

當知如是山谷、巖穴、稻稈積等，大樹林中，空迴、塚間、邊際臥坐，或阿練若、或林樹下、或空閑室，總名處所。

午二、釋圓滿<sup>2</sup> 未一、標

處所圓滿復有五種。

未二、釋<sup>5</sup> 申一、第一處所圓滿

謂若處所，從本已來形相端嚴，眾所喜見，清淨無穢；園林池沼悉皆具足，清虛可樂；地無高下，處無毒刺，亦無眾多磚石瓦礫；能令見者心生清淨，樂住其中修斷加行；心悅、心喜，任持於斷。是名第一處所圓滿。

心悅心喜任持於斷者：謂於是處清虛可樂，心生歡悅，是名心悅。即是以是處為依，隨順加行，謂我定當成辦所作，心生喜悅，是名心喜。由是因緣，住不放逸，斷滅一切世間貪憂，是名任持於斷。

申二、第二處所圓滿

又若處所，晝無憤鬧，夜少音聲，亦少蚊蟲、風日、蛇蝎諸惡毒觸。是名第二處所圓滿。

申三、第三處所圓滿

又若處所，無惡師子、虎、豹、豺、狼、怨敵、盜賊、人非人等諸恐怖事；

於是處所，身意泰然，都無疑慮，安樂而住。是名第三處所圓滿。

申四、第四處所圓滿

又若處所，隨順身命眾具易得，求衣服等不甚艱難，飲食支持無所匱乏。是名第四處所圓滿。

申五、第五處所圓滿

又若處所，有善知識之所攝受，及諸有智同梵行者之所居止；未開曉處能正開曉，已開曉處更令明淨；甚深句義以慧通達，善巧方便殷勤開示，能令智見速得清淨。是名第五處所圓滿。

辰二、威儀圓滿<sup>3</sup> 巳一、徵

云何威儀圓滿？

巳二、釋<sup>2</sup> 午一、標相

謂於晝分經行、宴坐；於初夜分亦復如是；於中夜分右脅而臥；於後夜分疾還起，經行、宴坐。即於如是圓滿臥具，諸佛所許大小繩床、草葉座等結

加趺坐，乃至廣說。

午二、釋義<sup>3</sup> 未一、結加趺坐<sup>4</sup> 申一、徵因

何因緣故結加趺坐？

申二、總標

謂正觀見五因緣故。

申三、列釋<sup>5</sup> 酉一、速發輕安

一、由身攝斂速發輕安。如是威儀順生輕安最為勝故。

酉二、能經久時

二、由此宴坐能經久時。如是威儀不極令身速疲倦故。

酉三、是不共法

三、由此宴坐是不共法。如是威儀外道他論皆無有故。

酉四、形相端嚴

四、由此宴坐形相端嚴。如是威儀令他見已極信敬故。



酉五、佛等共許

五、由此宴坐佛佛弟子共所開許。如是威儀一切賢聖同稱讚故。

申四、結成

正觀如是五種因緣，是故應當結加趺坐。

未二、端身正願<sup>2</sup> 申一、別辨相<sup>2</sup> 酉一、端身

端身正願者，云何端身？謂策舉身令其端直。

酉二、正願

云何正願？謂令其心離諂離詐，調柔正直。

申二、離蓋障

由策舉身令端直故，其心不為惛沈睡眠之所纏擾。離諂詐故，其心不為外境散動之所纏擾。

未三、安住背念<sup>2</sup> 申一、徵

安住背念者，云何名為安住背念？

申二、釋<sup>2</sup> 酉一、第一義

謂如理作意相應念，名為背念，棄背違逆一切黑品故。

酉二、第二義

又緣定相為境念，名為背念，棄背除遣一切不定地所緣境故。

巳三、結

如是名為威儀圓滿。

辰三、遠離圓滿<sup>4</sup> 巳一、徵

云何遠離圓滿？

巳二、標

謂有二種。

巳三、列

一、身遠離，二、心遠離。

巳四、釋<sup>2</sup> 午一、身遠離

身遠離者，謂不與在家及出家眾共相雜住，獨一無侶，是名身遠離。

午二、心遠離

心遠離者，謂遠離一切染汙、無記所有作意，修習一切其性是善能引義利定地作意，及定資糧加行作意，是名心遠離。

遠離一切染汙無記所有作意等者：不如理作意，是名染汙作意。非如理非不如理作意，是名無記作意。此二作意說應遠離。如理作意其性是善，說應修習。此復有二，一、謂能引義利及與定地作意，二、謂定資糧及定加行作意。

卯五、結攝

如是此中，若處所圓滿、若威儀圓滿、若身遠離、若心遠離，總攝為一，說名遠離。

寅三、心一境性處及障清淨處<sup>2</sup>

卯一、別辨<sup>2</sup>

辰一、心一境性處<sup>3</sup>

巳一、出體性<sup>4</sup>

午一、徵

云何心一境性？

午二、標

謂數數隨念同分所緣，流注、無罪適悅相應，令心相續，名三摩地，亦名為善心一境性。

午三、釋<sup>4</sup>

未一、數數隨念<sup>2</sup> 申一、徵

何等名為數數隨念？

申二、釋

謂於正法聽聞受持，從師獲得教誡教授增上力故，令其定地諸相現前。緣此為境，流注、無罪適悅相應，所有正念隨轉安住。

未二、同分所緣<sup>2</sup> 申一、徵

云何名為同分所緣？

申二、釋<sup>2</sup> 酉一、辨相

謂諸定地所緣境界，非一眾多種種品類，緣此為境，令心正行，說名為定，

此即名為同分所緣。

緣此為境令心正行等者：謂於所知事同分所緣一切影像，平等平等任持心故。義如決擇分說。（陵本六十三卷八頁<sup>5044</sup>）

酉二、釋名<sup>2</sup> 戌一、問

問：此所緣境是誰同分，說為同分？

戌二、答

答：是所知事相似品類，故名同分。

未三、流注適悅相應

復由彼念，於所緣境無散亂行，無闕無間，無間、殷重加行適悅相應而轉，故名流注適悅相應。

於所緣境無散亂行等者：此即九種心住中專注一趣應知。由無色等十相令心散亂，說名無散亂行。

未四、無罪適悅相應

又由彼念，於所緣境無有染汙，極安隱住，熟道適悅相應而轉，故名無罪適悅相應。

於所緣境無有染汙等者：此即九種心住中等持應知。由無種種欲恚害等諸惡尋思、貪欲蓋等諸隨煩惱令心擾動，名無染汙。由無加行無功用任運轉道，說名極安隱住，熟道而轉。

午四、結

是故說言：數數隨念同分所緣，流注、無罪適悅相應，令心相續，名三摩地，亦名為善心一境性。

已二、辨品別<sup>3</sup> 午一、標

復次，如是心一境性，或是奢摩他品，或是毗鉢舍那品。

午二、辨

若於九種心住中心一境性，是名奢摩他品；若於四種慧行中心一境性，是名毗鉢舍那品。

午三、釋<sup>2</sup> 未一、九種心住<sup>2</sup> 申一、徵

云何名為九種心住？

申二、釋<sup>3</sup> 酉一、明體相<sup>2</sup> 戌一、略標

謂有苾芻，令心內住、等住、安住、近住、調順、寂靜、最極寂靜、專注一趣，及以等持，如是名為九種心住。

戌二、別顯<sup>9</sup> 亥一、內住

云何內住？謂從外一切所緣境界攝錄其心，繫在於內，令不散亂。此則最初繫縛其心，令住於內，不外散亂，故名內住。

從外一切所緣境界等者：色聲香味觸處，名外一切所緣境界。念增上力防護其心，不令趣入、流散、馳騁彼彼境中，是名攝錄其心。

亥二、等住

云何等住？謂即最初所繫縛心，其性麤動，未能令其等住、遍住故。

未能令其等住遍住故者：若心不能安住平等捨位，名未等住。若於所緣不

能遍攝令住，名未遍住。

次即於此所緣境界，以相續方便、澄淨方便，挫令微細，遍攝令住，故名等住。

以相續方便澄淨方便者：謂由無間、殷重加行，令心相續住一所緣，是名相續方便。止息諸惡尋思及隨煩惱，由是因緣令心清淨，是名澄淨方便。

亥三、安住

云何安住？謂若此心雖復如是內住、等住，然由失念於外散亂，復還攝錄安置內境，故名安住。

亥四、近住

云何近住？謂彼先應如是如是親近念住，由此念故，數數作意內住其心，不令此心遠住於外，故名近住。

謂彼先應如是如是親近念住者：如前已說，為守護念、為於境無染、為安住所緣，名為念住，乃至廣說由此三相，善住其念，故名念住。（陵本二



十八卷十七頁<sup>2383</sup>）今說如是如是親近念住，義應準知。言親近者，謂於此中，由正修習聞所成慧，故名親近。又由修習了相作意，故名親近。如攝事分說。（陵本八十六卷十七頁<sup>6536</sup>）

亥五、調順<sup>2</sup> 天一、徵

云何調順？

天二、釋<sup>2</sup> 地一、舉十相

謂種種相令心散亂，所謂色、聲、香、味、觸相，及貪、瞋、癡、男、女等相，故彼先應取彼諸相為過患想。

地二、顯調順

由如是想增上力故，於彼諸相折挫其心，不令流散，故名調順。

謂種種相令心散亂等者：此中色、聲、香、味、觸、貪、瞋、癡、男、女，說名色等十相。於如是事心起思惟，作用遽務，由是說言令心散亂。

亥六、寂靜<sup>2</sup> 天一、徵

云何寂靜？

天二、釋<sup>2</sup> 地一、舉尋蓋

謂有種種欲恚害等諸惡尋思、貪欲蓋等諸隨煩惱，令心擾動，故彼先應取彼諸法為過患想。

地二、顯止息

由如是想增上力故，於諸尋思及隨煩惱，止息其心，不令流散，故名寂靜。

亥七、最極寂靜

云何名為最極寂靜？謂失念故，即彼二種暫現行時，隨所生起諸惡尋思及隨煩惱，能不忍受，尋即斷滅、除遣、變吐，是故名為最極寂靜。

即彼二種暫現行時者：謂諸尋思及隨煩惱，名彼二種應知。

亥八、專注一趣

云何名為專注一趣？謂有加行、有功用，無闕無間三摩地相續而住，是故名為專注一趣。

亥九、等持

云何等持？謂數修、數習、數多修習為因緣故，得無加行、無功用任運轉道。由是因緣，不由加行、不由功用，心三摩地任運相續，無散亂轉，故名等持。

酉二、配六力<sup>3</sup> 戌一、標

當知此中，由六種力，方能成辦九種心住。

戌二、列

一、聽聞力，二、思惟力，三、憶念力，四、正知力，五、精進力，六、串習力。

戌三、配<sup>5</sup> 亥一、由聞思力

初由聽聞、思惟二力，數聞數思增上力故，最初令心於內境住，及即於此相續方便、澄淨方便，等遍安住。

亥二、由憶念力

如是於內繫縛心已，由憶念力，數數作意攝錄其心，令不散亂，安住、近住。

亥三、由正知力

從此已後，由正知力調息其心，於其諸相、諸惡尋思、諸隨煩惱，不令流散，調順、寂靜。

亥四、由精進力

由精進力，設彼二種暫現行時，能忍受，尋即斷滅、除遣、變吐，最極寂靜、專注一趣。

亥五、由串習力

由串習力，等持成滿。

酉三、辨作意<sup>2</sup> 戌一、配九心住<sup>3</sup> 亥一、標

即於如是九種心住，當知復有四種作意。

亥二、列

一、力勵運轉作意，二、有間闕運轉作意，三、無間闕運轉作意，四、無功

## 用運轉作意。

當知復有四種作意等者：三摩呬多地說：力勵運轉作意皆所不攝。有間、有用運轉作意，乃至攝樂作意所攝。自然運轉作意，加行究竟及此果二作意攝。（陵本十一卷十九頁<sup>932</sup>）由是當知，九種心住通說未得作意及已得作意諸相差別。

## 亥三、配

於內住、等住中，有力勵運轉作意；於安住、近住、調順、寂靜、最極寂靜中，有有間闕運轉作意；於專注一趣中，有無間闕運轉作意；於等持中，有無功用運轉作意。

## 戌二、顯通二品<sup>2</sup> 亥一、奢摩他品

當知如是四種作意，於九種心住中，是奢摩他品。

## 亥二、毗鉢舍那品

又即如是獲得內心奢摩他者，於毗鉢舍那勤修習時，復即由是四種作意，方

能修習毗鉢舍那，故此亦是毗鉢舍那品。

未二、四種慧行<sup>2</sup> 申一、徵

云何四種毗鉢舍那？

申二、釋<sup>4</sup> 酉一、出體性<sup>2</sup> 戌一、略標

謂有苾芻，依止內心奢摩他故，於諸法中能正思擇、最極思擇、周遍尋思、周遍伺察，是名四種毗鉢舍那。

戌二、別顯<sup>4</sup> 亥一、能正思擇

云何名為能正思擇？謂於淨行所緣境界、或於善巧所緣境界、或於淨惑所緣境界，能正思擇盡所有性。

能正思擇盡所有性者：思擇諸事及彼自相，是名思擇盡所有性。

亥二、最極思擇

云何名為最極思擇？謂即於彼所緣境界，最極思擇如所有性。

最極思擇如所有性者：思擇諸法一切共相及品、時、理，是名思擇如所有

性。

亥三、周遍尋思

云何名為周遍尋思？謂即於彼所緣境界，由慧俱行有分別作意，取彼相狀，周遍尋思。

亥四、周遍伺察

云何名為周遍伺察？謂即於彼所緣境界，審諦推求，周遍伺察。

酉二、顯差別<sup>3</sup> 戌一、標

又即如是毗鉢舍那，由三門、六事差別所緣，當知復有多種差別。

戌二、釋<sup>2</sup> 亥一、由三門<sup>4</sup> 天一、徵

云何三門毗鉢舍那？

天一、列

一、唯隨相行毗鉢舍那，二、隨尋思行毗鉢舍那，三、隨伺察行毗鉢舍那。

天三、釋<sup>3</sup> 地一、唯隨相行

云何名為唯隨相行毗鉢舍那？謂於所聞所受持法，或於教授教誡諸法，由等引地如理作意，暫爾思惟，未思、未量、未推、未察，如是名為唯隨相行毗鉢舍那。

云何名為唯隨相行毗鉢舍那等者：此顯聞所成慧依止於文，但如其說，未善意趣，是故名為唯隨相行。

地二、隨尋思行

若復於彼思量推察，爾時名為隨尋思行毗鉢舍那。

地三、隨伺察行

若復於彼既推察已，如所安立復審觀察，如是名為隨伺察行毗鉢舍那。

天四、結

是名三門毗鉢舍那。

亥二、由六事<sup>2</sup> 天一、徵

云何六事差別所緣毗鉢舍那？



天二、釋<sup>2</sup> 地一、標列<sup>2</sup> 玄一、尋思

謂尋思時，尋思六事。一、義，二、事，三、相，四、品，五、時，六、理。

玄二、伺察

既尋思已，復審伺察。

地二、隨釋<sup>6</sup> 玄一、尋思於義

云何名為尋思於義？謂正尋思如是如是語，有如是如是義。如是名為尋思於義。

玄二、尋思於事

云何名為尋思於事？謂正尋思內外二事。如是名為尋思於事。

玄三、尋思於相

云何名為尋思於相？謂正尋思諸法二相。一者、自相，二者、共相。如是名為尋思於相。

玄四、尋思於品

云何名為尋思於品？謂正尋思諸法二品。一者、黑品，二者、白品。尋思黑品過失過患，尋思白品功德勝利。如是名為尋思於品。

玄五、尋思於時

云何名為尋思於時？謂正尋思過去、未來、現在三時。尋思如是事，曾在過去世；尋思如是事，當在未來世；尋思如是事，今在現在世。如是名為尋思於時。

玄六、尋思於理<sup>5</sup> 黃一、徵

云何名為尋思於理？

黃二、標

謂正尋思四種道理。

黃三、列

一、觀待道理，二、作用道理，三、證成道理，四、法爾道理。

黃四、釋<sup>4</sup> 字一、由觀待道理

當知此中，由觀待道理，尋思世俗以為世俗，尋思勝義以為勝義，尋思因緣以為因緣。

尋思世俗以為世俗等者：此中略有二種觀待，一、施設觀待，二、生起觀待。謂若諸法，言說所行施設世俗，非言所行施設勝義，是名施設觀待。若由諸因、諸緣勢力諸法得生，是名生起觀待。

字二、由作用道理

由作用道理，尋思諸法所有作用。謂如是如是法，有如是如是作用。

字三、由證成道理<sup>3</sup> 宙一、標

由證成道理，尋思三量。

宙二、列

一、至教量，二、比度量，三、現證量。

宙三、釋

謂正尋思如是如是義，為有至教不？為現證可得不？為應比度不？

字四、由法爾道理

由法爾道理，於如實諸法成立法性、難思法性、安住法性，應生信解，不應思議、不應分別。

黃五、結

如是名為尋思於理。

於如實諸法成立法性等者：無始時來理成就性，是名成立法性。諸法自性絕諸戲論，過言說道，是名難思法性。諸法安立以彼法性為因，是名安住法性。如前已說，由彼諸法本性應爾、自性應爾、法性應爾。（陵本二十五卷十頁<sup>2110</sup>）今應配釋。

戌三、結

如是六事差別所緣毗鉢舍那，及前三門毗鉢舍那，略攝一切毗鉢舍那。

酉三、明建立<sup>2</sup> 戌一、問

問：何因緣故，建立如是六事差別毗鉢舍那？

戌二、答<sup>4</sup> 亥一、標

答：依三覺故，如是建立。

亥二、徵

何等三覺？

亥三、列

一、語義覺，二、事邊際覺，三、如實覺。

亥四、釋<sup>2</sup> 天一、配六事

尋思義故，起語義覺；尋思其事及自相故，起事邊際覺；尋思共相、品、時、理故，起如實覺。

天二、攝所知

修瑜伽師唯有爾所知境界。所謂語義，及所知事盡所有性、如所有性。

酉四、釋所緣<sup>2</sup> 戌一、舉淨行所緣<sup>2</sup> 亥一、別顯<sup>5</sup> 天一、不淨所緣<sup>3</sup> 地一、徵

云何勤修不淨觀者，尋思六事差別所緣毗鉢舍那？

地二、釋<sup>6</sup> 玄一、尋思義<sup>2</sup> 黃一、釋

謂依不淨增上正法聽聞受持增上力故，由等引地如理作意，解了其義。知此不淨實為不淨，深可厭逆，其性朽穢，惡臭生臭。

黃二、結

由如是等種種行相，於先所聞依諸不淨所說正法，解了其義。如是名為於諸不淨尋思其義。

知此不淨實為不淨等者：攝異門分說：又不淨者，是其總句。言臭穢者，受用飲食變壞成故。屎尿不淨變壞所成，故名臭處。諸肉血等變壞所成，故名生臭。可厭逆者，受用姪欲變壞所成，可惡逆故。（陵本八十四卷一頁<sup>6354</sup>）此中諸義，隨應當釋。

玄二、尋思事

云何名為尋思彼事？謂彼如是解了義已，觀不淨物，建立二分，謂內及外。如是名為尋思彼事。

玄三、尋思相<sup>2</sup> 黃一、自相<sup>2</sup> 宇一、徵

云何名為尋思自相？

宇二、釋<sup>2</sup> 宙一、依內不淨<sup>2</sup> 洪一、釋<sup>2</sup> 荒一、舉一切

謂且於內身中所有朽穢不淨，發起勝解。了知身中有髮、毛等，廣說乃至腦膜、小便。

荒二、攝二界

復於如是身中所有多不淨物，攝為二界，發起勝解。所謂地界及以水界。始於髮、毛，乃至大便，起地勝解；始於淚、汗，乃至小便，起水勝解。

洪二、結

如是名為依內不淨尋思自相。

宙二、依外不淨<sup>3</sup> 洪一、標

復於其外諸不淨物，由青瘀等種種行相，發起勝解。

洪二、釋<sup>2</sup> 荒一、別顯行相<sup>8</sup> 日一、青瘀勝解<sup>2</sup> 月一、取相<sup>2</sup> 盈一、由見等

謂先發起青瘀勝解，或親自見、或從他聞、或由分別所有死尸。

盈二、舉種類

如是死尸，或男、或女、或非男女，或親、或怨、或是中庸，或劣、或中、或復是勝，

或劣或中或復是勝者：薄福德者，是名為劣。勝福德者，是名為勝。非劣非勝，是名為中。

或是少年、或是中年、或是老年。

月二、辨位

取彼相已，若此死尸死經一日，血流已盡，未至膿爛，於是發起青瘀勝解。

日二、膿爛勝解

若此死尸死經二日，已至膿爛，未生蟲蛆，於是發起膿爛勝解。

日三、爛壞膨脹勝解

若此死尸死經七日，已生蟲蛆，身體已壞，於是發起爛壞勝解、膨脹勝解。



日四、食噉勝解

若此死尸為諸狐狼、鴟梟、鵬鷺、烏鵲、餓狗之所食噉，於是發起食噉勝解。

日五、異赤勝解

即此死尸既被食已，皮肉血盡，唯筋纏骨，於是發起異赤勝解。

日六、分散勝解

若此死尸或被食噉，支節分離，散在處處，或有其肉，或無其肉，或餘少肉，於是發起分散勝解。

日七、骨勝解

若此死尸骨節分散，手骨異處、足骨異處、膝骨異處、髀骨異處、髕骨異處、髀骨異處、臂骨異處、脊骨異處、頷輪異處、齒髮異處、髑髏異處，見是事已，起骨勝解。

日八、鎖及骨鎖勝解

<sup>3</sup>

月一、別釋

<sup>2</sup>

盈一、鎖勝解

若復思惟如是骸骨共相連接而不分散，唯取麤相，不委細取支節屈曲，如是

爾時起鎖勝解。

盈二、骨鎖勝解

若委細取支節屈曲，爾時發起骨鎖勝解。

月二、異名<sup>4</sup> 盈一、標

又有二鎖。

盈二、列

一、形骸鎖，二、支節鎖。

盈三、釋

形骸鎖者，謂從血鎖脊骨，乃至髑髏所住。支節鎖者，謂臂、髀等骨連鎖，及髀、髀等骨連鎖。

盈四、配

此中形骸鎖，說名為鎖；若支節鎖，說名骨鎖。

月三、假實<sup>3</sup> 盈一、標

復有二種取骨鎖相。

盈二、列

一、取假名綵畫木石泥等所作骨鎖相，二、取真實骨鎖相。

盈三、釋

若思惟假名骨鎖相時，爾時唯名起鎖勝解，不名骨鎖。若思惟真實骨鎖相時，爾時名起骨鎖勝解。

荒二、配屬變壞<sup>3</sup> 日一、標

又即此外造色色相，三種變壞。

日二、列

一、自然變壞，二、他所變壞，三、俱品變壞。

日三、配<sup>3</sup> 月一、自然變壞

始從青瘀乃至膨脹，是自然變壞。

月二、他所變壞

始從食噉乃至分散，是他所變壞。

月三、俱品變壞

若骨、若鎖及以骨鎖，是俱品變壞。

洪三、結

若能如是如實了知外不淨相，是名尋思外諸所有不淨自相。

黃二、共相<sup>3</sup> 字一、徵

云何尋思不淨共相？

字二、釋

謂若內身，外淨色相未有變壞；若在外身，不淨色相已有變壞。由在內身不淨色相平等法性、相似法性，發起勝解。能自了知我淨色相亦有如是同彼法性；若諸有情成就如是淨色相者，彼淨色相亦有如是同彼法性；譬如在外不淨色相。

字三、結

是名尋思不淨共相。

謂若內身外淨色相未有變壞等者：謂若內身相續住時，成就皮分相似清淨，是名外淨色相未有變壞。然是無常，於命終已，定當變壞，如彼外身青瘀等相不淨現前。由自他身平等法性、相似法性理應爾故。

玄四、尋思品<sup>3</sup> 黃一、徵

云何名為尋思彼品？

黃二、釋<sup>2</sup> 字一、品類攝<sup>2</sup> 宙一、黑品

謂作是思：若我於彼諸淨色相不淨法性不如實知，於內、於外諸淨色相發起貪欲，

於內於外諸淨色相發起貪欲者：謂緣於內自有情數身淨色相起自體貪，及緣於外他有情數身淨色相起有情貪故。

便為顛倒，黑品所攝，是有誚法，有苦、有害、有諸災患、有遍燒惱。由是因緣，發起當來生老病死愁歎憂苦種種擾惱。

宙二、白品

若我於彼諸淨色相不淨法性如實隨觀，便無顛倒，白品所攝，是無諍法，無苦、無害，廣說乃至由此因緣，能滅當來生老病死，乃至擾惱。

字二、正斷別<sup>2</sup> 宙一、於黑品

若諸黑品，我今於彼不應忍受，應斷、應遣。

宙二、於白品

若諸白品，我今於彼未生應生；生已令住，增長廣大。

黃三、結

如是名為尋思彼品。

玄五、尋思時<sup>3</sup> 黃一、徵

云何名為尋思彼時？

黃二、釋<sup>2</sup> 字一、思擇二相

謂作是思：若內所有諸淨色相，在現在世；若外所有不淨色相，亦現在世。

諸過去世曾淨色相，彼於過去雖有淨相，而今現在如是次第種種不淨。諸現在世我之所有似淨色相，此淨色相於現在世雖有淨相，於未來世不當不淨如今現在外不淨色，無有是處。

字二、成就法性

我此色身，去來今世，曾如是相、當如是相、現如是相，不過如是不淨法性。

黃三、結

如是名為尋思彼時。

去來今世曾如是相等者：謂淨色相，名如是相應知。去來今世，雖有如是似淨色相，終當變壞，皆不超過不淨實性。

玄六、尋思理<sup>2</sup> 黃一、徵

云何名為尋思彼理？

黃二、釋<sup>4</sup> 字一、觀待道理<sup>2</sup> 宙一、釋<sup>2</sup> 洪一、約真俗辨<sup>2</sup> 荒一、辨相

謂作是思：若內若外都無有我、有情可得，或說為淨、或說不淨；唯有色

相、唯有身形，於中假想施設言論，謂之為淨、或為不淨。

荒二、引證

又如說言：壽煖及與識，若棄捨身時，離執持而臥，無所思如木。既死沒已，漸次變壞分位可知。謂青瘀等，乃至骨鎖。

離執持而臥者：謂不為阿賴耶識之所執受任持不壞故。

洪二、約因緣辨

今我此身，先業煩惱之所引發，父母不淨和合所生，糜飯等食之所增長。此因、此緣、此由藉故，雖暫時有諸淨色相似可了知，而內身中若內若外，於常常時，種種不淨皆悉充滿。

宙二、結

如是名依世俗、勝義及以因緣觀待道理尋思彼理。

如是名依世俗勝義等者：如說：若內若外都無有我、有情可得，或說為淨、或說不淨。此依勝義觀待道理尋思彼理。又說：唯有色相、唯有身



形，於中假想施設言論，謂之為淨、或為不淨。此依世俗觀待道理尋思彼理。又說：今我此身，先業煩惱之所引發，父母不淨和合所生，糜飯等食之所增長。此依因緣觀待道理尋思彼理。

宇二、作用道理<sup>2</sup> 宙一、釋

復作是思：於此不淨，若能如是善修、善習、善多修習，能斷欲貪。如是欲貪，定應當斷。

宙二、結

如是名依作用道理尋思彼理。

宇三、證成道理<sup>2</sup> 宙一、釋<sup>3</sup> 洪一、至教量

復作是思：如世尊說：若於不淨善修、善習、善多修習，能斷欲貪。是至教量。

洪二、現證量

我亦於內自能現見於諸不淨；如如作意思惟修習，如是如是令欲貪纏未生不

生，生已除遣。是現證量。

洪三、比度量

比度量法亦有可得。謂作是思：云何今者作意思惟能對治法，可於能治所緣境界煩惱當生？

宙二、結

如是名依證成道理尋思彼理。

作意思惟能對治法等者：作意思惟不淨法性，是名思惟能對治法。令彼貪纏未生不生，是名能治所緣境界煩惱當生。

宇四、法爾道理<sup>3</sup> 宙一、標

復作是思：如是之法成立法性、難思法性、安住法性。

宙二、釋

謂修不淨，能與欲貪作斷對治，不應思議、不應分別，唯應信解。

宙三、結

如是名依法爾道理尋思彼理。

地三、結

是名勤修不淨觀者，尋思六事差別所緣毗鉢舍那。

天二、慈愍所緣<sup>3</sup> 地一、徵

云何勤修慈愍觀者，尋思六事差別所緣毗鉢舍那？

地二、釋<sup>6</sup> 玄一、尋思義<sup>2</sup> 黃一、顯相

謂依慈愍增上正法聽聞受持增上力故，由欲利益安樂意樂，於諸有情作意與樂，發起勝解，是慈愍相。

黃二、結名

若能如是解了其義，如是名為於諸慈愍尋思其義。

玄二、尋思事<sup>2</sup> 黃一、舉品<sup>2</sup> 宇一、唯外攝

彼既如是解了義已，復能思擇：此為親品、此為怨品、此中庸品。是一切品，皆他相續之所攝故，於中發起外事勝解。

字二、通內外

又若親品，名為內事；怨、中庸品，名為外事。

黃二、結名

如是名為於諸慈愍尋思其事。

玄三、尋思相<sup>2</sup> 黃一、自相<sup>2</sup> 字一、顯義<sup>2</sup> 宙一、標

復能思擇：如是三品，若無苦樂欲求樂者，願彼得樂。

宙二、釋<sup>3</sup> 洪一、三品差別

今於此中，有饒益相，名為親品；不饒益相，名為怨品；俱相違相，名中庸品。

有饒益相名為親品等者：從彼獲得利益安樂，是名有饒益相。從彼遭受逼迫損惱，是名不饒益相。此中義顯實無有情三品可得，唯於其中假想施設，謂為親品，怨、中庸品，故作是釋。

洪二、求樂差別<sup>2</sup> 荒一、標

如是三品，若無苦樂欲求樂者，略有二種欲求樂心差別可得。

荒二、列

一者、欲求欲界諸樂；二者、欲求色界有喜勇悅諸樂；三者、欲求離喜諸樂。

洪三、與樂差別

如是若於欲樂匱乏，願彼皆得無罪欲樂。若於有喜、離喜諸樂有所匱乏，當知亦爾。

宇二、結名

是名尋思慈愍自相。

黃二、共相<sup>2</sup> 宇一、顯義<sup>4</sup> 宙一、標

復審思擇：若諸親品、若諸怨品、若中庸品，我於其中皆當發起相似性心、平等性心。

宙二、徵

何以故？

宙三、釋<sup>2</sup> 洪一、相似性心<sup>3</sup> 荒一、標

我若作意與親品樂，此未為難；於中庸品作意與樂，亦未甚難；若於怨品作意與樂，乃甚為難。我於怨品尚應作意願與其樂，何況親品及中庸品而不與樂。

荒二、徵

何以故？

荒三、釋

此中都無能罵、所罵、能瞋、所瞋、能弄、所弄、能打、所打，唯有音聲、唯有名字。

唯有音聲唯有名字者：自他差別，唯假安立，實無能罵、所罵，乃至能打、所打可得，是故能所亦假安立，唯有音聲、唯有名字。菩薩地說：菩薩於有怨害諸有情所，修習隨順唯法之想，乃至廣說。（陵本四十二卷七

頁<sup>3434</sup>）與此義同。

洪二、平等性心<sup>3</sup> 荒一、無常見<sup>2</sup> 日一、舉事

又我此身，隨所生起，有色羴重四大所造，隨所住處，便為如是觸所逼惱。略有二觸，謂音聲觸，及手足塊刀杖等觸。

日二、顯義

是身及觸皆是無常，能為如是不饒益者亦是無常。

又我此身隨所生起等者：此顯自身業果異熟。由於先世自造種種不淨業故，今受如是種種逼惱苦果。自業所作，非因於他，是故此說有色羴重四大所造。

荒二、苦見

又復一切有情之類，皆有生老病死等法，本性是苦；故我不應於本性苦諸有情上，更加其苦，而不與樂。

本性是苦者：諸行羴重，名本性苦。由能隨順生起一切煩惱及與眾苦故。

荒三、無怨品見<sup>3</sup> 日一、由應攝受

又亦不應不與怨家作善知識、不攝一切有情之類以為自體。

日二、由互繫屬<sup>2</sup> 月一、引教

又世尊言：我不觀見如是種類有情可得。無始世來經歷生死，長時流轉，不互相為或父、或母、兄弟、姊妹，若軌範師，若親教師，若餘尊重、似尊重者。

月二、證成

由是因緣，一切怨品無不皆是我之親品。

日三、由不決定<sup>3</sup> 月一、標

又怨、親品，無有決定真實可得。

月二、徵

何以故？

月三、釋

親品餘時轉成怨品，怨品餘時轉成親品，是故一切無有決定。



宙四、結

故我今者，應於一切有情之類，皆當發起平等性心、平等性見；及起相似利益意樂、安樂意樂與樂勝解。

宇二、結名

是名尋思慈愍共相。

玄四、尋思品<sup>2</sup> 黃一、顯義<sup>2</sup> 宇一、黑品攝

復審思擇：我若於彼不饒益者發生瞋恚，便為顛倒，黑品所攝，是有諍法，廣說如前。

宇二、白品攝

我若於彼不起瞋恚，便無顛倒，白品所攝，是無諍法，廣說如前。

黃二、結名

如是名為尋思慈愍黑品、白品。

玄五、尋思時<sup>2</sup> 黃一、顯義

復審思擇：諸過去世求欲得樂有情之類，彼皆過去，我當云何能與其樂？諸現在世有情之類，我今願彼盡未來世，於一切時常受快樂。

黃二、結名

是名尋思諸慈愍時。

玄六、尋思理<sup>4</sup> 黃一、觀待道理<sup>2</sup> 字一、釋<sup>2</sup> 宙一、約真俗辨

復審思擇：此中都無我及有情，或求樂者、或與樂者；唯有諸蘊、唯有諸行，於中假想施設言論，此求樂者、此與樂者。

宙二、約因緣辨

又彼諸行，業煩惱等以為因緣。

字二、結

如是名依觀待道理尋思慈愍。

業煩惱等以為因緣者：此中等言，等取自種子，準下界差別觀說義應知。

黃二、作用道理

若於慈愍善修、善習、善多修習，能斷瞋恚。如是名依作用道理尋思慈愍。

黃三、證成道理

如是之義，有至教量；我內智見現轉可得；比度量法，亦有可得。如是名依證成道理尋思慈愍。

黃四、法爾道理

又即此法成立法性、難思法性、安住法性。謂修慈愍能斷瞋恚，不應思議、不應分別，應生勝解。如是名依法爾道理尋思慈愍。

地三、結

是名勤修慈愍觀者，尋思六事差別所緣毗鉢舍那。

瑜伽師地論科句披尋記卷第三十

